

**МАМАТҚУЛ ҲАЗРАТҚУЛОВ**

# **КҮККҮЛ**

*Хикоялар, қиссалар*

«ШАРҚ» НАШРИЁТ-МАТБАА  
АКЦИЯДОРЛИК КОМПАНИЯСИ  
БОШ ТАҲРИРИЯТИ  
ТОШКЕНТ — 2005

## Ҳазратқұлов Маматқұл

Күккүл: Ҳикоялар ва қиссалар.— Т.: «Шарқ», 2005.— 352 б.

Севги ва садоқат, мұхаббәт ва вафо, ишонч ва зътиқод, самимият ва эзгулик... Йысоналарни, айниқса ёшларни бир бирига болайтын түйгулар.

Езувчи Маматқұл Ҳазратқұловнинг ушбу китобидан жой олган қисса ва ҳикоялар қаҳрамонлари ана шу пок ва эзгу түйгуларни сақлаш, шунға муносиб бўлиш учун интиладилар. Зеро, мұхаббати кучли одам ҳамиша олийжаноб ишларга қўл уради, хоинлик, но-покликдан ҳазар қиласди.

Азиз китобхон! Китоб қаҳрамонлари Сизнинг қадрдонингизга, дилкаш сұхбатдошингизга айланади, деган умиддамиз...

ББК. 84(5У)6

© «Шарқ» нашриёт-матбаа акциядорлик компанияси  
Бош таҳририяти, 2005.

# **ҲИҚОЯЛАР**

## ЧҮЛИ ИРОҚ

Мұхаббат эрини үйротмоқчи бўлиб уйга кирди-ю, мириқиб ухлаёттанини кўриб фикридан қайтди. Ширин уйқусини бузгиси келмади. Астагина стулга ўтиради. Бахтиёр худди ёш боладек пиш-пиш қилиб беозор ухларди. Унинг ораси очиқ қалин қошлари пирпираб қўяди. Мұхаббат эрининг қошларига термулиб, ўйлади: «Мунча ораси очиқ. Эскиларнинг гапида ҳикмат кўп. Қошларининг ораси очиқ йигитлар узоқдан уйланади, уларнинг кўнгли ҳам очиқ бўлади, деганлари рост экан. Бўлмаса, бу киши қаёқда эдию, мен қаёқда эдим. Етти ухлаб тушимга кирмаган... У-чи? У ўйлабдими менга уйланишни?»

Уларнинг тўйи ўттанига эндиғина бир ой бўлди. Тўйдан олдин бир-бирига жуда яқин, сирдош эдилар, ҳатто тортинмас, унча-мунча гапларни бемалол айтишарди. Никоҳ кунидан бошлаб иккаласининг ҳам кўнглида ғалати бир кайфият туғилди. Бир-бирига кўринмас иплар билан чамбарчас боғланганини ҳис қилганлари сари уялиш, тортиниш туйғулари жўш уради. Ёлиз қолган кезлари куёвнинг ҳам, келиннинг ҳам тилига сўз келмас, гўё бир-бировини энди кўраёттандай жим ўтиришади. Онда-сонда айтиладиган гаплари ўзларига ҳам эриш туюлади. Қизик, нега шундай экан? Тўйдан олдин эса иккови икки ёқда қачон бирга бўлишни, мириқиб сўхбатлашишни, бир-бирининг дийдорига қонишни орзу қиласади. Висол онларида бири кўйиб, иккинчиси гапга тушарди. «Севасизми?». «Севаман». «Сиз-чи?». «Мен ҳам». Шу каби бир хил сўзлар қайта-қайта такрорланар, аммо на йигитнинг, на қизнинг ғашига тегмас, аксинча, яна эшитгиси, яна сўрагиси, яна эшитгиси келарди.

Энди-чи? Қизик, нега энди бунақа? Йўқ, улар бир-бирига тўйиб қолгани йўқ! Ошиқ-маъшуклик йўриги бўлак экан. Унда бирга бўлишларига қанчалик ишон-

салар-да, бари бир ҳали амалга ошмаган ширин орзу эди бу. «Ютганим ўзимники, чайнаганим гумон», деган гап бор. Никоҳ бу гапни уларнинг кўнгилларидан чиқариб ташлади. Йўқ, ўзаро қандайдир «ётсираб» қолиши бунданмас. Улар ҳамон бир-бирига ташна, ҳамон интиқ. Фақат эндиғиси бўлакча... Никоҳ ҳар кимнинг ҳам ҳаётини бошқа изга соларкан. Негадир одам ўзини салобатли, вазмин сезиб қоларкан. Олдинги шўхликлар, ҳазил-ҳузуллар энди...

Мұҳаббат эрининг юзларини, сочини оҳиста силай бошлиди. Бахтиёр кўзини очди. Юзлари сутта чайилгандай оппоқ, шунданми, қош-кўзлари яна ҳам қора-роқ кўринган фариштасифат Мұҳаббат ўтирипти. Унинг ипақдек майин қўллари Бахтиёрнинг силлиқ юзларини силади. Бир тутам қуёш ёғуси саҳнадаги балеринани қувлаб юрган пројектор нуридек унинг юзига тушиб турибди. Келин-куёв бир-бирига унсиз узоқ термулди. Кейин кўзлар бир-бирига яқинлашди, яна ва яна яқинлашди...

Мұҳаббат оҳиста бошини кўтарди. Унинг юзлари лоладек қизарип кетган. Эрининг кўзларидан кўзини олиб қочиб, унинг юзига астагина шапатилади. Бу шапатининг таъсирини на куёв сезди, на келин.

— Ёмонсиз, — деди Мұҳаббат.

— Сен яххисан, — деди Бахтиёр.

Иккаласи ҳам унсиз жилмайишиди.

— Турмайсизми энди.

— Ҳали вақтли шекилли... Бугун дам олиш-ку.

— Шундай бўлсаям-да... Битта-яримта келиб қолиши мумкин.

— Ким ҳам келарди? Ҳамма ўз иши билан овора ҳозир.

— Билиб бўладими? Ахир ҳар якшанба кимдир келади-ку, эсингиздан чиқдими, — деди Мұҳаббат кулиб. Чиндан ҳам тўйларидан кейин уларнига ҳар дам олишда бирор келарди. Гоҳ келиннинг уругларидан, гоҳ куёвнинг қариндошларидан, ёки уларнинг тўйига келолмаган дўстлари муборакбод этгани келишарди. Шунга уларнинг ўзи ҳам кўнишиб қолишган, бирор якшанба меҳмон келмаса, нимадир етишмаётгандай туюларди.

— Ҳа-я, рост айтасан. Саккиз яримнинг концертими? Ёз қизиқ-да, соат саккизда чошгоҳ бўлиб кетган-дек кўринади. Қишда шу пайтда тонг отмаган бўларди ҳали.

«Энди Турғун Алиматов ижросида сатода «Чўли ироқ»ни тингланг». Дикторнинг эълони Муҳаббатнинг диққатини тортди.

— Тўхтанг, Бахтиёр ака, эшитайлик шу куйни. Жуда яхши чалади-да.

Сато тилга кирди. Бахтиёр шифтта термулиб ётар, Муҳаббат эрининг найзадек ўткир, узун ва қалин киприклари қуршаб олган жуда тиник, ҳаётидан манмунлик сезилиб турган чақноқ кўзларидан нигоҳини узмайди, аммо хаёли паришон. Сато торлари инграр, гоҳ ҳазин, гоҳ баланд пардада нола қиласди. Гоҳо нафаси етмай қолиб, дами ичига тушиб кетгандай, бир сония жим бўлиб қолар, лекин орқада — худди тоғлар акс садо қайтаргандай унинг ноласи зириллаб турарди. Мусиқа гўё аста-секин киши юрагига кириб борар, унинг пардасини ҳозир... ҳозир йиртиб юборгудай бўларди.

Муҳаббат ўзини тамоман йўқотиб қўйган, юраги ёниб адо бўлаётган шам мисоли титраётганини сезмасди. У ҳали умрида ҳеч кўрмаган жойларни ҳозир шу тобда ҳаёл кўзлари билан яққол кўриб турарди: Ана, поёнсиз сахро, қум, қум... Иссиқдан оёқ куяди. Карвон кетидан бораётган ўн етти яшар соҳибжамол қизнинг мадори қуриган. Тили танглайига ёпишади. У бор кучини тўплаб «сув» демоқчи бўлади, лекин тили айланмайди, у жуда оғир, худди шишиб кетгандай. Атрофда бирон жонзот йўқ. Олдинда кетаётган нортуя бўйнидаги қўнгироқнинг майин, юракни эзувчи саси келади қулоққа. Сахро — нон ёпишдан олдин оқартирилган тандир. Бу тандирга бордию илоҳий қудрат бир томчи сув ташласа, киприк қоққунча ўтган фурсатда қуриб қолади. Туя арқонига боғланганича бораётган гўзалнинг оппоқ юzlари иссиқнинг зўридан бўғриқиб кетган, тўқ жигарранг тусга кирган. Энди лоақал кўзини очишга ҳам қуввати етмайди.

Тонгги шабнамдек беғубор бу гўзални тақдир қаёқларга олиб кетмоқда? Уни кимларнинг шафқатсиз

панжаси остига ташлайди. Буни ким билади? Ҳеч ким! Ҳеч ким!

О, шўрлик қиз! Не кўргиликлар бор сенинг бошинг-да! Қандай жафолар кутмоқда сени. Мадорсизлик, ташналиқ қизнинг ҳаёлларини алғов-далғов қилиб юборади. «Қачон етамиз? Қаерга борамиз? Муштипар онам, дасти калта отам! Қайларда қолдингиз?..» Лекин буни ҳеч ким билмайди, унинг қисмати оғир, йўли йироқ. Жуда йироқ... қум, қум, қум...

Куй ўтмишдаги ана шу ғам-ғусса ҳақида сўзламоқчи бўлади, лекин гапиролмай йиглайди. Бу ғамни ҳатто сато торлари ҳам кўтаролмай ўпкаси тўлиб кетади. Инграб, эзилиб йиглайди, йиглайди. Бахтиёрнинг юзига иссик бир томчи тушди. У шарт хотинига қаради.

Мұхаббатнинг хиёл қисик, аммо ҳар қандай юракни бир кўришдаёқ ўртовчи тимқора кўзларига ёш тўлган, киприклири орасидан сизиб чиқарди.

— Сенга нима бўлди, Мұхаббат?

Мұхаббат ёшли кўзларини жавдиратиб эрига термулди-ю, индамади, гапирмади.

— Сенга айтаяпман? Нима гап ўзи? — Бу сафар Бахтиёрнинг овозида бир ўқтамлик зоҳир эди.

Мұхаббат чукур хўрсинди.

— Куйи шундай бўлса ғамнинг ўзига

Қандай чидай олган экан одамзот?!

— Қўйсанг-чи, азизам, ҳар куй эшиттанингда бунақа эзилаверсанг, ўзингни ўзинг адо қиласан-ку.

— Йўқ, Бахтиёр ака, — Мұхаббат эрининг сочларини меҳр билан силади, — ҳамма куйга ҳам йиглайвермайман. Биласиз-ку, «Чўли ироқ»ни яхши кўраман. Шу куйни эшитишга ўзимнинг ҳам юрагим йўқ, безиллаб қолганман. Лекин чалганда ўчириб қўёлмайман, эшитмай туриб кетолмайман, журъатим етмайди.

— Бўлди! — Бахтиёр чаққон сакраб турди ўрнидан. — Одам деган бунақа пессимист бўлмайди. Ярашмайди! Қани, чой-пойингни олиб кел!

Бу — Бахтиёрнинг хотинига бошқа эрқаклар каби буйруқ оҳангига илк гапириши. Буни Мұхаббат ҳам сезди, лекин у қадар эътибор бермади. Қачондир, бир кун бориб шундай бўлишини биларди.

Ўша куйи кечгача Бахтиёрнинг чиройи очилмади, кўнгли ғаш бўлиб юрди. Муҳаббатнинг йиғлагани сабабини ўзича таҳдил қилас, турли ҳаёлларга борарди. «Нега бунча эзииди у? Йигидан ўзини тутолмади. Нега? Хўш, куйни яхши кўрса нима бўлибди? Мен ёмон кўраманми? Ёки шунчалик тошбагирманми? Йўқ! Куйни яхши кўрган одамнинг ҳаммасиям йиғлайвермайди-ку. Бирон сабаб борки, йиғлайди, эзилади шунчалик. Эҳтимол, шу куй билан боғлиқ бир гап бордир? Албатта, менга айтармиди...» У ўйлаган сари хаёлига турфа фикрлар келар, гўё излаган нарсасини ҳозир топадигандек туюларди: «Балки ҳув анави гапи бекоргамасдир: «Қандайдир бир ашулачими-ей, созандами-ей менга уйланмоқчи бўлиб юрарди. Лекин ота-онам унга икки дунёда ҳам бермасди. Ўзим-ку ўлдирса ҳам тегмасдим». Эҳтимол, бу билан қўрқсан олдин мушт кўтарар қилгандир. Ҳарқалай бир гап бор. Ўзи эрталаб, ўрнимдан турмасимдан келиб эркаланишидан юрагим шифилловди-я. Хотин киши ё ёмон туш кўриб чиқса, ёки ҳаром йўлга қадам қўйса, ҳеч бўлмаса олдинги жазманини ўйлаб юраги сикилса, эрини эркалашга, унга суйкалишга тушади, дейишарди. Шу гап ростга ўхшайди. Шамол бўлмаса дарахтнинг учи қимирламайди. Одамлар минг йиллик тажрибаларидан кейин бир холосага келадилар.

Бу фикрлар Бахтиёрнинг ичини сичқондек кеми-рар, юраги гупиллаб уради. «Хотин зотининг энг соддаси ҳам айёрикда тулкига дарс беради». Буларни ўйлаган сари қайсиdir ўртоғидан эшигтан ана шу гап ёдига келар ва унга ўзини ўзи ишонтиради.

Бахтиёр важоҳатини босолмади. Ҳозир хотинини чақириб, очиқ-ойдин гаплашиб олмоқчи бўлди. «Темирни қизифида босган маъқул».

— Муҳаббат!

Ошхонадан Муҳаббатнинг овози эшитилди.

— Лаббай.

— Менга қара... Бүёққа кел!

Муҳаббат кирди. У пешбанд тутиб олган, қия қилиб ўралган ялтироқ рўмоли ярашиб турарди. Муҳаббатнинг ёноқлари иссиқдан қизариб кетган, қайрилма

қошлари қалдирғоч қанотидек ингичка, қуралай кўзлари ўтдек ёниб турарди. Рўмоли остидан тошиб чиқ-қан қоп-қора соchlари оппоқ бўйнида эркаланиб ётарди. Қоронғу жойдан бирдан ёруққа чиқса одамнинг кўзи қамашади. Бахтиёр ҳам шундай ҳолга туҳди. У ҳозиргина ўтин чўғидек ёниб, куйиб турувди. Муҳаббат билан юзма-юз бўлди-ю, кўзи жимиirlаб, дами ичига тушиб кетди.

О, гўзаллик! Сенинг олдингда кимлар тиз чўкмаган! Не-не баҳодиру паҳлавонларни лол қолдирмагансан? Сенинг меҳру сеҳрингта не-не азаматлар асир бўлмаган!

— Чакирдингизми? — Муҳаббатнинг табассуми Бахтиёр қалбидағи алангага сув сепди. У хотинига қараб туриб симобдек эриб кетди.

— Ҳа, чақирудим. Гугурт борми?  
— Гугурт, ҳа, бор. Мана, — у пешбандиниг чўнта-гидан олиб берди.  
— Раҳмат...

\* \* \*

— Бахтиёр уйга келса, Муҳаббат йиглаб ўтирибди.  
— Яна нима бўлди?  
— Ҳеч нима. Ўзим шундай.  
— Яширма мендан, бари бир билиб оламан. Кейин хафа бўласан.  
— Нимани яшираман сиздан, Бахтиёр ака. Эшитяпсизми, музика, «Чўли ироқ».

Бахтиёр баттар тутоқди.  
— Эшитаяпман. Шунинг учун сўраяпман. Хўш, «Чўли ироқ»ни яхши кўрсанг нима бўпти? Шунга йиглайсанми? Ахир бир марта бўлмаса, икки марта бўлмаса... Ҳар доим шу аҳвол. Турмуш қурганимизга бир йил бўляяпти-ю ҳамон ўша куйни эшитсанг йиглайсан. Бўлди-да, энди.  
— Турмуш қуришимизнинг нима алоқаси бор бунга. Илгари ҳам шунаقا эди. Бундан кейин ҳам...  
— Демак... куй замираida кимдир бор. уни эшиттагингда ўшани эслайсан... «Чўли ироқ» яхши куй эмиш. Билдик яхшилигини...

— Бахтиёр aka! Нималар деяпсиз? Наҳотки... наҳотки мени...

Мұхаббат ўзини Бахтиёрнинг кўксига отди.

— Алдама мени. Лақиллатаман деб ўйлама. Сен ўйлаган лақмалардан эмасман.

Мұхаббат кўзларида ғилт-ғилт ёш билан эрига термулди.

— Ўтинаман сиздан, бунақа фикрларни хаёлингиздан чиқариб ташланг. Ахир бу мен учун ҳақорат-ку. Сиздан бўлак бирон киши ақалли қўлимни ушлаган бўлса, тил тортмай ўлай!

— Қасам ичма!

— Ишонмасангиз нима қилай ахир? Ҳеч нарсани, ҳеч кимни эсламайман. Билмадим, нимага ундай? Шу куйни эшитсан юрагим сиқилиб, йиғлагим келаверади...

— Бўлди. Бас қил қуй-пуйингни.

Мұхаббат пик-пик йиглар, ўзини босмоқчи бўлгани сари баттар ўпкаси тўлиб келарди. Бахтиёр айвонга чиқди-да, сигарет тутатди.

\* \* \*

Куни билан Бахтиёрнинг кайфияти бўлмади. Юраги хижил, кўнгли хира. Бошлиғидан эшиттан дашноми ярага туз сепгандай бўлди. Ишхонадан эртароқ чиқдида, буфетта бурилди. Одатига қарши у ердан бир стакан арақ олиб ичди. Газак ҳам қилмади.

Уйга келса хотини ҳали ишдан қайтмабди. Қоронғи тушиш палласини — фира-ширани ёқтирмасди у, юраги сиқилиб кетади. Шунинг учун ҳовлида ўтиrolмади. Ичкари кириб ечинмасданоқ каравотга чўзилди. Ётган жойида сигарет тутатди.

Радиода концерт бўлаяпти. «Энди «Чўли ироқ»ни тингланг». Бахтиёр радиони ўчирмоқчи, сугуриб олиб ҳовлига ирғитмоқчи бўлди. Лекин қандайдир куч, иРОДА уни бу фикридан қайтарди.» Радиода, куйда нима айб. Ўчирганим билан...» Сигаретни босиб-босиб тортаркан, куйнинг сеҳрли тўрига илиниб қолганини — берилиб тинглаётганини ўзи ҳам сезмасди. Сатодан таралаётган мунгли куйни сигарет тутунига қўшиб ичи-

га ютаётгандай, бу оҳанг юрак пардаларини зирилла-  
таётгандек бўлди. Энди куй садолари ичидан эшити-  
лаётгандай туюлди.

О, сехрли куй! Неча асрлардан буён қанча-қанча  
одамларнинг юрагини зирқиратасан? Не-не тошбагир-  
ларни мумдай эритмадинг! О, буюк халқ! Она халқим!  
Сенинг бетимсол даҳонгта таъзим! Минг бор тасанно!  
Шу куйларинг, шу сехркор мўъжизаларинг бўлмаган-  
да, фарзандларинг ҳам шу қадар мулоийм, одамохун,  
бағри кенг бўлармиди! Минг бор қуллуқ сенга, она  
халқим!

Куйнинг кўз илғамас тўри Бахтиёрни маҳкамроқ  
сиқиб бораради. У нигоҳини бир нуқтадан олмай туб-  
сиз ўйга гарқ бўлди. Китобларда ўқигани, киноларда  
кўргани, раҳматлик бувасидан эшитганлари — ўтмиш,  
ғамли, аламли ўтмиш кўз олдига келди. Куй ўша узоқ  
мозий ҳақида, унинг юракларни силқитувчи дардлари  
ҳақида йиғлаб, фарёд солиб ҳикоя қиласади. Олисдан,  
жуда олисдан кимнингдир нолакор, аммо шиддатли,  
исёнкор, мардона овози чалинди қулоғига:

*Баски қўйдим мен фалакнинг елкасига ғам юкин,  
Кийди мотам тўнинию, бўлди қадди ҳам дуто.*

Эшик қарс очилиб Муҳаббат кирди. Чирокни ёқди.  
У эрининг бу аҳволда ёттанини кўриб қўрқиб кетди.

— Сизга нима бўлди?

Бахтиёр гапирмади. Фақат «жим» дегандек қўлинни  
кўтарди-да, радиога ишора қилди. Шундагина Муҳаб-  
бат куйни эшитди. У эрига қаради. Қаради-ю унинг  
кўзларида электр нурида ялтираб турган ёш томчилар-  
ини кўрди. Бу ҳол уни ҳайкалдек қотириб қўйди.  
Куй тинди.

— Сизга ярашмас экан,— деди Муҳаббат оғир тин  
олиб. Бахтиёр индамай ўрнидан турди. Секин келиб  
хотинини қучоқлади. Юз-кўзларидан ўпди. Бу бўса-  
лар Муҳаббатга ҳаммасидан — тўйдан олдинги ўғрин-  
ча бўсалардан ҳам қайнокрок, меҳрлироқ туюлди.

1977 йил.

## СЕВГИ СОЗИ

*Ва шаббода қурғур илк саҳар*

*Олиб кетди гулнинг томини.*

*Ҳамид Олимжон*

Келишилган вақтдан ҳам ўн беш дақиқа ўтди. Нега келмаяпти? Узоқ эмас, ана ишхонаси.

Нигоранинг юраги ғашланади. Бекатнинг одам камроқ томонига ўтди. Қулоқнинг пардасини йиртгудек момақалдироқ гумбурлади. Ҳозиргина чараклаб турган қуёш юзини булат қоплади. Нигора соатига қаради: етти ярим. Унинг кўксидаги нимадир узилгандай чим этди. Юрак уриши тезлашди. Бир жойда туролмади, секин у ёқдан бу ёққа юра бошлади. «Ишхонасига кириб чиқсаммикан. Тинчликмикан ишқилиб?.. Икки соатча бурун ўзи телефон қилди-ку. Тўй масаласини гаплашиб оламиз, деди. Энди эса... қўнғироқ қиласман...» У телефон-автомат томон юрди.

- Ало, Фарҳод ака...
- «Нима»?
- Нега чиқмаяпсиз?
- «Вақт йўқ!».
- Вақт йўқ? Нега, ахир...
- «Вой мунча чўздингиз гапни. Вақт йўқ, дедимку. Ўртоқларим кеп қолишди».
- Шуни шундоқ чиқиб айтиб қўйсангиз бўлардику. Бугун тўй масаласини...
- «Хотин зотини эзмалигини ёқтирмайман-да. Бунча ҳовлиқмасангиз! Бир кун бўлади-да шу тўй. Тўйсираб қолмасангиз бунчача!.. Бошқа куни гаплашамиз, хайр!».

Телефон дастагини илгакка осдими-йўқми — билмайди. Унинг хаёллари пардай тўзғиди. Сумкасини қўлтиғига қисганча бир-бир босиб борар, қаёққа кетаётганини ўзи ҳам билмас эди.

Чақмоқ чақди. Нигора чўчиб тушди. Бирдан ён-атрофига алантади, хаёлинни йигиштириб олди. «Қаёққа

кетаяпман, кимнинг олдига боряпман?» Хиёбон четидаги скамейкага ўтирди. Ҳозиргина рўй берган воқеалар тушидами-ўнгидами кечганини бир лаҳза англай олмай қолди. Еру-осмон қоп-қора тус олди. Нигора ўрнидан турмоқчи бўлди, аммо туролмади, узоқ ётган бемордек ҳолсиз, мадорсиз эди. Фарҳодни, у билан илк танишганини, учрашувларини эслади. Қандай бахтиёр дамлар эди. Наҳотки, уларнинг ҳаммаси энди ўтмишга айланса. Унинг шунча гаплари, шунча ваъдлари ёлғонми? Одамзот шунчалар субутсиз бўладими? Яна йигит киши-я! Наҳотки? Ҳар гал учрашганимизда хаёл қиласиган орзуларимиз, ниятларимиз пучмили? Шунча орзу-ҳавасларни, ваъдаларни фақат ўзининг қабиҳ ниятига етиш учун қилганми? Шу қадар пастликка, тубанликка борадими? Ёки ўзим шунчалар гўл, овсарманми? Унинг сўзлари ёлғон, ваъдалари пуч эканига ақдим етмадими, лаққа тушдимми? Бу мумкин эмас! Фарҳод aka унақамас... У ҳолда бугун нега унақа қилди? Ўзи чақириб, ўзи чиқмади. Ўртоқлари келса нима қипти. Учрашадиган жойимиз шундоқ бурнининг остида эди-ку. Чиқиб шунақа бўп қолди, деса ёқасидан олармидим... Неччи ойдан бери ана совчи боради, мана совчи боради, деб келади. Йўқ, бу ерда бир гап бор... «Хотинларнинг эзмалигини ёмон кўраман, бунча тўйсираб қолдингиз...» Нима дегани бу? Хотин! Ахир мени... У ўкириб йиглаб юборди, ўзини тутолмади. Юз-кўзларини рўмолчаси билан беркитиб йиглар, бутун вужуди қалт-қалт титрар эди. Йиглаган сари ичидан алам, ўртаниш бостириб келар, бу туйгулар кўз ёшларига айланиб сизиб чиқар эди...

Январнинг ўрталари. Ҳали кўчалардан, трамвай-троллейбуслардан янги йил шиорлари олинмаган. Дўконларнинг ойналаридағи совға кўтарган қорбобо расмига болалар ҳавас билан термулишади. Одамларнинг кайфиятини ҳам байрам руҳи тарк этгани йўқ.

Нигора учрашувга сал кечикиб келди.

— Қизларнинг одати йигитларни куттириш эканда,— деди Фарҳод жилмайиб. — Яна бироз келмасангиз музлаб қолардим.

— Ҳечқиси йўқ. Сиз унча-мунчага музламайсиз, Борди-ю музласангиз ўзим эритиб оламан.

— Мени эритишга нафасингиз етармикан?

Нигора ҳам бўш келмади.

— Шу қадар қаттиқ эмасдирсиз.

Кулишди.

— Йўқ, унчалик қаттиқ эмасман,— деди Фарҳод қўли-даги тўрхалтага ишора қилиб. — Мана эриб келдим.

— Нима ҳаракат?

— Биласизми, Нигорахон, бир таклиф бор. Йўқ деманг.

— Қани, аввал эшитайлик.

— Совуқни кўриб турибсиз. Бу совуқда киноям унча ёқмайди. Хўп десангиз бир жойга борамиз.

— Қаерга, билсак бўладими?

— Менинг бир ўртоғим бор...

— Туғилган кунгами?

— Бердисини айтгунча уриб ўлдирманг. Ўша ўртоғим уйининг қалитини менга бериб кетган. Ҳар замонда хабар олиб турарсан деб. Ўзи Москвага кетган, иш билан. Ҳеч ким йўқ, икковимиз гаплашиб ўтирамиз. Музика қўямыз. Майда-чуйда олганман, сиз овқат пиширасиз. Қани кўрайлик-чи, қанақа пазанда экан-сиз.

Нигора майин жилмайди:

— Мени синаб кўрмоқчимисиз?

— Синовмас-ку, ҳар ҳолда...

— Менимча, бу синовингиздан қийналмай ўтсам керак.

— Кетдикми?

— Қандай бўлар экан?

— Қандайи борми, жуда яхши бўлади-да, иссиққина уйда суҳбатлашиб ўтирганга нима етсин.

— Негадир оёғим тортмаяпти.

Фарҳод унинг қўлтиридан одди.

— Қўйсангиз-чи, шунаقا эскича гапларни. Ким айтиди сизни замонавий қиз деб.

— Бироннинг уйига бориб ўтириш... Эгаси йўқ,... қандайдир ғалатида.

— Юринг-юринг,— деди Фарҳод уни олдинга бошлиб, — бирор эмас, ўз уйимдек гап. Бўлмаса менга қалитини ишониб бериб кетармиди. Ёки гапимга ишонмаяпсизми? — У чўнтағидан қалит олиб кўрсатди.

— Мана...

Ўртоғининг уйи Қорақамишда экан. Тўртингчи қаватда, уч хонали. Жиҳозлар, буюмлар чет элники, қимматбаҳо, хоналар ҳашамдор.

— Ўртоғингиз яхши турар экан. Бирга ишлайсиз-ларми?

— Узумини енгу богини сўраманг, Нигорахон. — Фарҳод тўрхалтадаги нарсаларни олиб столга қўя бошлиди. — Бошқа жойда ишлайди. Бизнинг маошларга қаноат қиладиганлардан эмас бу...

Нигора уйни кўздан кечирапкан сўради:

— Бола-чақаси қаерга кетган?

— Қизиқсиз-а, Нигорахон. Унинг бола-чақаси... йўқ, чақаси бор, боласи йўқ.

— Нега? — ҳайрон қолди Нигора. — Уч хонали уйда ёллиз ўзи турадими?

— Оббо, сизни боғчада тарбиячи десам, туппа-тузук терговчи ҳам экансиз-ку. Болалари бор эди, ҳозир йўқ. Хотини кетиб қолган. Ундан кейин, йўлини топган одам битта ўзи уч хонали эмас, тўрт хонали уй ҳам олаверади. Оғайним ана шунаقا йўлини биладиганлардан.

Нигоранинг юрагига аллақандай шубҳа соя ташлади. «Сен дўстинг кимлигини айт, мен сенинг кимлигингни айтиб бераман. Наҳотки? Йўғ-э, ундан бўлиши мумкин эмас...» У зимдан Фарҳодни кузатди. Йигит чаққонлик билан масаллиқ тайёрлар эди.

— Хўш, Нигорахон, нима овқат ясаймиз? Тергов тугади шекилли...

Нигора индамади. Оҳиста бориб радиоприёмник қулогини буради. Концерт бўлаётган экан:

*Сен сози мұхаббатсан, гулшанда гули раъно,  
Ишқингни кўча-кўйда юргувчи гаго қилма...*

Иккови биргалашиб димлама пиширишди. Фарҳод конъякни очди.

— Мен ичмайман, Фарҳод ака.

— Озгина-озгинадан.

— Барибир.

— Ҳуванави куни ичувдингиз-ку.

— Унда турилган кунингиз бўлгани учун озгина ичувдим.

— Бугун ҳам жиндаккина, кўп эмас. Бусиз ғалати, нимадир етишмаёттандай кўринади. — Конъяк тўлдирилган билур қадаҳни Нигорага узатди. — Қани, олинг. Сизнинг соғлифингиз учун!..

Аста-секин қадаҳлар бўшади. Гап-гапга қовушди, қулфи диллар очилди. Юзлар лола рангини олди. Қайноқ бўсалар газак ўрнига ўтди. Бир-биридан ширин орзулар, хаёллар. Уларнинг чеки-чегараси йўқ. Тўйдан кейинги саёҳатлар... Улар ҳозир бетон уйнинг тўртинчи қаватида эмас, осмону фалакда, паркү булувлар устида, турфа орзулар оғушида эдилар.

Дунёда улардан баҳтли, улардан шод одам йўқ, эди гўё...

Нигора ўрнидан туриб соchlарини тўғрилади. У йигитта қарай олмасди. Фарҳод ичкилик, севгидан сархуш.

— Энди нима бўлади? — Нигоранинг овози титраб чиқди. Йигит индамади. Қиз аста ортига ўтирилиб, унга қаради. Фарҳод нигоҳини бир нуқтага қадаганча миқ этмай ётарди. Унинг бу қадар бамайлихотирлиги қизнинг дилига шубҳа солди. У саволини яна такрорлади.

— Нима бўлади энди?

Фарҳод жойидан туриб ўтирди:

— Ҳеч нарса,— Негадир унинг товуши ҳиссиз, туйгусиз эштилди. — Эртами-кечми, барибир бир кун бўладиган иш-да.

— Лекин ҳар ишнинг вақти-соати бор.

— Вақти-соати бугун экан-да,— деди Фарҳод илжайиб.

— Бутун эмас эди...

— Нима, менга ишонмайсизми? Бўлмаса нега рози...

Нигора ялт этиб Фарҳодга қаради. Унинг бу қарашида ҳайрат, ажабланиш, савол, айни чоғда нафрат мужассам эди.

— Фарҳод ака?!

Фарҳод қизнинг соchlари ёйилиб турган елкасидан кучди.

— Ҳазиллашяпман, жоним.

Қиз турган кўйи:

— Бу ерга олиб келишдан мақсадингиз шумиди?!

Юрагим бир балони сезган эди-я.

— Қалбинга қулоқ сол, деб бекорга айтишмагандা.

Қиз йигитнинг қўлларини силтаб ташлади:

— Уялмайсизми?

— Асабийлашманг, азизим. Бу гаплар ҳазил. Сал кунлар илисин, совчилар боришиди. Баҳорда тўй қиласиз. Ҳавотир олманг, ҳаммаси изига тушади.

Ўша гапга ҳам тўрт ой бўлди. Ҳамон совчилардан дарак йўқ. Қайтанга муомаласи ўзгариб бормоқда. Батьсан учрашувга ҳам келмайди, кейин турли баҳоналар топади. Олдинги ширинсуханлик йўқ, орзу қилишлар, хаёл суришлар камайган. Нигора Фарҳод билан ўтказган дамларини бирма-бир таҳлил қила бошлади. Унинг ҳар бир ҳаракатидан, гап-сўзларидан сунъийлик, ясамалик қидира кетди. Нега шу пайттacha эътибор бермадим? Одамнинг боши тошга теккандан сўнг кўзи очилар экан-да... Бутун бунаقا муомала. Муддаоси нима? Наҳотки, мени лақиллатиб юрган бўлса?

Нигора ўзи билан ўзи олишар, томчилаеттган ёмғирга ҳам эътибор бермас эди.

Оғир хўрсиниб ўрнидан турди. Ҳали вақт эрта эсада, ҳаво айнигани учун қоронғу тушиб қолди. Нега боя индамадим? Шартта олдига кириб бориб, очикравшан гаплашиб олсам бўларди-ку. Ниятингиз нима, деб сўрасам еб қўярмиди. Ўзим ўлгудай ланж, кўнглим бўш-да.

Ёмғир кучайди. Ҳаш-паш дегунча усти ҳўл бўлди.- «Тезроқ уйга кетиш керак...» Бекатнинг соябони остида ёмғирдан паналади. Совуқданми, аламданми дар-дағ титради. Икки кўзи автобус йўлида, лекин онда-сонда ўтиб қоладиган енгил машиналарни ҳисобга олмаганди, кўча жим-жит. Ҳатто қўрқинчли. Нигора нима қиласини билмай қолди. «Нариги кўчага ўтайчи, балки у ердан такси-пакси топилар».

Кўчани кесиб ўтаёттган эди, бир машина олдига келиб қаттиқ тормоз берди. Фидиракларининг чийиллаганидан у қўрқиб кетди. Шофёр ойнадан бошини чиқариб бақири:

— Ҳой, таъвия, кўзингта қараб юрсанг ўласанми?! Ёмғирда базўр тўхтатиб қолдим. Акс ҳолда, дабдаланг чиқарди. Сен-ку гўрга, аммо менинг бешта боламни Ойшахоланг боқадими.

У сўкина-сўкина машинасини юргизиб кетди. «Бугун нима жин урди мени... Эсон-омон уйга етиб олсам майли эди...»

Такси бекатига борди. Уч-тўрт киши навбат кутиб турибди. Такси йўқ. Тезроқ кела қолсайди, деб ичини

ит тирнайди. Бир томондан совқотиб кетди, иккинчи томондан, акаси бир тишини арра, бир тишини болта қилиб ўтиргандир. Мўлжалдан сал кеч қолса, ўша куни Нигора сўроқу маломатдан қутулмайди. Фарҳод билан муносабатини акаси билмайди. Билса гўштини қийма-қийма қиласи. Шу боис Нигора учрашувга кам чиқади, унда ҳам кундузи. Акасига ўртогимникига бориб келаман, дейди. Ота-онаси унчалик тергамайди, қайтанга акасини сал босиб туришади. Бироқ акаси на отасию, на онасининг гапига қулоқ солади. Ҳадеб Нигорани суриштиргани-суриштирган. Қаерга бординг, қачон бординг, қанча ўтирединг, қачон келдинг... «Бугунам акамдан эшитадиганимни эшитаман...»

Нихоят, унинг навбати келди. Такси бироз юргач, пулини тайёрлаб қўймоқ ниятида, сумкасини очди. У ёғини титкилади, бу ёғини титкилади. Пул йўқ. «Кундузи бор эди-ку... Тушлиқда мен тўламадим... Ҳа, дарвоқе, Ҳалима қарз олувди. Расво бўлти-ку. Энди нима қиласман?» У сезидирмай ҳайдовчига назар солди. Ёшигина, келишган йигит. Тўғрисини айтса кўнар. Уйдан олиб бераман, дейди-да.

— Кечирасиз,— деди Нигора тутилиб. — Пулимни ўйқотиб қўйибман. Уйдан олиб чиқиб бераман.

Ҳайдовчи унга савол назари билан бир қаради-да, индамай йўлида давом этди.

Йўл четида турган икки йигит кўл кўтарди. Машина тўхтади.

— Юнусободгача...

— Чиқинглар.

Машина жилди. Кабинани бир зумда ароқ ҳиди тутди.

— Уф, хайрият-эй, — деди йигитлардан бири, — ёттунча одамни тоза хуноб қилди-да.

— Қаердан олиб келдингиз? — деб сўради ёшроби.

— Ишхонасидан. Роса ичди ўзиям. Оёқда туролмайдиган бўлиб қолди. Базўр таксига солиб келдим.

— Фарҳод ака ўзи кейинги пайтда кўп ичадиган бўлиб қолди-да,— деди ёш йигит.

Фарҳод номини эшитиб Нигоранинг эти жимиirlаб кетди. «Наҳотки, ўша бўлса, Фарҳод аканинг ўртоқларимикан?» У индамай йигитларнинг гапига қулоқ осди.

— Бир неча марта айтдим, мунча ичиш нима зарил сенга, дедим. Қаёқда, қулоқ солмайди, дардим кўп, билмайсан, дейди.

— Нима дарди бор экан?

— Э, гапда, ўзи соғ-саломат, бола-чақаси эсономон... Нигора устидан бир пақир совуқ сув қўйган-дай сезди ўзини. «Хотини, бола-чақаси... Наҳотки, мени алдаб юрган бўлса...йўқ, булар бошқа одам ҳақида гапирияпти. Фарҳод ака унақалардан эмас...»

— Боя нима дейди-я, бир қизни яхши кўраман, шунга уйланмоқчиман, дейди. Эсингни йиғ, дедим, учта болангни ўйласангчи, дедим. Ичиб олиб роса эзмалик қилди. Ҳозиргина қўнгироқ қилди, тўй масаласини гаплашамиз, чиқинг деди, чиқмадим, дейди. Ичавериб мияси айниб қолганми нима бало. Қайси аҳмоқ қиз қараб турган экан бу кишимга тегаман деб...

Нигоранинг қулоқлари чиппа битди. Кўзлари кўрмай қолди. Еруосмон чирпирак мисоли айланиб кетди. Таксида кетаёттанини ҳам унугди. Инграб юборди. Ҳайдовчи сезди, сезди-ю, совқоттан шекилли, деб ўйлади. Нигора иродасини қўлга олди. Бутун кучини тўплади. Бегоналар олдида сирини фош қилишдан ўзини тийди, тия олди. Лекин шу лаҳзада унинг кўзига жамики эркак зоти ёмон кўриниб кетди. Орқада ўтирган икки йигит ҳам, ҳатто мана бу таксичи ҳам худбин, ёлғончи, мунофиқ. Булар ҳам кимнидир алдаган, бадном қилган... Нигоранинг назарида бутун ер юзини алдамчилик, разиллик, шахсий манфаат, шахсий ҳузур-ҳаловат ташвиши қоплаб олгандай эди.

Такси трамвай йўлидан ўнгга бурилди.

— Шу ерда бизни туширинг,— деди ёшроқ йигит. Улар тушиб кетишли.

Нигора миқ этмас, миясида турфа фикрлар гужон ўйнарди. «Нима қилиб юрибман ўзи? Нега у ёқ-бу ёққа қарамадим? Щунчалар ҳам лақма бўладими одам деган! Бола-чақаси бор эркак билан... Унинг хотини, болалари олдидаям гуноҳкорман... Эҳ, каллаварам...

Мана сенга севги. Мана сенга тўй! Тўй эмиш, аза де, аза! Рост-да, бу кунингдан кўра ўлганинг яхши эмасми!».

У ўзи билан ўзи олишар, аммо овозини чиқаришнинг, дардини тўкиб солишнинг иложи йўқ эди.

Келажак, ширин орзулар ҳақида эмас, ёши бир жойга борган кампирлар каби ўтмиши, яқин ўтмиши борасида ўй сурарди. Бу ўйлар орасидан нурли тарафини тополмас, бир-биридан баттар дилини хуфтон этарди. Ўлаган сари бир ҳақиқатта ишончи комил бўлиб борарди: ғишт қолипдан кўчган, кўнгил пиёласи дарз кетган. Синиқ пиёла кимга керак!

Шофёр йигитга қаради. У икки кўзи йўлда, чапдастлик билан рулни бошқариб борарди.

— Уйланганмисиз?

Бу савол оғзидан қандай чиқиб кетганини Нигоранинг ўзи ҳам сезмай қолди. Томдан тараша тушгандаи берилган бу сўроқдан шофёр ҳам гангиб қолди. Ялт этиб Нигорага қаради.

— Йўқ, нимайди?

Нигора ўзининг саволидан ўзи хижолат чекди.

— Шунчаки ўзим... Севган қизингиз борми?

— Бор,— деди ҳайдовчи йигит астагина.

— Чиройлимис?

— Қайсиdir китобда ўқиганман, ҳар кимнинг севгани ўзига энг чиройли кўринаркан.

Нигора индамай қолди. Бироздан сўнг яна деди:

— Астойдил яхши кўрасизми?

— Саволингиз қизиқ бўлди-ку.

— Менинг гапларимга ажабланманг, лекин сиздан илтимос, севган қизингизни бир умр севинг, ардоқланг. Ахир одам боласи, айниқса, йигит умрида лоақал бир одамни баҳтиёр қилиши керак-ку. Бирорни баҳтсиз, бадном қилиш осон, бу ҳар қандай аҳмоқнинг ҳам кўлидан келади. Аммо ўзгаларга баҳт ато этиш, буни ҳаммаям эплаёлмайди... — Унинг лаблари титраб кетди, йиглаб юборди.

Ҳайдовчи Нигоранинг гапларидан, ҳолатидан ҳайрон. «Кўринишдан ёш қизга ўхшайди. Гаплари бунақа... Ким ўзи бу?... Пулим йўқ, дейди. Ўзи сувга тушган мушукдек шалвираб қопти... Йиглайди... Қаёқдан келаяпти...»

Машина тор кўчага кирди. Рўпарадаги кўк дарвоза олдида бир киши сигарет чекиб турарди. Таксининг чироғи тўғри унга тушди.

— Ана, акам туриптилар,— деди Нигора. — Ҳозир пулингизни олиб бераман.

— Керак эмас,— деди ҳайдовчи. Тезроқ ундан қутилиб кетишни ўйларди.

Нигора таксидан тушиши билан акаси бақира кетди:

— Шу маҳалгача қаерда санғиб юрибсан, ярамас?!

— Ака, шошманг, пулимни йўқотиб қўйдим. Таксига пулинин беринг.

— Тушиб қолган пулим йўқ. — У машинасини буриб олаётган таксичига ўдағайлаб кетди. — Ҳали одамларни текинга ташийдиган бўлиб қолдингизми? Шунақа олижанобман денг. Сиз ҳам шу ернинг одамими-сиз ёки осмондан тушганимисиз? Ер юзида бунақа саҳоватли одамни кўрганим йўқ ҳали.

— Менга нима дейсиз, ака. Оддий таксичи бўлсам, вазифамни бажардим...

Нигора зор қақшаб акасига ёпищди:

— Ака, ахир бу йигитта нега бақирасиз? Бу бечора менга яхшилик қилди.

— Ўчир овозингни! Уйга кир! Уйда гаплашаман сен билан.— Таксичига юзланди. — Йўқол бу ердан! Иккинчи қорангни кўрмайин бу маҳаллада.

Нигора пиқ-пиқ йифлаганча дарвозадан ичкарига кирди. Ҳайдовчи ҳеч нарсага тушунолмай таксининг бошини катта кўча томонга бурди: «Фалати одам экан-ку. Ҳа, майли, ҳар хил одам бор-да, бу дунёда. Ҳали синглиси шўрлик ҳам эшитадиганини эшита-ди...»

У машинасига қаттиқ газ берди. Катта кўчага чиқ-қунча таксининг орқа чироқлари тор йўлакни қизғиш нурлари билан ёритиб кетди...

Ёмғир тинган, майин шамол эсар, у булутлар галасини ҳайдар эди. Қўшни кўчадан карнай-сурнай на-воси эшитилди. Орқасидан йигитларнинг шодон қий-қириғи осмонга кўтарилиди.

Булар таксичи йигитта севги сози каби туюлди. Шу тобда у севган қизини кўргиси, унинг сўзларини эшитгиси келди... Машина рулини ўша қиз яшайдиган маҳалла томонга бурди...

1984 йил.

## СУЛТОН БИЛАН МАЛИКА

Султон кириб келганда купеда ёлғиз бир қиз ўти-  
парди.

— Йигирма олтинчи жой шуми? — У қизнинг жа-  
вобини кутмай дераза олдидаги кичкина столчага  
портфелини қўйди.

— Бир ўзингизми? — сўради қиз.

— Ҳа, сиз-чи? — Ҳозирча бир ўзим эдим, энди  
икковимиз, — кулди қиз.

«Шўҳакан-ку», хаёлидан кечирди Султон. Зимдан  
қизга разм солди. Унинг қошлари қўғирчоқникидек  
ингичка, мовий кўзларида ажиб бир дадиллик ва қув-  
ноқлик барқ уриб турарди. Қўнғироқ мalla соchlari  
елкаси аралаш яғринига тушган, оч-сариқ юзининг  
ярмини тўсиб олган эди. «Истараси иссиқ экан». Сул-  
тон қизга гап қотди:

— Демак, бир купеда икковимиз?

— Ёмонми? — шарақлаб кулди қиз. Унинг кулги-  
сида аъло кайфият, баҳтиёрлик аломати мавжуд эди.

— Тошкентта борасизми?

— Худди шундай, — деди қиз, — янглишмасам ўзла-  
риям...

— Топдингиз.

— О, гапнинг «бердисини» айтмай туриб мақсадни  
англаб оларкансиз-а. Мабодо журналистмасмисиз?

Султон кулиб юборди. Унинг кулиши жуда ёқимли  
эди. Бу ажойиб кулагини ҳозирги сұхбатдоши ҳам пай-  
қамай қолмади, албатта.

«Келишган йигит экан» деб ўйлаб қўйди қиз.

— Қип-қизил авлиё экансиз-ку!

— Демак, топдим, шундайми? Биласизми, нега тўғри  
топдим?

Мен журналистлар билан кўп муомалада бўлганман.

— Нима, Қаҳрамонмисиз?

— Йўғ-э, жуда ошириб юбордингиз. Мен ҳаваскор  
муҳбир эдим. Мактабда ўқиб юрган кезларим тез-тез  
редакцияга бориб турардим. Хабарларим, баъзан шеър-  
ларим ҳам чиқарди газетада.

— Ҳозир ҳам ёзиб турасизми?

— Вақт йўқ. Институтта кирганимдан кейин ҳам  
бир-икки бордим редакцияга, кейин дарслар, имти-  
ҳонлар кўпайиб кетди. Хуллас, журналистларнинг ха-

рактерини анча-мунча биламан-да. Уларни ярим психология дейиш мумкин. Муомалага жуда уста бўлишади. Қизлар билан гаплашишга қолганда-ку, асти кўявера-сиз, мутлақо суяги йўқ.

— Ўзингиз ҳам муомалада журналистлардан қолиш-мас экансиз,— деди Султон қизнинг тагдор гапларига ҳайрон бўлиб.

— Ҳа, энди, «яхшиларга эргашдим топмадим зиён дерман».

Султон кулди. Қизнинг гапга бу қадар чечанлиги-дан, ҳозиржавоблигидан лол қолди. Унинг асқиясига асқия билан жавоб бермоқчи бўлди:

— Аслида «қозонга яқин юрсанг қораси юқади», демоқчи эдингиз-а.

— Ақли бор одамнинг садақаси кетсанг арзиди.

Иккаласи баравар, кулишди. Проводникнинг овози уларнинг кулгисини ҳам, суҳбатини ҳам кесди.

— Билетларингни кўрсатинглар,— у билетларни кўриб берди-ю, — кўрпа-ёстиқ, керак бўлса марҳа-мат,— деди. Купедан чиқа туриб қизга ишора қилиб Султонга кўзини қисиб қўйди.

— Менга қаранг,— деди Султон,— шунчча суҳбат-лашдигу танишмабмиз-а. — У қизга қўлини узатди: Султон.

— О, қаернинг султонисиз?

— Мана шу купенинг.— Бу гапни қандай айтиб юборди Султоннинг ўзи ҳам билмай қолди.

— Яхши,— деди қиз,— исмингиз жисмингизга монанд экан. Менинг исмим Малика.

— Оббо, хўп топишибмиз-ку! Купенинг султони-ман деб бекорга айтмаган эканман— да.

— Журналистсиз-да... Мая десангиз ҳам бўлавера-ди. Ўртоқларим, мамашкам, таниш йигитлар ҳам шун-дай деб чақиришади, фақат папашкам Малика дейди-лар.

— Иккаласи ҳам чиройли исм,— деди Султон. Аммо «таниш йигитлар» деганида негадир кўнгли ғалати бўлиб кетди. — Ҳа, айтгандай, қайси институтда ўқий-сиз?

— ТошМИда, гинеколог бўлмоқчиман.

— Журналистикага қизиқар экансиз, шеърлар ёзаркансиз, нега университеттага кирмадингиз?

— Шунақа бўп қолди... Ундан кейин, журналист бўлиш ёки шеър ёзиш учун албатта университетда ўқиши шартми? Масалан, Чингиз Айтматов қишлоқ хўжалик институтини битирган, Вознесенский архитектура институтини ёки Чеховни олайлик.

— Чеховга ўхшаган врач-ёзувчи бўлмоқчиман дeng.

— Йўқ, ундан эмас. Бундан кейин мен ҳеч нарса ёзмайман. Фақат врачлик қиласман.

— Қизиқ-ку.

— Нега энди? Киши битта қайиқни ушлаши керак. Икки қайиққа қўл чўзган одам ўртада ғарқ бўлади. Ғарқ бўлмаслик учун буюк талант бўлиш керак.

Маликанинг мазмундор, мулоҳазали сұхбати Султонда унга нисбатан ҳурмат уйғотди.

— Менимча, сиз ғарқ бўладиганлардан эмассиз.

— Ғарқ бўлмаслигим мумкин,— деди Малика. — Аммо иккала қайиқни баравар бошқариб ҳам кетолмайман. — Қиз икки қўли билан сочини орқасига селпиб ташлади. Пуштиранг кофтасини ечди. — Вагон исиб кетди. — Гулдор кремплин кўйлаги нозик, ихчам гавдасини сикиб турарди. Бўртиб турган кўкраклари, кенг ёқасидан кўриниб турган оппоқ сийнаси Султоннинг дилига фулу солди. У бир тамшаниб қўйди. — Костюмингизни ечинг, қизимадингизми? Галстутингиз мунча чиройли?! Дидингиз чакки эмас!

Султон костюмини ечиб, илгакка осиб қўйди. Сўнгра кўрпа — тўшак олиб келгани чиқиб кетди. Малика латта сумкасидан қимматбаҳо атири олиб, қулоқларининг орқасига, бўйнига, бурнининг икки қирғогига сурди. Стаканнинг оғзидек келадиган ойначага қараб соchlарини тўғрилади.

Султон тўшакларни ўзи ўтирган жойга қўйди. Малика ўрнидан туриб табассум қилди. Унинг сарвдек тик қомати йигитни лоқайд қолдирмади. Маънодор йўталиб қўйди.

Султон Маликага ўрин солиб бермоқчи бўлди. Кўнглида у барибир рад этади, аксинча, менинг ўрнимни ҳам ўзи тузатиб берса керак, деб ўйлади. Бироқ Султоннинг ўйи сароб бўлиб чиқди. Унинг таклифига жавобан Малика:

— Марҳамат, қани кўрайлик-чи, бунақа ишларга қанчалик эвингиз келаркан,— деди.

Султон ўзининг таклифидан ўзи пушаймон чекди.  
«Олифтагарчиллик қилмай ўзингнинг жойингни со-  
либ ётавермайсанми, баттол». У жой солиш, кўрпа ий-  
тиш ишларига қовушмас, ётоқхонада ҳам каравотини  
наридан-бери тузатиб қўярди. У бир амаллаб аввал  
Маликага, сўнгра ўзига ўрин солди. Хижолатдан пе-  
шонасини тер босди. Дастрўмоли билан терини ар-  
таркан:

— Жуда исиб кетди-да, деразани сал очиб қўяй-  
ми? — деди.

— Кўйсангиз-чи, баҳор бўлгани билан ташқари  
совук. Ўрин солишга уста экансиз, тажрибангиз зўрга  
ўхшайди. — Малика атир-упаларини сумкага жойла-  
ди. — Энди мен ётаман. Тескари қараб туринг, ечи-  
ниб олай.

У тор кўйлагини бошидан чиқара бошлади. Сочла-  
ри юзига тўзиб тушди, аммо кўйлаги тоза ечилемади.

— Вой, кўйлак бўлмай ўл-а. Иккаласиям ечилиб  
кетяпти-я.

Султон унинг гапини эшитмаганга олди. У тескари  
томон ёнбошлаб китоб ўқирди.

Малика тик турганича шошилмай сочини тузатди,  
кўйлагини тахлаб, сумкаси устига ташлади. Сўнгра  
ўрнига чўзилиб, крахмалланган оппоқ рўйжони қўкра-  
гигача тортди. Икки қўлини занжир қилиб, боши ос-  
тига қўйди. Султон ҳамон унга қарамас, китобга тер-  
миларди. Уч-тўрт саҳифага кўз югуртирди, аммо би-  
ронта ҳам сўз миясида қолмади. «Нега бу қиз ўзини  
бунчалик эркин тутади? Мени биринчи марта кўраёт-  
ган бўлса. Ҳалиги гапларидан ғоят мулоҳазали, анди-  
шали кўринган эди. Бу қилиқлари нимаси?»

Қиз Султон томонга ўтирилиб олди. Аммо кўзлар  
учрашмади. У ўйларди: «Бу қанақа йигит. Журналист  
ҳам шунақа ландавур бўладими? Мен таниган журна-  
листлар жуда бало эди-ку. Қандай қилиб эриб, қучо-  
ғига кириб кетганимни ўзим ҳам сезмай қолардим.

Бу бўлса... Ўлгудай тупой экан-да. Бу бола ё ҳали  
бунақа нарсаларнинг мазасини билмайди, ёки яқинда  
уйланган». У мириқиб керишди. Оёқлари рўйжони қор-  
нигача тушириб юборди. У қайта тортиб олмади. Чу-  
қур нафас олди, кўнгли ниманидир истарди. Аммо  
истаган нарсаси йўқлигидан дили ғашланар, юраги гу-  
пиллаб уради.

«Журналистларнинг ҳам ҳаммаси бир хилда ҳароратли бўлмасакан-да. Мановига ўхшаган ҳиссизлари ям тиқилиб ётгандир. Мен бўлсан ўртоқларимга эрга тегсанг журналистга тег, деб юрибман-а». Қиз ўрнидан турди. Оппок, силиқ оёқларини осилтириб ўтириди. Ич кўйлақда унинг қомати жуда хушбичим, гўзал кўринарди. Қалин сочини яланроҷ елкаси узра қўли билан тараф қўиди.

— Менга қаранг, Султон.

Йигитнинг хаёли бўлинниб, ялт этиб қизга қаради. Кўз ўнгида тасодифан бир пари пайдо бўлгандек туюлди.

— Газетада ишлайсизми, журналда?

— Журналда,— деди Султон беихтиёр унинг қўшҳандалақдек кўкрагига термилиб.

— Яхши,— деди Малика. Бошқа гапирмасдан яна ўрнига чўзилди. Султон ҳам индамади, китобга тутинди. — Султон, нега ётмаяпсиз, туринг ечинмайсизми, кўйлақда исиб кетмаяпсизми?

— Мен бироз китоб ўқимоқчиман. Ҳали эрта-ку вақт.

— Китобни уйда ўқийверасиз, ётиб дам олсангизчи. Қаранг, поезднинг юришини, худди аллалаётганга ўхшайди. Ҳа, айтгандай, уйланганмисиз?

— Йўғ-э,— кулди Султон.

— Юрадиган қизингиз бордир?

— Йўқ десам ҳам бўлади.

— Нега мужмал гапирасиз, конкрет айтинг.

— Очифини айтсанам, бир қиз билан бир-икки марта кино-пинога тушдик. Сўнгра учрашмай қўйдик.

— Нега?— сўради Малика. Ўзича ўйлади: «Туришинг шу бўлса қайси аҳмоқ қиз сен билан юрарди».

Султон нима деб жавоб беришини билмади. Чунки бунинг аниқ сабаби йўқ эди.

— Билмадим. Кечирасиз, мен бир чекиб келай.

— Ие, чекасизми,— деди қиз ўрнидан сакраб туриб.

— Вахлироқ айтмайсизми шуни. Олинг сигаретдан. Бирга чекамиз. Султон сигарет узатди. — Оҳо «ВТ»ку. Келинг шу ерда чекаверамиз.

— Жуда тутаб кетмаскин? Проводник билиб қолса гапириши мумкин.

— Э, қизиқмисиз, проводник қотиб қолди аллақачон, кечаси билан ўтирармиди. Купеда икковимиздан бошқа ҳеч ким бўлмаса, тутаса нима қипти. Деразани сал очиб юборамиз, олам гулистон.

Султон ноилож ўтирди. Чекиши. Малика йигитнинг жундор, кенг кўкрагига, бақувват елкаларига суқ билан тикилди. У Султоннинг катта кўзларини, бир-бирига туташ қоп-қора қошини синчиклаб кузатди. Йигит термилган сари унинг ичида ғалати бир туйфу хуруж қиласди. Гўё ана шу туйфуни босиш учун чекаётгандек сигарет тутунини чуқур-чуқур тортарди. Султон эса қизга қарамасликка ҳаракат қиласди. Унинг нотаниш йигит олдида ийманмай ички кийимда ўтиришидан ҳайрон бўларди. Иккаласи ҳам миқ этмади. Султон сигарет қолдигини деразадан улоқти-паркан:

— Шамоллаб қолмасайдингиз, елкангизга бирон нарса оласизми,— деди. Султон аслида Маликанинг совқотишини ўйлагани йўқ, балки қизнинг бундай ўтириши унга жуда эриш туюлар, сира ҳазм қиломасди.

— Қўяверинг, шамолламайман. Негадир бутун вужудим ёниб кетяпти.

Султон ёстиққа ёнбошлаб, яна китоб ўқишига киришди. Малика сигарет қолдигини ташлаш баҳонасида ўрнидан турди. Купе эшигига ўрнатилган ойнага ўзини содди. Сочини тузатди, кўлларини кўтариб, гавдасини орқага ташлаб, узоқ керишди. Йигит унинг ҳаракатларини сезиб турса-да, қарамади. Малика устини ҳам ёпмасдан, ўзини жойга ташлади. Чуқур уҳ тортди.

— Чирокни ўчириб, ётсангиз-чи, энди.

Султон, «эҳтимол чирокни ўчирмаганимга уйқуси келмаётгандир», деб китобни ёпди. Туриб, кўйлагини ечди. Қиз эса киприклари орасидан унинг ҳаракатларини кузатарди. Султон қизнинг ҳақиқдай товланиб ётганини кўриб, вужуди ғалати бўлиб кетди. Қизга ҳазил қилмоқчи бўлди.

— Мая,— деди биринчи марта. Бу сўз қизнинг қулогига ёғдай ёқиб тушди. — Жудаям чиройли экансиз.

Мана шу бир оғиз сўз Маянинг етмиш икки томирига қон бўлиб кирди. Юраги гупиллаб ура бошлади. Лекин йигитнинг гапига жавобан ҳеч нарса демади. Кўзини ҳам очмади. «Энди ўзига келяпти шекилли.

Йигит киши ҳам шунақа совуққон бўладими». У Султоннинг яна бирон нарса дейишини кутди. Аниқроғи, ёнимга келади, ҳазиллашади, дёб ўйлади. Бироқ Султон бошқа бир оғиз ҳам гапирмади. Индамай ўрнига чўзилди. Чойшабга боши билан бурканиб олди.

Маликанинг ҳафсаласи пир бўлди. У бир-икки марта у ёнбошидан бу ёнбошига ағдарилди. Йўталди, ух тортди, томорини қоқди. Султон ётган жойидан қайта турмади. Аксинча, йигирма минутлардан кейин унинг майин, беозор хурраги эштилди. Буни қиз ўзига нисбатан ҳақорат, деб тушунди. «Мени менсимади чоғи. Э, менсимаса ундан нари, мен ҳам зормасман шу лашлангта. Келгани билан қўлимни ҳам ушлатмасдим». Шу аламли хаёллар билан ухлаб қолди.

\* \* \*

У кўзини очганида тонг отган, вагон деразасидан қуёш нури тушиб турарди. Султон столчага суюнганича китоб ўқиб ўтиради. Малика ўтирган ҳолда кўйлагини кийди, сочини тузатди, сочиқни елкасига ташлаб чиқиб кетди. У ювиниб қайтиб кирганида Султон ўрнини таҳларди. Сумкасидан пардоз анжомларини олиб ишга киришди. Султон сочиқу чойшабларни бир чеккага йиғиштириб қўйди. Галстутини олиб, ойнага қарамай боғлади.

— Қалай, яхши дам олдингизми? — сўради қиздан. Малика юзига упа сура туриб, раҳмат, деди. Унинг бугунги ҳолати кечаги Маликага сира ўхшамасди. Кеча ёқимли, майин гапираётган қизнинг сўзи бугун негадир терс эштилди.

— Мана, Тошкентта ҳам яқинлашиб қолдик,— деди Султон. — Адрес алмашсак, балки бундан кейин ҳам кўришиб туармиз. Анча дўстлашиб қолдик.

— Ҳожати йўқ,— деди кескин.

Султон кулди. Қизнинг ҳаракатларини кузатиб, яна сўради:

— Нега энди?

— Сизда юрак йўқ. Мен қалбсиз одамлар билан гаплашмайман.

Йигит қизнинг пичингини тушунди, аммо ўзини гўлликка солди.

— Юраксиз одам тирик юра оладими?

— Мен биологик юракни айтаётганим йўқ. Унақа юрак чұмчукда ҳам бор.

Қизнинг бу гапи Султоннинг етмиш икки томири-ни тикондек зирқиратди. Ўзини тиёлмади.

— Юрак бор, деб кўрганга очиб ташлайверадими? Инсон ҳамиша яширин нарсага ўч бўлган. Илгари йигитлар қизларнинг юзини бир кўриш учун ойлаб орқасидан юришган. Ҳозир эса қизлар йигитларнинг олдида ички кийимда ҳам ўтираверади.

— Нима бўпти? Замон шунақа.

— Балки буни тараққиёт дерсиз, маданият дерсиз?

— Бўлмасам-чи?

— Кечирасиз, бу тараққиёт ҳам, маданият ҳам эмас. Қолаверса, буни замонга тўнкаш ҳам нотўғри. Замонни баъзи бетаъсиirlар бузаяпти.

— Нима, менга шама қиляпсизми?!

— Ўзингизга нам тортманг. Ибтидоий жамиятда одамлар бир-бирига сиз айтгандай муносабатда бўлишган. Шарм-ҳаё деган нарса бўлмаган. Улар маданият-лимиди? — Султон қизишиб кетди. Гарчи, одатига қарши бўлса-да, сигарет тутатди. У ҳеч маҳал нонушта қилмай чекмасди. — Маданият деганда нафосат, гўзаллик, ҳаё — ҳаммаси жамулжам бўлади. Сизнинг мана бу гапларингиз, бегона йигит олди-да ички кийимда ўтиришингиз маданиятми? Тараққиётнинг белгила-рими?

— Мен билан ишингиз бўлмасин. Ўргилдим сиздақа насиҳатгўйдан,— жеркиб берди Малика. Кейин ўзича тўнғиллади. — Ёшини сўрасанг йигирмадан энди ошилти-ю, гапини қаранглар, чолга ўхшайди. Яна журналист эмиш.

Султон индамади. Босиб-босиб сигарет чекди. Қиз деразага ўтирилиб ўтирди.

— Қани, пастелларни топширинглар,— деди проводник келиб. — Ў-ҳў, ҳаммаёқни тутатиб юбориб-сиз-ку, ука.

Малика деразадан нигоҳини узмай гапга аралашди:

— Бу киши маданиятнинг энг учига чиққанлар. Шунинг учун купеда ҳам чекаверадилар.

Проводник «нима гап, тинчликми?» дегандек, Султонга қошини учирди. У елка қисди. Проводник ҳайрон бўлганича чиқиб кетди. Шу тобда Маликанинг

жуда ҳам чеккиси келар, аммо Султондан сигарет сўрашга юзи чидамасди. Бир нарса эсига тушгандек, шарт ўтирилиб сумкасини очди, чет элдан келтирилган резинка сақичини олиб, оғзига солди. Султон чойшабларни топширгани чиқиб кетди. Мая эса деразадан эрталабки қуёш нурида чараклаб турган далага қарагани-ча жаҳл билан сақич чайнайверди.

1977 й.

## ТАРОЗИ

Сожида худди бир нарсадан чўчигандай илкис уйғонди. Дераза пардасини кўтариб ташқарига қаради: ҳали қоронги. Ҳовлида супургининг «шув-шув» и эши-тилди. «Энам ҳовли супураяпти. Қанча ҳаракат қилсан ҳам энамдан олдин туролмайман-а».

Сожида шуларни хаёлидан ўтказди-ю, апил-тапил кийиниб ҳовлига чиқди. Айвон ёнидан ўтадиган ариқчада ювинди. Ўрикнинг қонга бўялгандай қип-қизил хазонлари оралаб жилдираб оқаётган тип-тиниқ сув муздай эди. У ювинаркан, ўйларди: «Нимага зардолининг барги бунча қизариб кетар экан? Табиатнинг ишларига ҳайрон қоласан-да. Кўм-кўк нарса шунчалик қип-қизил... Онасининг бағридан узилиб кетаётгани учун дили қонмикин? Ажабо, дараҳтлар ҳам одамларга ўхшайди-я...»

Қиз ювиниб бўлиб, молхонанинг олдини супураётган онаси томон юрди.

— Ассалом.

— Бунча вахли турдинг, қизим? Онаси самимий айтди бу гапни, аммо Сожида хижолат бўлди. Ахир ёши олтмишдан ошган онаси эрта туриб ҳовли супурсаю, бу ухлаб ётса яхшими?

— Беринг супургини...

Кампир икки қўли билан белини ушлаб, қаддини ростлади.

— Озгина қолди, ўзим супуриб қўя қоламан. Чой қўйганман, қайнаган бўлса, дамлагин.

«Чой ҳам қўйишга улгуритилар-да». Сожида баттар хижолат бўлди, юzlари қизариб кетди, икки чаккасига иссиқ нарса югургандай бўлди...

Нонуштадан кейин Сожида этигини кия бошлади.

- Ҳа? — деди онаси ажабланиб.  
— Чиқа қолай.  
— Ҳали вахли-ку. Сал туриб борарсан. Онанинг гапларида қизига ачиниш, раҳм туйгулари мужассам эди.  
— Эртароқ боришим керак.  
— Шу пайтда далада бирор борми йўқми, ёлғиз ўзинг...

Сожида қанорни этакка ўраб қўлтиғига оларкан, онасининг гапига кулди:

— Нима, мени бўри ермиди? Ундай десангиз бўриjam йўқ. Биззи обод далаларга бўрини бойлаб қўйса ҳам турмайди.

— Ҳазилинг ҳам бор бўлсин-да, қизим. Саҳармардондан шунақа гапларни қўйсанг-чи,— кампир қизига яқин борди. Қандайдир сирли бир гап айтадигандек овозини пасайтириди. — Ҳар ҳолда эҳтиёт яхшида, болам. Бўйи етган қизсан... Овлоқ жойга бемаҳалда ёлғиз боришингта кўнглим бўлармиди.

Сожидага онаси ҳозир жуда ҳам меҳрибон, ғамхўр кўриниб кетди. У ўзини тутолмади. Онасини шартта қучоқлаб олиб, эркаланди. Кампир қизнинг юzlаридан, пешонасидан ўпди.

— Мендан хавотир олманг, энажон. Эртароқ борай деганим, бугун кечагидан кўпроқ теришим керак. Биласиз, Шаҳодат билан мусобақалашганимиз. Кеча у мендан ўн беш кило кўп терди.

— Ҳа, гап бу ёқда дегин. Шунинг учун хўроz қичқирмасданоқ туриб олган экансан-да,— кампир муҳим гап эсига тушгандай сергак тортди. — Менга қара, Сожида, у дугонангта синглиси ҳам ёрдам берәёттанмиш-ми?

— Билмадим,— деди Сожида.  
— Нимага билмайсан? Бир жойдан терасизларми ўзи? Синглисиям чиқяптими теримга?

— Ҳа, чиқяпти.  
— Икковини ҳам Шаҳодатта ёзяптими? Шундай қилсаям бўладими?

— Билмасам. Бўлса керак-да, қиляпти-ку.  
Кампирнинг қовоқлари уюлди.

— Товба? Буниси қизиқ-ку. Ахир бу фирромлик масми?

— Унисини билмадим, энажон. Мен тезроқ борай, вақт кетяпти...

Сожида қишлоқдан чиқиб, икки томонига қатор тут экилган тупроқли йўлдан илдам кетиб борар эди. У ҳар қадам босганида тунги шудрингда сал намиқ-қан тупроқнинг таниш, дилни қитиқловчи ҳиди уфурар, бунга йўл четидаги тутлар, бурғанлар бўйи қўшилиб унинг кўнглини яйратар эди. Бу сурур уни яна ҳам тезроқ юришга қистарди. Пахтазорга яқинлашганда тутлар орасидан ҳуштак эшитилди. Юраги шувиллаб кетди. Атрофга аланглади, ҳеч ким йўқ. Хаёлимда шундай туюлгандир, деб ўлади. Уч-тўрт қадам юриши билан яна ҳуштак чалинди.

— Сожида...

Бу овозни, унинг эгасини Сожида таниди: Акрам. Сожиданинг юраги гуп-гуп ура бошлади. «Акрам! Шу маҳалда у бу ерда нима қилиб юрипти?»

— Сожида... Бу ёқса кел.

Сожида кўчанинг ўртасида серрайиб қолди. Акрам Сожидадан бир йил олдин мактабни битирган. Улар бир-бирига хат ёзиша бошлаганда Сожида тўққизда, Акрам эса ўнда ўқир эди. Шунга ҳам икки йилдан ошди. Бу вақт ичидা, эҳ-ҳе, қанча оқ қоғозларнинг юзи қораланди. Иккови ҳам хат ёзаётганда жуда бурро бўлиб кетар, баъзан шеърлар ҳам тўқишиар эди. Аммо онда-сонда хилват жойларда учрашиб қолганда негадир уларнинг гапи-гапига қовушмас, иккови ҳам, ҳаяжоннинг зўриданми, дилидагини тилига чиқаролмай хайрлашар эди. Учрашувда айтилмаган гаплар яна оппоқ қоғозга битилар эди...

Акрам йўл четидаги увотта чиқди:

— Сожида, бу ёқса кел.

— Нима қиласман?..

— Сенда гапим бор

— Нима қилиб юрибсиз бу ерда? — сўради қиз. Унинг тилига бошқа сўз келмас эди.

— Сенинг йўлнинг пойлаб чиқувдим, — йигитнинг овози титраб кетди. Гап бор эди.

— Нима гап экан?

— Сожида... Хатда...

Сожида шарт орқасига ўтирилдию, югуриб кетди. Ортдан «Мен сени севаман» деган товуш қулогига чалинди. Акрамнинг хатларида бу сўзни Сожида кўп ўқиган, аммо ўзининг оғзидан ҳали ҳеч эшиитмаган эди. Ҳозир бу сўз гўё жонли бир нарсадай қулогидан

оёғининг учигача жимиirlатиб ўтди. Бир зум юришдан тўхтади. Ширин бир нарсанинг мазасини тотгандай кўзларини юмиб олди.

Бутун вужуди бўшашиб кетди. У пахтазорга қандай келганини, қанорни қаерга қўйиб, этакни қачон белига боғлаганини билмайди. Этаги яримлаб пахтанинг оғирлиги сезилгандағина ўзига келди. Шудринг қўнган оппоқ пахта, очилмаган кўм-кўк кўсагу йўзапоянинг намхуш ҳидини ҳам энди туйди. Ўзидан ўзи уялиб, атрофга аланглади. Шабнам ҳали кўтарилемаган, кенг пахтазор жим-жит. «Жинниман мен, эртароқ келиб пахта териш ўрнига...» Шу топда қулоғи остида «мен сени севаман» деган титроқ товуш яна эшитилгандаи бўлди. Беихтиёр тутзор томонга қаради. Ҳеч ким йўқ. «Ўзингни қўлга ол, Сожида. Вақт кетяпти. Бугун ҳам орқада қолсанг уят!» Унинг нозик бармоқлари шудринг тушган лўппи пахталарга эпчил бориб келар эди. Ҳаш-паш дегунча этаги тўлди. «Қанорни қаерга қўйдим? Э, ўл..» Қанорни қидириб кетди. Ўқариқ бошида экан. Этагини унга бўшатди-да, эгат оралаб жадал кетди.

Тонг ёришиб, одамни одам танийдиган бўлганда ўқариқ бошидаги қанор тўлай деб қолган эди. Сожиданинг этаги яна тўлди. Уни ечиб олдида, қаддини ростлади. Шаҳодат келмадимикин, деган хаёл билан ён атрофга қаради. Ҳеч ким кўринмади. «Ё бошқа картадан теряптимикан? Йўғ-е, буни тамомламай бошқа жойга ўтишга бригадир рухсат бермайди-ку. Балки синглисига ишоёнib...шошилмай келса керак-да». Оппоқ очилган пахта юзида бир томчи шудринг милдираб турар эди. Сожида ўша пахтани авайлаб қўлга олди. Ҳар чаноқдаги юлдуз қирралариdek бешга ажралиб турган пахтага термулиб хаёлга толди.» Ҳозир мен тераётган мана шу пахтадан нималар қилинار экан? Балки қайсиdir ўлқадаги нотаниш бир тенгдoshim кўйлак кияр? Эҳтимол, мана шу пахта кимнингдир ярасига малҳам бўлар? Қизиқ! Дунёning ишларига ҳайрон қоласан одам... Ўша нотаниш дугонам устидаги кийимнинг пахтасини Сожида деган бир қиз терганини билармикан? Қаёқдан билсин? Балки менинг устимдаги мана бу жемперни ҳам аллақайси мамлакатдаги менга ўхшаган бир қиз тўқигандир? Одамлар бир-бирини кўрмай, танимай, ҳатто қанақа эканлиги-

ни тасаввур ҳам қилмай бири иккинчисига ёрдам беради-я. Лекин ҳамиша бирга юрадиган, бир ариқдан сув ичиб, бир ҳаводан нафас оладиган одамлар баъзан бир-бирига ёрдам беришни, яхшилик қилишни истамайди. Қайтанга оёғидан чалади. Қизиқ экан-да одамзотнинг феълиям».

— Э, ҳорманг, ҳорманг, Сожидахон. Ҳалитдан бир қанорни тўлдириб кўйибсиз-ку.

Сожида илон чаққандай сапчиб туҳди. Қўлидаги лўппи пахта ерга тушиб кетди. Рўпарасида Муродилла турар эди. Ўттиз ёшларни қоралаб қолган, паст бўйли, семиз бу йигит уч йилдан бери ҳисобчи бўлиб ишларди.

— Бугун дугонангиздан ўзиб кетаркансиз-да, Сожидахон?

— Сиз яна биронта одамнинг терганини дугонамнинг ҳисобига ёzsангиз, тенглашиб қоламиз,— деди Сожида унга қарамай.

— Оббо, сиз-эй, ҳали шунга хафа бўлиб юрибсизми? Хафа бўлманг. Менга қаранг, Сожидахон, сизга бир гапим бор эди.

Сожида жаҳд билан унга қаради. Кўзларини сал қисиб ҳисобчига юзланди.

— Хўш, нима гап экан? Қулогим сизда.

— Биласизми, Сожидахон. Хўп десангиз, бугун ҳар гал тортгани хирмонга олиб борганингиздан ўн кило-ўн килодан қўшиб ёзаман. Шунда Шаҳодат сизга сирайм етолмайди. Розимисиз?

Сожида унинг гапларини эшитиб туриб ўзича режа тузар эди. «Нималар деяпти ўзи бу? Нима учун менга ғамхўрлик қилгиси кеп қолди? Нимага шама қиляпти?» Эрталаб онаси айттан гаплар эсига туҳди: «Бўйи еттан қизсан. Овлоқ жойга бемаҳалда ёлғиз ўзингни юборишга кўнглим бўлармиди». Сожида Муродилланинг тиржайиб турган башарасига қаради: «Йўқ, сен ўйлаганчалик лақма эмасман!»

— Ростданми? — бирдан қиёфасини ўзгартирди Сожида. — Шундай қилоласизми?

— Бўлмасам-чи? Ҳаммаси ўзимнинг қўлимда-ку.

— Яхши бўларди,— деди Сожида ўзини хурсанд бўлгандай тутиб.

— Лекин биласизми, сал оз-да.

— Нима оз? — деб сўради ҳисобчи ҳовлиқиб.

— Ўн кило оз-да. Йигирма килодан қўшолмайсизми? Муродилла хурсанд бўлиб кетди. «Худо хоҳласа иш беш. Йигирма кило бўлса йигирма кило-да. Нима, тушгача бир марта, тушдан кейин яна бир марта торттиради. Қирқ кило пахта нима деган гап. Бошқалардан икки килодан урсам ҳам... Бугун кечқурунга таклиф қилсаммикан? Хўп, дермикан? Хўп демай ҳам кўрсин-чи!»

— Бўпти. Мен розиман. Сиз учун йигир- ма кило пахта нима бўпти? Лекин ҳеч кимга айтмайсиз-а?

— Албаттада. Кимга айтардим,— деди Сожида муғамбириона. — Ҳа айтгандай, эрталабдан бу ёқда нима қилиб юрибсиз?

— Менми? Ҳар кун эрталаб одамлар теримга тушгунча далани айланиб кўраман, қайси картани олдин териш кераклигини аниқлайман.

— Шундайми? Мен бригадир кўрса керак, деб ўйлардим,— деди Сожида соддалик билан.

— Э, қизиқ экансиз, Сожидахон. Бригадир нима? У шунчаки, номига. Ҳамма ишни мана биз ҳал қила-миз-да. Бўлмаса сизга қўшимча пахта ёзишнинг ўзи бўладими? Айтгандай, Сожидахон, яна бир гапни айтиш эсимдан чиқаёзибди. Кечқурун ҳамма билан баравар кетиб қолманг. Хўпми? Мана, эрталаб ҳаммадан бурун келсангиз, кечда ҳам энг кейин қайтсангиз, шунда ҳаммадан кўп терганингиз ишончли бўлади. Тўғрими? Қоронги тушиб қолишидан қўрқманг. Ўзим кузатиб кўяман. Келишдикми?

Сожида ҳисобчининг без бўлиб турган кўзларига қараганча ўйларди: «Ҳа, туллак, ниятинг маълум! Акрамга айтсаммикан? Йўқ. Ўзим боллайман бу суллоҳни». Унга сир бой бермади.

— Бўпти, келишдик, сиз бораверинг, биронта кўриб қолса гап-сўз кўпаяди. Ваъдангиз эсингиздан чиқмасин-а. Ҳар борганимда йигирма килодан қўшасиз. Тушгача тўрт марта, тушдан кейин тўрт марта олиб борман, майлими?

Ҳисобчи гангид қолди. «Саккиз марта? Демак, бир юз олтмиш кило! Э, тавба, мен шунча ёзсан, ўзи юздан ошириб терса. Ҳаммаси қанча бўп кетади? Унинг устига, кеча бир юз йигирма кило терган қиз бугун

бирдан уч юздан ошириб юборса. Ким ишонади бунга? Расво бўлдику бу ёғи. Энди нима қилиш керак?»

Муродилланинг ўйланиб қолиш сабабини тушуниб еттан Сожида билмаган бўлиб гап бошлади:

— Ҳа, Муродилла ака, ўйланиб қолдингиз? Бир нарса демоқчисиз-у, айтолмаяпсиз-а? Тўғрими?

Муродилла чайналиб қолди. Кўнглидагини айтай деса, ҳозиргина «ҳамма ишни ўзимиз ҳал қиласиз», деб керилиб қўйди. Фикридан қайтмай деса, бу ёғини эплаш осон эмас.

— Сожи-и-да.

Картанинг нариги бошида Шаҳодат кўринди. Со жида уни бу ёқقا кел, деб имлаб чақирди.

— Мен бора қолай бўлмаса, Сожидахон,— Муродилла оёғи куйган товуқдай типирчилаб қолди,

— Ваъда ваъдами?— Сожида атайлаб гапни чўзар эди. — Қайтиш йўғ-а? Бунинг устига, сиз кимсиз Муродилла табелчи. Ҳали унинг сўзини иккита қилган мард топилган эмас. Тўғрими?

Ҳаллослаганча Шаҳодат етиб келди. Икки дугона кучоқлашиб кўришишди,

— Э, ўл,— деди Шаҳодат дугонасига,— мунча ҳовлиқмасанг. Кечаси шу ерда ётиб қолдингми, нима бало?

— Йўқ, дугонажон, бу пахтани мен терганим йўқ, Муродилла ака териб бердилар. Энди бошқа термайман. Шуни кечгача саккизга бўлиб хирмонга олиб бораман. Ҳар борганимда бу киши менга йигирма' килодан қўшиб ёзадилар. Бўлади шу! Қани, етиб кўр-чи менга!

Муродилла на кетишини, на қизларнинг суҳбатига аралашишини биларди. Жиноят устида қўлга тушган одамдай гарангсиб қолди.

— Нималар деяпсан? Эсинг жойидами ўзи?— деди Шаҳодат дугонасига термулиб.

— Нима, ишонмайсанми? Ана, Муродилла аканинг ўзларидан сўра ишонмасанг. Тўғрими?

Муродилла қилган ишидан минг пушаймон эди. Аммо ундан қандай қутулишни ҳам билмас эди. Гапни ҳазилга бурмоқчи бўлди.

— Дугонангиз жуда ҳазилкаш экан,— деди у Шаҳодатга юzlаниб. — Тонг саҳарда келиб бир қанорни

тўлдириб қўйиптию, яна менга ёрдам бериб юборинг, дейди.

Сожида унга яқин борди. Фижиллашиб қолган йигитлардай икки қўлини белига қўйиб, ҳисобчига ўқтам гапирди:

— Ким ҳазиллашяпти? Ҳозиргина нима деб турувдингиз? Нимага энди латтачайнарлик қиласиз? Қечқурун мен ҳаммадан кейин қолишим керак эди, сиз кузатиб қўймоқчи эдингиз. Энди ҳазил бўлиб қолдими? — Сожида бир оз овозини пасайтириб, қаҳрини янада ошкор изҳор этди: — Менга қаранг, ўртоқ табелчи! Мен сиз ўйлаганлардан эмасман! Сизнинг марҳаматингизга зор ҳам эмасман! Шуни иккала қулоғингиз билан яхшилаб эшишиб олинг: дунёда шундай нарсалар борки, уларни ҳалику йигирма кило пахта экан, олтин билан ҳам сотиб ололмайсиз! Бу инсоннинг орияти, номуси, шаъни! Қизларнинг курури!

Ҳисобчи томогига суяқ тиқилиб қолган лайчадай кўзини лўқ қилиб қолди. У нимадир демоқчи бўлар, аммо на тили буралар, на калласига бир фикр келар эди.

Қизлар эгат оралаб кетишиди. Ҳисобчидан сал узоқлашгач, Сожида бўлган гапни дугонасига айтиб берди.

— Оббо суллоҳ-эй,— деб Муродилла турган жойга қараб қўйди Шаҳодат. Ҳисобчи хирмон томонга шалвираб кетиб борар эди. — Шунаقا бемаъни эканми бу ўлгур-а?

...Чошгоҳгача дугоналар зўр бериб теришди. Соҳиданинг қаторида учта, Шаҳодатнинг қаторида иккита қанор тик турар эди.

— Сожи,— деди Шаҳодат,— бугун мунча куйиб-пишдинг, ёнверингта қарамайсан ҳам. Ана у ёқса қарасанг-чи.

Сожида нима гап дегандек, Шаҳодат кўрсатган томонга назар ташлади. Ариқнинг нариги бетидаги картада терим машинасини кўрди. Унинг рулини Акрам бошқариб борар эди. Йигитнинг ҳаракатлари эпчил, чаккон. Қизиқ, қизга бир оғиз гапини эплаб гапиролмаган йигит қудратли машинани чапдастлик билан ҳайдаса.

Ҳозиргина ҳисобчига ўқтам-ўқтам гапираётган Сожида бирдан мулойим тортиб қолди. Индамай ерга

қараганча пахта теришда давом этди. Қўллари ўзига бўйсунмагандай лоқайд бориб келарди.

— Айт, бир бункерини тўксин, икковимиз бўлиб оламиз,— деди Шаҳодат ҳазиллашиб.

— Э, ўл, бас қил,— Сожида дугонасидан уч-тўрт эгат нарига ўтиб кетди...

...Икки дугона кун бўйи терган пахтасини торттирмади. Шом бўлиб, одам одамни танимай қолганда бригада йигитларидан илтимос қилиб хирмонга олиб боришиди. Ҳисобчи уларнинг пахтасини тортар экан, иккала қизнинг ҳам юзига қарай олмасди.

Қизлар пахталарини торттириб, хирмонга тўкишиди. Қанорларини этакка ўрашди. Сожида дугонасига аста кўзини қисдию, табелчига яқин борди.

— Мен ҳам кетаверайми, Муродилла ака? Ё ўзингиз кузатиб қўясизми?

Муродилланинг аъзойи бадани титраб кетди. Со жиданинг эрталабки гапидан ҳам бу ошиб тушди. У шу пайтгача бунчалик изза бўлмаган эди. Хайриятки, бу гапни хув нарида турган бригадир, хирмончилар эшлишишмади.

Қанор ўралган этакни елкасига ташлаб олган қизларнинг шодон кулгуси намозшом қаърини ёриб, кенг дала бўйлаб ёйилди. Улар орасида тиник, жарангдор бир кулги алоҳида, баландроқ эшитилди.

Бу — Сожиданинг кулгиси эди.

1980 йил.

## МОМАҚАЛДИРОҚ

Райком бюроси тамом бўлганда ёмғир шариллатиб қуярди. Шунданми, район маркази кўчаларида одам сийрак. Аҳён-аҳёнда ўтаётган машиналар кўчаннинг хал-қоб жойларидағи ёмғир сувларини икки тарафга сачратиб кетади.

Искандар раис бюродан латтадай шалвираб чиқди. У ҳеч қачон бунчалик шаллинг бўлмаган эди. Бутун вужуди зирқираб қақшар, ўзини бир замбил лойдай, балки унданда оғирроқ ҳис қиласди. Ҳром этикларини кўтаришга гўё мадори етмасди.

У ҳафсаласизлик билан мармар зиналардан тушди. Йўл четида турган машинасига боргунча уст-боши

жиққа ҳўл бўлди. У буни сезмади, хаёлидан ҳар хил фикр кечди: «Нега бундай бўлди? Биринчи нима учун мени бунчалик қаттиқ савалади? Яна бюорода, ҳамманинг одида-я! Нега?»

Раис машина эшигини қандай очганини билмади. Ўзини «Волга»нинг орқа ўриндиғига ташлади. Раисни бунаقا ахвонда кўрмаган Бўривой ҳайрон қолди.

— Қаёққа?

— Гўрга!...

Бўривой раисга ўтирилиб қаради.

— Нимага ўқраясан? Ҳайдасанг-чи!

— Назокатхонникигами?

— Ўчир овозингни! — ўшқирди раис. — Фаросат борми ўзи!

— Ахир ҳамиша бюородан кейин...

— Бўлди, қисқа қил! Уйга ҳайда...

Машина чироқлари қоронгулик бағрини ханжардек тилиб бормоқда. Раис миқ этмас, гоҳ-гоҳида уф тортиб кўярди. У хаёлини тизгинлаб ололмас, секретарнинг дашномига ўзича сабаб қидирав, аммо бирон-бир жўяли асос тополмай дили хуфтон бўларди.

«Йўқ, секретарь бекорга саваламади. Бу ерда бир гап бор. Кимдир ғаламислик қилган, унга оди-қочди гапларни етказган. Чигит экиш кечиккан бўлса менда нима айб? Жўрттага орқага сурганим йўқ-ку! Менам ваҳлироқ экиб олай дейман. Осмоннинг таги тешилгандай ёмғир тинмаса, қўлимиздан нима келади?! Табиий шароитни ҳисобга олишмаса... Бунаقا масалада Қодир Собирович маладес эди. Тушунарди. Ҳа, энди у киши бошқа одам эди-да. Булар нимани билади. Дех-қончилик қилиб юриптими. Академик бўлсаям дех-қончиликни билмаса қийин-да. Экиш уч-тўрт кун кечиккан билан осмон узилиб тушмайди-ку! Ёки экув-сиз қоп кетармиди? Барорини берса бас. Олдин-ке-йин экканга қарамайди. Эрта баҳордаёқ доварага дов солиб, экишни туталладик деб рапорт берганларни кўп кўрганмиз. Чигитни қайта-қайта экади, қанча уруғ кетади ортиқча, ўзиникини тамомлаб, қўни-қўшнидан қарз ҳам олади. Қанча меҳнат, оворагарчилик... Ғал-вир сувдан кўтарилган паллада эса илдизини қурт еган палақдай шалпайиб, дами ичига тушиб қолади. Қий-ғир урган беданага ўхшаб бўйинни ичига тортиб,

атрофга жавдираиди. Баҳонаси — чигит қайта экилган... Жўжани кузда санайдилар...» Раис сигарет тутатди. Сал ҳовуридан тушиди.

— Менга қара, Бўривой. — У машина ўриндигига ўмганини ташлади. — Бир неча йилдан бери бирга ишлаймиз. Сендан яширадиган сирим йўқ. Айтгин-чи, борди-ю, мен сени қўпчиликнинг ўртасида ноҳақдан-ноҳақ изза қилсам, нима қиласдинг?

Бўривой раиснинг аҳволига энди тушунди. «Ҳа, демак бююда калтак еган. Зўрдан зўр чиқипти-да. Менинг сўзимни икки қиладиган одам ҳали туғилмаган деб ҳаммани зор қақшатасан. Арзимаган нарсага одамларнинг дилини оғритасан. Бирорни мессимайсан. Сени шоҳингни қайирадиган ҳам топилипти-ку? Шунаقا, пешонаси тошга текканда очилади одамнинг кўзи. Шу машинанинг тили бўлса айтсин, қанча сўккансан мени. Қанча эрмак қилгансан. Андишанинг оти қўрқоқ... Энди ўзингта кепсан». Бўривой бу гал ҳам андиша чегарасини бузиб ўтолмади. Дилидагини тилига чиқармади. «Ўзи-ку бўлганча бўпти, меним ўлганинг устига чиқиб тепмайин. Марднинг ишимас бу: Иззай-мўмин — ҳаром».

— Билмадим, раис бова.

Раис яна тутоқиб кетди:

— Ҳей, қанақа одамсан ўзи? Қачон бир нима сўрасам «билмадим», дейсан. Нимани биласан ўзи?! Бирон нарса десанг-чи, ахир, мундай.

Искандар раиснинг бу гапига Бўривойнинг жаҳли чиқмади, аксинча кулгиси қистади. Лекин кулмади. «Қаттиқ савалапти-да». У ўйланиб қолди. Кўзлари машина чироқлари ёритиб кетаётган ўйдим-чукур йўлларда. Ёмғир шаррос қуяр, машина фидираклари тез-тез кўлмакларга тушиб-чиқарди.

— Тўғрисини айтсан майлими, раис бова? — деди Бўривой.

— Хўш, гапир...,

— Борди-ю, мени бирор бекордан-бекорга сўкса, юзимни шувит қилса, ўша одамнинг бетига қайтиб қарамасдим.

Раис ойнадан сигарет қолдигини иргитди-да, орқага суюнди. «Буям бало. Гап нимадалигини тушунганга ўхшайди».

— Лекин, ука, дунёнинг ишлари сен ўйлаганчалик осон эмас-да. Шунача пайтлар бўладики, бегуноҳ эканингни билиб турсанг ҳам танқид қилган одамга қарши бирон нарса деёлмайсан, ҳақлигингни исботлаётмай қоласан. Ичиндағи жинасан, асабийлашасан, ўша одамни болаҳонадор қилиб сўкасан ҳам, аммо кўзига тик қараб бир оғиз сўз қайтаролмайсан. Билдингми, ука?

— Нимага шундай, раис бова? — ўсмоқчилади Бўривой.

— Ким билади дейсан. Балки одамлар ўзидан қўрқар...

— Йўқ, раис бова, ким билади эмас, ҳамма билади. Ундан кейин, одамлар ўzlаридан эмас, мансабидан, столини тортиб олишларидан қўрқадилар. Ахир ҳаммаям шундаймас-ку. — Раис шофёрнинг гапларига жиддий кулоқ солди. — Масалан, мен кимдан қўрқаман, ёки менинг нимамни тортиб олади. Бу машина бўлмаса, бошқаси, бошқасиям бўлмаса, кетмон. Кетмонни ҳеч ким ололмайди.

— Лекин кетмон билан ҳеч қаёққа бориб бўлмайди-да ҳозир.

Бўривой кулди:

— Ҳех, раис бова, қаёққа борардик. Нима қилсак ҳам, ким бўлиб яшасак ҳам, барибир энг сўнгтида кетмонга, кетмончига ишимиз тушади... Бусиз бўлмайди.

Раиснинг фаши келди. У Бўривойни кўпдан бери билар, аммо бунчалик гапдоннитини сезмаганди. Аслини олганда раис шофёри билан ҳеч қачон яқинроқ, самимий гаплашмаган. Искандар раис буни ҳозир биринчи марта ҳис қилди. Шунинг учун шофёрига қарши мик этмади. Қайтанга гап бошлаганидан афсусланди.

— Дурустсан-ку,— деди аччиқ киноя билан. — Шунча гапларни биларкансан-ку, мендан яшириб юрибсан-а. Бўривой раиснинг пичингини фаҳмлади.

— Тўғри гап туққанингта ёқмас экан, — шофёр раисга қараб қўйди.

— Тилинг жудаузун бўлиб кетипти-ку, Бўривой?!

Бу гап Бўривойнинг жаҳлини чиқарди. У озғин, чайир қўллари билан машина рулинни маҳкамроқ сиқиб ушлади. Ўрнидан бир кўзғалиб қўйди.

— Сизга осон: гапим ёқса ёлғондан бўлсаям мақтаб қўясиз, ёқмаса уришасиз, сўкасиз... Менга ўхшаган бечоралар эса...

— Бўлди! Ўргилдим сендақа «бечора»дан... Ўз иззатини билмаган нонкўр! Кийикдай машинанинг рулини тутқазиб қўйибман-а, сен кўрнамакка!

— Нима дўқ қиласиз менга. Бўлди-да, энди. Қачон бир жойдан феълингиз айнаб чиқса, аламини мендан оласиз. Нима, сизга ўйинчоқманми? Нари борса битта аравакашда, истаганимча ҳақорат қиласаверман — қўлидан нима келарди, дейсиз-да. — У тобора қизишиб борарди. Ўзини босмоқчи бўлар, аммо бир ички түғён, дард бунга йўл қўймас, юрагида тош бўлиб ётган дардларини тўкиб солишга ундарди. — Йўқ, ундей эмас, раис бова, мавриди келганда айтиб қўяй, мени кўп калака қиласаверманг. Бўлди! Бошқа чидаёлмайман. Охирги гапим шу: менинг қоп кетадиган давлатим ҳам, сағир қоладиган болам ҳам йўқ. Бир сўққабош одамман. Шунинг учун ҳеч кимдан, ҳеч нарсадан қўрқмайман.

Искандар раис Бўривойга еб қўйгудек бўлиб тикилди. Бўривой буни сезмади. «Бу тирранча мени қўрқитмоқчими ёки ҳаммаси лалми дўқми? Райкомдаги гаплар етмовдими? Тавба! Ҳали бурнини эплаб артолмайдиган зумраша гап қайтараяптими?! Мени ким деб ўйлашти ўзи бу? Райкомдаям менга бунақа муомала қилишмаган-а! Анави секретарь гапирди-қўйида. Заарси йўқ, ҳали янги, яхши билмайди мени. Астасекин тушуниб олади. Яна шунақа катталик қиласа ўзим биламан нима деб жавоб қайтаришни. Мен билан беллашган не-не азаматларнинг пихини қайириб, попугини пасайтириб қўйганман».

— Сен бунақа баландпарвоз гапларингни бас қилгин, бола. Лайлак билан тенглашаман деб чумчуқнинг бути йиртилганини эшиттанмисан?!

Бўривой ўзини тутолмади:

— Мен сиз билан teng бўлмоқчимасман. Сиз кимсиз — Искандар раиссиз, мен-чи, оддий шофёр. Буни биламан. Лекин сизнинг етимчангиз эмасман! Сиз ҳам шуни билиб қўйинг!

— Ўчир унингни! — бақирди Искандар раис. — Менга гап қайтаришни ким қўйипти сенга?! Тилингни...

Бўривой раиснинг гапини охиригача эшитмади. Чапдастлик билан моторни ўчирди-да, машинанинг калитини суғуриб олиб раисга отди:

— Олинг матаҳингизни! — Унинг ним қора, думалоқ, кўзлари яна ҳам йириклишди, рангпар юзлари оқариб кетди. Аъзойи бадани титраб, гапиромай қолди. — Нима мен... Нима мен... си-и-зга к-калака бўлдимми?.. Катталигингизни бошқа одамга қ-қила-сиз... Мен кўтармайман...

Бўривой шартта машинадан тушди-ю, эшикни зарб билан ёпди. У шаррос қуяёттан ёмғирга ҳам, кетмакет гулдираётган момақалдироққа ҳам парво қилмай илдамлаб кетди. Ўчирилмай қолган машина чироқлари ёруғида раис уни аниқ, кўриб турарди. Бўривой кўздан ғойиб бўлгунча икки марта кўлмакка оёғини тиқиб олди. Аммо у ҳеч қаёққа қарамай, ҳеч нарсага эътибор бермай жадал илгарилаб борарди.

Раис ҳанг-манг бўлиб қолди. Бўривойнинг бу дара-жага боришини етти ухлаб тушида кўрмаганди. Бўлмаса, бунақа ғиди-бидилар, э-ҳе, неча марта бўлган. Ҳаммасида ҳам Бўривой ранжиган, кўнглига олган, аммо елкасини қисиб ишини қилиб кетаверган. «Бугун нимага бундай қилди? Қаердан пайдо бўлди бу юрак унда? Ё бирор ўргатдимикан?.. Ҳаммасини кўнглига тутиб, пайт пойлаб юрган экан-да. Ҳа, тирмизак, роса вақтини топди лекин».

Раис босиб-босиб сигарет тортди. Ёмғир зўрайган-дан-зўраяр, машинанинг устида бирор ўйинга тушаёт-гандек далир-дупир қиласади. Ялт этиб чақмоқ чақди. Раис беихтиёр Ёмонжардаги Бургутқояга қаради. Болалигида Ёмонжар, Бургутқоя ҳақида кўп вахимали гаплар эшитганди. Ҳозир уларни эслашга ҳам юраги дов бермади. Назарида баҳайбат қоя момақалдироқ зарбидан қулаб тушаётгандек туюлди. «Падарингга лаънат. Келиб-келиб шу ерда қолдирасанми?!» Раис жаҳл билан тишларини фижирлатди. Шофёри ҳозир олдида бўлса бўридай ғажиб ташларди. «Ҳех, тавба, камбағалнинг орқа томири таранг бўлади, деб бекорга айтишмаскан-да. Сенга ким қўйипти дўнгмўйинликни. Ундан кўра ака-ака деб қўлтиғимга кирмайсанми, аҳмоқ. Бу туришингда гўр бўлармидинг. Ҳаммагаям шунақа хўққилик қилсанг, йиғиштир тахта-ўқловингни деб орқангта тепадики... Сенинг ҳалоллигингу, ор-

номусинг, ҳаммаси бир пул... Ҳали қўзи очилмаган кучукваччасан. Эҳ гўдак! Осмонда юргангага ўхшайсан. Шошмай тур, ўзим тушириб қўяман ерга. Шунда очилади ўша кўр кўзларинг...»

Ёмғир тобора авжига чиқади, йўллар, ариқлар бўтана сувга тўлиб оқади. Раис дам-бадам Бургутқояга қараб қўяди. Ёмонжар томондан ниманингdir увиллаёттани эшитилди. Раиснинг эти увишиб, баданида чумоли ўрмалаб кетди. Бу кўрқувданми, совуқданми — англомади. Бир мишиқи шу қора ёмғирли тунда нотавон қилиб кетгани алам қилди унга. Бўривойнинг орқасидан югурмоқчи, унга етиб олиб роса калтакламоқчи бўлди. «Адабини бериб қўймасам... Тўхта, Искандар! Нималар деяпсан? Урасан. Кимни? Ўғлинг қатори бола билан ёқалашиб ўтирасанми? Йўқ, у безбет ҳеч нарсадан қайтмайди. Ўлар хўқиз болтадан тоймас, қайтариб солса борми... Нима деган одам бўласан? Бирор эшитса гап-сўз кўпайиб кетади. Унга-ку барибир. Қайтанга Искандар раисни урдим деб мақтганади».

Раис шуларни хаёл қилди. Ўрнидан қўзғалишга, машина эшигини очишга қуввати етмас, аниқроғи, ботиномламасди. Плашини елкасига ташлаганча қунишиб ўтирап, фараларнинг хира тортиб бораётган ёруғида чор атрофга олазарак термуларди. Бургутқоянинг учгинасида момақалдироқ жуда қаттиқ гумбирлади. Осмоннинг бир парчаси узилиб тушди назарida.

Чақмоқ, момақалдироқ, кучли ёмғир Искандар раис юрагида ғулғулани оширап, у ғужанак бўлиб қолганди. Раис энди ҳеч нарсани ўйламас, ўйдай олмас эди... Машина чироқлари батамом ўқди. Ёмғир челаклаб қуяр, яқин атрофда йилт этган учқун кўринмасди...

1978 йил.

## КАШФИЁТ

Ўртадаги майдончада бўш жой йўқ: рақсга тушаётганлар билан тўла. Жуфт-жуфт бўлиб ўйнаётган йигит-қизларнинг чехрасида шодлик, қувноқлик туйғуси балқиб турипти. Ҳамма ўзича рақсга тушаяпти: анови йигит қизнинг белидан қучган, қиз эса унинг елкасига бошини қўйганча оҳиста хиром айлайди. Йигит қиз-

нинг қулоғига энгашиб шивирлади чоғи, унинг ёниб турган рухсори яна ҳам қизарди, кўзлари яшнаб кетди, лабига табассум югурди. Бу тарафдаги йигит-қизлар бўлса қўл ушлашмай, ҳозирги мода бўйича белларини эгиб, гоҳ, ўнгга, гоҳ, сўлга шоҳ ташлашади, ирғишлаб ўйнашади. Уларнинг нигоҳларигина бирбирини бирлаштириб турипти. Майдончанинг тўридағи саҳнада созандалар музика асблоларини бор кучи билан چаладилар. Цирк масхарабозларининг кийими сингари енглари осилиб, шалвираб ёттан қизил кўйлакли, қўнғир соchlari қулоқ-чаккаларини батамом бекитиб олган қиз жон-жаҳди билан қайсиdir тиlda ашгула айтаяпти.

Хўрандалар ўзаро мириқиб суҳбатлашишнинг имкони бўлмаганидан ноилож майдончадаги ранг-баранг рақсларга термулиб ўтиришга мажбур эдилар. Лекин бундан ҳеч ким ранжимас, «суҳбатлашиш учун ресторанга кириш шартми, бу ерда ўйнаб-кулиш, томоша қилиш керак-да», деган хаёл билан ҳузур қилиб сигарет тортиб ўтиришар, рақсдан кўз олишмасди.

Фақат бир киши, хув чеккада — ним хира чироқлар этагидаги столда ёлғиз ўтирган йигит шовқин-сурон дарёсидан ташқарида. Қалин, тимқора соchlari елкасига тушиб турган бу йигит қотма, кўринишидан гимнастикачиларга ўхшайди. У тошдан-тошга урилиб шиддат билан оқаётган кўпикдай оппоқ төғ дарёсини томоша қилаётгандай жим, маъюс ўтирипти. Йигит тирсакларини стол қиррасига кўйган кўйи рақс майдончасига маъносиз боқади. Лекин ҳозир у на бировни кўради, на бирон нимани эшитади. Жисми бу ерда — ола-ғовур ресторонда-ю, хаёли бошқа ёқда — яқиндагина бўлиб ўтган йиғилишда.

\* \* \*

Киностудия бадиий кенгашининг йиғилиши бормоқда. Минбарда студия директори. Паст бўйли, думдумалоқ, битта ҳам сочи йўқ боши электр нурида ялтираб турган олтмиш ёшлардаги бу одам гавдасига ярашмаган ингичка, аммо ўткир овозда сўзламоқда:

— Энди, ўртоқлар, айрим камчиликларимиз ҳақида тўхтамоқчиман. Бу камчиликлар шундан иборатки, коллективимизда ишга совуқёнлик, эътиборсизлик, лоқайдлик билан қаровчилар бор. Боргина эмас, бун-

дайлар кўпайиб кетаяпти. Мана шуниси бизни ташвишга солмоқда. Масалан, Жамшид Валини олайлик. Бу йигит жуда талантли, билимли режиссёларимиздан, ёш бўлишига қарамай анчайин тузук фильмлар ишлади. Унинг фильмлари фестивалларда, кўрикларда мукофотлар олди. Бу ёш режиссёрнинг, қолаверса, бутун колективимизнинг ютуғи. Буни ҳаммамиз яхши биламиз. Лекин масаланинг бошқа томони бор, ўртоқлар. Жамшид Вали, назаримизда, ана шу ютуқлардан маст бўлиб қолганга ўхшайди. Семизликни қўй-кўтаратди деганлариdek, эрта келган шуҳрат бу кишининг кўзини қамаштириб қўйған кўринади. Оқибатда ўзига ортиқча бино қўядиган, унча-мунчани менсимайдиган қилиқ чиқарди. Булар, шубҳасиз, ишга безътибор қарашга олиб келади. Жамшид Вали янги фильм ишлашга киришганига бир йилдан ошди. Бу ҳаммага аён факт. Лекин ҳалигача арзирли бирон иш қилгани йўқ. Ваҳоланки, бу фильм халқимизнинг Гитлер Германияси устидан қозонган Буюк ғалабаси байрамига колективимизнинг совраси бўлиши керак. Байрамга эса жуда оз вақт қолди. Бу қутлуғ ишни сизга ишонганимиздан, талантингизни ҳурмат қилганимиздан топширган эдик,— деди директор Жамшидга қараб. У пиёладаги чойдан бир ҳўплади-да сўзида давом этди. — Менимча, сиз бу ҳурмат ва ишончни тўғри тушунмадингиз. «Мен ишламасам, бошқа одам ишлаёлмайди бу фильмни», деб нотўғри ўйладингиз. Ваҳоланки, студиямизда талантли режиссёлар кўп. Уларнинг фильмлари ҳатто халқаро анжуманларда обрўли совринлар олган. Бу ҳаммамизга, жумладан, сизга ҳам маълум.

Жамшид директорга зимдан қараб-қараб қўяр, аммо сўзини бўлишга истиҳола қиласарди.

— Бадий кенгашнинг қарорини чиқариб, бошқа режиссёрга олиб беришимиз ҳам мумкин. Лекин бундай қилиш яхши эмас, кўзингизга хунук кўриниб қоламиз. Ундан кейин, бунга бизнинг виждонимиз йўл қўймайди... Бу ҳақда олдин ҳам бир неча марта айтганмиз. Ваҳоланки, доимо сабаб битта: «Бош ролни ижро этадиган актёр тополмаяпман». Назаримизда, бу дангасалик, ишга эътиборсизлик, энг ёмони, коллективга ҳурматсизлик. Ўз хатосини хаспўшлаш учун асоссиз бир баҳонадан бўлак нарса эмас! Наҳотки, шун-

дай катта республикамиизда битта талантли актёр то-  
пилмаса?! Ваҳоланки, ўнлаб театрларимиз бор. Юзлаб  
актёrlаримиз бор. Уларнинг орасида талантлilари  
йўқми? Бор, албатта. Ҳали айтганимиздек, бу гап ба-  
ҳона, холос. Қидирса топилади. Фақат изланиш керак,  
ҳа изланиш! — Директор яна чой ҳўплади. — Наза-  
римда, сиз Жамшид Вали, ҳали териси қотмаган шуҳ-  
рат ва обрўларингизга ишониб изланишни, қидириш-  
ни йифиштириб қўйганга ўхшайсиз. Ўзингизни буюк  
режиссёр деб атайсиз, чоғи. Энди актёrlар менинг  
ёнимга ялиниб келсин, деб юрган бўлсангиз, бу фик-  
рингиз нотўғри. Актёrlар кеълмайди. Уларни чақириш,  
таклиф қилиш керак. Ҳар қанча буюк бўлсангиз ҳам  
изланишни сира тўхтатманг. Шон-шуҳрат, обрў-эъти-  
бор талантга ўхшайди. Биласизми, улувлар нима де-  
йишган? Талантни асраш, тарбиялаш керак дейишган.  
Худди шундай шуҳратни ҳам авайлаш керак. Ҳа, авай-  
лаш зарур. Бўлмаса қафасдан чиқдан бедана сингари  
пир этиб учади кетади. Кейин қайта қўлга тушириб  
бўпсиз. Шунинг учун ишлаш, изланиш керак. Бу ёлғиз  
Жамшид Валига эмас, ҳаммага бирдек тегишли. —  
Директор чойдан яна бир ҳўплади-да, жойига бориб  
ӯтириди.

Яна икки киши сўзга чиқди. Улар ҳам студиянинг  
ютуқлари, камчиликлари ҳақида фикр айтишди. Гап  
айланиб Жамшид Валига келиб тақалаверди. Нотиқ-  
лар бу борада асосан директорнинг фикрини маъқул-  
ладилар. Ниҳоят, Жамшид Вали сўз сўради.

— Марҳамат,— деди мажлиста раислик қилувчи.—  
Сўз режиссёр Жамшид Валига.

— Мен сўзга чиқдан нотиқларнинг, жумладан, хур-  
матли директоримизнинг фикрларига қўшиламан. Аммо  
бу ерда айтилган айрим фикрлар менга нисбатан тух-  
мат эканлигини айтмасдан иложим йўқ. — Мажлис  
аҳди бирданига Жамшид Валига қаради.— Аввало мен  
шон-шуҳрат тожини кийдим, деб керилганим йўқ. Ким-  
ни менсимабман. Тўғри, фильм ишлаш чўзилаяпти.  
Буни эътироф этаман. Лекин мендан бўлак ҳеч ким  
ишлаёлмайди, деган кайфиятда атайлаб чўзаёттаним  
йўқ. Студияда талантли режиссёrlар кўплигига шубҳа  
қилмайман. Аксинча, улардан кўп нарса ўрганмоқда-  
ман. Жамшид Вали гапирган сари ҳаяжонланарди, икки  
чаккасига ёйилиб кетган узун, майин соchlарини дам-

бадам орқага тараб қўярди. — Бош роль ижрочисига келсак, шу образга мос актёр тополмаётганим рост. Бу баҳона эмас! Тўғри, талантли актёrlаримиз кўп. Улар театрда ҳам, кинода ҳам ажойиб образлар ижро этиб келишмоқда. Буни инкор этмайман, уларнинг маҳоратига ҳам шубҳа қилмайман. Лекин бу роль учун ўзим тасаввур қилган актёри учратолмаяпман. Гап мана шунда. Ахир, ҳаммангиз биласиз, ҳозиргина директоримиз ҳам таъкидлаб ўтдилар, бу фильм қутлуғ байрамга багишланган. Шундай бўлгач, шошма-шошарликнинг, байрамгача тугатиш ниятида палапартиш ишлашнинг нима кераги бор?! Фильм гарчи ғалаба байрамига багишлансада, ҳалқимизнинг урушда кўрсатган бетимсол жасорати, матонати ҳақида ҳикоя қилувчи бақувват экран асари бўлиб қолиши лозим-ку. Байрам кунлари беш-олти марта кўрсатилиб, кейин экрандан тушиб кетадиган фильмнинг нима кераги бор? Шунча вакт, шунча меҳнат, қанчадан-қанча маблағ кетгандан кейин умрбод қоладиган фильм бўлсин-да! — «Тўғри, тўғри» деган овозлар эшитилди. — Йўқ ўртоқлар, мендан кетгунча, эгасига етгунча қабилида ишламайман. Бунақа иш услуби ижодда, санъатда кетмайди. Бу айрим қурилиш ташкилотларининг услугбини эслатади менга. Бирон бир объектни фалон байрамга совра тариқасида фойдаланишга топширади-да, байрам ўтгач, ремонт қилишга тушади. Хўш, бундан кимга фойда-ю, кимга зарар?! Борингки, қурилиш объектларини ремонт қилишар экан, лёкин фильмни-чи? Уни ҳам ремонт қиламиزمи? Бу кулгили гап, ўртоқлар! — «Тўғри, тўғри», деган овозлар энди баралла янгради. Бу овозлар Жамшидга дадда, қувват берди. — Менинг фикрим шу — тасаввуримдаги актёри топмагунимча фильмни суратта ололмайман. Бўлмаса бошқа режиссёрга олиб беришларингиз мумкин. Майли, ким истаса ишлайверсин, мен сира хафа эмасман.

Жамшид минбардан бир қадам юриши билан зални гулдурос қарсаклар тутди. Унинг юzlари, қулоқларигача қизиб, қизариб кетганди.

\* \* \*

Музика тугади. Рақсга тушаётганлар ўз ўринларига бориб ўтиришди. Жамшид оғир тин олиб, стул суюнчирига ташлади ўзини. Столдаги «ВТ»дан олиб тутат-

ди. «Йўқ», хато қилмадим,— деб ўйларди у. — Нима бўлса ҳам кўнглимдаги гапни айтдим. Ёмон кўришса кўришар. Бошлиқларга хунук кўринмаслик учун виж-донсизлик қилиш керакми. Қаллоблик ёмон, аммо қаллобликни кўриб билиб индамаслик ундан ҳам ёмон! Майли, нима бўлса бўлар. Нари борса фильмни бошқа бирорвга олиб берар. Бўлак нима ҳам қиласди.

— Жамшид, ўзингмисан? — қаршисидан унинг синф-дош дўсти Зоир келарди.— Боядан бери қараб-қараб қўяману, сенмисан, ё бошқами, деб иккиланаман.

— Салом Зоир, кел, оғайнин.

Зоир унинг ёнидаги стулга ўтирди:

— Хўш, тинчликми? Ёлғиз ўзинг ресторанга кира-диган одатинг йўқ эди-ку.

— Шунақа бўлиб қолди.

— Нима бўлди, тинчликми ўзи? Кайфиятинг ҳам чатоқроқ.

— Тинчлик, дўстим. Хўш, ўзинг кимлар билан ўти-рибсан?

— Ҳамкасларимдан бири ўғил кўрувди. Шуни ювгани...

— Ҳа, яхши... Бўпти, оғайниларингни ёнига бора-вер. Кейин бирор кун бафуржга гаплашармиз.

— Йўқ, улар кетищди. Мен сенинг ёлғиз ўтирган-нингни кўриб, ҳайрон бўлдим-да, улардан узр сўраб қолдим.

— Чакки қилибсан. Бирга келгандан кейин бирга қайтиш керак эди.

— Зарари йўқ. Тушунадиган йигитлар.

— Ҳар ҳолда яхши қилмалсан. Ҳай, майли, бўлар иш бўпти. Ўтир. Бир оз гаплашайлик, кейин кета-миз. — Жамшид графиндаги ароқдан иккита қадаҳга қуиди. Ичишди.

— Қани, гапирчи, нима гап ўзи?— сўради Зоир. Жамшид бугун киностудияда бўлган мажлисни қис-қача гапириб берди.

— Бошингни қотириб нима қиласан, оғайнин. Шартта ишлаб беру пулингни олиб ялло қилиб юравер-да. Асабингни бузиб, унинг устига раҳбарларга ёмон кўри-ниб нима қиласан. Ҳозирги вақтда «сизники маъқул, aka», деганнинг ошиги олчи.

Жамшид сигарет тутунини чуқур тортаркан, Зоирга еб қўйгудек бўлиб тикилди.

— Менга қара, Зоир, bemornинг касалини ўзинг атрофлича текшириб, операция қилиш керак деган хулосага келгач, операция столига ётқизасанми ёки бошқа бирорнинг гапига ҳам ишониб операция қилаверсанми?

— Буни нима қизифи бор сенга? — ҳайрон бўлди Зоир.

— Саволимга жавоб бер! Фақат тўтрасини айт!

— Ўзим маълум хулосага келганимдан сўнг...

— Ҳамишами? Ёки бирорнинг хулосасига ишониб операция қилган пайтларинг ҳам бўлганми?

— Нима десам экан сенга... Умуман бўлган... чунки биз медиклар бир-бири мизга ишонамиз. Врачларнинг хулосасида ҳар хиллик бўлмайди.

— Ёлғон! — кескин гапирди Жамшид. — Медицина хулосаси ҳамиша ҳам бир хил чиқмайди. Бу мумкин эмас. Ҳар бир врач ўзича хулоса чиқариши керак.

— Жамшид, сенга нима бўлди? Асабларинг чатоқ. Чарчабсан шекилли. Жамшид миқ этмади. Тўсатдан рўпарадаги икки улфатта термулиб қолди.

— Менга қара, Зоир, ҳув аваби йигитга қара, кўраяпсанми? Сув ичаяпти-ку.

Зоир ўша томонга ўтирилди.

— Хўш, нима бўлибди.

— Бордию сен уни танимайсанми?

— Қизиқ гапларни гапирасан-а. Қаёқдан таний уни. Нима, ораларингдан бирон гап ўтувдими.

Жамшиднинг ҳозиргина асабийлик акс этиб турган афти-ангорига қувноқлик югурди. У ёш боладек илжаяр, ўзини тутиб ололмасди.

— Дўстим, агар ўша йигит артист бўлса ҳеч иккиланмасдан пробасиз кинога олардим. Мен тасаввур қилганим, қидириб юрганим ана шу йигит. Эшитаяпсанми, Зоир, ана менинг қаҳрамоним.

— Жамшид, ҳазиллашяпсанми ёки мени майна қиласанми?

— Ҳазил-пазили йўқ, оғайни. Ростдан айтаяпман. Қарагин-а, кулишлари, ўзини тутиши, ўтириши, ҳаракатларигача — ҳаммаси уники, менинг қаҳрамонимники. — У ўша йигитдан кўзини узмас, йигит бўлса бундан мутлақо бехабар дўсти билан сұхбатлашиб кулиб ўтиради. Жамшид қадаҳга ароқ қуиди-да, Зоир-

нинг борлигини ҳам унутгандай шарт ичиб юборди. — Эй, қодир ҳаёт, нега у йигитни актёр қилиб яратмадинг... Йўқ, бари бир бу йигитни чақираман. Артист бўлса ҳам, бўлмаса ҳам шу йигитта бераман ролни. Ҳаракатларида, қарашларида актёrlик элементлари бор. Бажаради. Юрагим сезаяпти буни. — У бу гапларни кимга айтаяпти. Ўзигами ёки Зоиргами, иккови ҳам билмасди.

— Жамшид!

— Жон оғайни, тур ўрнингдан, ўндан сўраймиз кимлигини, мен таклифимни айтаман.

Зоир ўзича елкасини қисиб қўйди:

— Майли, менга бари бир. Сўрасак сўрадик-да. Лекин кулги бўламиз, дўстим.

Жамшид жадал ҳалиги йигитнинг ёнига борди. Орқасидан Зоир эргашди.

— Кечирасиз, оғайнилар, тутатиб олсан майлими?

— Йигит Жамшидга бир қарадиу гутурт ёқиб тутди.

— Раҳмат. Сиздан бир нарса сўрамоқчиман. Қаерда ишлайсиз?

Йигит кулди. Шеригига қаради.

— Нима эди? — деди шериги.

— Сир бўлмаса, албатта.

— Сирли жойи йўқ, театрда ишлайман.

— Нима?! — Жамшиднинг қўлидан сигарет тушиб кетди.

\* \* \*

Режиссёр Жамшид Вали қаттиқ ҳаяжонда. Бир неча дақиқадан сўнг унинг янги фильмни жамоатчилик кўригига қўйилади. Қандай қабул қилишар экан, нима фикр билдиришаркан...

Фильм намойишидан кейин унинг муҳокамаси бўлди. Сўзга чиққанлар фильмни истеъдодли режиссёр Жамшид Валининг навбатдаги ютуғи сифатида баҳолашди.

Муҳокама сўнгида киностудия директори сўзлади:

— Биз Жамшиджоннинг талантини ўз вақтида пай-қаганмиз. Шунинг учун ҳам доимо унга ишониб масъ-улиятли фильмларни топшириб келмоқдамиз. Мана, исботи ҳозиргина кўрганингиз янги фильм. Ваҳоланки, уни ишлашга ишқибоз режиссёrlар кўп эди, лекин биз Жамшиджонга ишондик. У биз кутгандай

фильм ишлашини билардик. Айниқса, актёр танлай билиш маҳорати ҳаммамизни хурсанд қилди. Фильмдаги бош қаҳрамон ролини ижро этган актёрги шу режиссёrimiz кашф қилди. Бу фильм студиямиз колективининг ғалаба байрамига муносиб түёнаси. Шундай ажайиб фильм яраттанингиз учун ташаккур сизга! Ўйлайманки, томошабинларга ҳам жуда ёқади бу фильм ва унинг умри боқий бўлади. Шошмасдан, ўз ишига пухта киришиб ишлашнинг, ролларга тўғри келган артистни олавермасдан, шу образ моҳиятини очиб бера оладиган актёр топмагунча тинмай изланинг са-марасини кўрдингизми? Бу жиҳатдан Жамшид Вали гарчи ёш бўлса-да, кўпларга намуна қилиб кўрсатса арзийдиган ишларни бажармоқда. Ваҳоланки, коллек-тивимизда шошма-шошарлик, пала-партишлик билан фильм ишлайдиган, оқибатда фильмлари бир-икки марта намойиш қилиниб, йўқ бўлиб кетадиган режиссё-ларимиз ҳам бор. Ҳа, бундан кўз юмолмаймиз...

Директор узоқ гапирди. Унинг сўзида Жамшид Валига ҳамду сано, айрим ношуд режиссёrlарга тан-қид уфуриб турарди. Жамшид фильмнинг бош қаҳрамони образини яратган ёш актёрга маънодор жил-майиб қўяди.

Мұхқомадан кейин ҳамма Жамшид Валини қиз-гин табриклади. Бундан бир неча ой илгари деярли ҳеч ким танимайдиган, кинога тушишни умуман хаё-лига келтирмаган ёш актёр ҳам энди бадиий фильм бош қаҳрамони сифатида ҳамманинг эъзози-эътибо-рида. Буни ўйлагани, чукурроқ ҳис қилгани сари унинг қувончи,чуваккина мана бу режиссёрга нисбатан мин-натдорлик туйғуси қалбидан тошиб кетар, ҳаяжонини босолмасди...

1974 йил.

## ИҚРОР

Алмат ака маориф бўлимидан кўнгли кўтарилиб чиқди. Оғир бир юқ, атрофни қуршаб олган мана шу оқсоч тоғлардай залворли ташвиш анчадан бери унинг елкасидан қаттиқ босиб турар эди. Энди у ўзини қуш-дай енгил ҳис қилди.

Истироҳат боғи томонга юрди. Бир нафас ёлғиз қолгиси, ўзи билан ўзи сұхбатлашгиси келди. Кекса чинор тағидаги скамейкага ўтириди. Чинорнинг сарғайған барглари «ширт» етиб узилади-да, пирпираб ерга учади. Шапалоқдай барг Алмат аканинг ёнгинасига — түшди. У баргни қўлига олди: сап-сариқ. «Ҳаёт қонуни... Шу барг баҳорда тангадай япроқ ёзади. Ўшанда одамнинг дилини яйратади. Энди бўлса... Ҳеч ким эътибор бермайди. Балки босиб, эзгилаб ўтади. Инсон ҳаёти ҳам шунга ўхшаш. Умрнинг кузи... Уни пайқаганлар бор, пайқамаганлар бор. Қай бири маъқул?»

Барг бандидан ушлаб юзига сийпалади. Нигоҳи ҳамон чинор шохларида. Чети йиртилган сап-сариқ барг унинг дикқатини тортди. У нима учундир дириллар эди. Қизиқ... Нега титраяпти? Яшаш учун курашиб керак, дегани шуми? Наҳотки? Балки тўғридир? Мен-чи? Бўйин бердимми? Умр кузини эрта тан олдимми? Бўлмаса нега ариза ёздим?

Алмат аканинг ҳаёли ҳозиргина район маориф бўлими мудири билан бўлган сұхбатта кўчди. Мудир Алмат аканинг аризасини ўқимади. Бу масалада олдин ҳам бир неча марта келган, ҳар гал «ўйлашиб кўрамиз», деб қайтариб юборган.

Мудир Алмат аканинг озрин, ажин босган юзларига, маъюс кўзларига бокди. Бу кўзларда зигирнинг гулича бўлса-да, сохталик сезмади. Алмат аканинг қайси гапида, қайси ишида ғайритабиилик кўрган?

— Хўш, сабаби нима ўзи, домла? Очирини айтингчи? Ёки бирор гап ўтдими? — деди мудир.

Алмат aka ўтирган жойида бир қўзғалиб қўйди.

— Нимага ундан дейсиз. Ҳеч гап ўттани йўқ. Коллективимиз яхши, ҳамма ҳурмат қилади.

— Шундай бўлса ишлайвермайсизми? Мактабга сиздай одамнинг бош бўлиб турганига нима етсин. Ўқувчиларгаям, ўқитувчиларгаям, айниқса, ёш муаллимларга сизнинг тажрибангиз, маслаҳатингиз жуда зарур-ку.

— Қобилиятли ёшлар бор. Биз энди кексайиб қолдик.

— Биринчидан, ҳали бақувватсиз, иккинчидан, қари билганни пари билмас, дейдилар. Сизнинг мактабга келиб-кетиб, у-бу ишларга бош бўлиб туришингиз коллективнинг баҳти-ку...

Алмат ака қўлидаги баргни икки бармоғи орасида айлантириди. «Баҳт. Уни ким қандай тушунади? Мендай кекса ўқитувчи, унинг устига мактаб директоридан саволига жавоб ололмаган ўқувчи нима деб ўйлайди?..»

Дарсдан кейин савол-жавоб бўлди. Суҳбат адабиётнинг бугунги аҳволи, ҳозирги ёш шоир ва ёзувчилар ижоди ҳақида борди. Ўқувчилар кўп янги номларни санашиди. Уларнинг шеърларидан ўқиб беришди, китоблари хусусида фикрларини айтдилар. Очиги, Алмат ака бир оз довдираబ қолди. Бу ёшларнинг кўпини эшитган, у-бу нарсасини ўқиган бўлса-да, тан олиш керак, ижодини тўлиқ билмас эди. Шунинг учун ўқувчиларнинг саволларига аниқ жавоб беролмади, чайналиб қолди.

Ўша куни дарсдан жуда ҳорғин чиқди. У бутун муаллимлик фаолиятида кўп қийинчиликларни бошидан кечирди, оғир йилларда, қийин шароитларда дарс берди. Лекин бирон марта чарчаганини, руҳи тушганини эслаёлмайди. Бутун жуда эзилди. Умрида биринчи марта ўзини ожиз сезди. «Демак, бизнинг давримиз ўтибида-да...» Хаёлига келган биринчи фикр шу бўлди. «Ўқувчиларнинг саволига жавоб беролмаган, лоақал улар билган нарсани билмаган ўқитувчи ўқитувчими? Дарслиқдаги гапларни ўқиб бериш билан иш битмайди».

Ўз устида ишламайдиган, билимини ошириб, янгиликлардан хабардор бўлиб бормайдиган ўқитувчиларни Алмат ака кечирмас, буни сира яширмай, уларнинг юзига айтар эди.

Бутун эса ўзи... «Қачондан бери шундай бўлиб қолдим? Балки анча бўлгандир, сезмагандирман?! Нега энди ўсиб келаётган авлоднинг фикрини ўтмаслаштирамиз?! Уларнинг мулоҳазасини нима учун ўз қолипимизга солишимиз керак? Ўқувчиларнинг келажаги, тақдири менга, менга ўхшаганларга боғлиқ-ку. Йўқ, энди тамом! Ҳар кимнинг ўз даври бўлади. Аммо бу давр мутлақ эмас! Буни тушуниш, англаш даркор. Кимки буни ўз вақтида тушунса, ҳаётнинг шиддатли оқими билан баравар сузишга қурдати етмаганигини пайқаб, ўзини қирғоқча олса — шунинг ўзи баҳт!..»

Директор шулар ҳақида ўй суринг ўтирганди, эшик тақиллади. Дарҳол ўзини қўлга олди, костюмини, галстугини тўғрилади.

— Мумкинми, домла?

Уч йил бурун университетни битириб келган ёш адабиёт муаллими эшикни очди.

— Келинг.

Ёш ўқитувчилар орасида Алмат аканинг собиқ ўқувчилари анчагина. Директор уларнинг ҳаммасига бир устоз каби меҳрибонлик қиласар, зарур маслаҳат ва кенгашини аямасди. Мана бу йигитга эса унинг хурмати ўзгача. Бу ҳам адабиётчи бўлгани учунми, камтар, ишчанлиги туфайлими — ҳар қалай Алмат ака аниқ сабабини билмайди — лекин алоҳида бир меҳр билан яхши кўради. Ҳозир юраги сиқилиб, ўзи билан ўзи баҳслалиб турганда севимли шогирдининг кириб келиши унинг айни кўнглидаги иш бўлди. У ўрнидан туриб, шогирдига пешвоз юрди.

— Бир маслаҳат бор эди, домла.

— Ўтилинг-чи. Хўш, нима экан?

— Районимизга бир-иккита ёш шоирлар келишипти. Уларни мактабимизга чақириб учрашув ўтказсак. Баҳонада адабиётимизнинг бугунги аҳволи билан яқинроқ танишар эдик. Улардан кўп нарса сўраб-билиш мумкин. Ўқувчиларимизга ҳам нафи тегади.

Синфдаги савол-жавоб Алмат аканинг ёдига тушди. Лекин буни шогирдига сездирмади.

— Майли,— деди лоқайдлик билан. Кейин қўшимча қилди: — Кимлар экан?

Муаллим районга келган ёш шоирларни айтди. Алмат ака бармоқларини стол устида ўйнатар экан, «О, жуда яхши! Зўр шоирлар. Улар билан учрашув ўтказиши керак, жуда яхши...» деди. Аслида уларнинг биронтасини ҳам тузукроқ билмас эди.

— Бўлти, гаплашиб келинг,— деди. — Қачон ўтказмоқчисиз учрашувни?

— Эртага чақирсанм девдим.

— Майли. Мени эртага облонога чақиришган. Завучга тайинлайман, биргалиқда уюширинглар. Агар уларнинг ёнида китобидан бўлса, кутубхонамиз учун дастхат ёздириб олинг.

Ёш муаллим бир оз бўшаши.

— Сиз қатнашмасангиз қандай бўлади?

— Зарари йўқ. Нима қипти? Мен бормасам бўлмайди-да. Индинга ўтказайлик десам, уларнинг вақти борми-йўқми, балки кетиб қолишадими?

— Облонога бир кун кейин борсангиз-чи? Ўзингиз иштирок этганингизда яхши бўлар эди-да. Ҳам директор, ҳам тажрибали адабиёт ўқитувчиси. У шоирларни яхши биласиз...

Ёш муаллимнинг охирги сўзлари Алмат акага киноя каби эшитилди. «Шоирларни яхши биласиз». У ҳозир овозини борича «Йўқ, мен ҳеч кимни, ҳеч нарсани билмайман! Менинг даврим ўтди!» деб бақиргиси, шу билан кўнглини сал бўшаттиси келди. Бироқ Алмат ака... Алмат Муродов учун бундай қилиш ярашмас, ярашмайдигина эмас, умуман ақдга сифмайдиган бир гап эди. Унинг кучли иродаси, кенг мулоҳазаси, катта ҳаётий тажрибаси ҳар доимгидек, бу сафар ҳам бир лаҳзалик енгил ҳиссиётдан устун чиқди. Ўрнидан оғир турди-да, шогирдининг ёнига келиб, елкасига кўлини ташлади.

— Тушунаман, ўғлим,— деди у оталарча вазминлик билан,— лекин сиз ҳам мени тушунинг: мен учрашувда қатнашолмайман. Бунинг учун мен эртага облонога бориш-бормаслигимнинг аҳамияти йўқ!.. Сабабини сўраманг. Мавриди келса айтарман.

Бу гапдан ёш муаллим ҳайратга ту shedi. «Нима гап ўзи? Бу гапларни Алмат ака айтяптими?» Қулоқларига ишонмади. Рўпарасида турган одам ўша — ўзига илк бор ҳарф ўргатган, қалбида адабиётта иштиёқ уйғотган, қанча-қанча ёшларга устозлик қилган, посёлкада-етти ёшдан етмиш ёшгача ҳамма домла, деб ҳурмат қиласиган Алмат Муродов турганига шубҳа қиласигандек унга синчковлик ила тикилди.

Буни Алмат ака сезди. У ҳам шогирдининг жавди-раб турган кўзларига қаради-да:

— Шундай, ўғлим!— деди.

...Алмат ака чуқур хўрсинди. Чинорнинг кўм-кўк баргига термилди. «Хўш, ўша ёш муаллим қандай тушунади бу баҳтни? Баҳт эмиш. Юз меҳри — иссиқ қабилида индамай юришганини, юзига солмаёттанини баҳт, деб ўйлаш керакми?..»

...— Балки шундайдир,— деди Алмат ака. — Лекин мен учун бундай баҳтни кўтариш оғир. Ўйинга ярамай қолганини сезиб ўзини четта олиш, ёшларга ўрин бе-

риш даркор. Ўзини ҳам, ўзгаларни ҳам қийнаб, кўзға чиқдан говмиччадай хунук кўриниб юриш наҳотки баҳт бўлса?

Мудир ўйланиб қолди. Алмат акага синовчан разм солди. У нигоҳини бир нуқтага қадаб, индамай ўтирад эди. Мудир охирги марта Алмат аканинг қўйнига қўл солди.

— Мен сиздан буни кутмаган эдим,— деди ранжиган оҳангда. — Сизни сираям шунаقا одам деб ўйламовдим. — Алмат ака ялт этиб мудирга қаради. Унинг бу қарашида «Мен қанақа одам эканман? Нима демоқчисиз?» деган кескин савол зоҳир эди. Мудир эса буни сезмаган каби ўсмоқчилади. — Наҳотки, шу қадар шахсиятпараст бўлсангиз?

Алмат ака аввал оқарди, кейин уят иш қилиб қўйган боладай қизариб кетди. Илкис нима дейишини билмай қолди.

— Бу нима деганингиз?— деди ниҳоят.

Мудир иложи борича ўзини жиддий тутишга, ҳазилини сездирмасликка ҳаракат қилди. Гапириш оҳангини ҳам ўзгартирмади.

— Тўгри-да! Шахсий ҳаловатингизни ўйлаб ҳам-масидан воз кечяпсиз. Жамият манфаатидан ўзингизни олиб қочяпсиз. Бошқа мактабларда шундай ўқитувчилар борки, пенсияга чиққанига бир неча йил бўлганига қарамай, ишламасликни хаёлига ҳам келтирмайдилар. «Кўп йиллик ҳалол хизматларингиз эвазига энди ҳордиқ олинглар», деб қанча айтдик. Аммо улар «Танамда жоним бор экан, жамият учун, ҳалқ учун хизмат қиласман! Майли, мурдам чиқсин мактабдан», дейишади. Уларни ҳақиқий педагог, жамият учун, ҳалқ учун умрини бахшида қилган фидойилар деса бўлади. Сиз эса ҳали ўшалардан ёшсиз, лекин «Кексайдим, чарчадим, соғлигим ёмон, ишдан бўшатинг», дейсиз.

Мудир кимларни назарда тутаётганини Алмат ака билади. Районда беш-олтита кекса ўқитувчи бор. Ўқитувчилар етишмаслиги туфайли бир вақтлар муаллим бўлиб олган. Аслида ўз исминиям бехато ёзолмайди. Лекин буни ўзлари тан олмайдилар. Бу ҳақда сўз кетдими, «биз ўшлагимизда...» деб гапни узоқдан бошлашади. Ўқувчиларнинг масхара қилиши ҳам, педагоглардаги дашномлар ҳам, қизим сенга айтаман,

келиним сен эшит қабилидаги учиреклар ҳам уларга таъсир этмайды... Ўрдак каби сиртига сув юқтирумайдилар...

Ўзини ўшаларга менгзагани учун Алмат ака мудирдан ранжиди. Вужуди жимирилаб, бошига иссиқ қон югуруди, икки чаккаси қизишиб кетди.

— Менга қаранг, ҳурматли мудир,— деди салмоқлаб. — Борди-ю, ҳазил қилаёттган бўлсангиз, сиздан қаттиқ илтимос, иккинчи бунаقا ҳазилни йиғиши-ринг, агар рост айтаёттган бўлсангиз...

У гапиролмай қолди. Ҳазили қалтис чиққанини мудир сезди. Стаканга сув қўйиб, Алмат акага узатди.

— Домла, домла... Қўйинг-э, наҳотки, ҳазилни тушунмасангиз. Мен сизнинг кимлигингизни билмайманми?!

Алмат ака бир қултум сув ичиб, бошини кафтлари орасига олди. Тирсакларини столга тираганча узоқ жим қолди. Мудир саросимага тушиб, кўрқиб кетди. «Хе, шу ҳазилни чиқарганинг падарига лаънат!» Алмат ака-га яқин борди.

— Доктор чақирайми, домла?

Алмат ака «йўқ» деган маънода бош ирфади. Бир оздан кейин қўлларини туширди. Ожизлик билан мудирга қаради.

— Кечиринг, домла. Ҳазиллашаман, деб..

— Ўша ватанпарварлар, жамиятта жонини қурбон қилган фидойилар билан ишлайверинг-да,— деди Алмат ака жуда синиқ товушда. — Мендек шахсиятпаст, худбин одамни нима қиласиз. Ундан кўра аризамга тезроқ қўйиб, тезроқ қутулмайсизми! — У энди ўзига ўзи гапирав эди. — Шахсиятпаст эмишман. Салкам эллик йил муаллимлик қилиб, ҳеч кимдан бундай гапни эшитмовдим. Ёшим бир жойга борганда шахсиятпастлик қиласанми? Бўшатинглар, қувватим етмаяпти, ҳозирги болаларга ақдим, билимим ожизлик қилиб қолди, энди ёшлар ишласин, десам худбинлик бўладими... Нега бир-биримизни тўғри тушунмаймиз? Ҳайронман, ёлон гапга дарров ишонишади-ю, рост сўзингга қулоқ солишмайди!

У бир лаҳза жим қолди. Нафасини ростлади. Кейин мудирга юзланди:

— Жамият тараққиётiga қўшилиш, бу тараққиёт билан баравар юриш қўлимиздан келмагач, ортиқча чиранишнинг нима кераги бор? Борди-ю, мен шуни сезган бўлсам, шуни тан олиб турсам — бу айбми? Олдин ҳам неча марта келдим хузурингизга. Ҳар гал пайсалга соласиз. Ҳурматингизни қилдим, индамай қайтиб кетавердим. Энди эса...

Алмат аканинг мактаби райондаги энг илфор, ҳамма томондан намунали. У директорликни топширса, мактабнинг обрўси нима бўлади? Янги директор бу обрўни сақлаб қола оладими? Ахир, мактаб бутунрайоннинг фахри-ку!

Мудирнинг ташвиши бу ёқда эди. Директорнинг аризасига қўл қўймай галга солишининг боиси ҳам шу.

Алмат ака уни ишонтириди: Мактабнинг обрўсини сақлаб қола оладиган, шухратини яна ҳам ошириш қўлидан келадиган ёшлиар бор...

Бу гапдан мудирнинг кўнгли ўрнига тушди...

Алмат ака аввал қўлидаги баргнинг томирларига, сўнг ўзининг қўл томирларига разм солди. Озғин қўлларида бўртиб турган томирлар ҳали унча-мунча ишни писанд қилмаёттандек туюлди. У ички бир қони-қиши, қандайдир хурсандлик хиссини туйди...» Директорликдан бўшаганим билан қиладиган ишларим кўп ҳали... Ўғил-қизларим, невараларим...»

— Ассалому алайкум, домла.

Алмат аканинг хаёли бўлинди. Қаршисида шогирди — ёш адабиёт муаллими турарди.

— Ёлғиз нима қилиб ўтирибсиз бу ерда?

Алмат ака унга ёнидан жой кўрсатди.

— Ўтиринг. Шошилмаяпсизми? Қаерга кетяпсиз?

— Йўқ. Кинофикациядаги ўртоғимнинг олдига бораётган эдим. Янги фильм келганмиш. Ўқитувчилар ҳаётидан экан. Гаплашиб кўрай, мактабимизга олиб бориб кўрсатса, яхши бўларди.

«Директорликка бунинг номзодини кўрсатиб чакки қилмадим. Жуда куйди-пишди йигит. Ўз фанини, умуман мактабни, болаларни яхши кўради. Ана шундайлар директор бўлгани тузук».

— Ҳозир сизни ўйлаб, ўтиргандим.

— Мени? Қизиқ-ку!

— Ҳа, сизни, — деди Алмат ака шогирдига синовчан тикилиб. — Биласизми, мен ҳозир районо мудирининг оддидан келяпман...

Алмат ака бўлган гапнинг ҳаммасини айтиб берди.

— Бундан бир ойча илгари ёш шоирлар билан учрашув ўтказмоқчи бўлганингизда мен қатнашолмайман, деганим эсингиздами? Сабабини энди билдингизми?

— Қўйинг домла, биз адабиётни сизчалик тушунишимиизга ҳали анча бор.

— Йўқ, ўғлим. Гапларимни сохта камтарлик, деб ўйламанг. Бори шу. Сизга айтадиган муҳим гапим бор. Менинг аризамга қўл қўйди.

Муаллим ўрнидан сапчиб туриб кетди.

— Нималар деяпсиз, домла?! Мактабнинг ҳоли не кечади?

— Хавотир олманг. Ҳаммаси яхши бўлади... Майли ҳозир йўлдан қолманг. Бошқа гапларни эртага педсоветда гаплашамиз. Хайр, омон бўлинг...

...Улар ота-болалардай хайрлашдилар. Алмат ака шогирдининг орқасидан қараб қолди. Унинг юришида қандайдир вазминлик, салобат бор эди. «Ултирмайди...Ишонаман...»

1982 йил.

## УКА

Акмал Москвага олдин ҳам келган. Унда шунчаки, томоша қилиб кетган эди. Бу гал иш билан юриби — семинарда қатнашяпти. Ҳар кун эртадан-кечгача лекция, сира тиним йўқ.

Бугун жуда хуноби ошди. Бор-е, деб Самарқандга қайтиб кетмоқчи ҳам бўлди. Метро вагончаларининг бир маромдаги шақ-шуқига қулоқ солиб борар экан, миясида турли-туман фикрлар ғужрон ўйнарди. «Шунча йўлдан овора бўлиб келдим. Бир ҳафтадан бери тентираб юрибман. Энди, нима бўлса ҳам охиригача чидай. Шу ҳолда қайтиб борсам директор ҳам ранжиди...»

У меҳмонхонага шалвираб кириб келди. Ҳамхонаси йўқ, ҳали қайтмабди. Қават навбатчисидан чой ил-

тимос қилди. Юмшоқ креслога ўтириб иссиқ чойдан хўплади.

Эшик тақиллади. Акмал хаёлини йифиштириб олдида:

— Ким, у? — деди.

Эшик яна тақиллади. У ўтирган жойидан турмади. Эринди. «Ким бўлди экан? Манави бўлса индамай кириб келаверар эди...»

— Кираверинг!

Эшик секин очилди. Бир киши аста мўралади. Акмалга таниш қиёфа. У қўлидаги стакани столга қўйдида, ўрнидан сакраб турди.

— Нормат!

— Салом, ақа... — деди Нормат.

Ака-ука қучоқлашиб кўриши...

\* \* \*

Акмал оиласда тўнгич фарзанд. У ўрта мактабни битириб, Самарқанддаги меъморчилик институтига ўқишга кирди. Нормат ўрта мактабни Акмалдан бир йил кейин битирди.

Отаси: «Сен ҳам шаҳарга ўқишга борасанми, ўғлим?» — деди бир куни Норматга. У отасининг ажин босган юзларига, негадир бир оз ғамгин чехрасига тикилди. Отаси жуда қариб қолгандай туюлди. Ҳозирги саволида ўзига нисбатан илтижо, ялиниш оҳангини сезди. Бунинг боиси бор.

Ҳайит ака нисбатан кечроқ фарзанд кўрди. У ўттиздан ошганда Акмал туғилди. Бунинг устига, ёшлигига қўп қийинчилик кўргани учунми, тез қариди. Йўқ, қариганда у куч-кувватдан қолмади. Ҳозир ҳам билагида кучи, юрагида ўти бор. Фақат шашти пастдай кўринади. Акмалнинг қўлидан энди иш келиб, оғири ни енгил қиласман, деганда ўқишга кириб кетди. Оила-рўзгор ишлари яна Ҳайит аканинг ўзига қолди.

Нормат вояга етди. Эрта-индин у ҳам ўқишга жўнасан... Кейин нима бўлади? Ҳовлидаги токларни чопиш, сувориш, баҳорда очиб, кузда кўмиш яна Ҳайит аканинг гарданига тушадими?

Ҳайит ака Норматдан бояги саволни бекорга сўрамади. Савол замирада чуқур маъно, бир-бирига боғлиқ саволлар бор. Нормат буларни билади. Билгани учун ҳам отасининг нуроний чехрасига узоқ термилди.

— Нимайди, ота? — деди у ниҳоят.

Ҳайит ака оқ оралаган соқолини оҳиста силади. Норматта қарамай, узоқ-узоқларга, тоғнинг қуёш тегай-тегай деб турган чўққисига термулганча, хаёлчан бир аҳволда деди:

— Ўзим... Шунчаки, сўраяпман-да, ўғлим. Мактабиям битирдинг. Қайси ўқишга бормоқчисан, деб сўраяпман-да.

Ҳайит ака ўғлига қандайдир ҳам маънодор, ҳам савол назари билан қаради.

— Акам ўқища бўлса... Мен ҳам кетсам, уйнинг ишларини ким қилади? Ёлғиз ўзингиз куймаланиб юрасизми? Одамлар нима дейди? Икки ўғил ўстириб кўрган роҳати шуми, демайдими?

Ўғлининг ақл-фаросатидан Ҳайит аканинг кўнгли ёришди. Аммо дилида кечган мамнунликни тилига чиқармади. Ҳайит аканинг одати шундай: ўғил-қизларидан хурсанд бўлса ҳам, ранжиса ҳам ўзини тия олади. Ортиқча суюб, эркаламайди, шөвқин-сурон солиб, бақирмайди. Фарзандлари ҳам отасининг бу одатини билишади. Фақат унинг юз ифодаси, гапириш оҳанги дилида кечаётган ўйларни аён қилиб қўяди. Ё ўйчан, камгап бўлиб қолади, ё чиройи очилиб, ёш боладай ҳазил-ҳузул қилади.

— Иш қочиб кетмас, — деди Ҳайит ака салмоқлаб.— Лекин сен ўқишинг керак. Бир вақти келиб: «Отам мени институтга юбормаганлар», деб хафа бўлиб юрсанг яхши эмас-да:

— Вақт-соати келса, ўқиб оларман. Лекин ҳозир бормайман. Ундан кўра бир ишнинг бошини тутай. Акам битириб келсин. Кейин бир гап бўлар.

Нормат айтганини қилди. Тракторнинг рулини тутди. Уй ишларини эса тамоман ўз елкасига олди.

...Баҳорда Ургут тоғлари ям-яшил либос кияди. Лолалар зангор гиламдаги қип-қизил гулларни эслатади. Атрофга қараб кишининг кўзи тўймайди. Ҳавонинг тозалигини айтинг.

Акмал икки ўртоғи билан қишлоғига келди. Мехмонлар бироз дам олишгандан кейин Нормат акасини секин четта имлаб чақириди:

— Мехмонларни уйда димиқтириб олиб ўтиравермайлик. Тоқقا олиб чиқайлик. Айланиб, дам олиб келишади.

— Яхши бўларди. Машинангда чиқамизми? — деди Акмал.

— Албатта-да. Шундай кунда минмасак қачон ми-намиз. Яхши кунларимизга ярасин, деб яхши ният билан олганман.

Улар Омонқўтон тогига чиқиши. Нормат учун Омонқўтондан гўзалроқ жой йўқ. Ўртадан шарқираб сой оқади. Суви тип-тиник, муздай. Тошдан-тошга урилиб оқишига термилиб ўтиришнинг ўзи кишига завқ барислаиди. Икки томон баланд тоғ — кўм-кўк ўрмон. Шаҳардан келган мәҳмонлар жанинната тушгандай бўлиб қолдилар. Арча ўтинида пиширилган тандир кабоб, кийик ўт тўғралган қўйининг қатифи.

Нормат бир-иккита жўраси билан кабоб елпиягти.

— Акмал, укангиз нима иш қиласди? — деб сўради мәҳмонлардан бири.

— Трактор ҳайдайди.

— Бирон-бир раҳбарларданми, деб ўйлабман, — деди иккинчиси.— Бунча зиёфат қилиш учун...

Акмал қулиб қўйди. Аслида унинг ўзи ҳам укасига тан бераётган, қойил қолаётган эди. Қаерга бормасин ҳамма у билан қуюқ кўришади, хизматда бўлайлик, деб қўлини кўксига қўяди. Нормат: «Раҳмат, раҳмат, кейинги сафар», деб ўтиб кетади. Шунча обрў-эътибор, иззат-ҳурмат...

Мәҳмонлар уч кун туриши. Уч кун ичида Нормат уларни қаерларга олиб бормади, нималар билан мәҳмон қилмади. Охири машинасида Самарқандга элтиб қўйди. Хайрлашаётганда мәҳмонлардан бири Норматнинг қўлини қаттиқ сиқар экан:

— Уканг бўлса шундай бўлса-да. Кўз тегмасин. Омадингни берсинг, ука, — деди.

Нормат акасини ётоқхонага олиб борди. Акмал машинадан тушаётганда Нормат унга қоғозга ўроғлик нарса узатди.

— Нима бу? — деди Акмал.

— Олиб қўйинг, ака. Керак бўлади.

Акмалнинг вужуди жимиirlаб кетди: «Наҳотки? Ука акага пул берса! Нега энди! Аслида бу ишни мен қилишим керак эди-ку!» Аканинг бурчи, вазифаси эмасми?! Укам менга ёрдам беряпти... У жуда уялди. Хижолат чекди.

— Нормат... Керак эмас, ҳаммаси етарли, — деди ниҳоят.

Нормат кулди. Акасининг хаёлидан кечган фикрларни уққандай эди.

— Борида олаверинг, ака. Хижолат тортманг. Эртанидин катта меъмор бўлиб кетсангиз сиз менга ёрдам берасиз.

— Қачон уйга борсам тинмай хизмат қиласан, — деди Акмал. — Ҳозир жўраларимга шунча зиёфат бердинг. Шунинг ўзи бас, ахир. Мени хижолат қилма. Ака бўлиб нима қилиб қўйдим сенга.

— Айтдим-ку, ҳозир сиз олиб туринг, вақти келса мен оларман.

Ўшандан кейин Акмал анча пайт қишлоғига бормади. У Норматга кўринишдан уялди... «Унинг кўзига қандай қарайман? Мени деб ўқишига кирмади. Менинг ўрнимга уй ишларини қиляпти. Ота-онамга қарайапти. Бу ҳам етмагандай менга ёрдам беради. Қайси ука шундай қиласи? Акалар, ҳатто оталар-чи?!»

... Ёзниг жазирама кунлари. Имтиҳонлар тутаган. Акмал диплом ишининг ташвиши билан юрибди. Бир кун иссиқдан бўшашиб қайтди. Ётоқхона эшиги олдида турган қизил «Москвич» кўзига таниш кўринди. Номерига қаради. «Ие, Норматнинг машинаси-ку! Тинчликмикан?» Шу хаёллар билан машина эшигини тортди: қулф. Қаерга кетди экан? Ётоқхона томонга бурилиши билан ичкаридан Нормат чиқди.

— Ҳа, Нормат? Тинчликми?

— Тинчлик, — деди Нормат салом бериб. — Ўзингиздан сўрасак? Соғ-саломатмисиз? Уйга бормайсиз ҳам.

«Чолу кампир хавотир олишган. Ҳар ҳафтада боришимга ўрганиб қолишган-да».

— Отам билан энам ишдан қолдиришибди-да, сени,— деди Акмал ҳол-аҳвол сўрашиб бўлгач.

— Нимага?

— Нимага бўларди, бир ой бормаганимга хавотир олиб сени жўнатишибди-ку.

— Йўқ, улар билишмайди. Ҳаяллаб кетганингизга бир бориб хабар олиб келайчи, деб ўзим кедим. Отамгаям, энамгаям айтганим йўқ. У куни энам «Акангдан дарак бўлмаяпти-я, болам», девдилар. «Кеп қолар, иши кўпайиб кетгандир-да», дедим. Энамни алоғда бўлмасинлар дедим-у ўзим турли хаёлларга бордим. Кейин уларга билдирамай бу ёққа жўнадим.

— Бекор овора бўпсан. Нима, мен ёш боламидим. Диплом ишлари билан югуриб юрибман. Бугун бу ерини тузатаман, эрта у ерини.

— Қачон ҳимоя қиласиз?

— Кейинги ҳафта, жума куни.

— Бўпти, мен кетдим. Ўша куни келаман.

— Келишингнинг нима ҳожати бор. Ишдан қолиб юрасанми?

Нормат индамай машинага ўтирди. Акмал унинг орқасидан ҳавас билан термилиб қолди.

Жума куни диплом ҳимоясидан сўнг терлаб-пичиб коридорга чиқди. Эшик олдида қўлида бир даста гул билан Нормат кутиб олди. У гулни акасига тутқазиб, уни маҳкам қучоқлади.

— Табриклайман, ака! Отам билан энам ҳам табриклаб юборишиди.

Акмал севинчини яшиrolмади.

— Раҳмат, ука...

У бошқа гапирмади, гапиролмади.

Акмалнинг бир дўсти югуриб келиб Нормат билан кўришиди. Нормат уни таниди. Баҳорда қишлоғига борган, тоққа чиққан йигитлардан бири эди.

— Ётоқхонага борамизми? — деди ҳалиги йигит.

— Ҳа, — деди Акмал, Норматга: — Сен ҳам юр. Беш-олтита жўраларим боради. Бирпас ўтирамиз.

Ўн чөғли йигит-қиз Акмалнинг хонасига келишиди. Улар стол атрофига ўтириши билан Нормат ишга тушиб кетди. Бир зумда столнинг усти турли ноз-нельматлар билан лиқ тўлди. Пиширилган гўшт, тандир кабоб, қатлатир, мева-чева... Акмалнинг оғзи очилиб қолди.

— Оҳо, зўр-ку, — дейишиди меҳмонлар. — Бу ҳақиқий банкет-ку.

Йигит-қизларнинг бири қўйиб, иккинчиси сўз олди. Ҳаммаси Акмалнинг таланти юксаклигини, диплом иши сифатида тақдим этган лойиҳаси юқори баҳоланганини, келажакда ундан катта меъмор чиқишини қайтакайта таъкидлашди.

Нормат бир чеккада уларнинг сўзини тинглаб ўтирап, шундай истеъдодли акаси борлигидан фуурулана, сўз айтувчилар Акмални мақтаётганида «Бу менинг акам, кўриб қўйинглар!» деб овозининг борича ҳайқиргиси келар эди...

Йиллар ўтди. Бу орада Акмал ҳам, Нормат ҳам уйланди. Бола-чақали бўлди. Хар иккала тўйининг оғирини Нормат кўтарди. Лекин буни ҳеч ким билгани йўқ. Одамлар: «Ҳайит ака ўғилларининг тўйини жуда яхши ўтказиб берди», — деб гапириб юришди. Бу гапни эшиттан Нормат астойдил севинди. «Отамнинг шаънига одамлар яхши сўз айтишса бас. Менга шунинг ўзи кифоя».

Тақдирнинг тақозоси билан Акмал шаҳарда яшаб қолди. Дўстлари башорат қилганидек, у катта меъмор бўлиб етишди. Унинг лойиҳаси бўйича бинолар, майдонлар, хиёбонлар қурилди. Буларнинг ҳар бири давлат комиссияси томонидан қабул қилинганда, тантанали очилиш маросимларида Нормат акасининг ёнида бўлади. Кимдан эшитиб, қаердан билиб келади — бунга Акмалнинг ақли етмайди. Сўраса — билдим-да, деб гапни қисқа қиласи. Акмалнинг номига мақтов сўзлар айтилганда Норматнинг кўкси тоғдай кўтарилади.

Дўстлари, бошқа жойлардан келган жўралари билан шаҳарга тушиб қолса, албатта Акмалнинг лойиҳаси бўйича ишланган биноларни кўрсатади. Майдонларни айланиб, хиёбонларда бир нафас бўлсада, ўтириб ҳордиқ чиқаради. «Мана шу бинонинг лойиҳасини менинг акам ишлаган. Мана бу майдонни, хиёбонни ҳам. Қаранглар, қандай чиройли, ажойиб. Ҳаммаси жой-жойида. Меъмор чизиб чиқмаса бунақа баланд иморатларни қуриб бўлмайди». Одамларга ана шундай деб мақтанишини яхши кўради.

Бу севинчларини, мақтанишларини Акмалга айтмайди. Бироқ Акмалнинг ўзи сезади. Сезиб укасидан хурсанд бўлади. «Менинг ижодимга шунчалик қизиқади, шунчалар жон куйдиради-я...»

\* \* \*

Норматнинг ўқиши учун «вақти-соати келмади». Бугун бу деди, эрта у. Бир ишни тутатса иккинчиси чиқиб турди. Оиласлик бўлгандан кейин иш қайнагандан қайнади. Йил ўтган сари ота-онаси қариб, оғир ишларга ярамай қолаверди. «Иқтисодий жиҳатдан сал ўзимни ўнглаб олсан, кейин ўқийман» деб хаёл қилган эди, йўқ, аксинча бўлди. «Иқтисодий жиҳатдан ўзини ўнглади», аммо оиласлик шароит тобора мурак-

каблашиб бораверди. Бирин-кетин сингилларини турмушга узатди. Ота-онасининг ёнида эса ёлғиз ўзи қолди. Энди уларни ўз ҳолига ташлаб кетолмайди.

Ота-онасининг соғ-саломат юрганидан, сингиллари баҳтини топиб, уйли-жойли бўлганидан кўнгли тўқ. Кўшни қишлоқларда бирон-бир тўйми-таъзиями бўлиб қолса, ота-онасини машинага миндириб олиб боради. Фақат ота-онасини эмас, бошқа қарияларни ҳам ола кетади. Шунда чолу кампирлар уни алқайди: «Умрингдан барака топ, болам. Бизнинг ёшимизга етиб юр. Омадингни берсин. Бола-чақангнинг ҳузурини кўр».

Ана шундай кезларда у ўқиёлмай қолганидан кўнгли ўксимайди, пушаймон қилмайди. «Тўртта одамнинг кўнглини олсан — шунинг ўзи бас-да. Тақдирда бор экан, ўқиёлмадим. Лекин кимдан камчилигим бор. Ўқишини битириб, номи улуғ, супраси қуруқ бўлиб юрганлар ҳам бор-ку!» Шуларни ўйласа хаёлига лоп этиб акаси келади. «Йўқ, менинг акам унақалардан эмас! Тўғри, унинг тагида машинаси, кассада минг-минг пули ўйқ. Аммо акамни ҳамма ҳурмат қиласди.

Меъмор Ҳайитов, деб гапиради. Радиодан, телевизордан акам қурган биноларни мақтайди. Акам машҳур одам. Кўп пул топиш осон, лекин машҳур одам бўлиш қийин. Қани, кимнинг акаси шунаقا машҳур? Кимсан, Акмал Ҳайитов! Меъмор Ҳайитов! Ана шу одам менинг акам бўлади! Биз у билан бир қориндан талашиб тушганимиз».

Болалигида Акмал билан Норматнинг гавдаси бир хил эди. Танимаганлар уларни эгизак, деб ўйларди. Бирининг кийимини иккинчиси кийиб қочар, шундан икковининг ўртасида тез-тез «жанжал» чиқиб турар эди. Отаси ёки онаси Акмалга иш буюрса, у Норматта айтади, Нормат эса ўзинг қил, дейди.

Бир марта қизиқ бўлган. Ўшанда Акмал ўн тўртда, Нормат ўн уч ёшда эди. Ҳайит ака Акмалга: «Ариқдан сув боғлаб кел, ҳовлидаги токларни сугорамиз», деди. Акмал отасига индамади-ю, ташқарига чиқиб, Норматта: «Ариқдан сув боғлаб келаркансан. Отам айтдилар, токларни сугорар эканмиз», деди. Нормат: «Алдама, ўзингта айтган. Бор ўзинг». Униси у деди, буниси бу. Бу машмашани Ҳайит ака эшитиб қолди. Ўфилларига миқ этмади. Кетмонни елкасига ташлаб ариқ томонга чиқиб кетди. Ака-ука отасининг мақсадини ту-

шуниб, орқасидан эргашди. Ҳайит ака ўғиллари ортидан келаётганини сезди. Сезди-ю, билмаганга олиб кетаверди. Акмал чопиб бориб: «Ота, кетмонни беринг. Ўзим боғлаб келаман», деди. Ҳайит ака бамайлихотир ҳолда: «Қўй, ўғлим! Сенларга бир ишни айттунча, тинчгина ўзим қилиб қўя қолганим маъкул», деди.

Бу гапдан Акмал ҳам, унинг орқасидан бурнини тортиб эргашиб бораётган Нормат ҳам изза бўлди. Ака-ука бир-бирига қаради. Бу қараашда «уялмайсанми?» деган маъно бор эди...

...Нормат етилиб, юzlари тўлишиб қолди. Оғир-вазмин йигит. Офтоб тифида қорайган билакларидан йигитлик кучи ёғилиб турибди. Анча улуғсифат кўринади. Билмаганлар уни Акмалнинг акаси, деб ўйлади. Акмалчуваккина бўлиб қолди: ранг-рўйи бир аҳволда. Ёнгоқ соясида қолган ниҳолдай нимжон. Нормат буни акасининг кўп ишлашидан, иши оғир ва диққинафас эканлигидан, деб билади. Қачон унинг уйига борса, Акмал катта оқ қоғозга термилиб, учи игнадай қилиб очилган турли қаламлар, ҳар хил жазварлар билан нималарнидир ўлчаб, чизиб ўтирган бўлади. «Меъморлик ҳам қийин иш экан-да». Акасига раҳми келиб кетади. «Ака, ҳадеб хонага қамалиб олиб чизма-чизиқ қилавермай, ҳар замонда қишлоқ томонларга бориб бир айланиб келинг. Ҳаво алмаштирасиз. Соғлиғингизга ҳам фойда» дейди. Акмал сигаретни бурқситиб тутатади-да, укасининг меҳрибон кўзларига термилади.» Хўп, мана шу ишимни тугатай. Кейин албатта бораман. Тоқقا олиб чиқасанми?» «Албатта, олиб чиқаман». Қаёқда, у иш тугартутамас яна бир иш топилади. Шундай қилиб, баҳор ўтади, ёз ўтади, куз кетидан қиш келади. Акмал эса катта оқ қоғоз устига игнадай учли қаламлар билан одам ақли етмайдиган чизиқлар тортишдан на бўшайди, на чарчайди...

\* \* \*

— Нима қилиб юрибсан буёқларда? — деди Акмал укасини кучогидан қўйиб юбормай. — Бирон иш билан келдингми? Менинг бу ердалигимни қаердан билдинг?

— Ўзим, шундай, томоша қилгани келдим.

Ака-ука иккита креслога қарама-қарши ўтиришди.  
Акмал Норматта чой узатди.

— Ҳар ҳолда бекорга келмагандирсан?

Нормат кулди. Акаси узатган илиқ чойдан бир хўплаб, Акмалга маъноли қаради.

— Нимага ундай деб ўйлайсиз? Москвага фақат сиз келаверасизми? Бизлар ҳам томоша қиласийлик-да Москвани. — Стаканни Акмалга узатаркан, кулимсиради. — Кўргазмага келувдик.

— Шунаقا дегин, — деди Акмал. — Кўпчиликмисизлар? Қачон келдиларинг?

— Анча киши бор. Кеча кечқурун келдик.

— Хўш, менинг бу ердалигимни кимдан эшилдинг?  
Қандай топиб келдинг?

— Нима, бизни жуда саводсиз, деб ўйлайсизми?  
Сўраб-сўраб топиб келдим-да.

Норматнинг «бизни саводсиз деб ўйлайсизми» деган гапи Акмалнинг юрагига санчилди. У ҳамиша укасининг ўқимай қолгани учун ўзини гуноҳкор санаб юрар эди. Лекин бу ҳақда Нормат бирон марта бир оғиз гапирмаган... Акмал гап очса ҳам: «Бу гапларни кўйинг, ака», деб мавзуни бошқа томонга бурарди. Бутун билибми-бilmайми, шуни айтди. Яна қаерда, уйдан, ота-онасидан, бола-чақасидан узоқда. «Барига бир кўнглида бор экан-да. Юрагида тугун бўлиб қолган экан-да...»

Акасининг индамай қолгани Норматни ҳайратта солди. Акмал хомуш тортиб, сигарет тутатди.

— Сизга нима бўлди, ака? — деди Нормат ҳайрат ва ҳаяжон билан.

Акмал сигарет тутунини ичига тортаркан, ўйчан деди:

— Мени кечир, Нормат. Ишимга берилиб кетиб сенинг ўқишинг билан шугулланолмадим.

Норматнинг эсига лоп этиб боя айтган гапи тушди.  
«Эҳ, каллаварам! Нималар дединг ўзи? Нима учун келдинг-у, нима қилиб қўйдинг?!»

— Ака, — деди айтган сўзидан пушаймон бўлиб. — Бемаъни гапим учун мени кечиринг. Гап бу томонга айланиб кетишини ўйлаганим йўқ. Хурсандчилигимдан сизга ҳазиллашдим, деб қовун тушириб қўйибман-ку.

— Йўқ, тўғри гап, — деди Акмал ўйчан.

Нормат ўрнидан иргиб турди. Акмалнинг рўпарасига келди.

— Ака! Агар мени укам десангиз шу гапни хаёлингиздан чиқариб ташланг! Шу ҳақда шу пайтгача ўйлаган бўлсам ёки энди ўйласам... сафарда турибман...

— Бас! — Акмал ҳам ўрнидан турди.

Ака-ука тик турганча бир зум бир-бирларига термилиб қолишиди.

— Мен нима учун бу ерга келдим? Биласизми? — деди Нормат жимликни бузиб. Акмал «Билмайман», деган мазмунда елка қисди. Нормат акасининг кўзларига термиди. — Ахир бугун туғилган кунингиз-ку!

Ака-ука беихтиёр бир-бирининг қучоfiga ўзини отди. Улар узоқ вақт шу алпозда туришди... Акмалнинг елкаси силкинди. Буни Нормат сезди. Сездию... Ўзининг ҳам елкаси титраганини билмай қолди...

1984 й.

## КЎНГИЛ

У қаноти синган қущдек пирпираб тушаётган баргларни босиб, секин бораарди. Касалдан тургани учун руҳсиз. Автобус бекатида Жавлонни учратди.

— Жавлон! — У дўстини учраттанидан севиниб кетди. Гёё танасидаги оғриқлар бирдан тарқаб кетгандай туюлди.

— Салом, Маҳмуд, — қўл узатди Жавлон.

— Қандай шамол учирди? Қачон келдинг?

— Малака ошириш курсига келгандим, йигирма кун бўлди.

— Нега уйга бормадинг?

— Бир марта ишхонангта телефон қилувдим, касал дейишиди. Уйингта боришга, тўғриси, вақт тополмадим.

— Ҳа, анчадан бери ётувдим, бугун ишга чиқдим... Қани кетдик, бир отамлашамиз. Уйда ётавериб жуда зерикканман.

— Раҳмат, мен бугун кечки поезд билан кетяпман.

— Ҳали вақт бор-ку, бир оз ўтирайлик.

— Йўқ, Маҳмуд, ҳали бошқа ишларим бор, бир кишининг олдига боришим керак... Хайр, яна келганимда гурунглашамиз.

Жавлон шундай дедиу жойидан кўзғалаётган автобусга лип этиб чиқиб одди.

Маҳмуд ҳайрон бўлганча унинг орқасидан қараб қолди. Бу учрашув тушида содир бўлдими, ўнгидами — билолмади. Дилида ҳалиги қувончидан асар ҳам қолмади, аксинча, танаси баттар оғирлашиб, дили хуфтон бўлди-қолди...

У уйига қандай етиб келганини билмади. Ўзини каравотга ташлади. Кичкина хона янада тор, совук туюлди. Истар-истамас Жавлон билан кечган дамларини эслаб кетди...

Жавлон иккаласи синфдош. Бирга дарс тайёрлар, бирга ўйнашарди. Сира сан-манга боришмаган. Дарвоҳе, бир марта сал қизаришиб қолишганди.

Мактаб ҳовлисида Маҳмудни бирор туртиб қочди. Нарироқда қиқирлаганича Жавлон чопиб бояпти, Орқасидан югурди. У мактабнинг ёзлик спорт майдончаси томонга қочди. Маҳмуд етиб одди-да, уни уриб ортига югурди, сўнг синфга кириб кетди. Бироздан сўнг шоп мўйловли, жуссадор бир киши югуриб кирди-да, кўзларини бежо ўйнатиб сўради:

— Жавлонни уриб қочган ким?!

Болалар жим, Маҳмуд қўрқанидан дағ-дағ титрайди. Синфга Жавлон кириб келди. Ҳалиги киши ундан сўради:

— Қани, сени урган бола?

— Ана, — деди у Маҳмудни кўрсатиб.

Маҳмуд ўзини батамом йўқотиб қўйди. Мўйловли киши унинг юзига тарсаки тортиди. Маҳмуднинг кўзидан олов чиқиб кеттаңдай бўлди.

Бу — Жавлоннинг отаси эди...

Ўшанда Жавлондан Маҳмуднинг кўнгли қолди. «Отасига нега чақди? Ўйинни ўзи бошлади-ку!» Анча пайтгача у билан гаплашмай аразлаб юрди.

Болалик-да, яна ярашиб кетишиди. Жавлоннинг ўзи яқинлашди. Аразлаб юрса баҳолари тушиб кетиши аниқ. Уй вазифаларини ҳам бош қотириб, ўзи ишлashi керак...

Орадан йиллар ўтди. Улар мактабни тутаттагч, пединститутга ўқишига отланишиди.

Уларни шаҳарга кузаттани Жавлоннинг отаси ҳам чиқди. У кишини кўриши билан Маҳмуднинг хаёлига болаликдаги ўша воҳеа келди.

— Энди, Маҳмуджон, Жавлон билан бирга шаҳарга кетяпсанлар. Эҳтиёт бўлиб юринглар. Бир-бирингта хушёр бўлинглар. Бегона жой, шаҳарда юриш осон иш эмас.

Маҳмуд индамади.

Бир-биридан кўмак олиб имтиҳонларни топширди. Иккови ҳам ҳамма имтиҳонлардан ўтди. Бироқ Жавлоннинг бали бироз кам бўлиб қолди. Бундан у хафа. «Мен мандатдан ўтолмасам керак». Маҳмуд дўстига далда берди: «Нимага ундан дейсан, ўтасан, жўра...» У шундай дейди-ю, ўзи ичида иккиланди: «Ўтармикин? Ишқилиб ўтсин-да. Бир-биримизга ҳамроҳ бўлиб ўқир эдик...»

Орзиқиб кутилган кун ҳам келди. Ҳавонинг иссиғи, ҳаяжон қўшилиб, ҳамманинг юзлари қизарип кетган. Барчанинг нигоҳи икки тавақали залворли эшиқда.

Бир маҳал бино пештоқидаги катта радиокарнай тилга кирди: «Ҳурматли абитетиентлар! Ҳозир мен кимнинг фамилиясини ўқисам, ичкарига киради».

Сув сепилгандан сўнг чанг босилгандай ҳамма жим. Тўпланганлар бутун вужудини қулоққа айлантириб тинглайди. Баъзилар қулоғи эшитмай қоладигандек, оғзини ҳам очиб карнайга термилади.

Ярим соатлардан кейин Маҳмуднинг фамилиясини ўқиди. У Жавлонни ҳам эсидан чиқаргандек эшикка ўзини урди...

Бали камлиги учун Жавлон сиртқи бўлимга қабул қилинди. Маҳмуднинг севинчи ичига сифмайди. Жавлоннинг қовоғи солиқ. Маҳмуд дўстининг кўнглини кўтарди:

— Ҳечқиси йўқ, Жавлон. Сиртқига бўлса ҳам кирдинг-ку! Келаси йили кундузгига ўтказиб оларсан.

— Холамнинг эри ректормидики кундузгига ўтказиб қўйса мени, — зарда қилди Жавлон.

— Хафа бўлма, жўра, — деди Маҳмуд яна, — шунга ҳам шукур қилсанг-чи. Уни овутарди-ю, ўзи Жавлонга ич-ичидан ачинарди.

... Маҳмуднинг ўқишлари бошланиб кетди. Жавлон ҳар сессияга келганда дўстининг олдига боради. Йўқ, Маҳмуднинг ўзи уни хонасига бошлаб келади. Яна биргалашиб дарс тайёrlашар, суҳбатлашарди. У Жавлонга қўлидан келганча ёрдам берди.

Ўқиши битиргандан сўнг Маҳмудни институтда ишга олиб қолишиди. Жавлон ундан бир йил кейин тутатди. Шу сўнгти йил давомида уларнинг дўстлиги яна ҳам мустаҳкамланди. Жавлон диплом ёзиш учун отпуска олиб шаҳарга келди. Маҳмуднинг ётоқхонасида туриб диплом ишини ёзди.

Жавлон давлат имтиҳонини ҳам, диплом ишини ҳам аълого топшириди. Маҳмуд доим унинг ёнида бўлди.

Кечқурун ётоқхонага қайтгач, иккови икки каравотта оғир чўқди. Униси ҳам, буниси ҳам жим. «Яҳши бўлди, Жавлон ҳам битириб олди. Кўп қийналди бечора», деб ўйлади Маҳмуд. У дўстига ҳазил қилди:

— Мана Жавлон, институтният битирдинг. Диплом киссада: энди бир ювсанг бўлармиди.

У ётган жойидан аста Жавлонга кўз қирини ташлади. Жавлон икки кўлинин боши остига қўйганча шифтта термилиб ётаркан аста деди:

— Қўйсанг-чи, сиртқи дипломини ҳам ювадими?

Маҳмуд ёстиққа тирсаклади.

— Энди шундай дейсан-да. Шу вақттacha битирап-миканман-йўқми, деб ташвишда эдинг.

— Шу заочниниям битиролмасам тоза саводсиз эканман-да, — деди Жавлон ўша ётганича қимирламай. — Кундузгида ўқиганларнинг ҳам ҳаммаси бир хилда билимлими?! Ана, мактабимизда кундузгида ўқиб борган саводсизлар қанча...

Жавлоннинг бу гапи Маҳмудни ҳайратта солди. «Нега бундай деяпти? Гапимни бошқача тушунди чоғи...»

— Гап сиртқиу кундузгида эмас-ку, — деди Маҳмуд. — Ҳаммаси одамнинг ўзига боғлиқ...

Маҳмуднинг гапи чала қолди. Жавлон жойидан иртиб турди.

— Ичасанми? Нима олиб берай?

Маҳмуд кўзларига, қулоқларига ишонмасди.

— Тинчликми, Жавлон?

Жавлон индамай ташқарига чиқиб кетди.

Эртасига Жавлон қишлоққа жўнаб кетди. Маҳмуд автобус бекатигача кузатиб қўйди.

— Бирор ҳафталардан кейин бориб қоламан, — деди Маҳмуд. — Отпуска оламан.

Жавлон индамай кўл узатди.

Маҳмуднинг қишлоққа келганига уч кун бўлди, аммо Жавлондан дарак йўқ. Илгарилари Маҳмуднинг келганини эшитган заҳоти дарров етиб келарди. Ҳолижонига қўймай уйига олиб кетарди. Ҳамма ўртоқларини уйига тўплаб, Маҳмуднинг «шарафига зиёфат» берар эди. Маҳмуднинг: «Бунча тарафду-ташвишнинг нима кераги бор, Жавлон. Ундан кўра, бироз гаплашиб ўтирайлик», деган гапига «Қўйсанг-чи, энди. Бир кеп қопсан-да. Суҳбатам, улфатчиликам — ҳаммаси бўлади», деб уни ўз ҳолига қўймас эди. Ўртоқларига Маҳмудни мақташдан бўшамасди. Бундан Маҳмуд қанчалар хижолат чекмасин, у сира тинмас эди.

Ҳозир эса ундан хабар йўқ. «Ёки эшитмадими-кан?» Рости, Маҳмуд ҳам унга ўрганиб қолган, қишлоққа келиб уни учратмаса, озгина бўлса-да, гурунглашмаса кўнгли жойига тушмайди.

Ётоқхонадаги гап, автостанциядаги хайрлашув Маҳмуднинг ёдига тушди. «Нега ундан деди? Жуда совук хайрлашди. Нима учун? Уни хафа қиласидиган гап бўлгани йўқ-ку. Аксинча, қўлимдан келгунча диплом ишига ёрдамлашдим, имтиҳонда домлаларга тайинладим...» Жавлоннинг диплом ишини машинкалатишни, муқовалатишни Маҳмуд зиммасига олганди. «Нега келмаялти экан?»

Охири сабри чидамади, укасини Жавлонни чақириб келгани юборди. «Аканг келганини эшитдим. Ишим кўп. Вақт топсам бирор кун борарман», депти. Маҳмуд бу жавобни эшишиб, жуда ажабланди. «Нега унақа қиласиди? Наҳотки, кечқурун ҳам вақти бўлмаса? Ёки мендан хафамикан? Нима учун? Уни ранжитадиган бирон иш қилмагандим шекилли! Балки чиндан ҳам иши кўпдир. Қишлоқчилик ахир...» Ана шу фикрлар билан Маҳмуд ўзига-ўзи таскин берди.

Аммо эртасига ҳам, индинига ҳам Жавлондан дарак бўлмади. «Мен бекорчиман-ку, Жавлонни ўзим йўқлаб боришим керак». Жавлоннинг уйига йўл олди. Дарвозани тақиллатган эди, хотини очди.

- Ҳозиргина бир жойга чиқиб кетдилар, — деди
- Балки бизникига кетгандир?
- Билмадим.

Маҳмуд индамай орқасига қайtdi.

Кунлар кетидан кунлар ўтаверди. Жавлонни қидириб борган Маҳмуднинг укаси уни яна тополмай кел-

ди. Шундан сўнг Маҳмуд ҳам сўрамади. Бироқ гап нимада эканлигини, Жавлон нега бундай қилаёттанини усира тушунолмасди.

Бир кун оқшом Маҳмуд газета ўқиб ўтирганди, кўчадан келган отаси:

- Жавлон келдими? — деб сўради.
- Йўқ, — деди Маҳмуд ажабланиб, — нима эди?
- Ҳалигина кўчамиздан ўтиб кетди-ку!
- Билмадим, келмади.

Бу гапдан сўнг Маҳмуднинг ҳайрати янада ошди. «Наҳотки, Жавлон шу кўчадан ўтса-ю, бирров кирмаса». Отаси Маҳмуднинг фикрини англагандек гап қотди:

— Тўғрисини айтсам, шу жўранг менга унча ёқмайди. Илгари ҳам бир-икки гапирганимда хафа бўлувдинг. Мана кўрдингми, иши битди — эшаги лойдан ўтди. Энди сенинг керагинг йўқ. Илгари шаҳарга тез-тез бориб турарди — сен яхши эдинг, қадрдан эдиларинг. Қани энди ўша пайтдаги жўрачиликларинг...

Отасининг гаплари Маҳмудни ўйлантириб қўйди. Бирон нарса дейишга тили бормасди. «Рост-да, бўлмаса нега бирон марта келмади? Унинг ўзи неча бор дўстлигимиз абадий бўлади деганди-я».

Лекин кўнгли ишонмасди. «Йўқ, Жавлон унақа пасткаш эмас, бу қадар тубанликка бормайди у».

Маҳмуднинг отпускаси ҳам тугади. У эрта шаҳарга жўнайман деган куни Жавлоннинг уйига борди.

Дарвозани унинг ўзи очди.

— Э, салом, шаҳарликларга! Қани, марҳамат, — деди Жавлон.

Унинг гаплари, таклифи Маҳмудга ясама, сохта бўлиб кўринди.

— Раҳмат Жавлон. Эртага қайтаётган эдим, бир кўриб кетай, дедим. Бир неча марта қидириб тополмадим сени.

— Шу десанг, жуда иш кўпайиб кетди. Бораман деб ҳеч қўлим тегмади.

— Ҳозир каникул эмасми?

— Мактабда каникул бўлгани билан уйнинг ишларини айтмайсанми. Диплом ёзамиз, деб шаҳарда санғиб юраверган эканмиз, ишлар йигилиб қопти. Бош қашишга қўл тегмайди. Ҳозир ҳам бир жойга бормоқчи бўлиб турувдим.

Илгари бирон марта Жавлондан ишим кўп, деган гапни эшитмаган эди. Икки-уч кунлаб дўсти билан юрар, баҳор кезлари төвларга олиб чиқарди. Шунда Маҳмуд хижолат бўлиб, «Сени ишдан қолдираяпманку», деса «Эй, жўра, иш топилади, аммо дўст топилмайди, одам топилмайди. Унинг устига сенинг баҳонангда ўзим ҳам бироз дам оламан», деб Маҳмудни хижолатдан чиқарар эди.

Маҳмуд ўйланиб қолди: «Наҳотки, отамнинг гаплари рост бўлса? Одам одамга иши тушгани учун дўст тутинадими?»

Бу фикрларни сиртига чиқармади.

— Шаҳарга борганингда албатта киргин.

— Шаҳарда нима қиласман энди? — деди Жавлон тиржайиб. — Ўқиш бўлса битди. Тушиб қолган ишм борми...

Маҳмуд индамади. У хайрлашиш учун қўл узатди.

— Кирсанг бўларди, — деди Жавлон хайрлашар экан.

— Раҳмат, бир жойга бормоқчи экансан. Йўлдан қолма. Мен ҳам шошиб турибман.

— Шундайми?! Майли, яхши бор. Оқ, йўл.

Маҳмуд индамай йўлга тушди.

...Шундай қилиб, Маҳмуд қадрдан дўсти Жавлон ҳақидаги турли хаёллари билан шаҳарга келди. У бу гапларнинг сабабини тушунгандай бўлар, аммо кўнглида ҳамон «наҳотки» деб иккиланарди. Иккиланган кезла-рида отасининг гаплари ёдига тушар, шу заҳоти фикрлари тингандай, тарозининг отаси томондаги палласи босиб кетгандай туюлар эди...

Ўша воқеадан кейин бугун улар тасодифан учрашиб қолдилар. Бу учрашувдан сўнг Маҳмуд Жавлон ҳақидаги фикрларига нуқта қўйди. Сўнгра кундалигига бугунги числони ва шоирнинг қуйидаги икки мисрасини ёзиб қўйди:

Мен дўстимдан айрилдим бугун,  
Тирик туриб айрилиб қолдим.

1970 йил.

## ТҮҚАЙДА

Мингбулоқ — тоғ этагидаги қишлоқ. Унинг табиати жуда гүзал — бир ёнда одам кундузи юрса қўрқадиган даражада тўқайзор, бир тарафда бояр-роғ. Бу ерда жамики мевадан бор десак, лоф эмас, яна бир ёнда токзор — унга оралаган одам қора кишмишу оқ кишиши, ҳусайнию тойифи, султонию қора жанжал, даройиу сурхок — хуллас, бир неча хил узумни топади. Токзорнинг юқори тарафида заяк бор. Рустам билан Даврон мана шу ерда қўйларини боқишидаи. Асосан қора дўйланадан иборат тўқайзорнинг ўти шу қадар бўлиқки, одамнинг белига уради. Рустам билан Даврон баъзан шу томонга ҳам ҳайдашади қўйларини.

Улар тўқайзорга киришни яна бир жиҳатдан ёқтирадилар. У ерда ёввойи қуён, тулки, тустовуқ, яна қандайдир ҳайвону паррандалар юради. Неча марта ёввойи қуёnlарни қувлашган...

Рустам билан Даврон синфдош, бу йил олтингчини битиришди. Аммо танимаган одам уларнинг синфдошлигига ишонмайди. Чунки Рустам баланд бўйли, юзлари қоп-қора, кўринишидан ўн беш-ўн олти ёшларга борганга ўхшайди, Даврон эса аксинча, пакана, юзлариям сап-сариқ, ёшига нисбатан бир-икки ёш кичик кўринади. Шу боис аввалига уларни орқаворотдан узунқисқалар деб масхара қилувчилар ҳам топилди. Бу гап Рустам билан Давроннинг ҳам кулогига етиб келган, бироқ уларнинг иккови ҳам эътибор бермади. Аксинча, бунга сари иккови кўпроқ бирга юрди, дарсга ҳам бирга бориб, бирга қайтди, олдинлари иккови бошқа-бошқа ўтиради, шу гап-сўзлардан кейин бир партада ўтирадиган бўлди. Бора-бора уларнинг бу одатига ҳамма кўниқди, ҳеч ким эътибор ҳам бермай қўйди, қайтанга, ё Рустамни, ёки Давронни ёлғиз кўрса ажабланишадиган бўлишди. Ҳасан-Ҳусанлар ҳам булар каби бир-бирига яқин, кўнишиб қолишмаса керак.

Таътил кунлари ҳам иккови бирга ўйнайди, сойдаги сув омборига чўмилгани биргалиқда боришидаи. Рустамда ҳам, Давронда ҳам тўрттадан кўй бор. Ҳар йили эрта баҳордан тўрттадан қўзичоқни етаклаб, кеч кузгача боқишидаи. Бу улар учун одат бўлиб қолган. Ёзги

таътилни улар шу қўзиларни боқиши, дарёга олиб бориб чўмилтириш билан ўтказишади.

Икки ўртоқ, бу йил ҳам шу одатни тарк этмаган.

Ёзги таътилга чиқишиганига ўн кундан ошди. Ҳар кун тонг саҳарлаб иккови икки тарафдан тўрттадан саккизта қўйни ҳайдаб юқорида таърифлаганимиз боқقا келишади. Бир кун заяқда, бир кун тўқайзорда, бир кун токзорнинг уватларида қўйларини боқадилар. Кун исигач, тоғ этагидаги катта булоқдан келадиган ариқнинг муздай сувидан қўйларини сугориб, қайрағочнинг соясига бойлади. Кейин ўзлари ҳам соянинг қалинини топиб чўзилиб ётадилар. Бу пайтда икки жўра ё латифа айтишади, ё китоб ўқишида, баъзида ҳаммасидан зерикиб, иккови икки тарафда кўм-кўк ўт устида ухлаб қолади.

Ҳар кунги одати бўйича бутун ҳам эрта тонгда келишди. Кун чиққунча қўйларини ўтлатди. Вақт пешинга яқинлашганда ариқдан қўйларни сугориб, қайрағочнинг соясига боғлади. Ўзлари эса қўйларига рўпара турган оқ ўрикка томон юришди. Ўрик тепалиқда бўлиб, у ердан чор атроф, ҳатто тўқайзор ҳам кўриниб турар эди. Жўраларнинг, мақсади — аввало ўрик олиш, қолаверса, боғлардаги мева-чеваларга кўз-кулоқ бўлиб туриш.

Дарвоқе, шу ерда бир нарсани эслатиб ўтиш лозим. Бу боғлар, токзорлар аслида колхозники, аммо уни одамларга бўлиб беришган. Кимгадир ярим гектар, кимгадир кўпроқ ё озрок, хуллас, ҳар бир оиласининг имкониятига қараб тақсимланган. Ўша боғу токзорга ҳар оиласининг ўзи қарайди — эрта баҳорда токларни очади, чопади, кесади, сугоради — қисқаси, нима иш бўлса оила аъзолари билан ўзлари бажаришади. Мевалар, токлар ҳосил туккандан кейин колхоз фаолларидан иборат комиссия келиб, ҳосилни чамалаб кўради-да, шунча узум, шунча олма, ёнғоқ, ўрик берасиз, дейди. Боғнинг эгаси кўнса рози бўлади, йўқса камайтиринглар, дейди, тортишади. Охири икки тарафнинг келишувидан кейин шартнома тузилади. Мева-чевалар, узум пишгандан кейин ўша шартномадаги ҳосил колхоз хирмонига топширилади. Қолгани эса ўша оиласининг ихтиёрида — хоҳласа сотади, истаса қуритиб олади. Шу боис ҳар бир оила ўзига ажратилган боқقا

эътибор билан қарайди, дарахтларни, токларни парваришилайди, чопигинию очиш-кўмишни вақтида бажаради. Ёзда эса мевани қушу ҳайвонлар еб кетмасин, деб кечакундуз қоровуллик қилишади.

Рустам билан Давронларнинг бори ёнма-ён. Улар ҳам қўй боқишиади, ҳам боқقا қарашади...

Икки жўра оқ ўрикнинг офтобрўя тарафига ўтиб пишган-пишганидан уч-тўртгадан олишди. Энди биттадан ўрик ейишувди ҳамки, тўқай томондан милтиқ овози эшигилди. Икки ошна бир-бирига ялт этиб қаради.

— Ким бўлди бу? — деди Даврон сергакланиб.

Рустамнинг ҳам кўзлари ўйнаб кетди:

— Ҳайронман... Шу пайтда ким ов қилиши мумкин?

Даврон ўрнидан турди-да, милтиқ овози келган тарафга бўйини чўзиб қаради.

— Бу атрофнинг одами бўлмаса керак, — деди Даврон тўқай томондан нигоҳини олмай, — Ўзимизди одамлар ҳозир ўқ отиш мумкин эмаслигини билишади-ку.

— Кўрдингми кимлигини? — деб сўради Рустам.

— Қаёқдан кўраман... Тўқайзордан кўринармиди.

Рустам ҳам жойидан турди.

— Борамизми ўша ёқقا?

— Борамиз.

Тўқайзорга олиб борадиган ёлғизоёқ йўлдан олдин Рустам, ортидан Даврон югуриб кетди.

Улар тўқайга боф тарафдан келишди. У ёқ-бу ёқقا аланглади, ҳеч ким кўринмади. Иккови ҳанг-манг бўлиб, бир жойда қотиб қолди. Шу маҳал тўқайнинг нариги тарафидан яна ўқ овози эшигилди. Қулоқлари динг бўлиб турган жўралар кутулмаган гумбирлашдан чўчиб тушдилар. Даврон кўйлагининг ёқасини очиб туф-туф, деди.

— Юракданам боракан-ку, — деди Рустам кулиб.

— Ўзинг-чи, — деди Даврон. — Рангингни қара, докадай бўп кетити.

Иккови бир-бирининг ҳолидан кулиб қўйди.

— Майли, бўлари бўлди, Даврон, — деди Рустам.— Юр, кетдик, ўқ товуши келган тарафга борамиз. Кимдир тустовуқми, қуёнми отаяпти чамамда.

Даврон унинг орқасидан эргашди.

— Куппа-кундузи милтиқ отгани қўрқишмайдими-  
а... Бола-чақалар ўйнаб юрган бўлиши мумкин демай-  
дими.

— Маст бўлса керак, — деди Рустам тўқайзор ора-  
лаб илдам борар экан. — Соғ одам ҳозир ов қилмай-  
ди... Овоз берайлик. Яна палакат босиб...

Даврон унинг гапини тасдиқлади:

— Рост айтасан. Ким билади улар кимлар...

Рустам тўхтади.

— Кел, бир бақириб кўрайлик-чи.

Иккови бараварига бақирди:

— Ҳо-ой! Ким у-у?!

Ҳар иккаласи бутун вужудини қулоққа айланти-  
риб, атрофга қулоқ тутди. Лекин ҳеч қандай сас-садо  
чиқмади. Яна бақиришди. Бу гал жим туриб қулоқ  
солиши. Шунда тўқайнинг бир бурчагидан икки-уч  
кишининг секин гаплашган овози қулоққа чалинди.  
Рустам эшиитдингми, дёғандек, Давронга қаради. Жўра-  
лар қарашлариданоқ бир-бирининг фикрини англали-  
лар.

— Кетдик!

— Кетдик!

Улар товуш келган томонга юрдилар.

Тўқайнинг қишлоқдан келавериш тарафида катта-  
роқ ҳовузнинг ўрнича келадиган очиқ майдон бор.  
Жўралар ҳозир шу майдонни мўлжаллаб боришарди.  
Бинобарин, ўқ овози ҳам шу ёқдан эшитилганди. Улар  
майдонга тахминан яқинлашиб қолганларида яна ўқ  
овози эшитилди. Сўнгра икки-уч кишининг қувноқ  
қийқириғи жаранглади. Буларнинг ҳаммаси Рустам би-  
лан Давроннинг шундоқ бурнининг остида рўй берди  
гё. Шунинг учун ҳам аввал Рустам, орқасидан Дав-  
рон бақирди:

— Ким у милтиқ отаётган?

— Ҳозир милиция чақираман!

Улар майдонга чиқдилар.

Икки дўст адашмаган эди. «Овчилар»нинг лаш-луши  
шу майдонда экан. Уларнинг кийимлари ёнида битта  
қуён, битта тустовуқ ётарди. Лекин ҳеч ким кўрин-  
мади.

— Ана,— деди Даврон шошиб. — Қуён, тустовуқ  
отишипти. Ўзлари қаерда экан.

— Ҳозир келади шу ерга, — Рустам катталардай салмоқлаб гапирди. — Бироз сабр қилиб турайлик.

Иккови майдоннинг қарама-қарши тарафида, буталар панасига чўнқайиб ўтириди. Бир пиёла чой ичкулийк фурсат ўтар-ўтмас уч киши тўқай ичидан чиқиб келди. Улардан бирининг қўлида қип-қизил тустовуқ.

— Ие, Камол дўхтири-ку, — деди Рустам.

Камол дўхтири — қўшни қишлоқлик врач. У мактабга ҳам тез-тез келиб туради. Ҳамма болалар уни яхши танийди. Бу йил Камол дўхтирининг ўғли мактабни битирди. У ҳали ўқиш тутамасдан «медиинститутта кираман, отам аллақачон гаплашиб қўйган», деб ҳаммага мақтаниб юради. Бу гапларни, табиийки, Рустам билан Даврон ҳам эшиттан.

— Ёнидагилар ким бўлди экан? — деди ажабланиб Даврон.

Рустам жўрасига синовчан назар ташлади.

— Мени синаб кўрмоқчимисан? Ёки...

Даврон ҳайрон бўлиб Рустамга юзланди.

— Нимага ундан дейсан?

— Билмаяпсанми кимлигини? — деди Рустам тагдор қилиб.

— Қаёқдан билай.

Рустам Камол дўхтирининг ўғли айтиб юрган гапни эслатди.

— Институтнинг домлаларими шулар? — деди негадир ҳафсаласи пир бўлган Даврон.

— Нима, сенингча институт домлаларининг шохи борми? Уларам ҳаммага ўхшаган одам-да.

Негадир Давроннинг ҳамон ишонгиси келмасди.

— Қаердан биласан булар кимлигини? Балки домламас, бошқа одамлардир.

Давроннинг гаплари Рустамни ажаблантириди.

— Эҳтимол бошқадир... Лекин нима учундир мен шунаقا деб ўйлаяпман... — Бирдан Рустам сергак тортиди. Ялт этиб жўрасига қаради. — Менга қара, Даврон, ким бўлса бўлар, бизга барибир. Аммо нима учун куппа-кундузи бу ерга келиб ов қиласди улар? Ахир ҳозир на куёну на тустовуқни отиш мумкин эмас-ку.

— Ким билади дейсан...

Икки жўра ўзаро гаплашишардию кўзлари «овчилар»нинг ҳаракатини кузатарди. «Овчилар» ўлжалари ни тўрвага сола бошладилар.

— Кетдик, уларни ушлаймиз, — деди Рустам.

— Кетдик. Нима ҳақи бор бу ердан ов қилишга.

Иккаласи баравар «овчилар» томонга югурди. Буларни кўриб Камол дўхтири ҳам, меҳмонлар ҳам ҳангманг бўлиб қолдилар.

— Ҳа, болалар, тинчликми? Нимага бақирасилар? — деди Камол дўхтири.

Олдинма-кейин югуриб келган жўралар «овчилар»-нинг олдида тақقا қотди.

— Нимага отасизлар?

Рустамнинг кескин айтилган бу гапи «овчилар»ни бир зум саросимага солиб қўйди. Меҳмонларнинг бири ўзбек, иккинчиси рус бўлиб, иккови ҳам башанг кийинган, силлиқ юzlари куннинг иссиғида қизариб кетган эди. Рус киши Камол дўхтирга:

— Кто они такие? — деди болаларга ишора қилиб.

Камол дўхтири унга нималардир деб тушунтириди. Бу сұхбат жўраларнинг баттар ғашига тегди. Даврон Камол дўхтирга яқинроқ бориб хезланди:

— Камол ака, ўзингиз дўхтири бўлсангиз, ҳозир ов қилиш мумкинмаслигини биласиз, яна нимага куппа-кундузи булади отасиз? — деди тустовуғу қуёnlарни кўрсатиб.

Камол дўхтири аввалига нима дейишини билмай каловлаб қолди. Бироқ дарҳол ўзини қўлга олиб, баланддан кела бошлади:

— Жа акъли бўп кетибсиларми, болалар. Силар билган нарсани бизам биламиз. Лекин меҳмонди кўнглига қарашиб керакми?!

Жўралар бўш келмадилар:

— Бу ерда тўқай борлигини, унинг ичида қуёну тустовуқлар юришини меҳмонлар қаёқдан билишади?

Меҳмонлар ўзаро бир-бирига нимадир деди. Рустамнинг гапини рус меҳмонга таржима қилиб берди чамаси. Сўнгра иккала меҳмон Камол дўхтирга маънодор қаради. Аслида бу қарашнинг замираида чуқур маъно мужассам эди.

Рустам айтганидай Камол дўхтири ўғлини мединститутта киритиш ниятида домлалар билан гаплашган, шу сабаб уларни уйига меҳмонга таклиф этган эди. Улар анча ўтиришди, еб-ичишли. Бироз кайф қилишгандан кейин Камол дўхтири мақтанди: «Жуда ажойиб жойларимиз бор. Шундай тўқайзорлар борки, ўрмон-

дан қолишмайди. У ерда тулки дейсизми, ёввойи қуён, қирғовул дейсизми, ҳамма нарса бор. Бир бориб ов қилиб, айланиб келайлик.» Бу гапга меҳмонлар аввалига кўнмадилар. «Ҳозир ов қилиш мумкин эмас-ку», деб унамадилар. Аммо нима қилиб бўлса ҳам меҳмонларнинг кўнглини олиш илинжида бўлган Камол дўхтири уларни бир амаллаб кўндириди. Тўқайга келиб меҳмонларнинг оғзи очилиб қолди. У ёқ-бу ёқни бирорз айланишганди гоҳ қуён чопиб кетади, гоҳ парт этиб тустовуқ учади — хуллас, қўриқхона мисоли. Бу ҳолатни кўрган меҳмонлар бир зумда овга берилиб кетдилар.

Ҳозир болаларнинг дашномидан сал ўзларига келишди-ю, аммо ов завқи устунлик қиласди. Камол дўхтири эса зумрашадай болалардан дакки эшитаёттани учун меҳмонлар олдида изза бўлди. Шунинг учун на Камол дўхтири, на меҳмонлар паст келдилар.

— Мунча ақл ўргатдинг менга! — деди Камол дўхтири Рустамга.

— Бор, ишингни қил. Хўжайнликни ким қўйибди сенларга.

Рустам унинг кўзларига тик қаради:

— Мактабдаги учрашувларда, суҳбатларда ўзингиз табиатни асраш керак, ҳайвонот оламини авайлаш зарур, деб қанча гапирасиз. Яна ўзингиз... Домланинг айтганини қилу қилганини қилма экан-да.

Гапга меҳмон аралащи:

— Ўзинг ҳаммасини билар экансан-ку, жиян, гапириб нима қиласан.

— Мен шундай деган бўлсам, — деди Камол дўхтири, — тўғри айтганман. Табиат бизнинг бойлигимиз, тўғри. Лекин ҳамма нарса инсон учун. Инсондан азиз нарса йўқ.

Унинг гапини Даврон илиб кетди;

— Инсондан азиз нарса йўқ, деб, ҳамма нарсани бир чеккадан қириб ташлаш ҳам инсофдан эмас-да.

Бу гапдан дўхтирининг жаҳли чиқди:

— Ким ҳамма нарсани қириб ташляяпти?! Бунча бидирлайсан сен жинқарча. Олдинам бирон марта кўрувдингми мени бу ерда?

— Сиз бир марта келсангиз, бу киши бир марта, яна кимдир, ишқилиб ҳамма бир мартадан келиб ов қиласверса, бу ерда жонивор қоладими?

Меҳмонларнинг олдида ўсал бўлганиданми ёки кайф таъсиридами, Камол дўхтири Рустамга қўл кўтарди. Мўлжали юзига шапалоқ тортиш эди. Бироқ меҳмон унинг қўлидан шартта ушлади.

— Қўйинг, яхшимас, болага қўл кўтарманг.

— Кўрмаяпсизми бу тирранчаларни, — деди Камол дўхтири ўз қилиғидан ўзи қизариб. — Мунча ақл ўргатади одамга. — Кейин Рустамга ўқрайиб қарди.— Йўқол кўзимдан!

Рустам бир қадам орқага тисарилди. Аммо ҳамон паст тушмасди.

— Оғзингизга қараб гапиринг. Ҳозир бригадирни чақириб келаман. Штараф қилади, кейин кўрасиз.

— Ундан каттасини чақирмайсанми? — деди дўхтири овозини баландлатиб, меҳмонларга қаради. — Қани, милтиқни олинглар, шу зумрашалар билан ади-бади айтишиб ўтирамизми. Яна бир-иккита тустовуқ отайлик, кейин кетамиз.

Улар болаларнинг бор-йўқлигига ҳам парво қилмай тўқайзорга оралаб кетишли. Бу жўраларнинг иззат-нафсиға тегди. Бир зум нима қилиш кераклигини маслаҳатлашиб олдилар. Бири у деди, бири бу, деди. Охири Рустам баҳсга яқун ясади.

— Мен шу ерда тураман, буларнинг қаёқса боришни кузатаман. Иложи бўлса бир амаллаб шу ерда ушлаб тураман. Сен физиллаб бориб бригадирни чақириб кел. Бир жазосини берсин буларди.

— Даврон қишлоққа югуриб кетди. Рустам пана бир жойга ўтиб ўтиреди. «Ишқилиб Даврон бригадирни топсин-да... Тезроқ келишса яхши бўларди. Бўмаса булар анча нарсани отиб олишади.» Ҳа деганда Даврон кўринмас, вақт ўтган сари Рустамнинг юраги сиқиларди. Бу орада икки марта ўқ овози гумбирлади. Бунга сари Рустам эзилар, тезроқ бригадир кела қолсайди, деб ичикарди.

Нихоят, Даврон билан бригадир кўринди. Рустам югуриб уларга пешвоз чиқди. Салом-аликни ҳам унтутиб, бригадирга бўлган воқеани айтиб берди.

— Эшитдим, эшитдим, — деди бригадир бамайли хотир, — Даврон айтди. Қаёқса кетди улар?

— Ичкарига кириб кетишгани бўйича ҳали йўқ, — деди Рустам.

— Кийимлари, отган нарсалари турипти лекин. Ҳувана.

Шу маҳал буларнинг келишини пойлаб тургандай тўқайдан «овчилар» чиқиб келдилар. Малла сочли меҳмон бир қуённинг қулоғидан ушлаб олган, учаласининг ҳам кайфияти чоғ, оғзи қулоғида.

— Ҳорманглар,— деди бригадир,— нима ҳаракат?

Камол дўхтири салом-алик қилди-да, бригадирни бир чеккага тортди. Нималарнидир куйиб-пишиб тушунтириди. Бригадир маъқул деган оҳангда бош иргарди тинмай. Сўнгра бригадир болаларга яқин келди.

— Майли, болалар, қўйинглар, азиз меҳмонлар экан,— деди овозини пасайтириб. — Ҳозир кетишади, бошқа отишмайди. Институтнинг домлалари экан. Бир келиб қолишишти. Унинг устига Камол дўхтиридиям ўзига яраша ҳурмат-иззати бор. Буларди олдида у кишига бирон нарса десак, одобдан бўлмайди. Қани боринглар, қўйларингта қаранглар.

Бу гап болаларнинг тарвузини қўлтиғидан туширди. Шундай экан, бригадир қишлоқдан нима учун келди бу ерга? Келаёттандан важоҳати бошқача эди-ку. Дўхтири билан гаплашиб бирдан сувга тушган бўлка нондай бўшашиб қолди. Нима гап ўзи?

Болалар бу саволларга жавоб тополмай гаранг эди. Аммо улар хўп деб кета олмадилар.

— Мелисани айтиб келиш керак, — деди Рустам, - Югур, Даврон, бориб айт. Иложи бўлса шу ерга тез етиб келсин.

— Унгача булар кетиб қолишимайдими?

— Сен тез югур. Мен буларди гапга солиб турман. Милисанинг матасекили бор. Бир пасда етиб келади.

Даврон милицияхонага югурди. Гап нимада эканини билмаган «овчилар» ҳам, бригадир ҳам ҳайрон бўлиб Рустамга қараща.

— Жўранг қаёқقا кетди? — деди бригадир.

Рустам ўзини билмаганга солди.

— Билмадим. Қўйларининг олдига кетди чоғи.

— Ўзингни гўлликка солма, — деди Камол дўхтири. — Жўранг қаёқقا кеттанини билмайсанми.

Рустам ўзини хотиржам тутар, нима қилиб бўлса ҳам вақтни чўзишни истар эди.

— Сизга барибир эмасми, Камол ака. Сиз на бригадирдан, на ундан каттасидан — ҳеч кимдан қўрқмайсиз-ку.

Дўхтири рўмолчаси билан юзу бўйинларининг терини артаркан деди:

— Қўрқмайман, ҳа, қўрқмайман. Билдингми. Менга деса райком секретарини бошлаб келмайсанми.

Унинг бу гапи бригадирнинг иззат-нафсиға тегди чоғи, дўхтирга бежо қараб қўйди, лекин ҳеч нарса демади.

Шу пайт қишлоқ тарафдан мотоциклнинг патиллаган овози эшишилди. Унга дастлаб Рустамдан бўлак ҳеч ким эътибор бермади. Овоз тобора яқинлаша бошлади. Бу Рустамнинг кўнглини кўтарар, ич-ичидан суюнтираш эди.

Ҳаш-паш дегунча Давронни мингаштирган милиционер етиб келди. У чеcть бериб, ўзини «овчилар»га танишитирди. Ҳозир ов қилиш мавсуми эмаслигини, фалон қонуннинг фалон моддасига кўра шунча сўм жарима тўлаши лозимлигини ва отилган ўлжалар мусодара қилинажагини айтди. Милицияни кўриб «овчилар» довдираб, ов гашти тарқаб кетди. Лекин Камол дўхтири бўш келмади.

— Сизам эринмаган одам экансиз-да, ўртоқ капитан,— деди дўхтири.— Ёш боланинг гапига ишониб шунча йўлдан овора бўлиб шу ерга келиб ўтирибсиз-а.

Милиционер жиiddий қиёфада:

— Аввало бу бизнинг ишимиз. Қаерда шунаقا воқеани эшиксак етиб борамиз. Уннан кейин, болалар ёлғон гапиришмайди. Мана, ўзим кўриб турибман. — У шундай деб чарм папкасини очиб, қофоз-ручка ола бошлади. — Қани, исм-шарифларингизни айтинглар.

Бу гаплар болаларди қанчалар севинтиrsa, Камол дўхтиру меҳмонларни шунча ташвишга sola бошлади. Дўхтири нима қиларини билмай довдираб қолди, умидворлик билан бригадирга термулди, у билмадим, деган оҳангда елка қисди. Қараса милиционер бўш келадиганга ўхшамайди, дўхтири дадил ишга киришди. Шартта милиционернинг тирсагидан олди-да, четга тортди. Бригадирга нималарни уқтирган бўлса, бунга ҳам шуларни гапира бошлади. Уларни кузатиб турган болалар бир-бирига шивирларди: «Бу милиса жуда қаттик,

Камол дўхтирди гапига кўнмайди. Барибир штраф солади.»

Йўқ, болалар янгишган эдилар. Милиционер ҳам худди бригадирдай аввалига йўқ деди, қаттиқ-қаттиқ гапирди. Кейин юзига қулги югуриб, оғзи илжайди. Камол дўхтири билан қўл ташлашиди. Бу гал суҳбатга меҳмонлар ҳам қўшилдилар. Улар ҳам милиционер билан қўл ташлашиди.

— Жонкуярлигинглар учун раҳмат, укалар, — деди милиционер болаларга яқин келиб. — Силасга мен раҳматнома эълон қиласман. Ҳар доим шундай ҳушёр бўлинглар. Аммо бу галча буларга тегмайлик. Азиз меҳмонлар экан. Обрўли домлаларни беҳурмат қилсак яхши эмас. Улар иккинчи марта бундай иш қилмайдилар. Яхши отта бир қамчи дегандай, шу огоҳлантиришнинг ўзи етарли уларга. Хўп, хайр, болалар, раҳмат силасга.

У шундай деб мотоциклига ўтирди-да, париллатиб ҳайдаб кетди. Рустам билан Даврон ҳеч нарсага тушиумай гаранг бўлиб қолди. Уларни кузатиб турган Камол дўхтири:

— Тустовуқдан биттасини берайми, болалар? — деди.

Бу гапдан «овчилар» кулиб юборишиди, бригадир ҳам қўшилди.

Рустам билан Даврон энсаси қотиб, бу воқеаларга ақли етмай оғир қадамлар билан қўйлари томонга йўл олдилар. Улар ўзаро турли фикрларга бордилар, ҳар хил тахминлар қилдилар. Бироқ бир нарсани — бригадирнинг ҳам, милиционернинг ҳам ўғли медицина институтига кириш илинжида юрганини, бутунги ов баҳонасида фақат Камол дўхтирининг эмас, бригадир билан милиционернинг ҳам мушкули осон бўлганини, уларга ўзлари билиб-бilmай яхшилик қилиб қўйганини мана бу жонкуяр болалар билмас эдилар.

\* \* \*

Бу воқеага йигирма йилдан ошди. Рустам билан Даврон мактабни битирди. Камол дўхтири ва унинг меҳмонлари билан қўл ташлашмаса-да, иккови ҳам медицина институтига ўқишга кирди.

Хозир у боғлару тўқайзорлар йўқ. Ёввойи қуёну тустовуқларни Мингбулоқ болалари ҳатто танимайди-

лар. Икки жўра болалик йилларини эслаб қолишганда ўша воқеа дамба-дам ёдига тушаверади. Боғ-роғлар, токзорлар, тўқайзорлар йўқ бўлиб, ҳайвонлару паррандалар қирилиб кетишига ўша Камол дўхтири, бригадири милиционер, шуларга ўхшаш кимсалар сабабчи бўлиб кўринаверади уларга.

Яна ким билади дейсиз...

1993 йил.

## ЁЛГИЗЛИК

*Ёлғизлик ҳасратин кўрсатма, тақдир,  
Ёлғизлик инсонга ўлим-ку ахир...*

Абдулла Орипов

Икки кун эзиб ёққан ёмғир пайшанба куни эртабаб тинди. Еруқўқдан намчил ҳид келади. Эндиғина ниш урган майсалар, ҳали куртак чиқаришга улгурмаган дараҳтлар заҳ ҳавода совқоттан боладек қунишади.

Қишлоқ этагидан ўтадиган дарёга сел келган. Тоғ сойларининг суви шу дарёга йигилган. Ҳозир у тўлиб, қирғоқларидан тошиб оқмоқда. Ҳасчўплар билан тўлган дарё қоп-қора, бўтана. Сел кун ботиш томондан шиддат билан йўл четидаги жарликка келиб урилади-да, яна чапга бурилиб кетади. Аждаҳодек вишиллаб оқаётган селнинг зарбидан дам-бадам жарнинг бир парчаси шалоп-шалоп этиб қулаб тушади.

Жониқул ота жар ёқасига келиб селни томоша қилиб ўтирибди. «Тавба, умр оқар сув деганлари шуда. Оқишини қара. Не-не одамлар ўтиб кетди-я. Манави жарчи. Йўлга етишига оз қолибди. Илгари дарё ҳув анави ердан оқарди». Ўзича дарёнинг нариги қирғонини мўлжаллади. «Шунча жойни ювиб кетибди-я. Ҳар йили сел келаверса, жарни ювиб бораверса, охирни нима бўлади? Йўлни ҳам олиб кетади-ку».

— Марайим аканикига савоби жанозага-а...

Жониқул отанинг хаёли бўлинди. Тош йўлдан отчоптириб қелаётган йигиттага қаради. Чопонининг устидан белини боғлаб олган йигит — отага яқин келдида, отини секинлатди.

- Ассалому алайкум, бова.
- Ваалайкум ассалом. Бу, Марайимнинг кими қазо қипти, бўтам?
- Ўғли. Тракторчи ўғли бор эди-ку, ўша.
- Ота алланималарни пичирлаб юзига фотиҳа тортиди.
- Нима қипти? Қайси кунигина соппа-соғ юрувди-ку?
- Ажал экан-да, бова. Кеча қирдаги қўтонга хашак олиб бораёттан экан, тракторнинг фидираги лойда тойиб кетиб, авария бўпти. Тракторнинг тагида қопти ўзи.
- Ё оллоҳ, ё оллоҳ! Бу қандай кўргулик бўлди? Шу колхоз катталарига неча марта айтдим-а, қўтоннинг йўлини тузатинглар, тош-пош ташланглар, дедим. Қишин-ёзин бориб турасизлар, бир палакат бўлмасин, деб қанча жаврадим-а. Ҳа, ёшлар-а. Кўнглим ўлгур сезувди-я ўзи. Бирорга айтишдан қўрқардим лекин.
- Майли, бова, мен борай бўлмаса, ҳали айтадигай жойлар кўп.
- Йигит отини жадаллатиб кетди. Ярим чақирим жойга бормасидан яна унинг овози эшитилди:
- Марайим аканикига савоби жанозага-а...
- Эрталабдан бу нохуш хабарни эшишган отанинг дили хуфтон бўлди. «Нимага бундай бўлаяпти? Фақат ёшлар-а. Эй оллоҳи карим! Бу нима кўргулик! Олдин келганлар олдин кетса бўлмайдими? Фалак тегирмон тоши деганлари шуми? Ундан бўлса навбати қани? Ишқилиб яхшиликка кўринсин-да».
- Ота оғир-вазмин хаёллар билан орқасига қайтди. Кўз ўнгидан Марайим аканинг ўғли кетмасди. Жуда оқил, одобли бола эди-да. Қўллари доим қора мой бўлиб юрадиган бу йигитнинг юзидан кулги аrimасди. Кўзлари кулиб турарди. Бирорга ёмон гапирганини, оғзидан сен деган сўз чиққанини ҳеч ким эшишмаган.
- Жониқул ота уни охирги марта кўрганини эслади. Ўн кунлар бўлди. Баҳор келиб ҳамма ғимирлаб қолган. Ота одатига кўра дарвоза олдидағи супачага кичкина пўстакни солиб, офтобда исиниб ўтиради. Марайим аканинг ўғли «ДТ-28» тракторини елдириб келиб қолди. У отани кўрди-ю трактордан сакраб тушиб

кўришди. Соғлигини сўради. «Бардам бўлинг ота, худо хоҳласа, баҳорга ҳам чиқиб олдик. Энди буёғи рўйикўклам. Одамнинг дилини яйратадиган кунлар келди», деганди раҳматлик. «Иншоолло, — деди Жониқул ота,— аммо-лекин бу баҳор деганинг бизга ўхшаганларни тентиратиб қўяди. Илик узилган пайт-да». «Йўгон чўзилиб, ингичка узилган вақт денг». «Шундай, шундай, бўтам». «Бўшашманг отахон. Ҳалиям бўлса, сизга ўхшаганлар бардам. Иликларингиз ёқقا тўлган-да». Кулди шўрлик. Кейин чаққонлик билан тракторга чиқди. Ота унинг ортидан ҳавас билан термилиб қолди: «Ишқилиб, худо сенларга қувват берсин. Умри-жонларингни узоқ қилсин».

Ана шу сұхбат Жониқул отанинг кўз олдидан нари кетмас, ўйлагани сари йигитнинг сиймоси ёрқинроқ кўринар, отанинг юраги баттар эзиларди. «Ҳалиям бўлса, сизга ўхшаганлар бардам. Иликларингиз ёқقا тўлганда». Йигитнинг бу гапи ҳозир отанинг юрак-бағрини пармадек ўйиб бораарди...

Жониқул ота Тоштепа қишлоғидагина эмас, колхоз бўйича энг кекса ҳисобланади. Уч йил олдин унинг тенгқурларидан қўшни қишлоқлик Эшонқул бобо қазо қилди. Шундан бери Жониқул отанинг чиройи очилмайди, олдинги ҳазил-ҳузуллари ҳам йўқ. «Ҳалиям шунчалик юриптилар. Бу кишидан ёшларам ўёқ-буёқقا боролмайдиган бўлиб қолган-ку». Аслида отага кексалик ҳали ҳукмини тўла ўтказмаган, ўзининг айтишича, «етти мучаси сор». Тиним билмайди. Молларга жодида беда майдалаб солади, оғилхонанинг, кўчаларнинг қорини курайди. Ёзда эса қўлидан ўроқ билан ток қайчи тушмайди. Ўғиллари, неваралари «уриниб нима қиласиз, дамингизни олиб ётинг», деб неча марта айтишди. Ота бу гапларга индамай кулиб қўяди.

Бир куни жазирاما ёз ойларида Жониқул ота йўл четидаги бедапояда ўт ўрарди. Сутранг «Жигули» келиб тўхтади. Ундан отанинг агроном невараси тушди.

— Ота,— деди у бувасига яқин келаркан,— сиз ўрмасангиз қолиб кетадими шу беда?

Ота ўроқни билагига ташлади, неварасига қараб жилмайди. У шаҳзодалардек салласи печининг учини чиқариб, қантариб қўйган, юzlари, қош-киприклари, соқол-мўйлови чангда яна ҳам окрок кўринарди.

— Нима зарил сизга, ота? Йўл усти бўлса яна. Кўрганлар нима дейди? Бир гилам ўрнича жойу, шуниям ўзлари ўрмай, кекса одамга ўрдириб ўтиришипти дейишмайдими?

Ота неварасининг билагидан олди-да, бир даста бедани кўрсатиб «ўтири» дегандай имо қилди. Ўзи хам чордана қурди.

— Мана бунга қара, ўғлим,— деди ота ишлатилавериб ярақлаб кетган ўроқни неварасига кўрсатиб,— бу бир ўрок, темир. Шуям ишлатилгани учун ярқираб, очилиб турилти. Бир жойда тураверса, занг босиб кетади. Одам ҳам шундай. Қимирлаб, ҳаракат қилиб турмаса бўлмайди. Занглаб қолади. Жонсиз темирники ишлатиб туриш лозим бўлгандан кейин, одамни қўявер. Мехнат қилиш учун яралган-ку одамзот. Бир жойда тек турса, ҳамма нарса айнийди.

Кўлмак сувни қара, сасиб кетади, ҳатто мол ҳам ичмайди. Шунинг учун сен ҳар кимнинг гапига қулоқ солаверма. Мен шу ўт ўрилмай қолиб кетади деганим йўқ. Ўрилади. Лекин индамай, кўзли кесак бўлиб ётолмайман. Шол бўлмасам, қўл-оёғим бут бўлса...

— Сиз шундай дейсиз-да, ота. Ҳаммаям тўғри тушунавермайди-да.

— Гапирган гапираверсан. Бу дунёда кўринган одамнинг гапига қулоқ солаверсанг, қилар ишингни билмай қоласан, болам.

Агроном бошқа гапирмади. «Ке, қўй, яна қайфиятини бузиб қўймай. Шу билан ўзини овунтирса овингтирас».

— Бўлти, мен кетдим...

— «Шошма. Галингни ўйлаб гапираяпсанми? — деди ота. — Кетдим деганинг нимаси? Кетдим демайди, «мен борай», дейиш керак.

— Э, шунақа майда-чуйда гапларга парво қилаверманг, ота.

— Бу майда-чуйдамас. Ўзинг-ку одамларнинг олди-қочди гапини кўнглингта олиб юрибсан. Аслида ўша гаплар майда-чуйда.

— Бўлти, бундан кейин айтмайман. Борай-чи, буғдойга комбайн келмоқчиди. Хабар олай.

— Ҳа ёшлар-а,— дея кулимсираб, яна ўт ўришга киришди ота.

Кеч кузга бориб Жониқул ота бетоб бўлиб қолди. Унинг олдидан одам узилмайди. Каттаю-кичик келиб, ҳол-аҳвол сўраб кетади. Ота касал бўлгандан бери деярли ҳар оқшом ўғил-қизлари, неваралари, қўни-қўшнилар унинг олдида гурунглашиб ўтирадилар. Отани зериктириб қўймаслик пайида бўладилар. Улар ҳар хил масалалардан сўз очадилар. Отани индамай уларнинг гапига қулоқ солиб ётади.

Шундай оқшомлардан бирида Жониқул ота оҳиста гап бошлиди:

— Болаларим, энди менинг ризқим тугаб, куним битганга ўхшайди. Шунинг учун...

Ҳамма ялт этиб, бетоб бўлса-да, ранг-рўйини унчалик олдирмаган отага қаради. Агроном невараси отага яқинроқ сурилиб ўтириди.

— Нималар деяпсиз, ота? Ҳали бардамсиз, тузалиб кетасиз, ҳеч нарса кўрмагандай бўлиб.

— Сиззи шундай юришингиз биз учун катта давлат. Тоғдай суюб турибсиз-ку бизларди,— деди ўғилларидан бири. — Унақа гапларни қўйинг ҳали. Юзйил ҳеч нарса бўлмай қолди ҳозирги вақтда.

Ота болаларининг сўзига индамай қулоқ солди-да, сўнг бир қизиқ гап эсига тушгандай жилмайиб қўйди.

— Тўтри, болаларим. Ҳаёт яхши, жон ширин. Лекин ҳамма нарсанинг ҳам меъёри бор, вақти-соати бор. — Ота бир оз жим қолди. — Энди мен сизларга бир нарсани айтай. Бу дунёning завқиям, лаззатиям ўз тенгқурларинг, бўйинсаларинг билан totли. Бусиз ҳеч ниманинг қизиги йўқ. Раҳматли Эшонқул кетдию мен учун ёруғ дунёда ҳеч ким қолмагандай туюлди. Шундай пайтда билинаркан инсонди қадр-қиммати. Одамзотнинг қадрига тириклигига етиш керак, болаларим. Нимаики иззат-икром бўлса, кўзи очиқлигига қилиш лозим. Ўлгандан кейин минг эслаш, хотирлаш — ҳаммаси бир пул. Эшонқул билан қадрдонлигимиз, бир-биримизга ҳазил-хузул қилиб юрганимиз учунгина эмас. Унинг ўлими билан биз қаторилар тугади. Тенгдошларидан айрилиб, яккамиҳдай серрайиб қолиш ҳам яхшиликка товин эмас-да, болаларим. Билмадим, шунчалик кўп эканми гуноҳим?

— Сизни бирор хафа қилдими?

— Эй, ўғлим, ким хафа қиласы мени. Қайтанга бутун иззат-хурматдаман-ку. Кўнгилларинг ҳар ёқса кетмасин. Менинг ёшимга борганда чақасизлар бу гапларди мағзини. Дараҳтнинг ҳам қуриганини, қурт еганини, чириганини кесадилар-ку. Ёш ниҳолни кесиш қанчалик увол, ахир.

— Қўлимиздан нима келади,— деди маъюсланиб кимдир.

Ота чуқур хўрсинди-да, юқорироқ сурилиб ётди.

— Ҳа, қўлимиздан ҳеч нарса келмайди. Иложимиз йўқ. Мана шунга куяман-да, болаларим. Неварам, ҳатто зварам тенгиларнинг таъзиясига бориб юрибман-а. Бу қандай кўргулик, ахир?! Ота-она ўлмоғи — мерос. Фарзанд доғини худо кўрсатмасин.

— Қўйинг, ота, бунақа гапларни. Чарчайсиз, бир оз дам олинг,— деди невараси.

— Йўқ, ўғлим, чарчаган эмасман. Менга таскин бераман дема. Отангни дунёдан безиялти дебам ўйлама. Биласизлар, менинг бошимдан не-не машаққатлар, қийинчиликлар ўтган. Шу азоблардан қутулиб, энди оёқни узатиб ҳордиқ чиқараман деганда, сўққабош бўлиб қолсанг, алам қилмайдими? Одамзот қариганда фақат ўтмишни эслайди. У яхшими, ёмонми — бари бир. Унинг эртаси, ширин-шакар нияти, орзулари йўқ. Аммо ўша ўтган кунларини бирга эслаш учун улфат бўлиши керакми? Мен кимга айтаман дардимни, ким тушунади? Уч йилдан бери шу аҳвoldаман. Эшонқул билан дардлашардик, ҳазиллашардик, ўтган-кетган ҳақида эслашиб ўтирадик. Энди йўқ, у гаплар. Ҳаммаси тутади...

— Қўйинг, ота, кўп қийнаманг бизларди,— деди агроном.— Ахир бизни яшашга, ҳаётдан завқланишга ўзингиз ўргаттансиз-ку. Нима бўлди энди сизга, бунча тушкунликка тушиб қолдингиз?

— Хафа қилганим учун мени кечиринглар... Ёлғиз яшаш оғир бўларкан. Ёлғизлик Оллоҳга ярашади, деб бекорга айтишмаган-да. Худога шукур, сенлардай эслихушли, ақлли болаларим бор. Бундан нолимайман. Аммо тенгқурларнинг ўрни бўлакча, улардан айрилишнинг дарди ҳам оғир. Устун синса, устунга зўр келади. Бу дунёга ҳеч ким устун бўлмайди, аммо ҳамма устуларнинг юкини кўтариш ҳам осон эмас-да. — Ота оғир тин олди. Ўтирганларга бирма-бир зеҳн солиб чиқди. — Мана, болам, сен агрономсан, ўзингта яраша

ошна-оғайнинг, улфатларинг бор. Шулар билан яйрайсан, очилиб гурунглashedсан. Ўғлингнинг жўралари билан ўз ошналарингдай ёйилиб сухбат қуролмайсанку, тўғрими... Унинг устига катта энанг раҳматли ҳам эрта кунда йўлга туша қолди. Умри қисқа экан худо раҳматини...

Отанинг гапини ҳамма сукут билан тинглар, елкасидан оғир бир юк босгандай бошини хам қилиб ўтиришар, бирон-бир сўз дейишга ҳеч кимнинг қуввати, мадори етмасди.

\* \* \*

Қишлоқ қариялари тўпланиб Жониқул отанинг олдига келишиди.

— Ота, бўлинг,— деди оқсоқоллардан бири. — Жанозага айтишди. Бориб келайлик.

Отанинг қовоқлари солинган, жуда хомуш, гапиргиси ҳам келмасди.

— Нимага пакарсиз, ота? Мазангиз йўқми?

— Ҳа, тобим йўқ, оғрияпти, дилим оғрияпти. Бу қандай гап, ахир, ёшгина йигит-а. Бир йил ичида учта навқирон кетди-я. Бирини машина босган, бирори тракторнинг тагида қолган... Бунга чидаб бўладими? Бу йил жуда оғир келди-да.

— Илон ўили оғир бўлади дейсиз-ку, ўзингиз.

— Лекин бунчаликмас-да. Нима бало, илон думи билан тушганмикан сувга-я?

— Буям оллонинг иродаси-да. Қани, бўла қолинг, тезроқ борайлик.

Отанинг қўллари қалтирап, ўзини босолмасди.

— Қандай бораман, қайси юз билан?

— Сизда нима айб? Қайси юз билан деганингиз нимаси?

— Қайси куни кўрувдим-а, раҳматликни. Мана шу ерда, дарвозада. Йўқ, мен бормай қўя қолай...

Оқсоқоллар отани ҳол-жонига қўйишмади:

— Кексайиб жуда ваҳимачи бўлиб қопсиз ўзи. Ҳадеб уйда ўтираверса хаёл ҳар ёққа олиб кетаверади. Юринг, бундай одамларга аралашинг, кўнглингиз ёзилади... Ажал-да, ёш-қарига қарайдими. Куни битган одам эртами-кечми кетавераркан-да... Бўлинг, машина кутиб қолди...

Ўша куни таъзиядан қайтаётиб Жониқул отанинг эти увишди. Қаттиқ намгарчилик таъсир қилдими, уйга келиб ётиб қолди. Отанинг аъзои-бадани олов бўлиб ёнарди. Бироқ ота буни ҳеч кимга билдирмас, тиши-ни-тишига босиб жим ётарди. Хуфтонга бориб кўзи илинди. Туш кўрди. Қадрдони Эшонқул уни қидириб-қидириб, охири топиб олганмиш. «Э, жўра, қаёқларда қолдинг ёлғиз ўзинг», дермиш. Жониқул ота бўлса «Нимага ёлғиз дейсан? Болаларим-чи, невараларим, қишлоқ одамлари-чи?» — депти ҳайрон бўлиб. «Э, уларни қўй. Сенга ҳамроҳ бўлармиди улар. Ёшлар ўз кунини кўрсин. Уларнинг йўриги бўлак, бизники бўлак. Қани, юр, кетдик», деб Жониқул отани қаёққадир етаклаб кетганмиш. «Ҳой, тўхта, мен болаларимга айтай, кейин қидириб юришмасин», деса ҳам қулоқ солмасмиш.

Ота уйқусида кўп алаҳсиради. Бошида ўтирган болалари иссиғи кўтарилганидан, деб ўйлашди. Ота чўчиб уйғонди-ю атрофга аланглади.

— Қани? Қаёқда кетди?

Бош томонида ўтирган катта ўғли отасининг пешонасига қўлинни қўйди. Иссиқ!

— Ким? Ҳозир келади, ҳозир.

Ота бир дам вассажуфт шифтта қараб хаёл суриб қолди. Кейин аста ўғлига юзланди.

— Энди ётинглар, болаларим. Дам олинглар. Эртага чарчайсизлар ҳали. Вахлироқ туринглар,— деди. Унинг товуши жуда хаста, синиқ чиқди.

...Азонда Жониқул отанинг уйидан эшитилган «Отам-эй, отам-эй», деган овоз сукунат қаърини тилка-пора қилиб, қишлоқ узра ёйилди...

1979 йил.

## ЎЖАР

Алишер ҳеч қачон лагерга бормаган. Таътил бошланди дегунча қишлоққа — бувиси билан бувасининг олдига жўнайди. Аввалари ё дадаси, ё аяси элтиб қўярди. Мана икки йилдирки, у ерга Алишернинг ўзи боради.

Бу йил ҳам мактаб тугаши ҳамоно қишлоққа отланди.

— Мунча шошмасанг, — деди аяси. — Борарсан ўша қишлоққа. Сал нафасингни ростла, ҳали уч ой бор-а олдинда.

Алишер кўнмади.

— Нима қиласман бу ерда. Бетон уйингизда одам кечасиям ухлаёлмайди. Ёниб кетади. Қишлоқ зўр. Соқол отам билан ҳовлида ётаман маза қилиб.

У бувасини «Соқол ота» дейди. Ҳайдар бува етмишни қоралаган эса-да, соқоли ҳали унчалик оқармаган. Ўзи бардам, бир зум тиниб ўтирмайди, гоҳ молларга ўт ўради, гоҳ токларни кесади — ишқилиб ўзига иш топиб туради. Алишер гўдаклик чоғарида бувасининг тиззасига ўтириб соқолини ўйнарди. Ҳайдар бува уни эркалар, кенжা ўғлимнинг ўғли деб, Алишерни бошқа невараларидан кўра кўпроқ суряди. Ўша пайтларда Алишер бувасини Соқол ота деб атаган. Шу-шу Соқол ота бўлиб қолди. Дадаси билан аяси неча марта энди ақлинг кириб, катта бўлдинг, бува дегин, деб танбеҳ, берди. Алишер ўрганолмади. Ҳайдар бува ҳам унинг раъйига қарайди: «Қўяверсаларинг-чи, нима деса дер, ўзи билади». Унга Алишернинг дадаси эътиroz билдириди: «Сиз шундай деб бунинг кўнглини кўтарасиз, кейин қулоғига гап кирмайди». Ҳайдар бува Алишерни эркалатиб: «Йўқ, Алишер ақлли йигит, ҳамма гапга қулоқ солади. Тўғрими?» — дейди.

Ҳайдар бува носвой отади. Рўза кунлари кун бўйи носвой чекмагани учун кечгача гаранг бўлиб юради. Шундай пайтда унга невараларинингчувур-чувури ёқмайди. Шу сабаб келинлари, қизлари шомда оғиз очишдан аввал бувага алоҳида хонада дастурхон тайёрлашади. Чой-пойини ичиб, носвойни чекиб ўзига келмагунча олдига ҳеч ким кирмайди.

Лекин Алишер кириб бораверар, буваси унга индамасди. Бундай пайтда Соқол отасига осудалик ёқишини у қаёқдан билсин. Эндиғина уч ёшга тўлганди. Алишер Соқол отасининг ёнида худди унга ўхшаб чордана қуриб ўтиради. Ҳайдар бува бир-икки пиёла чой ичгандан сўнг носвой отади-да, кўзини юмид ёстиққа ёнбошлайди. Алишер дам-бадам унга қарайди, кейин

ўзича нималардир дейди. Соқол отаси унинг гапини яхши тушунмаса-да, «Ҳа-ҳа, ол, узумдан ол», деб қўяди. Бошқа неваралари кирса Алишерга уларни кўрсатиб: «Ҳайда, ҳайда», дейди. Алишер жойидан иргиб туради-да, болаларни қувади. Ҳайда, ҳайда. «Унинг бу қилиғидан бува кулиб қўяди. Болалар чиқиб кетгач, «Ке, энди бу ерга ўтири», деб ёнидан жой кўрсатади. Алишер пириллаб бориб соқол отасининг ёнига чордана қуради...

Аяси ҳам қатъий турди:

— Ҳовлиқмагин, борарсан. Мани у-бу ишларимга сал қарааш. Ўн-ўн беш кундан кейин борсангам бўлар ахир. Иссиқ бўлса фақат сан турмайсан-ку бетон уйда. Ўлмаган биззи жонимиз-а.

Алишер аясига қаттиқ гапиргиси келмади, аммо бир кун ҳам тургиси йўқ, иложини топса бугуноқ жўнаб кетса қишлоққа. Унинг қовоғи осилиб, лаби дўрдайди. Аяси билдики, гапи Алишерга ёқмади.

Дадаси ўртага тушди:

— Қўявер, аяси, борса борар. Қанча иш бўлса ўзингдан ортмайди. Қолаверса, ана Наргиза бор. У ёқдан Наргизанинг норози оҳангда овози эшитилади.

— Нима, ман чўриманми? Ҳамма ишга мани тиқасизлар. Алишерингиз юрсин ялло қилиб.

Дадаси уни эркалатди:

— Сан катта бўлиб қолдинг, қизим. Алишер ҳали кичкина. Бир-икки йил ўйнасин, кейин буниям бурнини ерга ишқаб ишлатамиз. Шундайми, Алишер?

Бу гап Алишерга ёқмади. Аммо ҳозир қутулиш учун маъқуллаб бош иргади.

— Сиз бунингизни жуда эркалатиб юборяпсиз, — деди аяси. — Қиз бола бўлса Наргизанинг гуноҳи нима? Шу аҳволда кетаверса, бунингиз ишёқмас, дангаса, ялқов бўлади. Ҳозирдан меҳнатта ўргатиш керак.

Алишер аясининг гапини илиб кетди.

— Қишлоққа бориб ишлайман. Соқол отамнинг ишларига қарашаман.

— Гўр қиласан! — деди унга Наргиза. — Ўзинг ишламаганингта яраша у ердаги болаларниям ишдан қолдирасан. Кўрганман-ку, тўрт-бешта бўлиб копток тепасилар, чўмиласилар, эшак минасилар...

Алишер опасини жеркиб ташлади:

— Бўлди! Мунча сайрадинг. Саннан бирор сўраяп-тими.

Наргиза ўзига-ўзи гапиргандай мингирилади:

— Бу йилам бир балони ортириб келар ҳали.

Унинг бу гапида жон бор эди. Алишер деярли ҳар иили қишлоққа борганда ё бошини ёради, ё қўли чиқади, ё бир жойи шилинади. Ишқилиб ишқал чиқармай келмайди.

— Нафасингни иссиқ қил! — деди аяси уни уришиб.

Дадаси қараса гап кўпаядиган. Шунинг учун уларнинг гапини чўрт кесди:

— Бўлди, гапни кўпайтирганлар. Ҳар хил ортиқча гап-сўзнинг нима кераги бор. Ундан кўра Алишерга яхши бориб, яхши дам олиб, ўйнаб-кулиб эсономон кел, денглар.

Наргиза дадасиниг бу гапидан хижолат тортди, жаҳл устида ўйламай айттанини сезди. Бошини хам қилиб сукут сақлади, сўнг дастурхонни йифиштирган кўйи ошхонага чиқиб кетди.

...Охири Алишер билан дадаси ғолиб чиқди. У эртага жўнайдиган бўлди қишлоққа.

— Ман нарсаларини тайёрлаб бермайман, — деди Наргиза.

Аяси унга эътиroz билдиrmади. Алишернинг кийим-бошларини ўзи тайёрлаб, сумкасига жойлаб қўйди.

\* \* \*

Алишер кириб келганда Ҳайдар бува ўрик тагида-ти сўрида ёлғиз ўзи чой ичиб ўтирган эди.

— Ассалому алайкум, ота.

У сумкасини сўри четига қўйдию бувасини қучоқлаб олди.

— Ваалайкум,— деди Ҳайдар бува неварасини қучаркан. — Эсон-омон келдингми, болам. Отанг, энанг, опанг, укаларинг яхши юришилтими?

Алишер бувасининг ёнига ўтириди. Ҳайдар бува фотиҳа ўқиди.

— Раҳмат. Ҳаммалари яхши юришилти, сизга салом айтишди. Ўзингиз тузукмисиз, ота?

Ҳайдар бува қалин, узун соқолини силади.

— Худога шукур, тузукман. Отангни ишлари яхшими? Аңчадан бери келмайди.

— Яхшилар. Ҳали отпускага чиққанлари йўқ. Отпускага чиқсан бораман, дедилар.

— Ишқилиб эсон бўлишсин. Мактабинг битдими?

Ҳайдар бува чой қуийб, неварасига узатди. Алишер чойни оларкан:

— Ҳа, — деди, — ўқиш тугаши билан буёққа жўнадим.

— Боплапсан. Жазирамада шаҳарда нима қиласан. Уйларинг тоза ҳаммом бўлиб кетаркан ёзда.

Уч-тўрт йил бурун ёзда Ҳайдар бува Алишерларникига борган. Беш-олти кун туриб, шаҳарни томоша қиласман, девди. Қаёқда, бир кеча ётдию эртасига кетаманга тушди. Ҳамма ҳайрон.

— Э, бу уйларингда одамзод чидаб бўмайди-ку, — деди бува ҳафсаласи пир бўлиб. — Нафасим қайтиб кетди. Кечасиям дим, деворларгача қизиб ётипти-я! Э, тавба, одам боласи ҳамма жойда яшаб кетаверай-кан-да.

Ўғли, келини, неваралари қанча ялинишди, айниқса Алишер унинг этагига осилиб олди. Лекин Ҳайдар бува кўнмади. Жўнаб кетди қишлоққа.

Шундан бери у ёз ойлари бормайди шаҳарга. Ўғлини, невараларини қўргиси келса ёки бирон-бир юмуш чиқса баҳордами, куздами боради...

Алишер бувасининг гапини маъқуллади.

— Бувим, бошқалар қани? — сўради Алишер.

— Қишлоқда тўй бор. Эгамберди деган одамди билласанми? Ана шу тўй қиласяпти. Ҳамма шақа кетган... Бир полгина жойга беда экувдим. Кеча қарасам гуллағити. Ўриб қўймасам, қотиб қолади. Ке, шуни чўзиб юрмайин дедим-да, эрталаб ўришга тушдим. Ҳозирда тутатдим. Жуда чанқадим, бир пиёла чой ичиб, нафасимни ростлай, кейин тўйга бораман, деб ўтирувдим. Яхшиям кетиб қолмаганим, сен келайкансан.

Алишер бувасининг тиниб-тинчимаслигига қойил қолди.

— Ҳалиям беда ўрасизми, ота?

— Нимага ўрмайман?! Отам қариб қолди, дейсанми? — Ҳайдар бува кулди. — Ҳе, болам, мени ўрганим нима бўлайди. Бекор ёттандан кўра бир эрмак-

да. Ҳам амакиларингга ёрдам... Бошқа кийимларингам борми?

Алишер йўлда эзилмасин деб кўйлак-шимларини сумкасига солган, устида эса қандайдир ёзувлари бор футболка, тор трико эди. У бувасининг фикрини тушунди.

— Бошқа кийимларим бор, — деди.

— Бўлмаса шуларни кий. Икковимиз тўйга борамиз. Шу кийимда борсанг, одамлар қулади. Фалончининг неварасини юришини қаранглар, дейди. Шаҳарди йўли бўлак.

Алишер сумкасини кўтариб ичкарига кириб кетди. Бир оздан сўнг кўйлак-шимини кийиб чиқди.

— Бу бошқа гап, — деди Ҳайдар бува. — Жўрала-ринг билан ўйнаганингда кийсанг майли боягиларди.

Бува билан невара тўйга отланди...

\* \* \*

Алишер эшакка минишга ишқибоз. Қандай қилиб бўлса-да, эшак минишга баҳона қидиради.

Ҳайдар буванинг эшаги бақувват, унча-мунча юкни кўрдим демайди. Бува унинг емишига қарайди-да. Қишин-ёзин емини узмайди. Болаларини ҳам эшакка қаранглар, деб тергагани-тергаган. Шу боис буванинг куулранг эшаги доим йилтираб туради.

Ҳайдар буванинг эшакка бу қадар эътибор бериши бекорга эмас. Ўзининг ибораси билан айтганда, эшак унинг қўл-оёғи. Нима кўп, Ҳайдар буванинг юриши кўп. Бугун фалон қишлоқда тўй, эртага бошқа қишлоқда, яна жаноза, бошқа маросимлар... Бува ҳаммасига эринмай боради. Ана шунда эшак кунига ярайди. Бугина эмас, рўзгорда қанча-қанча ишлар борки, эшаксиз битмайди. Сув келтиришдан тортиб, хашак ташишгача, э-хе озмунча юмушми. Аравани қанқиллатиб тортганда ҳамманинг ҳаваси келади. «Жониворнинг гўшти ҳаром бўлгани билан меҳнати ҳалол. Уям одамзоднинг қўлига қараган маҳлук. Вақтида емишини, сувини бериш керак», дейди бува.

Алишер буваси эшагининг юришини ёқтиради. Худди отдай тарсиллаб юради. Чопишиям зўр. Алишер тўқимга маҳкам ўрнашиб олади-да, эшакни чоптиради. Буваси кўриб қолса уришади: Ҳой, секинроқ ҳайдা.

Ўлдирасан-ку эшакни ичини узиб». Алишер қулоқ солмайды, баттар хала босади.

Бувисининг хавотири бошқа ёқда. «Эшак Алишерни йикитиб, бирон жойинн майиб-пайиб қилмасин тагин». Ҳар йили ёзда келганида бирон жойини қашқа қиласвериб бувиси бечоранинг юраги олиниб қолган. Тинч ўтири деганига қулоқ солмайди. Келганидан то, уйига кеттунича буви бечорани ана шу хавотир тарк этмайди.

— Алишержон, болам, эшақдан эҳтиёт бўлгин, йикитиб-пиқитиб кетмасин.

— Йикитмайди, буви, эшак ювош, — дейди Алишер маҳмаданалик қилиб.

Буви ўзига-ўзи гапиради:

— Илоё эгам ўзи паноҳида асрасин. Ҳайвон-да, билиб бўладими...

Бугун жума. Алишер билади — буваси район марказига номоз жумага кетади. Кун бўйи маза қилиб эшак миниши мумкин.

Нонуштадан кейин Ҳайдар бува одатига кўра янги тўнини кийди, янги салласини ўради.

— Ҳа, ота, — деди Алишер ўсмоқчилаб, — қаёққа отланяпсиз?

Бува неварасига қараб мугомбirona кулди:

— Ҳа, шайтон. Билиб туриб, сўрайсан-а.

Бува автобус бекатига чиқиб кетди.

Алишер эшакни тўқимлади. Ҳалачўпни олди-да, иртиб минди. Қишлоқ этагида кенг майдон бор. Ҳамма болалар ўша ерга бориб коптотк тепади, эшакда кўпкари ўйнашади. Алишер эшакнинг бошини шу томонга бурди. Яхшилаб икки-уч хала босди. Эшак аввалига йўртди. Алишер яна ҳалалаб, биқинига икки марта нуқиганди, эшак қўшоёқлаб чопди. Бундан Алишернинг завқи келиб, баттар чоптирди. У ўзини гўё суворийдай ҳис қилиб, ҳовлиқиб борарди.

Йўл ёқасидаги бутазор орасидан бир ит илкис отилиб чиқдию вовуллаб унга ташланди. Чопиб бораёттган эшак итдан ҳуркиб, шартта чапга бурилди. Мувозанатини йўқотиб қўйган Алишер эшақдан ағдарилиб тушди, икки-уч думалаб кетди. Ўридан туриб уст-бошининг чангини қоқди. Атрофга аланглади. Тўқими қорнига осилган эшак ҳув нарида кетиб борарди. Ит эса йўқ, аллақачон ғойиб бўлган эди. Алишер билдики,

эшакнинг айилини қаттиқ тортмаган экан. Кескин бурилганда тўқими қолиб, ўзи ағдарилиб тушитти. Эшакни ушлай деб унинг ортидан югурмоқчи бўлди, аммо чополмади. Ўнг оёғининг тўтиғи зиркираб оғриди. Шимининг почасини кўтариб қаради: ҳеч нарса сезмади. Яна юрди. Яна оғриди. Чўлоқданиб аста-секин юрди. Оғриқ босилиш ўрнига баттар зўрайди. «Нима бало бўлди экан, ишқилиб оёғим синмаган бўлсин-да. Йўқ, синса юрлмасдим. Щунчаки лат егандир...»

Алишер уйга томон йўналди. Оғриқ тобора кучайиб, оёғини босишга безиллаб қолди.

Ҳайдар бува жума номозидан қайтганда Алишер ўрик тагидаги сўрида чўзилиб ётарди.

— Ҳа, ўғлим, нима бўлди?

— Оёғим оғрияпти, — деди Алишер. Эшақдан йиқилганини айтмади.

Тандирда нон ёпаётган бувиси чолининг овозини эшишиб унга ўтирилди.

— Эшагингиз ўлгур Алишерди йиқитиб кетипти. Оёғи чиққанми, лат еганми, босолмаяпти.

Ҳайдар бува Алишернинг ёнига ўтирилди.

— Қачон йиқитди? Қаерда?

Алишернинг ўрнига бувиси жавоб берди:

— Эрталаб кучуқдан ҳуркиб йиқитипти.

Ҳайдар бува афсусланиб бош чайқади. Неварасига деди:

— Ўзингам кўп ўжарсан-да, улим. Ҳадеб эшакка минаверма, ҳайвон-да у, билиб бўладими десам, хафа бўласан. Оддинлариям қанча йиқилувдинг. Ҳеч паңдигят бўлмади-да сенга. Тинчгина юрсанг-ку майли-я. Менга деса, эртадан кечгача минмайсанми.

Бувиси нонини ёпиб, тандирнинг оғзини сават билан бекитди. Енгларини ечиб тандир ёнига қўйди-да, сўри томонга юрди.

— Насимни чақириб келиш керакми, дейман. Оёғини бир кўриб қўйсин-чи. Қани, нима дейди.

Кампирнинг гапи Ҳайдар бувага маъқул тушди.

— Майли кўрсин, — деди Ҳайдар бува. — Қани, менга бир кўрсат-чи.

Алишер почасини кўтарди. Ҳайдар бува аста силади.

— Шу ерими? Шишипти-ку.

— Ҳа.....

Унинг ҳолатидан оёғи оғриёттани билиниб турарди.

— Ҳа, шайтон-а, — деди Ҳайдар бува уҳ тортиб.— Сенга қанча айтдим-а, ҳадеб эшакка минаверма деб. Кейин кампирига юзланди. — Оёғи чиқмаган, лат еганиям йўқ. Менимча, суяги дарз кеттан. Акмал қани, Насимни чақириб кесин-чи.

Акмал — амакисининг ўғли. Ундан икки ёш кичик. Улар кўпинча бирга ўйнашади. Бугун у нима иш биландир ҳамсоя қишлоқдаги тогасиникига кетувди, ҳали келгани йўқ.

Бувиси ҳозир шуни айтгувди Ҳайдар буванинг жаҳли чиқди.

— Шу маҳалгача қаерда дайдиб юриптиякан. — Ўрнидан турди. — Ўзим бориб келақолай, ҳали унинг қачон келади. Насим уйидами-йўқми — худо билади. Уям уйида ўтирадиган одам эмас.

Хайрият, Насим ака уйида экан. Ҳайдар бува уни бошлаб келди.

Насим ака Алишернинг оёғини пастдан юқорига, юқоридан пастта силаб кўрди. Сўнгра Ҳайдар бувага қаради.

— Гапингиз тўғри, бова. Оёғининг суяги дарз кетган. Дўхтирга обориш керак. Гипсга солмаса бўлмайди. Ҳозирча тухум суреб, бойлаб қўямиз. Локин иложи борича тезроқ дўхтирга кўрсатиш даркор.

Бувиси тухум келтириб берди. Насим ака унинг сарифини Алишернинг оёқига суреб, латта билан боғлади.

Кечқурун ҳамма йигилганда маслаҳат қилишди. Алишерни район дўхтирига обориш керакми ёки дадасига хабар бериш лозимми? Қишлоқда жўнаш олдидан уйида бўлган машмаша Алишернинг ёдига тушди. Шу аҳволда борса дадасиям, аясиям уришади, хафа бўлади. Наргизага-ку тоза топилади. «Ана, айтмовдимми бир балони бошлаб келади деб. Айттаним бўлти-ку». Шуларни ўйлаб, Алишер уйига боришни рад этди.

— Шунгаям ваҳима қилиб юрамизми, шу ерда дўхтирга бориб қўя қолайлик.

Амакиси унинг ниятини тушунди.

— Бу ерларди дўхтирининг мазаси йўқ-да, Алишер. Шаҳарди дўхтири ҳар қалай яхшироқ қарайди.

Кейин даданг билан аянгам хафа бўлади бизарга бир оғиз айтмасизлар деб.

Бу гапни Соқол отаси ҳам, бувиси ҳам маъқуллади.

— Нима бўлгандаям ота-онасининг қўлига топшириш керак, — деди бувиси. — Бизарда дўхтирларга ишониб бўладими. Гипсга солса ким билади, касалхонага ётқизадими....

\* \* \*

Алишерни амакиси машинасида уйларига олиб келди. Оёғи анча шишиб кеттан эди.

Унинг аҳволини кўриб дадасиям, аясиям чўчиб кетди. Амакиси бўлган воқеани айтиб берди. Буёғи Алишер йўлагандай бўлди. Бир томонда аяси, бир томонда дадаси додлади, Алишерни goҳ уришди, goҳ эркалаб овутди. Наргиза укасининг аҳволига қараб бир кулиги қистайди, бир ачинади.

— Бўлар иш бўпти, — деди дадаси ниҳоят. — Вақт ўтмасин, тезроқ дўхтирга олиб борайлик.

Амакисининг машинасида Алишерни касалхонага олиб боришиди.

Врачларнинг goҳ униси, goҳ буниси кўрди. Рентгенга солди. Охири хулоса шу бўлдики, Алишер касалхонада қолиши зарур экан. Шу заҳотиёқ гипсга солишиди.

Дадаси билан амакиси уни палатага элтиб, жойига ётқизишиди.

— Энди мен борай бўмаса, кеч бўп қолди, — деди амакиси.

— Қаёққа шошасиз, ака. Бугун қолиб, дам олиб эртага кетарсиз. Шунча йўлдан чарчаб келгансиз.

Амакиси қўнмади.

— Бормасам бўлмайди. Ўзинг биласан, ҳозир иш қайнаган пайт. Тезроқ борай.

— Бу бемаза сизниям роса овора қипти-да, ака.

— Қўйсанг-чи, бу гапларди. Ишқилиб тезроқ тузалиб кетса бас. Энди эшакка минмайди-да. Шундайми Алишер?

Алишернинг оёғини гипс қисар, оғриққа қўшилиб ғашини келтирас, ҳозир ҳеч нарса ёқмас эди. Шунга қарамай, амакисига тиржайди, базўр бошини қимир-

латиб, унинг гапини тасдиқлади. Амакиси хайрлашиб, чиқиб кетди.

— Бўлти, ака, яхши боринг, раҳмат сизга. Отамга, энамга, янгам, жиянларимга, ҳаммага салом айтинг. Хавотир олишмасин, врач билан гаплашдим, ўн-ўн беш кунда тузалиб кетади, деди. Мен бироз туриб борарман.

Дадаси Алишерни ваҳимага солмаслик учун ўн-ўн беш кунда тузалиб кетади, деган эди. У бир ойдан зиёд ётди. Дастребки кунлар роса зериқди. Ҳар куни дадаси билан аяси келганда, кетаман деб йиглайди. Улар далда беришади: «Бироз сабр қил. Тоза соғайиб чиқасан. Ким айтди сенга эшак мингин деб».

Аста-секии кўниқди, палатадошлари билан ошна бўлиб қолди.

Бир оқшом Алишер туш кўрди. Қишлоқда эшак миниб юрганмиш. Эшак яланюч эмиш. Тўқими борлигиде миниб йиқилувдим, яланюч қандай миниб юрипман, деб ўзиям ҳайрон бўлармиш. Бир маҳал эшак тилга кирипти: «Ўшанда мендан хафа бўлдингми? Жўрттага йиқиттаним йўқ сени», дермиш Алишерга.

У уйғониб кетди-да, кўрган тушини хаёл сурди. Тавба, эшак ҳам гапирадими? Фалати-ку. Соқол отасининг гапини эслади: «Одам тушида яланюч эшакка мин-са — яхшиликка товин, муродига етади».

Врач кирди. У ҳаммани бир-бир кўриб келди-да, Алишернинг каровати ёнидаги стулга ўтирди.

— Хўш, полвон, ишлар қалай? Зерикмаяпсанми? Оёфинг оғримаяптими? — Алишер «йўқ» деб бош ирғади. — Бутун гипсингни ечамиш. Уч-тўрт кундан кейин жавоб берамиз, уйингта кетасан. Аммо бир нарсани айтиб қўяй, — деди врач кулиб. — Энди икки-уч ой эшак минмай турасан. Ҳўпми?

— Ҳўп бўлади... — Алишернинг гапи дадил чиқди.

Врач хайрлашиб чиқиб кетди. Алишер ўйлади: «Икки-уч ой. Демак, кейин минаверсам бўлар эканда... Мактаб бошланиб қолади. Бари бир бу йил минолмас эканман. Келаси йил ёзда бораман қишлоқقا. Албатта бораман... Энди айилини қаттиқ тортаман. Шунда сираям йиқилмайман...»

ВАРНА  
1989 йил.

## АТРОФДА БАҲОР...

Эътибор берганмисиз: баҳорда ҳамма кўнгилчан бўлиб қолади. Тажанглик, асабийлик одамларни тарк этгандай туюлади. Узоқ давом этган қищдан сўнг баҳорнинг илиқ ҳавоси, қуёшнинг қизғиши нурлари одамлар асабига ором, дилига енгиллик баҳш этади.

Шундай фараҳли кунларнинг бирида ёш олим Мансур Бегматов институтдан хурсанд бўлиб чиқди. Илмий кенгашда китоби юқори баҳоланиб, нашрга тавсия қилинди.

Мұҳоммади, айниқса Муса Иброҳимовнинг оғирвазмин, ҳар бир сўзида олам-олам мазмун томиб турган нутқини эслагани сари Мансурнинг кўнгли тоғдай кўтарилаарди. «Нашриётда нима дейишаркин? Чиқарашармикан ишқилиб? Домла ёрдам бераман дедиларку.»

Мансур шу хаёллар билан бекатта етиб келганини, ҳатто трамвайга қандай чиққанини сезмай қолди.

— Амаки, ўтиринг.

Буни Мансур эшитмади, эшитса ҳам ўзига айтилганини пайқамади. Бошқа бирорга жой бераётган бўлса керак. Амаки деди-ку. У тутқични ушлаганча трамвай ойнасидан ташқарига қараб, хаёл суриб кетаверди. Бирор тирсагига туртди. Хаёли бўлинниб ёнига қаради. Паст бўйли, озғин, жингалак соchlари пешонасини қоплаган, бир қаращаёқ жуда чаққон ва эпчиллиги сезилиб турган йигит Мансурга мурожаат қилди:

— Ўтириб олинг, амаки.

Мансур бир дам саросимага тушиб қолди. Алланима хаёлига чақмоқдай урилди. Миясини турфа фикрлар чулгади. Аммо уларнинг биронтасини на илгарб олди, на идрок қилди, на хотирасида қолди.

— Раҳмат... ўтираверинг бемалол,— деди тараддуланиб. Шу дам трамвай қаттиқ тормоз бериб, илкис тўхтади-ю, Мансур олдинда турган семиз, иссиқдан терлаб-пишиб кетган гавдали хотинга бориб урилди. Хотин Мансурга ўқрайиб қаради:

— Ўзингни тутиб турсанг-чи. Нима ёшроғи топилмадими?

— Кечирасиз... Ахир мен жўрттага қилганим йўқ-ку.

— Жўрттагаям қил бўлмаса...

Жингалак соч йигит Мансурнинг билагидан олди.

— Қўйсангиз-чи, амаки, булар билан тенг бўлиб ўтирасизми? Асабингизни бузманг, тез қариб қоласиз. Ўтиринг ундан кўра.

Йигитнинг гали Мансурга ғалати таъсири қилди. «Тавба, ўзи ёшгина йигиту гапларини қара. Насиҳат қилади-я...»

Мансур йигитта раҳмат айтиб, бўш ўринга ўтирди. Қаппайган портфелини тиззасига қўйди. «Қизиқ, амаки дейди-я. Демак, ўттизга бормай амаки бўпман-да». У хаёлан ўзини кўзгута солди. Сочлари сийрак, кўзининг четларида иккита-учта ажин ҳам бор. Тўла гавдаси, билинар-билинмас бақбақаси чиндан ҳам уни улугсифат қилиб кўрсатади. «Нимадан экан бу? — ўйлади Мансур. — Чекмасам, бошқалардай ичавермасам... Оилас ҳам, худога шукур, тинч. Хотиним бечора-ку, эртаю кеч атрофимда гирдикапалак...»

...Мансур серфарзанд оиласда туғилди. Урушдан кеинги йиллар. Ҳали ҳаммаям ўзини ўнглаб ололмаган. Мансур ҳам уруш заҳматларини, асоратини озгина бўлса-да, тотганлардан. У баъзи тенгдошларида шўхликларга, ўйин-кулгига бой болалик йилларини ички бир энтикиш билан эслаёлмайди. Бундай кунларнинг ўзи кам эди. Болалигини эсласа тирикчилик ташвиши — мол боқиши, машоқ териш, сомон тўплаб, бозорда сотиш тушади ёдига.

Синфдаги болалар орасида усти энг юпуни ҳам Мансур эди. Лекин унинг бирон жойи йиртилганини, кир-чир бўлиб юрганини ҳеч ким кўрмаган. Кийим-боши эскилигига қарамай тоза, озода бўларди. Синфдошлари тез-тез янги кўйлак, шим кийиб келишарди. Бундай кезларда Мансурнинг ичидан бир нарса узилиб кеттандай туюлар, баъзан аччиқ хўрсинишидан йифлаб юборишига сал қолар, аммо ўзини тиярди...

Трамвай шиддат билан ўнгга бурилди-ю, Мансур қалқиди. Хаёли бир коса сувдай чайқалиб кетди. «Кеинингиси авиасозлар заводи». Репродуктордан эшитилган ҳайдовчининг овозидан сергак тортди. «Энди Ўрдага кепмизми. Ў-хў, бу юришда Қорақамишга қачон етамиз.» «Динамо» магазинидан чиққан уч-тўрт ёдъ йигитнинг устидаги спорт кийимини кўриб, лоп этиб яна

болалиги ёдига тушди. Эсида бор, олтинчи синфда ўқири. Жисмоний тарбия ўқитувчиси кейинги дарсда ҳамма спорт кийими кийиб келишини тайинлади. Бу Мансурни анча хафа қилди. Отасига буни қандай айтишни ўйлаб ўйига етолмади. Охири минг хижолат билан онасига кўнглини ёрди. Онаси оғир уф торттида, Мансурнинг бошини силади:

— Хўп болам, айтаман отангта, иложи бўлса олиб берадилар.

Мансурнинг раҳми келди онасига. «Шўрлик онам. Халиям индамайди. Нима бўлсаем ичига ютади. Олти ака-ука ўқисак мактабда, қайси биримизга форма олиб берсинг».

Бутун ҳам, эрта ҳам ўтди. Яна икки кун. Аммо спорт кийимидан дарак йўқ. Мансур ҳам бу ҳақда бошқа сўз очмади. Камгап отасининг янада камгапроқ, ўйчанроқ бўлиб қолганини сезди. Ота-онасининг шундок ҳам синиқ юрагига туз сепганидан ўзини ўзи кошиди, астойдил эзилди.

Дарсга кирган жисмоний тарбия ўқитувчиси ким спорт кийими кийган-киймаганини текширди.

— Нега форма кийиб келмадинг? — деб сўради Мансурдан. Мансур эгилган бошини ердан кўтаролмай жим тураверди. — Мунча хасис бўлмаса отанг. Битта форма олиб беришга кучи етмай қоптими. Ёки ўқитувчининг гапи бир пулми.

Мансур ер остидан ўқитувчисига ҳўмрайиб қарди. «Бас қилинг! Ўйлаб гапирайпизми ўзи. Сиз ҳам менинг отамга ўхшаб уруща бир оёғингизни ташлаб келганингизда бундай демасдингиз.»

Ўқитувчига шуларни баралла айтмоқчи бўлди, аммо ўзини қўлга олди. Ота-онасининг ўйтлари, инсоннинг энг ёмон иллати бетгачопарлик қилиш, деган гаплари ёдида эди. Муаллим жаҳл билан унга қараб турди-да:

— Синфда қоласан. Қачон форма кийиб келсанг шунда дарсга қатнашасан, — деб ўқувчиларни спорт майдончасига олиб чиқиб кетди.

Мансур бошини ҳам қилганча ёлриз ўзи сўппайиб қолди. Охирги бола чиқиб, синф эшиги ёпилиши ҳамоно Мансурнинг кўзларига ёш қуишилб келди...

Трамвай кескин тўхтади. Мансурнинг хаёли бўлинди. Ўттан воқеаларни эслаб, мийифида кулиб қўйди. «Одамзотнинг ҳаёти қизиқ эканда. Бир вақтлар шу форма туфайли ўқитувчини ёмон кўриб қолганман. Балки бу нотўғридир. Ахир, ўқитувчида нима айб. У ҳам юқоридан буюрган ишни қилади-да... Лекин ҳар ҳолда тушуниши керак эди-ку. Суриштирмай-нетмай одамнинг дилига озор бериш инсофданмас. Ўқитувчи деган номи бор. Сал мулоҳаза қилиб, ўқувчининг оиласиий шароити билан ҳам қизиқиб кўрса бўларди-ку...»

Ёшига нисбатан бир қадар катта кўринишини олдин ҳам ўртоқлари, таниш-билишлари айтишган, буни Мансурнинг ўзи ҳам сезарди. Лекин ҳеч маҳал бунинг сабабини, нега бундайлигини ўйлаб кўрмаганди. Ҳозир мана бу йигит «амаки» деганидан сўнг негадир бу ҳақда ўйлай бошлади. Йўқ, бу гапдан унинг кўнгли ўқсимади, фақат табиатнинг айрим нотекис,adolatsiz қонунлари хусусида ўйга толди. Ўзича бунинг сабабларини қидирди. «Болалигида кўп қийинчиллик кўрган одамнинг ҳаммасиям тез қарийвермаса керак. Эҳтимол, наслга боғлиқдир. Отам раҳматли ҳам шунаقا улуғсифат, ёшига нисбатан анча кексароқ кўринардилар».

Отасини эсласа ҳар доим кўнгли алланечук чучурканиб кетади. Отасининг ҳаёти Мансур учун мактаб бўлди. Сабр-қаноатни, одобни, қийинчилкларга бардош беришни — ҳаётда неки яхшиликларга эришган бўлса, ҳаммасини отасидан ўрганди. Отасининг умри, ҳаёти, фикрлари унинг учун мезон эди. Бошига бирон ташвиш тушса отасини эслайди. Шунда кўз ўнгида оп-пок, қалин соқоли кўксига тушиб турган, турмушнинг аччиқ аламлари ўчмас изини қолдирган сал буришиқ, аммо нимаси биландир суҳбатдошини сеҳрлаб қўядиган нуроний сиймо гавдаланади. «Ҳамиша ҳалол, покиза бўл. Ҳаром-ҳариш ишга қўл урма, бу йўлга юрма. Ҳеч маҳал ҳеч кимнинг дилини оғритма!» Мана шу насиҳатларни босиқлик билан, дона-дона қилиб, чертиб-чертиб айтади. Шунда Мансурнинг кўнгли таскин топиб, ташвишларни кучли, букилмас иродада билан бир

чеккага итқитиб ташлайди. Лекин буни у ҳеч кимга — на акаларига, на онасига айтади. Сир тутади.

«Эркакнинг улуғсифат, сал кўримли бўлгани яхши. Ёши элликка борсаям гўдакка ўхшаб шилдинглаб юрган эркак, эркакми? Виқор керак йигитта». Ҳозир отасининг ана шу гапини эслади. Йўқ, фақат ҳозир эмас, умуман ёш ҳақида гап кетса шу гаплар лоп этиб Мансурнинг ёдига тушади. Бу билан ўзига-ўзи таскин бермайди. Аксинча, бироз салобатли эканидан ич-ичидан қувонади.

Ҳайдовчи навбатдаги бекатни эълон қилди. Мансур фикрини йифиб олди. «Бунча ҳаёл сурмасам? Ажаб. Хўш, амаки деса нима бўлти? Шунга шунчами? Ёмонми, амаки бўлсанг? Ахир яқиндагина тезроқ катта бўлишни, раислардай икки қўлни орқага қилиб савлат тўкиб юришни орзу-ҳавас қилган ким эди? Энди ёш бўлгинг келиб қолдими? Ёшлик чоғларини қўймасяпсанми, демак қарий бошлапсан. Қачонгача бўз бола бўлиб юрасан. Ҳаёт ўз ҳукмини ўқийди-да. Сенинг истак-ҳоҳишингга қараб ўтиармиди...»

Бу фикрлар таъсирида бироз жилмайганини ўзи ҳам сезмай қолди.

— Ҳа, амаки, жуда қизиқ гап эсингизга тушдими дейман-а?

Мансур ялт этиб ёнида тик турган жингалак соч йигитта қаради.

— Ҳа ... — деди ҳижолатдан қизариб. — Менга қаранг ука, неchanчи синфда ўқийсиз?

Йигит хиёл табассум қилди. Бу табассумда киноями, менсимасликми ёки жаҳдми — ишқилиб шунга ўхшаш бир кайфият бор эди. Ҳар қалай самимий эмаслигини Мансур сезди.

— Нимайди?

— Ўзим, шунчаки сўраяпман-да.

— Нечанчи синф боласига ўхшайман? — деб сўради йигит. Энди бу сўроқ очиқдан-очиқ киноя эди.

— Тўққиз-ўнинчиларда ўқисангиз керак?

Йигит шарақлаб кулди:

— Мабодо психолог эмасмисиз? Роса аниқ топдингиз-ку... Қойилман... Тўққизинчини битирганимга тўққиз йил бўлди.

— Нима?!

Мансур бу сўзни шу қадар тасодифий ҳайрат билан айтдики, бирданига иккови ҳам жим қолди. Иккаласининг ҳаёлидан икки хил фикр кечди. Йигит: «Папка кўтариб юришига қараб туппа-тузук, кўпни кўрган одам деб ўйлабман. Соч деган жониворам калла ишласа-ишламаса тўкилаверарканда. Умрида одам-подам кўрганми ўзи бу?» Мансур: «Тўққизинчини битирганидан бери тўққиз йил ўтган бўлса, демак йигирма бешни уриб кўйипти-да. Ўзимиз қатори эканку. Фарқи уч йил экан-да. Тавба, ёш болага ўхшайди-я. Хафа қилиб қўйдимов чоғи».

— Жуда шўхга ўхшайсиз-а, амаки, — деди йигит кулиб. Сийрак мўйлаб чиқсан юпқа лаблари унинг ярақлаб турган тилла тишларини тўла беркита олмасди. — Қизларни айлантиравериб ёшни кичкина айтишга ўрганиб қолгансиз шекилли, а?

— Узр, хафа қилиб қўйдим чоғи. Мен сизни ёш йигит деб ўйлабман-да.

— Ёш бўлмай, нима, қариб қопмизми?

Трамвай навбатдаги бекатта яқинлашди. Йигит олдинги эшик томон йўналди:

— Бўпти, амаки, саломат бўлинг, мен тушдим.

— Хўп, хайр, — деди Мансур ихтиёrsиз равища.

Йигит одамлар орасидан туртиниб-суртиниб нарикетди. У кўздан ғойиб бўлгунча Мансур ажабланиб қараб қолди.

— Яхши йигит, ўзингиздан катталарга жой берсангиз бўлмайдими?

Мансур бошини кўтариб қоматдор, юzlари хўрзинг тоjisидай қип-қизил, кўкси орден-медаллар билан тўла олтмиш ёшлардаги бақувват бир одамни кўрди-ю, иргиб ўрнидан турди.

— Кечирасиз, амаки, кўрмай қопман. Марҳамат.

— Шунаقا, ҳозирги ёшлар ҳеч нимани кўрмайди, — деди бараваста киши бўш ўриндиқча оғирлик билан ўтиаркан. — Айтмасанг ўрнидан қўзғалмайдиям, без бўлиб ўтираверади.

Бу гап Мансурнинг бағрига тиғ каби санчилган бўлса ҳам индамади. Сал нарироқча сурилди-да, деразадан ташқарига қараб кетаверди. Барглари тангадай бўлиб

қолган тераклар, йўлкалар четидаги жонли тўсиқлар кўм-кўк. Анави олча роса гуллапти-да. Худди қор қоплаганга ўхшайди.

Бу манзара, кўклам кўриниши, трамвайнинг очик деразаларидан кираётган аллақандай ёқимли, хўшбўй Мансурнинг дилини ёриттандай, ҳаёлидан ҳар хил айқаш-уйқаш фикрларни қувгандай бўлди. Беихтиёр ён-атрофдаги одамларга бирма-бир кўз югуртирди. Уларнинг юзида ҳам ажиг бир қувноқлик, кўтаринкилик акс этиб турарди. «Яхши йигит, ўзингдан катталарга жой берсанг бўлмайдими», деган амакига қаради. Ташқарини кузатиб кетаётган бу одамнинг ҳам чехраси очилган. Ҳозир ана шу киши ҳам Мансурга яхши одам бўлиб кўринди.

Атрофда баҳор эди...

1973 йил.

# **ҚИССАЛАР**

## ЧИРОҚ ЎЧМАГАН КЕЧА

Афғон уруши ҳануз юракларимизни сирқираптиб турибди, афғон фожиаси сабабли қанчадан-қанча сара ўғлонларимизни бой бердик, қон ва ажал ранги бир умр хотираларимизга ўрнашиб қолди. Ана шу оғриқлар мени ушибу қиссани ёзишга даъват этган бўлса ажабмас.

Қисса анча илгари битилган, шунга қарамай, у тупроғимизга туташ — жондош, қондош юртда қарийб йигирма йил давом этган хунрезликдан қийналиб кетган афғон ҳалқи қайғу-алами ва орзу-умидларига ҳамоҳанг жаранглайди, деб ўйлайман. Қолаверса, у ҳалқимизга осойишталик бебаҳо неъмат эканлигини, оз бўлса-да, англатишига ишонгим келади.

Қиссани қофозга тушириш жараёнида жанг воқеалари ва дил изтиробларини ўз кўнглимда қайта ҳис қилишга уриндим. Аниқроғи, унга кўз ўнгимда вояга етиб, сўнг Афғонистонда бир неча бор ажалга рўпара келган биродарим — Пиримқул Собировнинг кўрган-кечиргани, ўй-хаёли ва муҳаббати маълум маънода асос бўлди. Ҳозирги кунда Пиримқул соғ-омон, оиласи, қурувчилик касбини эгаллаган.

Пайтдан фойдаланиб айтмоқчиман: истиқлол бахши этган тинчлик ва осойишталикни қадрлайлик, осмонимиз ҳамиша мусаффо ва осуда бўлсин.

Муаллиф

*Йўқликдан пок келиб, нопок бўлдик биз,  
Шўху қувноқ келиб, ғамнок бўлдик биз.  
Кўзимиз тўла ёш, юракда олов,  
Умр елга кетди ҳам хок бўлдик биз.*

Умар Хайём

## Биринчи боб

### I

Август оқшоми: илиқ, ёқимли.

Темирнинг армиядан қайттанига бир ойдан ошди. Ҳамон ўзини ўнглаб ололгани йўқ. Беш-олти кундан бери кечалари салқин шабада эсиб қолди. Шунинг таъсирими, қўлининг оғриги бироз зўрайди. Буни ёлғиз ўзи билади, ҳеч кимга сир бой бермайди. Отасининг «қўлинг оғрияптими, улим» деган сўровига «йўқ» деб, қисқагина жавоб қиласди. Айттани билан не наф? Уларнинг-да юрагини эзгани қолади.

Холиқ aka уруш нима эканини, ярадорлик азобини билади. У пайтда-ку майли, аммо ҳозир — тинч замонда сириқдай ўғли бир қўлидан айрилиб ўтирса — дардини кимга айтсин.

Зулфизар опанинг кўз ёши тинмайди. Темир онасига таскин бермоқ ниятида унга ҳазиллашади, ҳар хил кулгили гаплар билан хаёлини чалғитади. Зулфизар опа ўғлининг ногирон қўлига кўзи тушиши билан ўзини тутолмайди — кулиб турган кўзларидан ёш оқаверади...

Темир айвонда ёлғиз ўзи ётади.

Бугун анчагача уйқуси келмади. Бир томондан хаёл олиб қочади, бир томондан оғриқ азоб беради. Қўлидан айрилишга айрилди, энди ҳеч қурса оғриқ боси-либ кета қолсайди.

Темир ўрнидан турди. Зулфизар опа «улим армиядан келса кияди» деб, яхши ният билан олиб қўйган

Ургутнинг машҳур ялтироқ, чопонини елкасига ташлади. Боғ сари юрди. Бу боғ раҳматли бобосидан қолган. Темир бобосини кўрмаган. Отасининг айтишича, бобоси жуда ишбилармон, боғбонликни, дехқончилигу чорвачиликни хўп яхши биладиган одам экан.

Қулоқ-қулоқ даврида Темирнинг бобоси ҳам қамалиб кетишига оз қолган. Хўп ажойиб замонлар бўлған экан-да. Биров «фалончи қулоқ» деб ёзид берса, эшигида тўртта моли борми-йўқми, суриштирмай қамаб юбораверган-а...

Боғдан узум узиб, уватда чўнқайиб тураркан, кўз ўнгидаги икки йил давомида кўрган-кузатгани — поёнсиз далалар намоён бўлди. Қон тўкишлар, фожиалар, қурбонлар ёдига тушди. Қаердандир ўқиган эди бир афғон ёзувчисининг гапини: «Бизнинг далаларга сув ўрнида танклар келди». Қанчалар даҳшат! Одамларга сув керак! Унинг ўрнида танклар! Бир кун келиб афғон болалари бу воқеаларни қандай баҳолар эканлар?

Саҳар салқинида ногирон қўли санчиб кетди. Беихтиёр инграб юборди. Хайриятки, ёнида ота-онаси йўқ, бўлмаса унинг ҳар инграши Холиқ ака билан Зулфизар опанинг қайсицир томирларини чирт узиб ўтарди. Қўлинин чопонга ўради. «Ҳалиям омадим бор экан. Қанча-қанча йигитлар жувонмарг кетищди...»

Чўнқайиб ўтиравериб оёғи толди. Ўрнидан турди, тиззалири қисирлаб кетди. Ўнг қўлинин кериб, мириқиб керишди. Осмон бекубор, беҳисоб сепи — юлдузлар жимиirlарди. Хўжайдуқнинг устида ой кўринди — бир чети синдирилган патирга ўхшайди. Темир узумдан оғзига солди. Кишмишнинг шираси томогини қириб ўтди. Бунчалар ширин! Айтишларича, Ургутнинг оқ кишмишидай ширин узум дунёда йўқ эмиш...

Темир узум пўчогини бир четта ирғитди. Сўнг оҳисста қадам ташлади. «Энди ётиш керак. Чала уйқу — умрнинг эгови».

Жойига келиб чўзилди. Кўпинча шундай бўлади: ухлай десанг уйқу келмайди, ухламай деганингда уйқу босаверади. Ҳозир Темир мириқиб ухламоқ истагида. Лекин қани ўша уйқу! Дунёning ишлари бунчалар чигал ва бир-бирига уйқаш...

## II

Ғўнғир-ғўнғир овоздан уйғониб кетди. Сингиллари тамаки тергани кетяпти. Ҳали қуёш чиққани йўқ. Бечора сингиллари шудринг аримасдан тамакизорга орайди. Нимаям қилсин, салқинда териб келмаса, кун қизигач тамакизорга кириш азоб. Кейин ярим тунгача қадалиб ўтириб тамаки тизишади. Яна унда-бунда ургутликлар бадавлат, тамакининг пули кўп, деган таънаомуз гапларни эшишишади. Пули садқаи сар. Темир бу масалада курсдошлари билан ҳам кўп тортишган.

Бу мунозараға Гавҳар ҳам аралашар, кўпчилик-нинг олдида сир бермаслик мақсадида Темирнинг фикрига қарши чиқарди. Буни Темир билгани учун унга индамасди.

Гавҳар... У ҳозир нима қиласпти экан? Қишлоғида-микан? Балки Тошкентга боргандир, ўқиши яқинлашиб қолди-ку. Уч ойлар бўлди унга хат ёзмаганига. Армиядан қайтганини ҳам, бир қўлидан айрилганини ҳам Гавҳар билмайди. Ярадор бўлиб ҳарбий касалхонага тушганида битувди сўнгти хатини. «Хизмат охирлаб қолди, яқин кунларда қайтаман. Ўзим ёзмагунимча хат ёзманг», деганди ўшанда.

Келганидан бери бир-икки мўлжаллади мактуб ёзиши. Лекин қаерга, қайси манзилга ёзади? Таътил бошланиб қолди. Гавҳар қишлоғига кетгани аниқ. У ёқда ёзиш ноқулай, ота-онасими, ака-укаларидан биронтасими кўриб қолса — яхши эмас. Қишлоқчилик... Бечора Гавҳар не хаёлларда юрипти экан. Оддий хизмат бўлгандаям майли эди. Афғонистонда эканини у билади. Ичини ит тирнаб ётгандир...

Совуқ фикр урилди Темирнинг миясига. «Мени бу ахволда кўрса, Гавҳар қандай ҳолга тушади? Балки мендан айниб кетар. Ахир бир қўли чўлоқ йигит кимга керак? Унинг айби нима? Қайси гуноҳлари учун ногирон йигитта турмушга чиқади? Бошқа қизлардан кам жойи борми? Ҳусни-жамолда, ақлу фаросатда кимдан, қайси қиздан қолишади?..» Темир оғир хўрсинди. Фикран кимларнидир сўқди, кимлар биландир олишиди.

Рост-да, Темирнинг, Темирга ўхшаш юзлаб, минглаб йигитларнинг гуноҳи нима? Нега улар ҳали оқ-

қорани таниб-танимай, ҳаёт неъматларидан тотиб ул-гурмай ногирон бўлиб қолишлари керак? Шаҳид кет-ганлар-чи? Уларнинг айби не эди?!

Гавҳар буларни тушунар балки. Ақл-фаросатли қиз-ку... Лекин ота-онаси-чи? Ака-укалари, қарин-дош-уруглари-чи? Улар ҳам тушунадиларми? Тушун-гандан нима? Гулдай қизини ногирон йигитта бераве-радими? «Сени шу ниятда ўқишига юборувдикми Тош-кентга», демайдими қизига? Деса ҳақи бор! Э, Худо, бу не кўргулик!

Калласи хумдай шишиб кетди, юраги зирқиради. Қўлига ўқ текканида, касалхонада тирсагидан кесиб ташлаганида бунчалар қийналмаган, бунчалар изти-роб чекмаган эди. Бу қийноқ, бу эзилишлар яна қанча давом этаркин? Балки бир умр ундан фориғ бўлол-мас, эҳтимол бирор кун ҳам унинг исканжасидан чиқа олмас. Шундайлар озми? Мана сенга байналмилал бурч!

Эшакараванинг қангир-қунғири хаёл ипларини узди. Укаси Собир, сингиллари эшакаравани қўшиб тамакига жўнаб кетишиди. Айвоннинг нариги бошида тасбеҳ, ўтириб ўтирган Холиқ, aka тандирда нон ёпаёт-ган Зулфизар опадан сўради:

— Темир турмадими?

Зулфизар опа эрининг гапини эшитмади шекилли, Холиқ, aka саволини яна қайтарди. Зулфизар опа тандирнинг оғзига саватни ёпиб, косов билан тираб қўйди-да, эри томон юзланди.

— Бир нима дидингизма?

— Темир турмадима дийман.

Зулфизар опа қўлидаги енгичакларни ечиб, ўчоқ бошига ташлади.

— Турмади чофи. Қўйинг, ётаверсин. Зарил иши қоп кетяптими.

Улар билишмайдики, Темир қачондан бери уйроқ, хаёлнинг минг бир кўчасига кириб чиқмоқда. «Тур-саммикан, — деб ўйлади. — Яна бироз ётай. Энам айтгандай, зарил ишим бормиди қоп кетадиган. Ило-жи бўлса ярим соаттина мизғиб олай». Бу ёнбошига ағдарилди. Қани энди кўзи илинса. Сокин тунда кел-маган уйқу тонгти шовқинда келармиди.

Яна хаёли Гавҳар томонга учди.

Гавҳарга бор гапларни ёзишни ўйлади. «У бечора-ни қийнаб нима қиласман. Ундан кўра шундай-шундай бўлди, деб ҳаммасини ёзай. Кўнгли иримаса жавоб ёзар, шундан бари маълум бўлади-қўяди».

Шу фикри ўзига маъқул кўринди.

Темир қатпатирни хуш кўради. Буни онасиям би-лади. Шу боис ҳар гал нон ёлганида тўрттагина қат-патир пиширади. Бу одатини бугун ҳам канда қилма-ган эди. Темир дастурхон бошига келиб ўтириши би-лан Зулфизар опа иккита қатпатир олиб келди. Холиқ ака ўғлига бир-икки синовчан-синовчан назар солди. Нимадир сўрамоқчи бўлди-ю, тили бормаёттанини Темир пайқади.

Холиқ ака томогини бир қириб, оҳиста, вазмин нигоҳини дастурхондан узмаган кўйи гапирди.

— Кўлинг оғрияптима, дийман, улим?

Орага сукунат чўқди. Темир нима дейишини бил-май қолди. Ҳа, деса ота-онасининг юраги эзилади, йўқ деса, барибир билган, гапидан сезилиб турипти.

— Кўнглим сезиб юрипти, болам. Сер соп юрип-пан, охирги кунларда кўринишинг бўлакча. Чамамда ҳавонинг салқини таъсири қиляпти-ёв.

Темир армиядан келгандан бери Холиқ ака уни зимдан кузатади, гап-сўzlари, ҳаракатлари, одамлар билан муомаласига разм солади. Ундаги қандайдир аса-бийлик, сал нарсага қизишиб кетиш, баъзида эса ўта лоқайдлик, каражтлик, гап-сўзларни эщитмаслик ҳол-лари бор. Гоҳо ухлаб ёттанида бақириб юборади, бун-дан ўзиям уйғониб кетади. Атрофига аланг-жаланг қарайди, яна кўрпага бурканади.

Бунинг сабабини Холиқ ака ўзича тушунади: бу урушнинг таъсири, устига устак ярадор бўлган, бир қўлидан айрилган. Холиқ ака немислар билан бўлган жангда бунақа ҳолга тушганларнинг қанчасини кўрган. Биринчи марта жангга кирган айрим иродаси сустрок йигитлар ҳатто ақлдан озиб қолишган.

Холиқ ака ана шундан кўп хавотирга тушади. Ўғли-нинг бир қўли чўлоқлиги ҳам унинг кўзига кўринмайди. Худо бахтини, ризқу насибасини берса, ҳаммаси изга тушиб кетади, фақат эс-ҳуши жойида бўлса бас,

деб ўйлайди. Бу ўйларини ёлғиз Оллоҳдан ўзга ҳаммадан сир тутади. Темир хизматдан қайттан кезлари бунақа ҳол кўпроқ билинар эди, хайриятки, аста-секин камайиб бормоқда. Ҳатто бир куни Зулфизар опа ташвиш ила эрига «улингиз гоҳида алмойи-алжойи гапиради-я. Урушда қаттиқ қўрқсанми дийман-да, болагинам», деб қўйди. Холиқ аканинг юраги шув-в этиб кетди. Аммо ўзини қўлга олди, хотинини силтаб ташлади.

— Эсинг жойидами? Бу нима деганинг?!

Шу-шу Зулфизар опа бу ҳақда бошқа оғиз очмади. Балки кейин сезмагандир, сезса ҳам ичига ютгандир. Ўслини эринмай кузатишга вақти борми она шўрликнинг, тонг саҳардан икки хуфтонгача тиним билмаса...

Темир отасининг нуроний чеҳрасига, оқ оралай бошлаган қалин соқол-мўйловига термилди. Басавлат, ўтирганда тоғдай ҳайбатли кўринадиган Холиқ аканинг сезгирилигига Темир тан берди.

— Ҳа, — деди у ниҳоят оҳиста, — тўғри пайқабсиз, ота, бироз оғрияпти қўлим. — Тунда туриб юрганини отаси ҳам билганига энди шубҳаси қолмади. Шу боис ўзи очиқ айта қолди. — Кечасиям оғриди, ҳам уйқум қочиб кетди. Туриб бироз бояни айландим.

— Дўхтирга учрашиб, бир кўрсаттанинг маъқулмиди?

— Ўзимам шуни ўйлаб турипман. Иложи бўлса бугун бориб келмоқчиман. — Ер остидан отасига разм солди у. — Ҳавотир олманг, ота, ўтиб кетади. Кўп қаттиқ оғригани йўқ, сал-пал.

Нонуштадан кейин Темир уйга кирди. Гавҳарга хат ёзмоққа тутинди. «Салом, Гавҳар! Анчадан бери хат ёзмаганим учун узр. Бунинг сабаблари бор...»

Темир ўйланиб қолди. «Нимадан бошлай, қандай ифода қиласай фикримни?! Унақасигаям, бунақасигаям ўйлаб кўрди, йўлини тополмади. Дардларини, бошидан кечирган воқеаларни қофозга тушира олмаслигига кўзи етди. Бир-икки сатр ёзилган қофозни ғижимлаб бир четга иргитди.

Кейин шарт ўрнидан туриб, ҳовлига чиқди. Нега чиқди, нима қилмоқчи — ўзи ҳам билмайди...

## Иккинчи боб

### I

Вақт пешиндан оққанда поезд Кушка бекатига кириб келди. Узок йўл юриб толиқдан тепловоз чуқур нафас олиб тўхтади, вагонлар бир-бирига сурилиб, қасир-қусур овоз чиқарди-ю, бирдан тинди. Йигитларни кузатиб келаётган аскарлар юкларни олиб тушиш учун буйруқ берди. Ҳамма тўрвасини елкасига осиб, ўзини эшикка урди.

Перрон бир зумда сочи қиртишланган йигитлар билан тўлди.

Ҳаво дим, нафас олиш оғир.

— Бўтта нафасимиз қайтиб ўламиз-ку, — деди Азим.— Тошкентниям иссиқ деб юарканмиза-де. Бўтта қараганда жаннат экан-е.

Унинг гапига Жўрақул қўшилди:

— Кушка дегани энг расво жой деб эшиттандим...

Тўрвасини ерга қўйса бирор олиб қочиб кетадигандай, елкасига осиб олган миқти, пакана, сап-сариқ Носиржон гўё ўзига гапираёттандай минғирлади:

— Қани энди шу пайт Намонгонда бўлиб қолсан. Чодакка чиқардим, бир коса қатиқни ичиб, салқинда маза қилиб ётардим-да.

Азим унга қараб ҳўмрайди. Сўнгра Темирга юзланди-да, Носиржонни кўрсатди.

— Бу кишининг кўнгиллари қатиқ тусаб қопти, Чодакка чиқармишлар. Сал инсоф билан гапир, лоа-қал Комсомол кўлидаги чойхона де.

Буларнинг ҳазил аралаш орзу-хаёлига Темир ҳам қўшилди.

— Э, оғайнилар, Комсомол кўлиям, Чодак-подакам бўлмайди. Ҳаммасидан зўри Ургут. Юқори чиноргами, Омонқўтонгами чиқиб, тандир кабобдан еб, орқасидан яҳдай булоқ сувидан ичиб, каравотда бир соат ухласанг борми...

Азим бирдан унинг гапини кесди:

— Шошма-шошма, Темир. Бирпас ухламай тур, овқатинг ҳазм бўлсин, бўлмаса қозон кабоб тиқилиб қолади ичингда.

Тўртовлон баравар кулиб юборишиди.

Носиржон Жўрақулга қаради:

— Сен нимага индамайсан? — деди сўзнинг охирги бўгинини чўзиб. — Ҳа-а, Қўшрободди чўлида ўрганиб қолгансан-да, сен бечора. Ҳудди қишлоғингга келгандай маза қиляпсан чоғи, а?

Жўракул Носиржонга яқинроқ келди.

— Қўшрободга борганмисан ўзи? Сени Чодагинг нима бўлти унинг олдида. Пангатта боргин, кўрасан дунёнинг жаннати қайда эканини. Бу дунёда Пангат, у дунёда жаннат, деган гапни эшитмаганмисан?

Ҳазил-ҳузул билан гаплар дадил-дадил, қизиқёнлик руҳида давом этабошлиди. Темир уларнинг диққатини ўзига қаратди.

— Э, жўралар, қўйинглар бу гапларди. Ўзбекистонди чўлиям, қириям бу ерларди боғидан, тоғидан гўзал.

— Гениал фикр! — деди Азим киноя тарзида гапириб. — Философия! Шоир-да, мани оғайним, шоир! Шоирлардан ана шундай гениал фикрлар чиқади.

Темир Азимнинг елкасига қўлини ташлади.

— Кўйсанг-чи, майнавозчиликни. Тўғри-да, шу ерга келиб тортишиб ўтирамизми энди.

— Во! — Азим кўрсаткич бармоғини тепага кўтарди.

— Демак, мунозара тамом! Олға, марш!

Шу куни ҳаммомдан сўнг кийимларини алмаштиришиди. Бир зумда ҳаммаси инкубатордан чиқдан жўждайдай бир хилда бўлди-қолди. Юзини кўрмагунча ким эканини билиб бўлмайди. Бунга кўникмаган йигитлар роса кулишди.

Шундай қилиб ҳарбий ҳаёт бошланди.

Янгича шароит, янги жой, ҳавонинг ададсиз иссиғи йигитларни толиқтириб қўйди. Кўпчилиги эркин юрган, ҳатто аксарияти ота-онаси назоратидан ҳам холи бўлган студент эмасми, ҳарбийнинг темир интизомига ўрганиши, мослашиш оғир кечди. Иродаси бўшроқла-ри пана-панада яширинча кўз ёши ҳам қилиб олди. Энг ёмони — куннинг ўтиши қийин, ҳадеганда кеч бўлавермайди. Темир назарида бир неча ой ўтгандай туюлади, ҳисоблаб кўрса энди бир ҳафта кечибди.

Ёлғиз қолган кезлари, уйқу қочган тунлари Темир юраги орзиқиб кетади, умри бекор ўтаётгандай, ҳавога соврилаётгандай туюлади. Бу кунларки шундай экан, демак икки йил шу зайл бесамар кечаркан-да, деган ўй дилини ўртаб ўтади. Эссизгина икки йил! Ўқишини

битириши, бирон жойга ишга ўрнашиши мумкин эди. Аńча-мунча шेърлар ёзармиди. Балки бу ердаям ёзар... Имкон бўлармикан? Ҳозирча шеър ёзишга на имкон, на хоҳиш бўлди. Кечаси соат ўнда ёт, эрталаб олтида тур, бадантарбия, ювиниш, бараварига овқатта бориш ва ҳоказо. Богча тартибидан фарқи йўқ...

Бу ерга келиб жойлашган кунининг эртасигаёқ отасига хат битди. Ҳаммаси яхши деб, адресини маълум қилди. Ота-онаси Афғонистонга олиб кетади, деб кўркқан эди. Шундан уларни хотиржам қилди. Иккинчи хатни Гавҳарга ёзмоқчи бўлди.

Оппоқ қоғозга термилиб ўйга толди. Ўзидан-ўзи нолиди: «Э, қанақа адабиётчисан? Севган қизингта эплаб хат ёзолмайсан-у, яна шоир бўлармиш...» Ишқий китоблардаги мактубларни эслади. Отабекнинг Кумушга, Жўранинг Саодатга, яна бир қанча ошиқларнинг маъшуқасига биттан мактубларини бир-бир хаёлидан ўтказди. Биронтасини ўзига эп кўрмади. «Улардан кўчириб олиш уят-ку. Йўқ нима бўлсаем ўз билганимни, дилимда борини ёзаман. Шу ўйлар билан хат ёзишга тутинди: «Салом, Гавҳархон!» Яна ўйланиб қолди: «Гавҳархон эмиш. Бирон марта шундай деганманми ўзи? Жимжима, сохта эркалашнинг нима кераги бор. Нима деб атасам шундай ёзавераманда». Дафтарнинг варагини йиртиб ташлади. Янги варакқа ёза бошлади: «Салом Гавҳар! Соғликларингиз яхшими? Ўқишилар билан чарчамаяпсизми?

Биз Туркманистоннинг Кушка деган жойига келдик. Ҳаво жудаям иссиқ. Нафас олиш оғир. Ҳечқиси йўқ. Ўрганиб кетамиз. Яхши йигитлар кўп. Ўзимизнинг институтда ўқийдиган болалар ҳам бор...». Назарида асосий гапни айттолмаёттанга ўхшайди. Бир зум ўйланиб турди-да, жадал ёза кетди: «Гавҳар! Очифи, сизга ўрганиб қолган эканман... Сизсиз кунларнинг ўтиши оғир кечяпти. Соғиндим... Жудаям соғиндим. Бу ахволда икки йилни қандай ўтказаман, билмайман... Ўқишиларингизда омад тилайман, доимо соғ бўлинг».

Ҳарбий қасамёд қабул қилинди.

Ўқишиш бошланди. Энди бўш вақт йўқ ҳисоби. Эртадан кечгача машғулот. Туркманистон иссифиям таъсир этмай қўйди гўё.

Бир ойдан сўнг ўттиз чақиримлар наридаги тоғлиқ жойга олиб кетишиди. Бу ерда ўқиганларини машғу-

лотда синааб кўришди. Ичига ўн килоча цемент солинган тўрвани елкасига олиб югуртиради. Беш юз метрлар юқоридаги қир тепасига ғишт, бошқа қурилиш материаллари кўтариб чиқишишади. Яна югуришишади.

Ўқиши чоридағи зерикишлар булар олдида ҳолва бўлиб қолди. Куннинг иссиғида елкада юк билан чопиш, тепаликка чиқиб тушиш — дўзах азоби. Йигитлар тили осилиб, ҳаллослаб қолади. Лекин бунга ким эътибор беради, кимнинг раҳми келади? Баттар замлайди, баттар югуртиради, кимки танбаллик қилса, елкасидаги юкига яна юк қўшади. Йикки ҳафта тинмай шунаقا машқ қилишди. Шу икки ҳафта ичида кўпчилик бурнидан тортса йиқилгудек бўлиб қолди.

Бир куни оқшом дам олиб ўтиришганда Азим нолиди.

— Бу нима азоб-а, оғайнилар. Ўлсак ўлиб бўлдикку тоза!

— Ҳарбий хизмат шу-да, — деди Жўрақул ўзича Азимга таскин бермоқчи бўлиб. — Аста-секин кўникамиз.

Гапга Носиржон аралашади:

— Қанча йигитлар Афғонистонда қон кечиб юрипти. Ҳалиям шукур қилингна.

Азим ҳафсаласизлик билан қўл силтади:

— Э, бундан кўра Афғонистонга борганимиз тузук эди. Уруш бўлса нима қипти, қўлингда автомат, душманни шартта отасан, вассалом.

— Ёш боланинг гапини гапирасан-а, Азим,— дея кулди Темир. — Уруш ўйинчоқми сенга. У ёқдаги болаларнинг ўзи бир азобда бўлса, ота-онаси минг азобда.

— Ҳали кўп шошмангна, йигитлар, Афғонистонгаям борамиз, урушниям кўрамиз,— деди Носиржон билимдонларча.

— Ким айтди сенга?

Жўрақулнинг бу саволидан сўнг ҳамма унга юзланди.

— Нима, Афғонистонга борищдан қўрқаяпсанми?

— Гап менинг қўрқиш-қўрқмаслигимдами? Қўрқаман десам юбормайдими? Барibir ваҳима-да. Энг ёмони ота-оналаримиз юрагини ҳовучлаб ўтиради.

Носиржон ўша оҳангда, гўё ҳамма нарсани биладигандай гапирди:

— Кушкага келдикми — тамом, барибир Афғонистонга олиб кетади. Ана кўрасила. Уч-тўрт ой ўқитадио кейин жўнатади. Бўлмаса бунақа машқлар — эртадан кечгача қоп кўтартириб югуртиришнинг нима кераги бор?

— Тезроқ жўннагани маъқул, — деди Азим. — Автоматдан потиллатиб отишни яхши кўраман.

Азимнинг болаларча романтик хаёлидан шериклари кулишди. Аммо у фикридан қайтмади.

Темир ўзича бу гапларни таҳдил қиласкан, қанчалар қийин, минг бир азобга тўла бўлса-да, шу кунларига шукур қилди. Йўқ, у урушга киришдан чўчимайди. У бошқа нарсани ўйлади: уруш бўлгандан кейин у ҳам кимнидир отиши керак, ўлдириши керак. Одам ўлдиришни у тасаввурига сира сидиролмайди. Урушнинг эса ўз қонуни бор — сен ўлдирмасанг, сени ўлдиришади. Ҳали дунёнинг лаззатларини кўрмай ўлиб кетиши алам қиласди.

## II

Эркин қуш каби юрган йигитлар энди ҳарбий шароитта мослашдилар, унинг икир-чикирларига кўникдилар. Бошга тушганини кўз кўрар, деганлари шу-да. Машқлар ҳам аста-секин енгиллашгандай туюлди. Аслида қаёқда енгиллашади, улар ўрганиб қолдилар. Да-стлабки кунлар ўн кило цементни кўтариб юргурган бўлсалар, энди йигирма килога чиқди. Тепаликка юк ташиб-ку оддий ишга айланди.

Кунлар шу зайдада ўтаверди.

Аввалига дам-бадам хат ёзарди: гоҳ уйига, гоҳ жўраларига, Гавҳарга. Борган сари хат ёзишга ҳам ҳафсала қолмас экан. Биронтадан хат келсагина жавоб битади. Ҳар гал хат олганида Гавҳарданмикан, деб интиқ бўлади. Адресини ўқимаёқ дастхатидан танийди. Нега хат ёзмаяпти? Қишлоққа кетган бўлса, имкон тополмаяп-тимикан?.. Наҳотки, ярим соат вақти йўқ. Икки энли хатни ёзиш шунчалар қийинми?

Гоҳо хаёлига нохуш фикрлар келади: «Бошқа биронта йигит билан топишдимикан? Наҳотки шундай қилса? Менга ваъда берди-ку. Кутаман деди-ку. Яна билиб бўладими? Кутаман деб орадан бир ой ўтмасдан ўзга йигитнинг қучогига кириб кетган қизлар

озми? Ёки ота-онаси бирорга унаштириб қўйдими-кан. Гавҳарнинг ўзидан сўрар ахир. Қизидан сўра-май узатиб юборадиган замонлар ўтиб кетган-ку... Балки уларнинг қишлоғида ҳалиям шундайдир, билиб бўладими... Йўқ, унақамас... Шундай бўлганида ота-онаси Гавҳарни ўқишга юбормасди... Бўлмаса нега хат ёзмайди?...»

Бу ўйлар юрагини қуртдай кемиради.

Фикр-фикрни етаклаб келавериб, бағри ўртаниб кетади, инграб юборганини ўзиям сезмай қолади. Шундан кейингина ўзини қўлга олади, тушкун ўйларни хаёлидан қувади, ўзига-ўзи таскин беради: «Йўқ, Гавҳар унақалардан эмас, у сўзининг устидан чиқади. Мени кутади у, биламан, ишонаман... Қишлоқчилик, иш кўп, хат ёзишга имкон тополмаёттандир, бирорнинг олдида ёза олмаса... Ўқиш бошланса ёзади, албатта ёзади, кўнглим сезиб турибди».

Темирнинг кўнгли адашмаган эди.

Турфа ўй-хаёлдан дили гоҳо хуфтон, гоҳо чарогон бўлиб юрган кезларда у мактуб олди. Таниш ёзувни кўриб, юраги ҳапириқиб кетди. «Хайрият» деб юборганини ўзиям сезмай қолди. Шоша-пиша конвертни очди. Оппоқ қофозга маржондай тизилган ҳарфларга кўз югуртириди:

«Ассалому алайкум, Темир ака! Соғлиғингиз яхшими, хизматлар билан ҷарчамаяпсизми?

Менинг ишларим яхши. Қишлоқда эдим, шу сабаб анчдан бери хат ёзолмадим. Қишлоқ одатлари ўзингизга маълум, шунинг учун жавобим кечикканидан ранжимассиз, деб ўйлайман...

Бугун шаҳарга келдим. Ҳали тузукроқ жойлашмасимданоқ сизга хат ёзишга киришдим. Тўғриси, сизни соғиндим. Қанотим бўлсаю, учиб борсам Туркманистонга. Лекин, афсуски... Икки кундан кейин ўқиш бошланади. Энди тез-тез хат ёзиб тураман. Сиз ҳам мени интиқ қилманг. Ҳар куни хатингизни кутаман. Лоақал хат орқали гаплашиш, дардлашиш имконимиз борку. Шунисигаям шукур...

Жавобингизни интизорлик билан кутувчи, Гавҳарнингиз.»

Темир хатни қайта-қайта ўқиди. Ҳар гал ҳарфлар узра кўз югуртираёттанди Гавҳарнинг овозини эшиг-

тандай, у гўё ёнгинасида туриб сўзлаёттандай туюлди. Мактуб Темирнинг шубҳаю хавотирга тўла кўнглига таскин берса-да, соғинчини янада оширади. Бир мўъжиза рўй берсаю, у шу топда Гавҳарнинг ёнида бўлиб қолса.

Темир беихтиёр осмонга қаради: «Э, Худо, қани курдатингни бир кўрсат! Ҳеч қурса бир соат, яrim соатгина унинг ёнига элт мени!» У чукур хурсинди. Кафтидаги хатни яна очди, яна ўқиди.

— Ҳа, шоир, илҳом келдими? Ҳаёл сурвоссан?

Азимнинг саволи унинг хаёlinи бўлди.

Темир ўрнидан туриб хатни чўнтағига солди. Азим буни кўрмади, кўрганда «жонондан хат кепти-да, нима дейди, бошқасини топмаптими ишқилиб», деб турли саволлар билан ғашига тегар эди. Ҳамма унинг одатини билиб қолган, шу важдан ҳеч ким қизлардан келган хатни унга билдирамайди.

Эрталаб, буйруққа кўра, тўрва елкалаган аскарлар қисм ҳовлисида саф тортдилар.

Эллик ёшлардаги полковник ўртага чиқиб, бурч ҳақида, афғон ҳимояси ҳақида ваъз айтди. Сўнг, юриш буйруғи берилди.

Юз метрлар юрилгач, қатор турган машиналар кўринди. Буйруққа биноан улар машиналарга чиқдилар...

Машиналар аскарларни Ашхобод аэропортига олиб келди. Рота-ротага бўлинниб, самолётта чиқишиди.

Тўрт оғайни ботирлар бир ротада эди, шунинг учун ҳаммаси бир самолётта чиқиб, ёнма-ён ўтиреди. Жойлашиб олгач, Носиржон шерикларига қаради.

— Қалай, гапим тўғри чиқдими? Келган кунимизоқ айтганман буни.

— Э, сен авлиёсан, — деди Азим.

Носиржон бўш келмади, ўгирилиб Азимга юзланди:

— Аммо-лекин сен орзунгга етадиган бўлдингда, — деди кулиб. Сўнг Темир билан Жўракулга қаради: — Эсингдами, Кушканинг иссиғига бардош беролмай, бундан кўра Афғонистонга кетганимиз маъқул, автомат билан тариллатиб душманни отамиз, деганди. Фаришта омин деган экан. Энди кўрамиз, нечта душманни ўлдирап экан.

«Кўрамиз, нечта душманни ўлдирап экан». Бу гапларни айтиш наҳотки шунчалар осон бўлса. Душман ким? Ахир уям одам-ку, униям ота-онаси, қариндошуруги, балки бола-чақаси бордир. Одамни ўлдириш ўйинчоқми?

— Менга қара, Носир, — деди Темир, Носиржоннинг елкасига қўлини қўйиб, ўзига қаратар экан, — ўйлаб гапирайсанми шу гапларни? Афронистон дегани кимнидир ўлдириш керак, деганими?

Носиржондан аввал Азим гап қотди:

— Бошқа иложинг йўқ. Акс ҳолда сани ўлдиришади. Уннан кейин қанча кўп душман ўлдирсанг, шунча яхши. Қаҳрамон бўласан. Ёшгина йигит унвон олсанг ёмонми? Бир умр маза қиласан.

Бунақаси Темирнинг руҳига тўғри келмайди. Бундай «маза»ни у ҳазм қиломайди. «Булар осмондаги романтик хаёллар, биродар, ҳали ерга тушганда кўрамиз» демоқни мўлжаллади-ю, лекин ўзини тийди. Хозир бунақа тортишувлардан наф йўқлигини сезди.

— Майли, қўйинглар, жўралар, бу гапларни, нима бўлса пешонамида борини кўрамиз. Ундан кўра дам олинглар.

У, шундай деб, ухламоқчи бўлган каби, кўзларини юмди. Бироқ уйқу қаёқда, турфа ўйлар миясини парма сингари ўяди. «Уйга, отамга нима деб ёзаман? Афронистонга келганимизни ёёсам — тамом, бир тарафда отам, бир тарафда онам ўзини-ўзи еб адо қиласди. Токи мен уйга кириб боргунимча ҳоллари не кечади? Хатларидан маълум, отам Худодан факат Афронистонга бормаслигимни сўрайдилар. Биргина мени отаммас, ўғли армияга кеттан жамики ота-онанинг ягона тилаги шу-ку ҳозир. Ахир гоҳ у қишлоқда, гоҳ бу қишлоқда Афғон урушида ҳалок бўлган аскарларнинг ўлигини олиб келишяпти-да. Уларни кўриб, эшитиб турган қайси ота, қайси она чидайди, ўғлим Афғонга бормасин, деб эртаю кеч қайси бири Оллоҳга илтижо қиласмайди».

Шериклари Темирни ухлаб қолди, деб ўйлашди, шу боис унга индамай ўzlари нималардир тўгрисида гурнглашиб бордилар. Темир гарчи уйроқ бўлса-да, на дўстларининг гўнғир-гўнғири, на самолётнинг бир маҳомдаги гувиллаши хаёlinи бўла олади. «Нима қилиб бўлса-да, уйдагиларга Афғонга келганимизни билдири-

маслигим керак. Агар ризқи-насибам узилмаган бўлса, бир кун кириб борарман уйга. Бордию...»

У ўёғини ўйлашга ҳам юраги дов бермади. Бир зум хаёллардан холи қолмоқни истади. Аммо бунинг ило-жи топила қолса экан. Афғонистонда эканини билди-расмаслик йўлларини излайверди, излайверди.

Туйқусдан хаёлига бир фикр келди. «Шошма-шошма, — деди ўзига ўзи, — Маҳмуд Венгрияда хизмат қиляпти. Унинг адресида аниқ шаҳари ёзилмайди. Уму-ман, чет мамлакатларда хизмат қиласидиган солдатлар-нинг адреси кўрсатилмайди-ку, фақат дала почтаси, фалон ҳарбий қисм, деб қўйилади, холос. Демак, Аф-ғонистондаям шундай бўлади адрес. — Темир бу фик-ридан суюниб кетди. — Бизни чет элга — Венгрияга олиб кетишидди, Маҳмудларнинг яқинидамиз, баъзан у билан кўришиб ҳам турамиз, деб ёзаман. Аввал Маҳ-мудга хат ёзиб, бор гапни тушунтираман, сен ҳам хатингда менинг гапимни тасдиқлайсан: Темир бизга яқин жойда, ҳар замонда учрашиб турамиз, дейсан. Шунда улар хавотир олишмайди».

Ота-онасини ташвишга қўймасликнинг энг тўғри йўли шу эди. Бундай фикр хаёлига келганидан, муҳими Маҳмуд — тоғасининг ўғли айни кунларда Венг-рияда хизмат қиласидигандан ич-ичида севинди...

Самолёт пастлай бошлади. Баланд-паст тоғлар, тог оралиғидаги қишлоқдар кўзга ташланди. Ҳамма жим. Ҳар ким ўз хаёли билан банд. Кимнинг кўнглидан нима кечяпти экан шу топда.

Жимликни Азимнинг ҳазили бузди:

— Эй, Носир, қани душман, биронтасиям кўрин-майди-ку.

Азим жуда ҳазилкаш, дангал, мард йигит. Сира тиниб-тинчимайди, гоҳ у ёқдан, гоҳ бу ёқдан гапириб, ҳазил-хузул қилиб туради. У айниқса Носиржон билан қаттиқ ҳазиллашади. Иккови бир гуруҳда ўқигани учун бир-бирининг ҳазилини кўтаради, малол ол-майди.

— Сени келишингни эшитиб бари душманлар Покистонга қочиб кетган бўса керак. Ажалимиздан беш кун бурун ўлмайлик, қоч, Тошкентдан Азим шер деган полвон келутти, деб бир-бирини судраб кетишган чоғи.

Носиржоннинг бу гапидан танишу нотаниш — ҳамма кулиб юборди. Боядан бери жим келаётган Жўрақул гапга аралашди.

— Ҳайла, бир тўдаси орқа-олдига қарамай қочиб кетяпти. Кўрдингми, Носиржон?

Яна кулги кўтарили. Самолёт тобора пастлаб боряпти. Энди моллар, одамлар ҳам кўрина бошлади.

Афғонистон тупроғи биз учун ҳам қадрли. Тарихимизнинг бир бўлаги шу макон билан боғлиқ. Беруний, Навоий, Жомий, Бобур, яна қанча улуғ инсонларнинг қабри шу ерда. Уларнинг қабрини зиёрат қилиш, изларини тавоф қилиш ўрнига жанг қиласиз, қон тўкамиз... Ким билади, биз душман атаган одамлар орасида ўша аждодларимизнинг авлодлариям бордир. У ҳолда ўз қариндош-уругларимизга ўқ отамизми, бир-бири мизни ўлдирамизми? Ўлганларнинг руҳи қарғамайдими?

Темирнинг ўйлари ниҳоясига етмай самолёт ғилди-раклари аэропортнинг бетон йўлкаларига тегди...

Аэропорт деганда Темир кенг, равон бетон йўллару атрофида турли биноларни тасаввур қиласарди. Ко-бул аэропортида манзара ўзгача экан. Тўрт тарафи тоғ билан ўралган, майдони ҳам унчалик катта эмас. Қишининг изғиринига қарамай шол рўмолга ўхаш оддий матога ўралиб олган, узун иштон ва енгил пойағзал кийган — юпун афғонларга кўзи тушди...

## Учинчи боб

### I

Қош қорайганда улар тушган машина бир қасабага кириб келди. Пастаккина бараклар олдида тўхтади. Тушишга буйруқ бўлди. Темир Азим билан Жўрақулни қидира бошлади. У машинадан бу машинага чопди, тополмади.

— Носир, машиналарди ярми бошқа томонга кетганми, дейман.

— Шунақага ўхшайди. Икки-учта рота келган чоғи-да.

Шундай қилиб, тўрт оғайнилар бўлинниб кетищди. Азим билан Жўрақул бир жойдами ёки улар ҳам ажralиб кетищдими — буниси номаълум.

Шу оқшом Хинжон посёлкасида тунашди. Йўлда толиққан учунми Темир қаттиқ ухлаб қолди. Туш кўрди. Кенг дала эмиш. Бир қараса, ўзининг қишлоғига ўхшаб кетади, бир қараса ҳозиргина ўтиб келишган афғон далаларига ўхшайди. Темир ҳайрон. Қаерга келиб қолдим ўзи. Анови тоғлар ўзимизнинг тоғлар, лекин манави йўллар, тўсиқлар-чи? Ўлланиб турса, рўпарасида бир киши кўринибди. Яхшилаб қараса — отаси. Ие, отам қаердан келиб қолдилар бу ерга? Отаси унга томон кела бошлабди. Оралари беш қадамлар қолганда ўртада бир бўз от пайдо бўпти. От ўйноқлаб турибди, цирқда ўргатилгандай. «Улим, сенга от олиб келдим. Мана шу отни миниб юрсанг хавф-хатардан холи бўласан», дермиш отаси. «На эгари, на жугани бор, қандай минаман», деса, «Эй улим, бунга унақа нарсанинг ҳожати йўқ. Устига ўтиргсанг бас, истаган томонингга ўзи олиб кетаверади. У сени йиқитмайди, авайлайди», дермиш.

— Рота, подём!

Бу овоздан Темир сесканиб уйғониб кетди.

Эшик олдида рота командири — озгин, сочи қизишиш, капитан Волков турарди. Ҳамма баравар ўрнидан туриб, апил-тапил кийина бошлади.

Эрталабки бадантарбия, югуриш қайди, бирданига нонушта берилди.

Чала-чулпа нонуштадан кейин иккита рота аскарларига нарсаларини олиш буюрилди. Улар орасида Темир билан Носиржон ҳам бор.

— Яна қайга олиб бораркин, — деди Носиржон, нарсаларини йиғишириб осма тўрvasига соларкан.

— Ким билади, дейсан. Ихтиёр қозончининг ўзида, хоҳлаган жойидан қулоқ чиқаради, деганларицдай, истаган жойига олиб кетаверади-да. На сўрашнинг, на рад этишнинг иложи бор, қулоқни қимирлатмай кетаверамиз, жўра.

Саф тортганларидан сўнг капитан Волков билан нотаниш бир майор ўртага чиқди. Ҳамма уларнинг оғзига термилди. «Нима деркан? Қаерга боришимизни айттармиқан?» Майор нарироқда турган аскарларга нимадир деди. Улар зум ўтмай бир неча автомат кўтариб чиқди-да, сафда турганларга тарқата бошлади.

— Жангга кирамиз чоғи, — деди Носиржон астагина Темирга; товуши титраб чиқди. Буни Темир сез-

ди, сезди-ю, ўзининг ҳам кўнглидан шу ўй кечгани учун индамай қўя қолди...

Бир-бiri билан изма-из келаётган машиналар асфалт йўлда кетиб бормоқда. Темир атрофга разм солди. Ҳу нарида баланд-баланд қояли чўққилар. Ҳиндикуш тоги шу бўлсамикан? Бу йил қор анча кўп тушганга ўхшайди, тоғ этаклари ҳам оппоқ. Чап тараф бийдай дала, адоги кўринмайди. Боя тушида кўрганими? Худди ўша. Э, тавба, дейди ўзига ўзи, ҳали бу ерлар билан тузукроқ танишмай тушимга кирса... Отам хавотирда шекилли-да, тушимга бекорга кирмайди-ку, тушдаям бир хислат бор ўзи. Отни кўргани яхши бўлди, от — мурод дейишади... Ҳаммамизга автомат берганига қараганда, Носиржон айтганидай, тўғри жангта кирамиз шекилли. Лоақал уйга хат-пат ёзив юборсак ҳам майли эди.

Машиналар дара ичига кириб, тезликни оширди. Ҳар бир машинада биттадан офицер ўтирипти. Йўлга чиқищдан олдин тайинланган: «Офицер буйруғисиз ҳеч ким жойидан турмайди, қурол ишлатмайди».

Чуваккина офицер — Куйбишев ўрнидан турди-да, дурбинини кўзига қўйиб, йўлнинг икки тарафини кузата бошлади. Сўнгра аскарларга қаради: «Иигитлар, ҳушёр бўлинглар, мана шу дарада душманлар бўлиши мумкин. Бордию ўқ, отиб қолса ҳовлиқмангалар, қўрқмангалар, буйруғимсиз ҳеч ким ҳеч қандай ҳаракат қиласин». Машина тезлигини баттар оширди. Дара эса тобора торайиб бормоқда. Икки томон баланд тоғлар, йўлнинг чап томонида — пастлиқда кичкина сой, суви гоҳ, кўриниб, гоҳ, кўринмайди. Бу йўл Темирга Шоҳимардонга борадиган йўлни эслатди.

— Худди Шоҳимардоннинг йўлига ўхшайди-я, Носир, эътибор қиляпсанми? — деди Темир.

Чувак офицер Темирга бақирди:

— Разговоры!

«Ҳаракат-ку мумкин эмас, гапириб ҳам бўлмас экан-да», деб ўйлади Темир. Фикри охирига етиб-етмай олдинда автоматнинг тариллаган овози эшитилди.

— Бошланди! — деб юборди Носиржон беихтиёр.

— Ҳамма жойида қимирамай ўтирсин! — деди офицер.

Машина тезлигини пасайтирмади. Аскарлар атрофга аланг-жаланг қарайди. Туриш таъқиқланган. Офицер

ҳам энгашиб олди. Энди ўнг томонда ўқ отилди. Бу машиналарга яқин жойдан эшитилди. Чувак офицер автомати милини ўша томонга тўғрилаб, тепкини босди.

— Иложи борича пастроқ энгашинглар! — деб буйруқ берди офицер.

Аскарлар косаси ичига бошини тортиб кетган тошбақа мисоли, шинели ёқасига бурканиб, калласини хам қилдилар. Ҳайдовчи машинага газ берди.

Шу алпозда беш-ўн минут ўтиришди. Бошқа ўқ овози чиқмади.

— Хайрият, — деди офицер енгил нафас олиб, эсон-омон ўтиб олдик.

Дара тутаган, машиналар кенглиқда кетиб бораради.

— Душманлар ана шунақа жойларда ўрнашиб олган,— офицер аниқ, дадил гапиришидан бу ерда анчадан бери хизмат қилаётгани билиниб турарди. — Баҳтимизга бу ердагилар камчилик экан, бўлмаса қаттиқ отишма бўлиши тайин эди. Энди Тазунга етгунимизча бехавотир кетсак керак.

Тазун — улар борадиган манзил, тоғ оралиғидаги қишлоқ. Шу ерда шўро аскарларининг қароргоҳи бор.

— Ҳали узоқми? — сўради Темир.

Офицер кулди.

— Нима, қўрқяпсанми?.. Яна бир соатларда етамиз.

— Қўрққаним билан бирор нарса ўзгарармиди,— деди Темир, ўзини дадил тутишга уриниб.

— Тўғри айтасан, бу ерда қўрқувни эсдан чиқариш керак. Очиги, қўрққан одам эртароқ ўқча дуч келади... Ўзбекмисан?

— Ҳа, — деди Темир.

— Қаердансан?

— Самарқанддан. Мана бу жўрам Намангандан.

— О, жуда яхши, ҳамюрт эканмиз, менам ўзбекистонлик. Чирчиқдан.

— Қанча бўлди бу ерга келганингизга? — деб сўради Носиржон.

Офицер оғир тин олди.

— Э, сўрама, оғайни, уч йил бўлди. Бир марта отпускага бориб келдим, холос.

Уч йил. Шунча вақт кечаю кундуз жангут жадал, ўқ-олов, хавф-хатар ичида юришнинг ўзи бўлмайди.

— Уруш қачон тутар экан, маълум эмасми? — деди Носиржон.

Эндиғина бу ерга келган йигитларнинг соддалигини кўриб ичида кулган Куйбишев ўзини баттар билимдон, ҳамма воқеалардан хабардор тарзда тутди.

— Очиғини айтсам, — деди у гавдасига номуносиб оҳангда салмоқлаб, — ҳали анча давом этади. Душманлар кўп. Энг ёмони, оддий афғон ҳалқи сену мени ёмон кўради. Иложи бўлса битта қолдирмай қириб ташласам, дейди. Биз эса уларга озодлик, эркинлик берамиз, деб жон олиб, жон бериб юрибмиз. Саводсиз ҳалқ-да... Ҳа, майли, бир кунмас бир кун тушуниб етар. Ҳозиргилари бўлмаса, фарзандлари тушунар, балки ўшанда бизга раҳмат айтар... Факат кўплаб солдатларимиз ҳалок бўлаётгани алам қиласди-да. Инқилоб душманларини биттаям қолдирмай қириб ташламагунимизча бу ердан кетмаймиз.

Офицер мулоҳазалари Темирни ўйлантириб қўйди. Балки афғон ҳалқи шунаقا турмушни хоҳлар. Биз нега уларнинг ички ишига аралашишимиш керак? Ўзи қандай тузумни, қанақа тартибни истаса шундай яшайверсин-да. Эҳтимол бизнинг тузумимиз, бермоқчи бўлган озодлигимиз афғон ҳалқига ёқмас, уларнинг миллий руҳига туғри келмас. Бўлмаса шунча йилдан бери қанчадан-қанча қурбон бериб курашиб ётармиди... Одамнинг ақли етмайди... Нималар бўляпти ўзи? «Инқилоб душманларини биттаям қолдирмай қириб ташламагунимизча бу ердан кетмаймиз». Нега биз қиришимиз керак уларни? Ахир Савр инқилобини биз қилмадик-ку. Ўзлари инқилоб қипти, ўзлари курашаверсин-да.

Суҳбат қизиб, вақт ўтгани ҳам сезилмади. Пешинга яқин манзилга — Тазун қишлоғига етиб келдилар.

Аскарлар тушган макон қирнинг тепасида. Пастда қишлоқлар, бир томонда водий. Кечаси қор ёқсан шекилли, ҳаммаёқ лой, соя жойларда қор уюмлари. Тоғлар ягрини оппоқ, қуёш нурида олмос каби ялтираб кўринади. Бу манзаралар Темирга Ургут тоғларини эслатди. У ерда ҳам қиши кунлари худди шунаقا манзарани кузатиш мумкин.

Аскарлар кичик-кичик казармаларга бўлиндилар.

— Азим билан Жўрақул қаерда қолди экан? — деди Носиржон. — Кобулда қолдирдимикан ёки қай-

сидир төғ оралиғига жүннатиб юбордимикан-а? Хат-  
пат ёзайлик десак адресиниям билмаймиз. Уларни яна  
куриш насиб этармикин?

Темир чукур хурсиниб қўйди...

## II

Тунда Темир, самолётда тузган режаси бўйича, ав-  
вал Маҳмудга хат битди. Афғонистонга келишганини,  
ота-онаси хавотир олмаслиги учун шундай йул тутта-  
нини Маҳмудга тушунтириди.

«Хўш, энди кимга? Уйга кейинроқ ёзганим маъқул,  
унгача Маҳмуддан ҳам хат келиб қолади. Икковимиз-  
ники олдинма-кейин келса ишонарли чиқади... Демак,  
энди Гавҳарга ёзман!»

Уни ўлаши билан Темирнинг дилини ширин бир  
туйғу қамраб олди. Ажабо, муҳаббатнинг сеҳри шу-  
микан? Икки-уч кундан бери хаёлини тарқ этмаётган  
асабий таранглик, Кушкадан то бу ерга етиб келгунча  
гоҳ машина, гоҳ самолёт, гоҳ пиёда йўл юришлар,  
чарчофу толиқишлиар, уйқусизликлар — ҳаммаси бир-  
дан тарқагандай туюлди, ўзини ҳозиргина муздай ан-  
ҳорга шўнғиб чиққан одамдай енгил ҳис этди, кайфи-  
яти ҳам хушланди. Йўлда келаётib, умрида биринчи  
марта автомат отишмаларини кўриб юраги увишган,  
то хизмат тутагунча шу отишмалар ичида юрамиз ше-  
килли, деб ўйлаган, бу ўйидан очиғи, бирмунча чўчи-  
ган эди. Бу қўрқув, бу ҳадик яқин-яқингача, гарчи  
уни эсламасликка тиришса-да, кўнглининг аллақаери-  
да турганди. Улар ҳам қуёшдан чекинган соялар каби  
тарқалди — дилида на ҳадик, на чўчиш қолди. Муҳаб-  
бат, бу — қуёш! У одамни илитади, йўлини ёритади,  
гоҳида қиздиради, куйдиради. Муҳаббат кўнглан юрак-  
да кувват, шиддат, ҳаётта иштиёқ пайдо бўлади. У одам-  
ни жасур, ҳеч нарсадан чўчимайдиган, мард қиласи. У  
масофани тан олмайди. Йўқса, Гавҳар қаердаю, Тे-  
мир қаерда ҳозир. Унинг муҳаббати Темир кўнглига  
кувват, билагига куч, кўзига нур ато этмоқда. Шу тоғда  
ундан ботир, ундан мард, ундан-да жасур йигит йўқ  
оламда.

Темир ширин хаёлларга берилиб ўтиаркан, қўлла-  
рини орқага қилиб, маза қилиб керишибди. Назарида  
кенг елкалари янада кенгайгандай, бақувват мускул-  
лари тағинда бақувватлашгандай туюлди. Фикрларини

бир нуқтага жамлаб, оппоқ қоғозга ҳарфларни маржондай тиза бошлади.

«Гавҳар! Менинг муҳаббатим! Соғ-омонмисиз? Сизни қанчалар соғинганимни билсайдингиз... Сўз билан ифода қилолмайман. Бу дунёда сиз борлигинги, сизни менга рўпара қилгани учун Оллоҳ таолога минг бора шукроналар айтаман. Сизни ўйласам кўзимга нур, билағимга куч, дилимга хуш кайфият йўғрилаверади. Бу ердаги ҳар хил бемаъни одатлар, кишини ёш бола сингари қолипга солишлар, асабийликлар — ҳаммаси сизни ўйлаганимда нурга дош беролмаган кўршапалак мисоли кўздан ғойиб бўлади, улар хаёлу дилимни тарк этади, рутубатли қищдан кейин қуёш кўрган одам каби кўнглим равшан тортади. Шу боис сизни қуёшим дейман...

Гавҳар, жоним! Бутун биз Афғонистонга келдик. Ҳа, азизам, шундай. Ҳавотир олманг, бизнинг қисми-миз уруш бўлаёттан жойлардан анча узоқда. Бу ерда олдиндан хизмат қилаёттан йигитларнинг айтишича, Бағлон вилоятининг Тазун деган қишлоғидамиз. Тоғли жойлар. Насиб этса бу ерларга ҳам ўрганиб кетармиз. Туркманистоннинг ададсиз иссиғи, чант-тўзонлари, аёвсиз изғириналрига чидадик-ку. Одам боласи ҳамма нарсага кўникар экан.

Факат ўз дард-ҳасратимни тўкиб солдим шекилли, узр. Ўзингиз қалайсиз, соғлиғингиз, ўқишилар жойида-ми, қишлоқдагилар эсон-омонми? Доимо соғ бўлинг, ўқишингизда омад тилайман. Тез-тез хат ёзиб туринг, илтимос. Жоним, сиздан яна бир ўтинчим бор. Менинг Афғонистонга келганимни ҳеч кимга айтманг, уйдагиларга мен Венгрияда хизмат қиляпман, деб ёздим...»

Хатни ёзиб бўлди, ечиниб ётди. Ҳаёлидан ҳамон Гавҳар чиқмас, у билан ўтган масъуд дамлар лаззатини қайтадан туйгандек эди. Эҳ, қандай ширин онлар эди. Яна насиб этармикан?

Ухлайн дегани сайин Гавҳар билан кечган сухбатлар, воқеалар кўз ўнгидан кетмайди, ҳаммаси бир-бир ҳаёлида жонланаверди.

Бир марта жуда ғалати бўлди. Ўша воқеадан кейин анчагача Гавҳарга кўринишдан уялиб юрди. Уни эслаш Гавҳарга ҳам, Темирга ҳам ёқмас, иккаласи ҳам бир титраб кетар, шу боис уни сира ёдга олмасликка

иккови бир-бирига сўз берган эди. Хаёл қизиқ нарса экан-да, ҳозир шу воқеа эсига тушди...

Апрел ойининг охирлари. Санъат саройида кинога тушдилар. Кинодан чиқишганда қош қорайган, майин ёмғир севалаб туради. Ўша баҳорда негадир ёмғир кам ёғди. Шунданми, бугунги ёмғир ҳаммага хуш ёқар, у дараҳтлар, гуллар, ўт-ўланлар баргидаги чант-ғуборни ювив ўтар, ҳаво ёқими, севишганларни сайр этишга даъват этарди. Бу туйғу Темир билан Гавҳарга ҳам бегона эмасди.

— О-о, ёмғир ёғаяпти-ку, — деди Темир ташқарига чиқиши ҳамоно. — Ҳавони қаранг, Гавҳар, бунчалар хушбўй. Бироз айлансанк нима дейсиз? У Гавҳарга термилди. Гавҳар унга. Қизнинг кулгу ўйнаб турган шўхшан кўзларида йигитнинг таклифига ризолик аломати акс этиб туради. Шу боис Темир жавоб кутмай Ўрда томонга бошлади. Гавҳар шамсиясини очди.

— Менга беринг, — деди Темир қизнинг қўлидан шамсияни оларкан.

Шамсия айвончаси тагида ёмғирдан бекиниш учун улар бир-бирига тиқилиб борар, йигит анча бўйчан бўлгани боис, шамсия қиздан анча юқорида кўринар эди.

— Яхшиям зонтик олганим...

У йигит томонга юзини бурган кўйи, нигоҳини юқорига — Темирнинг кўзлари томон йўналтириди. Йигит эса аксинча, жиндай энгашган ҳолда, унинг кўзларига қаради. Шунда қизнинг шундоқ ҳам қоп-қора, дид билан тортилган нозик, билинар-билинмас сурма туфайли тағинда қорароқ кўринган кўзлари ёмғир томчиларини ёриб ўтаётган электр нурида чараклаб кетди. Йигит ўзини тиёлмади — чаросдек ялтираб турган кўзларига лабини бостанини ўзи ҳам, қиз ҳам сезмай қолди. Қиз бирдан ўзини орқага тортди.

— Ҳей, қароқчи, нима қиляпсиз? Уялмайсизми, катта кўчада...

Назарида юzlари қизариб кетди Темирнинг. Ўзини кўлга олиб ҳазиллашди:

— Ошинг ҳалол бўлса — кўчада ич, дейдилар.

— Аввал ҳалоллаб олинг, — Гавҳар ҳам ҳазилга ҳазил билан жавоб берди. Қизнинг топқирлиги, ҳозиржавоблигига Темир қойил қолди.

— Бопладингиз... Тан бердим, — деди ноилож.

Анхорга яқинлашиб қолдилар. Иккови ҳам гүё олдиндан келишиб қўйгандай Анхор ёқалаб «Пахтакор» стадиони томон юрди. Ёмғир ҳамон ўша кўйда — майдалаб ёғар, йўллар аллақачон ҳўл бўлиб улгурган, майдада-чуйда чуқурларда пайдо бўлган ҳалқобчалар чироқ ёғудусида ялтираб кўринар эди.

Стадион панжаралари кўринди.

Темир ака, — деди Гавҳар, — бир таклиф бор.

— Марҳамат.

— Шундоқ айланиб Гагарин паркига ўтсак. У ерда сиренлар бор, роса гуллаган бўлса керак. Оламиз.

— Сиренни яхши кўрасизми?

— Жудаям.

— Бўпти, олганимиз бўлсин.

Кўприқдан айланиб, Гагарин боғи томонга юрдилар. Бу пайтда ёмғир тинган, боғ ичи чироқлар ёруғида гўзал кўринарди. Арчалар сутта чайилган қизлар каби тиник-тиник, гўзал, кўзни қувнатади. Ҳув наридаги бир туп настарин чамандай очилипти. Унинг нафармон гуллари кўзни қамаштиради.

— Ана, — деди Гавҳар ёш боладай севиниб.

— Ҳозир оламиз...

Темир шундай деб шамсияни Гавҳарга узатди-да, ўзи жадал юриб кетди. Бориб настарин гулларидан уза бошлади. Ҳаш-паш дегунча бир қучоқ бўлди. Унгача қиз ҳам етиб борди.

— Мана сенга олам-олам гул,

Этагингта тўлганича ол, ол.

Темирнинг ҳазилидан қиз мириқиб кулди. Сўнгра шеърнинг давомини айтди:

— Бунда толе ҳар нарсадан мўл,

То ўлгунча шу ўлкада қол, қол...

Энди иккови баравар кулди. Уларнинг шодон кулгуси дов-дараҳтлар, ям-яшил арчалар, салом бераётган келинчак мисоли эгилиб ётган настаринлар бағрига сингиб кетди.

Қиз гулларни тўйиб-тўйиб ҳидлади.

— Жуда яхши кўраман-да сиренни. Буни ранги айниқса ёқади менга.

— Демак, нафармон рангни ёқтиаркансиз-да?

— Ҳа, — деди қиз яна гулларни ҳидлаб, — қизилданам, оқданам — ҳаммасидан кўра нафармон рангни яхши кўраман.

Шундагина Темир қизнинг устидаги кўйлак ҳам нафармон рангдалигига эътибор берди.

— Сезилиб турипти, — деди Темир мутомбirona оҳангда.

— Қаёқдан? — ажабланди содда қиз.

— Кўйлагингиздан.

Қиз устидаги кўйлагига, гўё ўзи энди кўраёттандай, энгашиб қаради. Чиндан бутун қайси кўйлагини кийиб чиққани ёдида йўқ, атайлаб шундай қилмаган, тасодифан тўғри келиб қолган эди.

— Жуда синчков экансиз-ку.

Темир сир бой бермади.

— Ҳа, энди девор бўлмаса кўчани кўрамиз.

— Сиздан эҳтиёт бўлиш керакка ўхшайди.

Темир қизнинг елкаларидан ушлади. Кўзларига термилди. Қиз ҳам термилди.

Нигоҳлар бир-бирига яқинлаша бошлади. Яна, яна... Лаблар қовушдилар. Икковиям бу дунёда йўқ эди гўё, арши аълого чиқиб кетишганди. Қани бу онлар тутамаса, давом этаверса, этаверса...

Ногоҳ чалинган хуштак овози уларни шувиллатиб «ерга» туширди. Темир ялт этиб овоз келган томонга қаради. Қўлига қизил латта боғлаган икки йигит турарди. Икковининг ҳам соchlari ўсиб кеттан, яқин ўртада тароқ кўрмаган, қўлидаги қизил лентани ҳисобга олмаса, кўчадаги безорилардан сира фарқи йўқ.

— Нима керак сизларга? — деди Темир ўзини дадил тутиб.

— Нега бу ерда ўпишаяпсизлар?

— Нима ишларинг бор?!

— Бу ерда бунақа иш билан шугулланиш мумкин эмас. Штраф тўлайсан, бўлмасам милицияга олиб кетамиз.

Темирнинг ғазаби қўзиди. Қўлинни Гавҳарнинг елкасидан олди-да, йигитларга яқин борди. Товушини бироз пасайтириб, қаҳр ила деди:

— Уялмайсизларми шу гапни гапиргани. Кўрдиларинг-ку ахир, ҳеч нарса қилганимиз йўқ.

«Посбонлар»нинг бир туки қимиirlамади. Ўша безрайган кўйи:

— Штраф тўлайсан, бўлмаса олиб кетамиз, — деди.

Ҳозир иккаласини милиция машинасида олиб кетадигандек, Гавҳар хавотирлана бошлади. Худо кўрсатмасин, шармандалик-ку бу.

У югуриб Темирнинг олдига борди.

— Темир ака, жон Темир ака, булар билан тортишманг, беринг шу штрафини. Мана, мендаям бор озроқ пул, — деб сумкасини титкилай бошлади.

Темир Гавҳарнинг қўлини ушлади.

— Қўйинг, сумкани ёпинг. Ҳозир ўзим тинчитаман.

«Посбонлар» Гавҳарнинг гапини эшитмаган бўлсада, ҳаракатларидан мақсадини англади. Айни вақтда Темир ҳам уларнинг ниятини билди, дружиначиларга заррача алоқаси йўқлигини пайқади. Бироқ ҳозир бу ярамаслар билан аді-бади айтишиб ўтиришдан фойда йўқлигига кўзи етди. Эҳтимол, нарироқда бошқа шериклари пойлаб тургандир. Темир чўнтағига қўл солди-да, чиқсан пулни узатди. «Посбонлар»дан бири пулни чироқ ёруғига тутиб санади.

— Бу кам, — деди Темирга яқинлашиб.

— Сенлардан қарзим борми? Олавер-да, борини.

Гавҳар яна Темирга ялина бошлади:

— Темир ака, мени пулимниям беринг, тезроқ, кетайлик бу ердан.

Темир гўё унинг гапини эшитмаган сингари яна чўнтағига қўл солди. Қолган ҳамма пулини берди. Бояги йигит яна чироқ ёруғига тутди, гўё қарзини санаб олаёттандай:

— Аслида буям кам, — деди, пулни чўнтағига соларкан, — лекин сенга раҳм қилдик. Энди бу ердан туёғингни шиқиллат.

Темир ниҳоятда эзилди, иккита безорининг олдида ожиз қолганидан эзилди. Тирикчилик ўтказишнинг бошқа йўлини топса бўлмасмиди бу ярамаслар...

Унинг оёқлари зилдай, гўё кўтариб босишга қийналади. Тилига сўз келмайди, миқ этмай бормоқда. Нима ҳам десин?

Боғдан чиқиб трамвай бекати томон юришиди.

— Мени кечиринг, Темир ака, — деди Гавҳар охирни жимликни бузиб. — Ҳаммасига мен айборман.

— Нимага сиз айбор бўласиз?

— Сирен олайлик, деб мен бошладим-ку бу ёқقا.

— Хўш, келсак нима бўпти? Сирен олсак нима бўпти? Ахир ҳамма келадиган, айланадиган жой-ку. Бор нима учун керак бўлмаса?.. Ярамаслар...

Иккови ҳам жим кетишиди. Такси-пакси тўхтатай деса, аҳвол бунаقا. Аммо шу ҳолда трамвай кутиши, Гавҳарнинг ётоқҳонаси гача трамвайдага лиқиллаб бориши, кейин ўзининг кулбасига кетиш — эҳ-ҳе, осонми... Гавҳар унинг кўнглидан кечаетган гапларни сезгандек сўз қотди:

— Юринг, Темир ака, ҳув наридан биронта такси тўхтатамиз. Трамвай қачон келади.

Темир индамади, миқ этмай Гавҳарга эргашди...

Бу воқеадан анчагача руҳан эзилиб, Гавҳарнинг олдида хижолат чекиб юрди...

Ҳозир шуни эслаб ётаркан, ўзича жилмайди: «Галати ҳодисалару тасодифларга тўла экан-да бу дунё!..»

### III

«Вой-дод, ўлдим» деган чинқириқдан чўчиб уйғонди Темир. Сапчиб туриб қараса, Носиржон полда чўзилиб ётибди. Қотмадан келган новча йигит икки қўлини белига тираб, унинг тепасида турибди. Темир билди, демак, «қария»лар ўз ҳунарини бошлабди. Қони қайнаб кетди. Югуриб бориб бояги йигитнинг қулоғи аралаш чаккасига бир шапалоқ туширди. У бу зарбани кутмаган бўлса керак, гандирақлаб кетди, аммо йиқилмади. Темирнинг башараси ваҳшиёна тус олган эди, буни Новча кўрди, кўрди-ю, ўзини ниҳоятда вазмин тутди. Аввалига Темирга еб қўйгудек бўлиб тикилди. Сўнгра ўша алпозда Темирга яқинлаша бошлади. Темир ўзини чоғлаб, калтакка чап беришни мўлжаллаб турди. Новча бир оғиз ҳам гапирмади-да, Темирнинг киндигини мўлжаллаб мушт туширди. Темир эпчиллик билан икки қўлини киндиги устига қўйиб улгурган эди. Новчанинг гурзида мушти унинг қўлига тегди. Очиги, Темирнинг қўллари синиб кеттудай зирқиради.

— Тузуксан-ку, биродар, — деди Новча айёrona илжайиб. — Уришишга уста экансан, балли, азамат. Ҳали бир синашамиз. Маъқулми?

Темир бироз буқчайган кўйи навбатдаги зарбага тайёрланиб турди. Ҳар қалай бу ярамас калтак еб индамай кетавермаса керак. Томошибинлар — Новчанинг югурдаклари ёттан жойларида Новчага пишанг

беришияпти. Новча Темирга яқинроқ көлди, гүё ҳозир босиб, янчидеги кетадигандай. Темир тишини тишига босиб жойидан жилмади, қаеригадир қаттиқ зарба тушишини кутди. Новча калтақдай узун қўлини Темирнинг елкасига қарс этказиб ташлади. Унинг елкаси, елкаси орқали бутун танаси зирқираб кетди.

— Ол қўлингни! — Темирнинг овози қаҳрли чиқди.

Новча яна иршайди, бу билан «олмасам нима келарди қўлингдан» демоқчи бўлди. Темирнинг иззатнафси чидамади. Новчанинг кўприк сингари чўзилиб турган қўлига кафтининг қирраси билан қаттиқ урди. Кутимаган бу калтақдан Новчанинг қўли узилиб тушгудек бўлди. «Иҳ-м», деб интраб юборганини ўзиям сезмай қолди. Чап қўли билан ўнг қўлининг зарба еган жойини ушлади.

— Каратэчиман де... Кўрамиз...

Темир ростданам каратэни унча-мунча биларди. Раҳматулла деган йигитнинг машқларига қатнаган: айрим усусларни ўзлаштириб олган эди. Ҳозир шу асқотди. «Ҳеч бўлмаса ўзларингни ҳимоя қилишни ўрганинглар», деб бақириб ётарди Раҳматулла бечора. Тўғри айтар экан:

Новча гапини тугатар-тугатмас Темирнинг чаккасига шапалоқ туширди...

Иккови роса калтаклашди. Бирор на ёрдам беради, на ажратиб қўяди. Уришиб чарчаган жўжахўролардай икковиям ҳолдан тойди. Новча сиртдан сир бой бермаса-да, ботинан Темирга қойил қолди. Сал нафасини ростлагач, Темир Новчага деди:

— Нега урасан буни?

Новча ҳамон пинагини бузмай, ғоят хотиржам оҳангда, сўзларни тишлари орасидан чиқариб гапирди:

— Сенга ким қўйипти бу ишларга аралашишни. Яна бурнингни суқсанг, ўзингдан кўр... Бу гал аядим... Мен бу ернинг шефиман. Кимки менинг айттанимни қиласаса — ҳолига вой!

Олдиндан хизмат қилаётганларнинг бариси Новчанинг оғзига термилиб турар, унинг буйруғисиз ҳеч ким ҳеч ишни қилмасди. Ҳозир Темир билан бўлган олишувда улардан биронтаси аралашмаганига сабаб ҳам Новчанинг ишораси бўлмагани эди.

Аслида Новчанинг одати шундай: янги келган йигитларга (кўнгли тусаганига) бирон иш буюради. Ин-

дамай бажарса — бажарди, бажармаса уради. Бордию уям қаршилик кўрсатса ҳолдан тойгунча уришади. Битта мардлиги — биринчи тўқнашувда бошқаларни ёрдамга чақирмайди, ўзи яккама-якка олишади. Рақиби ўзи билан тенг ёки кучлироқ чиқса унга бошқа тегмайди, иш буюрмайди, иложи борича у билан яқинлашишга интилади. Ўзининг ибораси билан айтганда, «шайкаси»га қўшиб олади. Унга ён бермай, «шайкаси»га қўшилмай, яна у билан уришиш ниятида бўлса, у ҳолда беш-олти болага айтиб тавбасига таянтиради.

Бугунги олишув Новча учун кутилмаган ҳодиса эди. Боиси, рақибининг ўзи эмас, унинг дўсти Новчага қарши чиқсан эди. Аслида-ку, бундай ҳолда иккаласини-ям оғзи-бурнини қонга тўлдиради. Темир билан калтаклашиб эса тўғриси, осон бўлмади. Бироқ Новча обрўни беришни истамайди.

У секин бориб каравотига чўзилди. Ётган жойидан Носиржонга қаради. Унга айтган ишини қилдириши керак. Акс ҳолда мазаси қочади. Айни чоқда Темирни чуқурроқ синамоқ ниятида, — қани, яна дўстининг ёнини оладими-йўқми, — ётган жойидан бамайлихотир, гўё ҳеч нарса бўлмагандай Носиржонга ўшқирди:

— Қани, ўрнингдан туриб мен айтган ишни қил-чи!

Носиржон бир Новчага, бир Темирга жавдираб қаради.

— Тур ўрнингдан деяпман! Эшитмаяпсанми?!

Ноилож Носиржон иргиб турди-да, эшик олдида ётган пол латтани олди.

— Зудлик билан арт полни. Агар чала бўлса, бошқатдан юvasан, — деди Новча.

Армиядаги тартибсизликлар, «эски» аскарлар билан янги келганлар ўртасидаги жанжаллар хусусида Темир кўп эшитган эди. Туркманистонга келиб тушишгандаёқ шундай тўполонларни кутганди. Лекин у ерда бу хил машмашалар бўлмаган, сабаби — «эски»лар деярли йўқ эди.

Носиржон полни арта бошлади. Темир нима дейишни, нима қилишни билмай боши қотди. Яна аралашай деса, ҳозир ўзи бўлганича бўлди. Яна калтак ейишга тоби йўқ. Буларнинг казармасида асосан олдин келган йигитлар, Темирлар билан келган ўн-ўн беш чоғли аскарлар бор, холос. Бирон нима дейин деса,

тайинки, энди ҳаммаси Новчанинг ёнини олади. Бўлмаса ҳозирги тўполонни булар ҳаммаси кўриб турипти. «Қани, уч-тўрт кун қарайлик. Ким қандайлигини билайлик. Шунга қараб иш қиласиз».

Нонуштадан кейин Темир аввалдан хизмат қилаётган бир рус йигити билан казармадан беш юз метрлар чамаси наридаги постга жўнади. Бу ердан иккита темир қувур ўтаркан. Рус йигитнинг айтишича, қувурларнинг биридан салярка, иккинчисидан керосин оқади. У Ҳайратондан Кобулга қараб ўтган. Уларнинг вазифаси ана шу қувурларни қўриқлаш, токи душманлар келиб портлатиб кетмасин. Навбатчиликни ўтаб бўлгач, деярли бошқа иш йўқ. Биринчи куни Темир шериги билан танишиб олди. Унинг оти Серёжа; ўзи рязанлик экан. У ёқдан, бу ёқдан гаплашиди, унинг бу ерга келганига бир йил бўлти. Анча-мунча очик, шалдуршулдуру йигит экани муомаласидан билиниб турипти. Ўзини катта тутмас, бўлаётган воқеалардан норози кайфиятда сўзлар эди. Шу жиҳатлари билан у Темирга ёқиб қолди.

— Новча билан кўп ади-бади айтишиб ўтирганлар,— деди Серёжа — Унинг қўлидан ҳар иш келади. Командирлар ҳам индамайди унга. Икки ойча бурун бир бола айтганини қилмаган эди, ёмон дўппослади. Бечоранинг жигари эзилган экан чоғи, касалхонада бир ойча ётиб ўлди. Сариқ касал билан оғриган экан, ўтиб кетипти, шундан ўлди, деб тобутини жўнатишиди.— Серёжа чуқур тин олди. — Ҳамма билади уни... Орага сукунат чўқди. Икковиям ўз хаёли билан банд. Ҳайратон тарафдан самолётнинг қулоқни қоматта келтирувчи чинқириғи эшитилди. Темир осмонга — самолётга қаради.

— Қараганинг билан кўролмайсан барибир, — деди Серёжа нигоҳини бир нуқтадан узмай. Унинг бамайлихотир ўтиришидан бундай овозларни эшитавериб, қулоқлари ўрганиб қолгани сезилиб турарди.

— Ҳар куни бир неча марта ўтади.

Сұхбат яна узилди.

— Хизматнинг охиригача шу ерда бўламизмикан ё бошқа жойгаям жўнатармикан? — деб сўради Темир бироздан сўнг.

— Билиб бўлмайди, — деди Серёжа. — Бизни бир йилдан бери қимирлаттани йўқ. Аммо биздан кейин

келган болаларни икки-уч ойдан кейин бошқа ёққа олиб кетди. Қаёққа — ҳеч ким билмайди... Пешонангда борини кўраверасан, оғайни.

— Афронлар биланам гаплашасиларми?

— Ҳа, — деди Серёжа, — қищда кам келади, баҳорда улар мана бу ерларга, — пастлиқдаги водийни кўрсатди, — экин экишади. Ёзда шоли экади, уни йигиштиргандан кейин бутдой экади. Ўша пайтларда келишади оддимизга. Гапларига кўп тушунмаймиз. Ўзбек, тожик болалар гаплашишади. Тилларинг яқин шекилли?

— Қайси миллатлигига қараб-да. Агар ўзбеклар, туркманлар бўлса биз гаплашшимиз мумкин. Бошқаларининг тилига тожиклар тушунади.

— Афронлар биздан келиб чек алмаштиради. Улардан олган пулимизга шахсий дўконлардан у-бу нарса харид қиласиз. Афронлар эса бизнинг чекимизга қисмлардаги магазинлардан савдо қиласидилар.

— Бизларни ёқтирмаса керак-а, Серёжа, нима де-динг?

Серёжа маънодор кулди.

— Мени синамоқчимисан?

— Нега энди? Фалати-я саволинг...

Серёжа кескин галирди:

— Бўлмаса шунақа савол берасанми. Ким остонасига милтиқ кўтариб келган одамни ёқтиради? Бекорга тўда-тўда бўлиб олиб курашяптими бизларга қарши?

— Улар бизга эмас, инқилобчиларга қарши курашяпти-ку.

Серёжанинг жаҳли чиқди:

— Е ўлгудай гўлсан, ёки аҳмоқсан. Ахир биз кимиз инқилобчилар бўлмай? Улар ўзлариникидан кўра бизларни ёмон кўрадилар. Босқинчи булар, деб қарайди бизга.

Серёжанинг мулоҳазалари Темирни ўйга толдирди. «Бунинг қарашлари бўлакча-ку. Астойдил айтяптими ёки мени кавлаяптими?» Ҳарҳолда Темир фикрини очиқ айтмади, синамаган отнинг сиртидан ўтма, деганлар, ҳали буни яхши билмаса, бироз кузатсин-чи... Хаёл сурганча жим қолди. Сўнгра суҳбат маромини бошқа томонга бурди...

Бир куни кечки овқатдан сунг, Новча Носиржон олдига келди; важоҳати ёмон эди. «Яна нима бало бўлди экан», деб турипти Темир.

Новча Носиржоннинг иягига кафтини қўйди-да, жаҳл билан деди:

— Менга қара, эй, сотқин, командирга бориб айтидиган бўлсанг, ўттиз икки тишиングни қоқиб, чақимчилик қилган тилингни узиб оламан. Билдингми? — бурчақда турган этигини кўрсатди. — Қани, дарров этигимни тозалаб, мойлаб қўй-чи!

Носиржон индамай унинг буйруғини бажара бошлади. Темир кузатиб турибди, аммо нима қиларини билмайди. Новча ҳар замон Темирга кўз қирини ташлаб қўяди. Бошқа болалар ҳам бор, лекин ҳамма жим. Серёжа зимдан Темирга қаради. Унинг қарашидан «мен нима девдим, кўрдингми, қўй, аралашма», деган маънени уқди. •

Новча каравотига бориб чўзилди, кўзи Носиржонда. У этикни яхшилаб артди, кейин чутка билан мойлади, орқасидан духоба латта билан роса ишқалаб ялтиратди. Бўлдими, дегандек, Новчага тикилди.

— Энди пайтавани ол, — деди Новча ётган жойидан. Носиржон пайтавани олди. — Ҳидлаб кўр. Яқинроқ об кел бурнинга. — Носиржон узоқроқдан ҳидлади. Новча дўйқ урди. — Яқинроқ опке деяпман.

Новчанинг шериклари хаҳолаб кулади. Носиржон сариқ эмасми, қип-қизариб кетди. Серёжанинг галини Темирдан эшигтан эмасми, кўз ўнгига жигари эзилиб ўлган бола келади.

— Ҳиди борми?

Новчанинг саволига Носиржон калласини ирғаб жавоб берди.

— Дарров ташқарига об чиқиб яхшилаб ювиб кел. Ҳидлаб кўрасан, агар ҳиди қолса, бошқатдан юvasан. Тушундингми?

Носиржон бош эгиб чиқиб кетди.

— Чақимчилик қилганинг жазоси шу. — Сўнг Новча Темирга қаратадеди: — Ҳу, полвон, землягингни тарафини олмайсанми, бор унга ёрдамлаш ичинг ачиса.

Темир билдики, Новча атайлаб унинг жаҳлини кўзғатмоқчи, жанжални Темир бошлишини кутяпти. Кейин шерикларига айтиб уни ўласи қилиб урдиromoқчи. Шу билан ўчини олмоқчи. Унинг аҳмоқона ни-

ятини амалга ошириш учун имкон бермаслик керак. Темирнинг виждони қайнаб кетди, унинг гаплари алам қилди, ундан кўра ургани, калтаклагани авло эди. Лекин чидамай иложи йўқ, бу ернинг ана шунаقا «тартиблари» бор, ўлсангам-қолсангам чидашга мажбурсан. Учакишсанг — баттар бўлади.

Ярим соатлардан кейин ювилган пайтавани кўтариб Носиржон кирди. У совуқдан дир-дир титрар, қўллари қовушмас эди.

— Марат, — деди Новча. Унинг рўпарасида ёттан жимитдайгина йигит иргиб турди ўрнидан. — Текшибириб кўр-чи, тоза ювилтими-йўқми?

Марат Носиржоннинг олдига келди-да, пайтаванинг у ёғ-бу ёғини ағдартириб кўрди. Тоза ювилганига ишонч ҳосил қилди чори, у генералга ҳисоб берган каби ғоз туриб: «Ҳаммаси жойида, шеф!» — деди.

Новча Носиржон томон қўлини бигиз қилиб, Маратдан сўради:

— Бунинг кийимлари тўғри келадими сенга?

Марат оғзи қулогига етиб, бош иргади.

— Пайтавани печ ёнига осгин-да, ҳамма кийимингни бунга келтириб бер.

Носиржон нега дегандек гарангсиб қолди.

— Эшитмадингми гапимни, — деди Новча. — Ёки тушунмадингми? Сен бунинг эски кийимларини оласан. Сенга бўлаверади.

Носиржон Новчанинг буйруқларини бекаму кўст бажарди. Бундан Темирнинг ғаши келар, бироқ тишини тишига босищдан, бу ҳолатни кўрмай деб кўзини юмиб ётищдан ўзга чораси йўқ эди. «Ҳай, Носиржон, Носиржон-а, командирга чақиб нима қилар эдинг-а. Серёжанинг гапларини айтдим-а, шундаям қулоғингга кирмалти-да. Командирга айтиб тузатиш мумкин бўлса ҳалигача тузатишмасмиди... Бунақалар билан учакишиб ким обрўй топарди... Ҳе, тавба-тавба...»

## Тўртинчи боб

### I

Темир Бори Усмондаги туман касалхонасига борди. Дарвозадан кириши билан ўзидан икки синф юқори ўқиган — ҳамсоя қишлоқдик Сафар деган йигитни учратди. У қайсиdir ташкилотда ишлашини Темир

эшитган, аммо анчадан бери кўрмаган эди. У Темирга шундай қаради-ю, тўхтади.

— Темирмисан?

Сафар қулочини ёзди ва унинг чап қўли тирсагидан йўқлигини кўрди. Барибир қулочини туширмади, келиб Темирни қучоқлади, юзларидан ўпди. Темирнинг бурнига гуп этиб ароқ ҳиди урилди.

— Қайларда юрибсан, жўра? Минг йилдан бери кўринмайсан? Бир ўқищда деб эшитаман, бир армияда дейишади.

— Ҳа, ўқищда эдим, кейин армияга кетдим. Яқинда келдим.

— Афғонистонда бўлдингми? — деди қўлига ишора қилиб. — Бу ерда нима қилиб юрибсан?

— Дўхтирга келяпман, бир кўриб қўйсин.

— Ўқ тегдими, э, бечора, ёмон бўпти-да. Холиқ акаям тоза хафа бўлгандир... Менга қара, сен дўхтирга кириб чиқ, мен дарвозада кутиб тураман. Бир отамлашайлик. Шунча жойларга бориб кепсан.

Сафарнинг кайфи анчагина. Ҳозир бу билан бирон жойга борса кечгача эзилиб қоп кетиши аниқ. Қандай қилиб қутулса экан? Темир иккиланиб қолди. Унга сари Сафар бидирлашини қўймайди.

— Нимага ўйланасан? Афғонистонга бориб душманларга қарши курашиб келган одам решитилни бўлади-да.

— Тўғриси, Сафар ака, тез уйга қайтишим керак,— деди Темир бошқа баҳона тополмай. — Мехмон келмоқчи эди.

Сафар қўл силтади.

— Кўйсанг-чи шундайча гапларди, жўра. Неччи йилдан бери энди кўряпман сени...

— Сафар ака...

Темирнинг гапи оғзида қолди.

— Сени отанг бундайча мижғомас-ку, сен кимга ўҳшадинг-а? Ахир мен кеча ҳўқизбоқар кўрдим. Янганг шу ерда, ҳозир хабар олиб келяпман. Шу хурсандчиликка бирпас ўтирумайсанми? Мунча ўзингди лаълига сома-да.

Темир кулди:

— Оббо, Сафар ака-эй, бу нима деганингиз?

— Ҳа, бўлмаса юр-да ахир.

— Мен қачон кираман дўхтирга, у қачон кўради, қачон чиқаман. Шунча кутиб ўтирасизми ишдан қолиб?

— Кечгачаям қарайман керак бўлса. Бор, тезроқ кириб чиқ.

Темир ноилож қолди. Жарроҳлик бўлими томон юаркан, ўйлаб кетди. «Қаердан учради бу одам. Ҳали тоза бошни қотирса кераг-ов. Ортиқча гапирсанг, бошқача тушунса, нима қилиш мумкин...»

Жарроҳ Темирнинг қўлини аввал ўзи кўрди, кейин рентгенга солди.

— Ҳаммаси жойида, иним, — деди кекса жарроҳ.— Ярангиз биттан. Оғриганининг сабаби енгил кийингансиз — салқин таъсир этган. Иссиқроқ кийиниб, эҳтиёт қилиб туринг. Худо хоҳласа, билинмай кетади. — Врач Темирга маънодор термилди. Темир, нима демоқчи бу киши, бир сир бору айттолмаяптими, деган хавотир билан унга жавдирали. — Иним, — сўзида давом этди врач вазмин оҳангда, — албатта бу иш яхши бўмапти. Аммо шунисигаям шукур қилсангиз арзиди... Ҳали ёшсиз, бундай юришдан кўра протез қўл қўйдирсангиз қалай бўларкин?.. Хоҳласангиз мен ёрдам бераман. Танишларим бор...

Врачнинг бу таклифи институтдаги бир қўли протез домлани ёдига туширди. Кечагидай эсида, биринчи марта кўрганида юраги шувиллаб кетган, кўзига жуда хунук, совуқ кўринган эди.

Шуни эслаб, бу таклифни қабул қилолмади. Чўлоқми, қинғирми — Худонинг бергани, яшириб бўлармиди.

Фикрини врачга очиқ-ошкор айтмади. У бечора астойдил, самимий таклиф қилаётганда бирдан юзига уриш инсофдан эмас.

— Майли, домла, мен бир ўйлаб кўрай.

— Бўпти, иним, тортинмай келаверинг. Ҳар қанча ёрдам бўлса мен тайёрман. У ерда менинг жўраларим бор, бир оғиз хат ёзиб берсам — тамом.

Темир врачга хайрлашмоқ учун қўл узатди.

Ховлига чиқиб дарвоза томон йўналаркан, ўйлади: «Сафар ака жўнаб қолгандир. Боя кайф билан айтди-кўйди-да».

Йўқ, Темир янглишган эди. Сафар дарвоза олдида қоровуллар билан чой ичиб, лақиллашиб ўтиради.

Темир узоқдан кўриниши билан сапчиб рўпарасига чиқди.

— Хўш, нима деди дўхтири? — деб сўради Сафар Темир яқинлашгач.

— Ҳаммаси жойида, сал иссиқроқ кийининг, деди.

— Унда зўракан. Энди кетдик. Норқул аканинг олдига бориб тўртта гап қилайлик.

Сафар чўғдай ёниб турган қип-қизил янги «Жигули»нинг эшигини очди. Машина қасалхона йўлагидан катта йўлга чиқди-да, ўнгта — Ургут тарафга бурилди.

— Норқул акани танийсанми? Жуда ажойиб одамда.

— Темир танимайман ишорасини билдириди. Сафар машина ғаладонидан сигарет олиб тутатди.

— «Чинор» рестаранида буфетчи. Хўп жўравоз одам, аслида уни жўравоз эмас, хўroz десаям бўлади.

Сафар машинани тўғри ресторан ҳовлисига ҳайдаб кирди.

Ичкаридан йўғон гавдали, кўринишидан самимияти, очиқ кўнгиллиги билиниб турган қора магиз юзли киши чиқди.

— Ассалому алайкум, — деди бояги одам.

— Норқул ака, бу киши Темирбек, ажойиб йигит. Яна денг «афрон»чилардан. Хўш... Манави тутти таги жа маза-да.

Норқул ака аввал Сафар билан, кейин Темир билан кўришди.

— Хуш кебсила, келингла, келингла. Анчадан бери кўринмайсиз, Сафарбой.

— Э, ака, иш кўп...

Иккови кулишди.

Норқул ака тутнинг қалин соясига стол қўйиб, дастурхон ёзди. Бир зумда стол турли ноз-неъматларга тўлди.

— Нима овқат кетирсин?

— Бу укам Афронистонда душманлар билан курашавериб, илиги анча пучайиб қолган, бир товоқ суяк об келинг, ака! — деди Сафар ва Темирга қаради. — Темирбек, қайсинисидан ичасан, оқми, қизилми?

— Мен ичмайман, — деди Темир хижолат тортиб.

— Ундей гапди қўйсанг-чи, тортинмай айтавер кўнглинг тусаганини. Бу ерга келиб ичмай кетиш — гуноҳ.

Гапга Норқул ака аралашди:

— Сафарбой, ургутликларга мос иш қилинг. Сиз чой қуйиб туринг, бу ёғини ўзим боплайман.

— Яшанг, Норқул ака.

Улар бир пиёладан чой ичиб бўлар-булмас, дастурхонга иккита минерал сув, битта ароқ, битта «Самарқанд» конъяги, бир графинда чалоб келди.

— Ўзингизам ўтилинг, Норқул ака, — деди Сафар.

— Сизлар баҳузур олаверинглар, у ёқда одамлар қараб турипти.

— Мехмонди ҳурмати учун биз минан биттадан олинг, кейин майли, индамаймиз.

Сафар ўзи билан Норқул акага ароқ, Темирга конъяк қўйди.

— Темирбек конъяк ичади. Ҳозир қўлини дўхтирга кўрсатиб чиқди. Иссикроқ кийининг, иссиқ тутинг, депти. Конъяк иссиқлик-да, фойда қиласди. Қани, Норқул ака, шу укамиз аждаҳонинг оғзидан эсономон қайтиб келгани учун олайлик.

Олишди. Дастурхончи жувон катта лаганда пайла-ри лиқиллаб турган йирик-йирик суюкларни бостириб келди.

— Темирбек, бу овқатни суюк дейдилар. — Хориж-ликларга тушунтираётгандай гап бошлиди Сафар. — Илиги, пайлари ҳилвираб пишган. Буни еган одам ҳамма томондан бақувват бўлади. — Норқул ака кулиб қўйди. — Биз тез-тез шу ерга келиб Норқул ака билан суюк еб турамиз. Шунинг учун янгангиз доим ўғил туради-да. Ҳаммаси баравар кулиб юборди. Норқул ака серпай бир суюкни олиб Темирнинг ликопчасига қўйди.

— Қани, меҳмон, олинг овқатдан, совумасин.

Сафар яна қадаҳларни тўлдирди. Норқул ака ўрнидан турди.

— Энди манга рухсат.

— Бундай ўтилинг, битта гап бор. Кейин турасиз. Кеча мен ўғил қўрдим, бу учинчиси.

— Э, шундайми? — деди Норқул ака. — Муборак бўлсин. Айтмайсизам, Сафарбой.

— Мана келдик-ку айттани. Шу ўғилчамиз катта йигит бўлиши учун битта оласизми-йўқми?

Норқул ака қадаҳга узалди.

— Бундай гаплар учун олмай иложимиз борми? Ўғилчангизни Худо умри билан, ризқи билан берган бўлсин.

Ичишди. Норқул ака минерал сув ҳўплаб, бошқа газак қилмай жойидан кўзгалди.

— Энди сила баҳузур ўтилинглар. Мани одамла кутиб қолдила.

— Ҳар замон келиб туринг-да, Норқул ака.

— Ҳўп бўлади. Нима керак бўлса Любага айтаверинг, топиб келади.

Норқул ака туриб кетгач, гоҳ уни, гоҳ буни баҳона қилиб, иккови анчагина тортди. Люба овқатни тез-тез янгилаб турди.

— Темирбек, — деди Сафар сигарет тутатиб, — Афронистонда хизмат қилиш даҳшатдир-а?

— Нимасини айтасиз, Сафар ака. Одамларди қирилиб кетаёттанини кўриш осонми?

— Сенам ўлдирдингми? Ваҳшийлардан қанчасини ер тишлатдинг?

Темир ғалати бўлиб кетди, ранги оқарди, назарида кўзлари йириклишиб, ўйнаб, асабий тусга кирди. У барча саволга жавоб беришга тайёр. Аммо «Одам ўлдирдингми?» деган саволни эшитса юраги ўйнаб, қони қайнаб кетади. Ўлдирган! Нима қилсин эди бошқа! Ўзга чораси, йўли бўлмаса!

Беихтиёр сигаретта қўл чўзди. Сафар анча ичганига қарамай Темирнинг аҳволини англади. Шу боис саволини бошқа қайтармади. Сигаретни бурқираттанча Темирга термилди. У сигаретни оғзига қўйиши билан гутурт ёқиб тутди. Темир сигарет тортаркан, қўли титраб кетди. Кўзларини бир нуқтага тикиди, узоқ тикиди... Бир маҳал Сафар унинг кўзларида ёш кўрди. Темирнинг овози чиқмас, аксинча, оғзидан буруқсиб тутун чиқар, кўзларидан эса жимиirlаб ёш оқарди. Сафар нима қиларини билмай қолди. Унинг дардини янгилаб қўйганини сезди.

— Мени кечир, жўра, — деди базўр.

Темир миқ этмади. Кўринишидан нимадир демоқчи бўлар, аммо тили айланмасди.

Охири чидаёлмади — ўрнидан турди. Сигаретни ташлади-да, киссасидан рўмолчасини олиб, кўз ёшлигини артди. Оғир қадамлар билан бир чеккага ўтди. Сафар ўтирган жойида гўё михланиб қолди.

Бироздан кейин Темир ўзини тутиб олди чоғи, курсига келиб ўтириди. Оғир тин олди.

— Мени кечиринг, Сафар ака... Бу саволга жавоб бериш оғир, мен учун оғир, бошқаларни билмадим. Одам ўлдирганим учун ўзимни кечиролмайман.

— Бунга сен айбормассан-ку.

— Биламан, биламан... Аммо барибир эсимга тушса ўзимни гуноҳкор ҳисоблайвераман.

— Эшитишимизча, улар ҳам бизди солдатларди...

Сафарнинг гапини Темир шарт кесди:

— Илтимос, Сафар ака, шуни эсламайлик... Ичида юрганида сезмаскан шекилли одам, энди ўйласам юрагим сиқилиб, миям ёрилиб кетай дейди...

Сафар қадаҳларни тўлдириди.

— Ке, оғайнини, шуни олайлик. Ишқилиб ёмон кунларинг ҳаммаси орқада қолган бўлсин. Яхши жойлардан келин ато этсин, бола-чақали бўл, тўйларингда хизмат қиласайлик.

Темир шу маҳалгача бирон қадаҳниям охиригача ичмовди. Бу гал бир томчи ҳам қолдирмай симириб юборди...

### III

Темир аzonда уйғонди. Ҳаммаёқ жим-жит, ҳеч ким турмаган кўринади. Боши гувиллайди. Кечаги воқеаларни эслади. Хайриятки, кўнгилни хижил этадиган гап бўлмапти. Фақат кўпроқ ичиб қўйгани чатоқ. Айниқса отасининг олдига маст ҳолда келгани дилини фашлади. У олдин ҳам ичган, ичмаган йигит борми. Холиқ ака ҳам буни сезади. Аммо у бирон мартаям мастилигида отасига рўпара бўлмаган. Сабаби — қишлоққа келганида ўзини тутарди, бордию жўралари қистаб-қўймаса, озроқ олади-да, отасининг кўзига кўринмай уйга кириб ётади. Тошкентдаги ўтиришларни, табиийки, отаси кўрмайдиям, билмайдиям.

Бу гал шу томони чатоқ бўлди. Отаси нима деб ўйлади экан? Армияга бориб ичишни кўпайтирибдида, ўғлим, деган хаёлга бордимикан? Ундай деса армиядан келганидан бериям қанча вақт ўтди, лекин Темир бунақа даражада қўйвормаган ўзини. Бўлмаса қанча одамлар кўргани келишди, жўралари билан улфатчилик қилишди, ҳаммасида меъёридан оширгани йўқ... Кеча нега бундай бўлди? Сафар акаям тоза шилқим

экан-да. Ҳоли-жонига қўймади-да. У ёғи кейин билинмаям кетди... Отасининг юзига қандай қарайди? Нима деркан?

Бу ўйлар Темирнинг миясини пармалай бошлади. Кечаги ичкилик таъсирида гувиллаб турган боши баттар оғриди. Ҳовлида Ҳолиқ аканинг шарпаси эшитилди. Намозга турган чамаси. Темир индамай, ухлаган каби кўзини юмиб ётаверди. Шу ётишда ухлаб қолганини ўзиям сезмай қолди. Бир маҳал уйронса қуёш чиқиб кетипти. Боши сал тиниклашгандай. Аста туриб деразадан у ёқ-бу ёққа мўралади. Зулфизар опа нон ёпяпти. Бошқа ҳеч ким кўринмайди. Сингиллари тамакига кеттан чиқар. Отаси қаерда экан? Шу пайтдан фойдаланиш керак.

Кийиниб ҳовлига чиқди. Ўз иши билан куймаланаётган Зулфизар опа ўғлининг турганини сезмади. Яхши бўлди. Кўриб қолса, албатта гап қўшарди. Темир айвон четидаги қўл ювгичга бориб ювиңди. Симда осифлиқ турган сочиқقا артинди-да, яна уйга кирди. Ойнага қараб сочини таради, кўзларига термилди. Юзидан кеча ичгани сезилиб турибди. «Об-бо, расво бўлтику». Кийим-бошини тўғрилаб ташқарига чиқди. Ҳамон отаси кўринмайди. Онасининг ёнига борди.

— Ассалому алайкум, эна.

Тандирдаги нонга сув ураётган Зулфизар опа ўтирилиб, алик олди.

— Сўрига чиқ, болам. Ҳозир патир пишади. Унгача отангам бозордан кеп қолади.

— Нон пишгунча бир пас боғ айланай.

— Бўлмаса, бир-икки бош узум узиб чиқасанми? Укаларингам кеп қолса керак тамакидан. Битта сатил олгин.

Темир пақир билан боғ оралаб кетди. Зулфизар опа орқасидан деди:

— Шоптолини қара-чи, пишгани бўса унданам териб кела қол, болам.

Ҳовлида тўрт туп шафтоли бор, иккитаси зарғалдоқ, иккитаси мойлама. Темир мойламасини хуш кўради. Меваси кўплигидан шохлари ерга теккудек бўлиб эгилган. Бир-икки жойига Ҳолиқ aka тиргович қўйган. Пақирни яримлатиб узди, кейин қора, оқ, кишишибдан яхшироқ пишганини қидира бошлади.

Холиқ ака бозордан қайтди. Айвондаги курсига ўтириди.

— Вой-вой, жоним-эй... Мукаррам, Темир турдима?

— Ҳа, — деди Зулфизар опа. — Шоптоли, узум опкегани бокқа оралаб кетти.

Холиқ ака боғ томонга қаради. Темир узум сара-лаб юрипти.

— Темир, — деди Холиқ ака ўтирган жойидан. Темир ял этиб отасига қаради. — Ҳай анави пуштага ўт, султони бор. Шундан бир-икки бош обке.

У шафтоли ва узумга тўла пақирни кўтариб келганида Холиқ ака бояги жойида ўтиради.

— Ассалому алайкум, — деди отасининг юзига қара-ёлмай.

— Ваалайкум ассалом...

Темир пақирни айвон четига қўйди-да, бошқа пақирдан сув олиб узумни ювмоқчи бўлди. Холиқ ака уни тўхтатди.

— Темир, қўй улим, уринма, ҳозир укаларинг кеп қолади, ўзлари ювади.

Ортиқча қаршилик қилмади Темир. Лекин ичидан эзилди: «Икки бош узум билан тўртта шафтолини ювол-масам, қандай одам бўлдим?.. Бу аҳволда қандай оила қураман, қанақа қилиб тирикчилик ўтказаман?..»

— Мукаррам, — деди Зулфизар опа эрига, — сўрига чиқинглар. Ҳозир дастурхон соламан. Нон пишди.

Дарвозада гидираклар қалдираши эшитилди. Укаси Собир эшакка минган, икки синглиси пиёда, аравага эргашиб кириб келишди. Аравага чош қилиб тамаки босилган. Собир эшакни бўшатди, унгача синглиси арава чархининг олд томонига тош қўйди. Собир шотини кўтариб, «лайлак» қилди. Тамаки шовуллаб ерга тушди. Капанинг ён-верига тиқилиб қолган баргларни Собир шоха билан олди. Ҳамма нонуштага ўтириди.

Кечака қаерга бординг, дўхтирга кўриндингми, ким билан ичдинг, нега бунча кўп ичдинг?.. Темир отасидан шу каби саволларни кутди. Аммо нонушта чори, на ундан сўнг Холиқ ака миқ этмади. Аслида Темирнинг дўхтирга учрашганини, у нима деганини Темир боғ оралаб юрганда Зулфизар опадан сўраб-билган эди. Кимлар билан ўтирганини ҳам суриштириди, лекин Зулфизар опа уни айтольмади.

Бу гаплардан бехабар Темир турли-туман хаёлларга борар, отаси индамагани сари эзилар, хижолатдан чиқолмай очилиб гапиролмай қийналарди. Ўзи гап очиб, бўлган гапларни айтиб бермоқчи бўлар, аммо бунинг ҳам иложини қилолмасди.

Нонуштадан кейин Холиқ ака ҳовуз этагидаги бедани ўришга киришди. Темир айвонда ёнбошлигандан газета-журналларни варақлади. Бир соатча мутолаа билан машғул булгач: «Август ойи ҳам охирлаб қолди. Энди бир Тошкентта бориб, ўқишимдан хабар олиб келсаммикан» деган фикр миясига урилди. «Балки Гавҳар ҳам келгандир». Гавҳар эсига тушиб юраги шифиллаб кетди. «У мени бу аҳволда кўриб не кўйга тушаркин? Юраги ёрилиб кетар бечоранинг».

Шу ўйлар билан отасининг ёнига йўл олди. Отаси куннинг иссигида ишлаб юрсаю бу сояда ётса. Уят!

— Ҳорманг, ота, — деди нима дейишини билмай. — Ёрдамлашай деб келдим.

Шундай деди-ю, ўзи ичидан зил кетди. Бир қўл билан беда ўришни эплармиди?

Холиқ ака бир даста бедани ёйиб қўйди-да, қаддини ростлади:

— Нимасига ёрдамлашасан, улим? Бу бир эрмакда менга, — деди сир бой бермай.

— Ҳеч бўлмаса дасталарни ёйиб қўярман.

«Қўй, уннама десам, қўлим йўқлигидан шундай деяпти, деган ўй кўнглига келмасин», деб Холиқ ака ўғлига иш буорган бўлди:

— Ичинг қизиган бўлса, майли болам... Манави дасталарни сал сийраклатиб қўй, тезроқ қурийди.

Шундай қилиб отаси айттан ишни бажариб турди. Бу пайтда ҳам Холиқ ака гап очмади. Мунча кенг бўлмаса ичи, дарё-я, дарё. Охири Темир бояги ўйларини айтди, Холиқ ака индамай эшилди.

— Ётоқҳонада турмоқчимисан? — деди охири.

— Билмадим, кўраман-да шароитта қараб.

Холиқ ака яна жим. Ўз иши билан овора.

— Энди улим, бир гаплашиб олайлик бўмаса, — деди Холиқ ака салмоқлаб. Ўзи уватта ўтирди. — Қани, ўтир-чи.

«Бошланди. Энди ҳаммасини бирма-бир сўрайди».

Йўқ ундан бўлмади. Холиқ ака мутлақо бошқа гапни қўзғади.

— Худога шукр, армияниям битказиб келдинг, ёшингам анчага борди. Энди бошти икки қилайлик.

Темир ялт этиб отасига қаради. Холиқ aka ҳам майин жилмайиб унга термилиб турарди. Отасининг кўзларига кўзи тушди-ю, тоб беролмай нигоҳини олиб қочди. Нима дейишини билмай қолди.

— Хўш, нима дейсан бу галга?

— Ўқиш битаверсин-чи, — деди ниҳоят.

— Қанча қолди ўқишингта?

— Икки йил.

— Ҳеч нарсамасакан... Бугун-эрта тўй қиламиз дётганим йўқ, албатта. Ҳозирдан ҳаракат бошласак, Худо насиб этса кўкламга чиқиб тўй қиламиз... Энангам келин кўргиси, невара кўргиси келади.

Темир кўлди.

— Неваралари бор-ку...

— Бор, Худога шукур. Локин уларди йўриги бўлак, сени жўжаларингди йўриги бўлак-да, улим.

Темир Гавҳарни ўйлади. «Сентябрда бешинчи курсга боради. Келаси йил ёзда битиради. Менга эса яна бир йил қолади. Демак, кўкламда эмас, келгуси йил ёзда тўй қилсак мумкин экан... Аммо Гавҳар кўнармикин? Институтни битиргандан кейин уни қаерга ишга жўнатади ҳали...»

— Ҳа, ўйланиб қолдинг?

— Йўқ, ўзим...

— Ҳар қалай, хайрли ишни эртароқ бўлгани тузук.

— Ҳали унгача вақт бор-ку, ота. Ўйлашиб кўрармиз.

Темирнинг ўйланиб қолиши, саволга аниқ жавоб бермай чайналиши боисини Холиқ aka ўзича тушунди. Ўғлининг кўнгил дарёсига қармоқ ташлади.

— Биронта кўз остингта олганинг борми? Ундай эса очигини айтавер.

Ё, қудратингдан! Темирнинг кўнглидан кечаётган гапларни қаердан сеза қолди отаси?

Темир отаси саволига аниқ жавоб беришдан истихола қилди, аммо кулгидан ўзини тиёлмади. Ўғлининг кулгиси бекорга эмаслигини Холиқ aka пайқади.

— Армияга жўнаётганингда жўраларингминан бир қиз келди. Ким эди у?

Темир отасига қараб бўзарди. «Эсида экан-да ҳали-ям. Мунчалар синчков бўлмаса?..»

Отасининг кўзидан кўзини олиб қочди.

— Бирга ўқир эдик...

Холиқ ака ҳамма гапга, ўғлининг муддаосига тушилди, бошқа эзғиланиб ўтиrmади.

Темир сұхбатта якун ясамоқ ниятида:

— Мен бир Тошкентта бориб ўқишимни аниклаб келай-чи, кейин бир гап бўлар, — деди.

Холиқ ака бояги тахминлари тўғри эканига гумон қилмай кўйди.

— Келин қаердан бўсаям майли, мен қаршимасман. Фақат ҳушёр бўл, кейинги пушаймондан Худо асрасин.

Отасининг сезгиrlигига Темир тан берди.

Холиқ ака ўғлига юзланди.

— Менга қара, улим, ургутлик жўрангта ўхшаганлар Тошкентдаям кўпми?

Устидан бир пақир сув қўйгандай музлаб кетди Темир. Шарт отасига қаради, бироқ миқ этолмади, довдираб қолди. Эрталабдан бери оғзини пойлади — кечаги гапларни сўрар, суриштирас, деб. Индамади. Мана энди айтди, айтгандаям роса боллади. Яхшиям икковидан бўлак ҳеч ким йўқ. Энаси, укалари олдида айтганда нима деган одам бўларди... Темир аввалига оқаради, кейин қизарив кетди. Базур ўзини қўлга олиб:

— Кечиринг, ота, шундай бўп қолди, — деди.

Холиқ ака бошқа гапирмади. Ўғли қилган ишидан қаттиқ пушаймонда, изтиробда эканини эрталабданоқ пайқаган эди. Ҳозир аникроқ сезди.

Анчадан кейин ота-бала олдинма-кейин уй томон ийналдилар.

## Бешинчи боб

### I

Кўклам келди. Адирларнинг кунгай томонида майсалар ниш урди. Ҳаво илиб қолди. Темир, у билан бирга келган йигитлар бу ернинг шароитига мослашиб кетдилар. «Қария»ларнинг ёшлиарга зуфуми анча сусайди, бинобарин, улар ҳам анча «улрайиб» қолдилар. Бўлар-бўлмасга Новчадан дакки эшитаверадиган, туртки еб, жазо олаверадиган Носиржон энди бу балолардан бир қадар халос бўлди.

Икки ойча бурун Темир бўлинма командири қилиб тайинланди. Энди у ўн икки аскарга бош.

Ана шундай кунларнинг бирида уларнинг ротасига жанговар топшириқ берилди. Қишлоқдан тўрт-беш чақирим наридаги бир ғорда душман ўрнашиб оғти. Йўқ қилиш керак.

Рота командири капитан Волков бошчилигида ўнта бронетранспортёрга ўтиришиб яrim тунда ўша ғор тарафга йўлга тушдилар. Ҳаммада автомат. БТР на баланд-пастликка, на ўйдим-чуқурга парво қиласди. Музёрап кема сингари париллаб илгарилади. Волков ўтирган БТР оддинда, унда дурбин ҳам бор. Темирнинг бўлинмаси бешинчи-олтинчи БТРда. «Душман қанча экан? Балки капитан билар... Жиддий отишма бўлса керак», деб ўйлаб бораради Темир. Оддин ҳам бир-икки жанг қилишди. Аммо у даражада кўп давом этмаган. Қисм жойлашган ҳудуддан ўтаётган душманга ўқ отишганди. Ким билади, озчилик бўлганми, қаттиқ қаршилик кўрсатмай қочишган эди. Ҳозир ўзлари душман уясиға бостириб боряптилар. Уйқуда ётган жойида қириб ташлаш керак. Режа ва топшириқ ана шундай. Шу иш мўлжалдагидай амалга оширилса яқинатроф душмандан тозаланади.

Бир муддат юришгандан кейин, тўхтанглар, деган буйруқ бўлди. Волков взвод ва бўлинма командирларини тўплади. Ғорга жуда яқин қолганини, душман сони аниқ эмаслигини, маълумотларга қараганда, камида уч юзта эканини айтди, шу боис ниҳоятда ҳушёр ва дадил бўлишиликни, қайси машина қайси тарафдан боришини қаттиқ тайинлади. Буйруқсиз ҳар ким ўзича ҳаракат қилмасин. Мен билан алоқани узманлар, деди. Иложи бўлса ўзимиз тинчитамиз душманни, кучимиз етмаса артиллериядан ёрдам сўраймиз.

Ҳамма ўз жойига кетди. Буйруқقا биноан Темир ўтирган бешинчи машина тўғридан бориши керак. Машиналар белгиланган чизиқ бўйича аста-секин жилмоқда. Темир ойначадан ташқарини кузатди. Сўнгра, милни тушириб, снарядларни босув нуқтасига тўғрилади. Шу пайт рўпарада — тахминан беш-олти метр нарида бир одам кўринди. Темирнинг назарида у ҳарбий кийимда эмас, аффон фуқароларидан эди. Беихтиёр машинани бошқариб бораётган операторга «Тўхта!» деб юборди.

— Нима гап? — деди оператор.

— Одамни кўрмаяпсанми, босиб кетасан-ку?

Оператор ҳайрон бўлди:

— Қани одам, қанақа одам?

— Кўрмисан?! — бақириб юборди Темир. — Қанақа одам бўларди, одамга ўхшаган одам-да.

— Ҳеч қанақа одамни кўрмаяпман, — деди оператор. — Тўхтасак бўлмайди.

Бошқа жангчилар ҳам ҳайрон қолишиди. Улар ҳам рўпарада ҳеч ким йўқлигини айтишиди. Темир хижолат тортди. Наҳотки, кўзига кўринган бўлса? Қўрқдими? Нимадан қўрқди? Барибир сир бой бергиси келмади.

— Тўхта деяпман! Бегуноҳ одамни янчиб кетмоқчимисан?

Оператор машинани тўхтатди-да, Темирга ажабланниб қаради:

— Ахир бу уруш...

— Э, урушни падарига лаънат!

Ташқи алоқадан взвод командирининг қичқириги эшлитилди:

— Бешинчи, нега довдираисан? Нимага тўхтаяпсан? Ким буйруқ берди сенга? Олға!

Оператор машинани юргизди.

Шу маҳал чап томондан шувиллаб снаряд учди. Қаршидан ҳам ўқ овози эшлитилди. Темир сездики, форга етиб келишапти. Душман хавфни пайқаган. Яна буйруқ келди:

— Бешинчи! Ўт оч! Бўл тезроқ!

Тугмачани босиб юборганини Темирнинг ўзиям сезмай қолди. Снарядлар бирин-кетин шувиллаб уча бошлади. Тўплар оғзидан чиқаёттан олов тун қаърини ёритиб ўтади. Машина тўхтаб қолганини на Темир, на оператор сезган эди.

Ташқи алоқадан Волковнинг асабий овози эшитилди.

— Бешинчи! Нимага тўхтайсан, ярамас! Бос олдинга! Ҳозир портлатади сени, тезроқ бўл!

Темир, ўзи тўхтагани етмагандай, орқадаги машиналар йўлини ҳам тўсиб қўйганини англади. Операторга қичқирди. Машина олдинга силжиди. Уч-тўрт қадам юриши билан ўнг томонда — шундоққина ёнида портлаш юз берди.

— Э, хайрият! — деб юборди Темир.

Форга отилган снарядлар душманни инига чўп суқилган аридай тўзғитган эди.

Турли томондан ўқ ёмғирлари қуярди. Темир тўп милини гоҳ ўнгга, гоҳ, чапга тўғрилайди. Бундай ҳолга тушгандан кейин одам ўзидан ўзи ишга киришиб, қаҳри ошиб кетганини билмай қоларкан.

Душман чинданам кўп экан. Атрофни мўр-малаҳдай босиб кетди. Улар на снарядларга, на автомат ўқларига парво қилар, ўлганигаям қарамай бостириб келарди. Ҳатти-ҳаракатлари соғ одамникуга ўхшамас, қутурган каби ваҳший эди улар.

— Наша чакканга ўхшайди, — деди кимдир.— Йўқса бунчалар дадил урушмасди кучли техникага қарши.

— Кўп валдирама, кўзингта қара!

Яна тўп, автомат овозлари оламни тутди.

Жанг узоқ давом этмади. Кутимагандা бостириб келган қудратли техника душманни, улар ҳар қанча кўп, жасур, аламзада бўлмасин, довдиратиб ташлади. Қочишга, бекинишга улгургани улгурди, аксарияти қирилиб кетди. «Ҳамма жой-жойида тўхтасин», деган буйруқ келди. Ўқ овозлари тинди.

Темир енгил нафас олди. Атрофга қаради, ёнидаги жангчиларни суриштириди. Шунда билдики, олти жангчидан иккитаси йўқ. Тўс-тўполонда улар қачон, қай пайтда машинадан қулаганини билмайди. Юраги увишиб кетди, аммо ҳеч кимга ҳеч нарса демади. Хаёлига лоп этиб Носиржон келди. У бошқа машинада эди. «Ишқилиб эсон-омонмикан у?» Носиржон биринчи марта жангга кириши эди. Темирнинг хавотири шундан. Лекин шу тобда ундан хабар олишнинг иложи йўқ.

Буйруқ келди: орқага қайтилсин!

Бир чақирим юришгандан сўнг тўхташди. Жангчилар машиналардан чиқдилар. Бораётганда сезмаган эканми ёки бошқа йўлдан қайтишдими, катта бир майдонда туришарди. Шу ерда бироз дам олиш учун рухсат берилди. Шунда Темир Носиржонни ахтара кетди. Тўда-тўда бўлиб ўтирганча дуд босган қуролларини тозалаётган жангчилардан суриштириди.

— Темир!

Бу — Носиржон эди. Темир дарҳол таниди. Овоз келган тарафга ўтирилди.

Носиржон унга пешвоз келарди.

— Омомисан? — деб сўради Темир.

— Худога шукур, ўзинг-чи?

— Яхшиман.

Ёнма-ён ўтиришди. Қоп-қоронги тун. Ҳаммаёқ жим-жит. Гўё яқин орада бу ерларда ҳеч нарса юз бермагандай. Юлдузлар жимиirlайди — фуж-фуж, шундай яқинки, гўё қўй узатсанг еттудай. Темир осмонга термилиб қолди. Назарида қулоқлари шанғиллар, бир томондан командирнинг буйруғи, бир томондан снарядларнинг овози қулоғига ўрнашиб қолган эди. Юлдузларга боқиб шуларни эсдан чиқармоқча интилди.

Капитан Волков ҳар бир тўданинг ёнига бориб «раҳмат, йигитлар, артиллериядан ёрдам олмай ўзимиз тинчтидик душманни, аммо анча йигитларимиздан, иккита машинамиздан айрилдик», деди. Кимлар экан улар? Бу ҳали номаълум эди...

## II

Бир ҳафтадан бери Темир Кобулда. Куйбишев раҳбарлигида беш жангчи бу шаҳарга командировкага келган. У Кобул кўчаларига ҳайрат билан тикилади. Киноларда кўргани, китобларда ўқигани — шарқона қурилиш услублари анча-мунча сақланган. Кўчаларнинг икки тарафи қатор дўкон. Энг узун кўчалардан бири Майванд ҳам турли дўконлар билан тўла. Бу ерда бутун мамлакат савдо олами ўз аксини топгандай.

Баъзи йирик бинолар ёнида бир-икки танқ, бронетранспортер кўзга ташланади. Қўриқчиликда афгон аскарлари туришар, айримлари бош кийимини «ёстиқ» қилганча юзини офтобга тоблаб мудрарди. Бошқалари машиналарга қизиқиб келган болаларни goҳ ҳайдар, гоҳида уларни гапга солар, ҳаттоқи кўнгли ўксимасин деб, улар зирҳли машиналарга чиқиша ҳам индашмасди.

Кобулда вазифалари нимадан иборат? Буни на Темир, на шериллари билади. Фақат Куйбишевга қулоқ солишади, унинг айтганини қилишади. Бир куни ҳатто Темир сўрадиям, буйруқни бажариб юравер, бошқаси билан ишинг бўлмасин, деди. Ҳозирча тайинли бирон иш қилишгани йўқ. Куйбишев бир ҳарбий қисмга кириб ўтиради, асосий вақти шу ерда ўтади.

— Мана шу мавзеда бизнинг мутахассислар яшайдилар,— деди Куйбишев бир куни айланиб юришганда.

— Бутун бир квартални эгаллаган бўлса, кўп эканда шўро мутахассислариям.

Темирга Куйбишев масҳараомуз қаради.

— Гўдакни гапини гапирасан-а, Темир, — деди у жиҳдий. — Дипломатлар, қурувчилар, инженерлар, таржимонлар, мелиораторлар... Эҳ-хе, қай бирини санай, озмунчами... Ахир бу саводсиз афғонларга ҳамма нарсани ўргатиш керак-да. Шунча одам уйидан, болачақасидан кечиб, хавф-хатар ичида ишлаб, буларга ёрдам берайлик, деб юрипти-ю, бу ярамаслар яна бизларни ёмон кўради. Иложини топса битта қолдирмай қириб ташласа ҳаммамизни... Нонкўрлар...

Қаерда бўлишмасин, дўкондами, бозорда, Темир афғонларга эътибор беради, улар ўзларини хуш кўрмаслигини сезади, улар кўзида шўро аскарларига нисбатан кучли нафрат, ғазаб акс этиб турипти. Ёш болалардан тортиб, кексаларгача — ҳаммасида шундай кайфият ҳукмрон. Бундан Темир гоҳ, эзилади, гоҳ очиғи, чўчийди. Аламзада одам кутилмагандан ҳар иш қилиб қўйишиям мумкин-да...

Ўша мавзе кўчаларидан ўтаётганда Темир атрофга диққат билан разм солади, кузатади: балки бирон-бир ўзбекни учратиб қолар. Ахир ўзбеклардан ҳам анчамунча мутахассислар, таржимонлар бор-ку. Ҳаёт тасодифларга тўла.

Бир куни оқшом чоғи кўчада дафъатан ўзбекча сўз қулогига чалинди. Орқасига ўтирилиб қараса, ўрта ёшлардаги, пешона соchlари бироз тўкилган, истараси иссиқ, бир одам ўғилчаси билан ўзбекча гаплашиб келяпти. Беихтиёр унга салом берди. Бояги одам ҳам ҳеч ажабланмай алик олди. Бу ерда ўзбек жангчиларини кўравериб ўрганиб қолган бўлса керак-да.

— Кечирасиз, ўзбекмисиз? — деб сўради Темир.

— Ҳа. Сиз-чи?

— Менам.

— Қачон келдингиз?

— Олти ой бўлди.

— Қаерликсиз?

— Самарқанддан.

Бояги одамнинг думалоқ, йирик-йирик кўзлари чақнаб кетди.

— Самарқанддан? Қаеридан?

— Ургутдан.

— Оббо, зўр-ку, — шундай деб Темирга қўлини узатди. — Менинг отим Ҳасан, менам самарқандликман, бир йилдан бери шу ерда ишлайман, таржимонман.

Хуллас, танишиб олишди.

Сўнгра, Ҳасан aka бироз ўйланиб қолди.

— Хўш, — деди жимликни бузиб, — нима қилсак экан. Командирингиз бир-икки соатта ижозат берармикан; Бизникига келсангиз бироз гаплашиб ўтирадик.

— Билмадим. Сўраб қўраман.

— Ёки ўзим борайми?

— Йўғ-э, — деди Темир, — ўзим сўрайман. Рухсат берар.

— Бўлмаса жавоб олиб келинг, бугунми, эртами, қанча ижозат берса. Мен ҳар куни кечқурун уйда бўламан. Янгангиз шу ерда, гурунглашамиз. — Кейин ўғилчасига деди: — Санъатжон, тоғантга салом бер, кўриш.

Темир Санъатжон билан қўл олиб кўришди. Ҳасан aka манзилини тушунтириди-да, хайрлашди.

Шу қисқа сұхбатдан Темирнинг кўнгли тоғдай кўтарилиди. Энди қандай қилиб бўлса-да, Куйбишевдан рухсат олиш ўйлини қидирди. «Ижозат берармикан у ярамас. Унча-мунча гапни тушунадиган одамга ўҳшамайди-да лекин... Ҳа, таваккал, бир сўраб кўрайчи». Тўғри Куйбишевнинг олдига йўл олди.

Куйбишев сўзларини эшигти-да, Темирга термилиб қолди. Унинг кўм-кўк кўзлари ўткир тикилар, ҳар қандай одам бу кўзларга узоқ қараёлмас, бардош беролмасди. Аммо Темир чидади, киприк қоқмай тураверди. «Бу қараши билан у, рост гапиряпманми ёки ёлғон, шуни текшириб кўрмоқчи шекилли», деган фикр ўтди Темирнинг хаёлидан. Ва кўзини олиб қочмади, у қанча турса буям ундан қаттиқроқ тикилиб тураверди.

Темир янгишмаганди. Чиндан ҳам Куйбишев синамоқда эди. Шу алфозда беш дақиқалар туришди. Охири Куйбишев кулиб юборди.

— Ҳа, шайтон, балосан-а? Кўнглимдан ўтган фикрни англадинг-а?

Темир ҳам кулди. Куйбишев соатига қаради.

— Яна йигирма дақиқадан сўнг Петровнинг вақти тугайди. Шунинг ўрнига бориб икки соат турасан. Кейин бошқа одам боради. Сен ҳамюргингнинг олдига бориб келасан. У ёққаям икки соат муҳлат...

Соат еттида Темир Ҳасан аканинг уйини топиб келди. Учинчи қаватда экан. Эшикни тақиллатди. Кутуби ўтирган экан чори, Ҳасан аканинг ўзи очди.

— Э, келинг, Темирбек. Командирингиз инсофли одам экан, жавоб берипти. Гажирроқ одам бўлганида кўйвормасди. Янгангизга айтиб ўтирувдим ҳозир.

Дарҳол дастурхон ёзилди, турли ноз-неъматлар қўйилди.

— Самарқандча қилиб бир кўк чой дамланг, аяси,— деди Ҳасан ака хотинига. — Темирбек кўк чойни соғиниб қолгандир.

Темир кулиб қўйди.

Иккови у ёқ-бу ёқдан гурунглашиб ўтириди. Ҳасан ака Темир Ургутнинг қаеридан эканини, ўқишини сўради. Темир ҳаммасини гапириб берди. Суҳбат давомида маълум бўлдики, Ҳасан ака Тошкентда ишлар экан. Темир Тошкентда ўқишини эшишиб, бу томонданам ҳамشاҳар эканмиз-ку, деди.

Бирон соатлар ўттач, овқат келди. Ҳасан ака «Самарқанд» қоњияги одди.

— Қани, Темирбек, икки ҳамшаҳар Самарқандни эслаб, манавиндан қиттай-қиттай отайлик.

— Менга мумкин эмас, Ҳасан ака.

— Нега?

— Командир билиб қолса уришади.

Ҳасан ака кулди.

— Э, қизиқмисиз, Темирбек, қаёқдан билади. Уларди ўзи ҳар куни тортади.

Унақа одам бошқа бирорвнинг ичган-ичмаганини пайқамайди.

— Ичмайди у. — Ажабланиш, ҳайрат ила гапирди.

— Уларди ичмайдигани бўмайди. Уннан кейин, — худди сирли бир гап айтадигандай овозини пасайтириди, — йўлини қиласиз. Темирбек, кетаёттанингизда бир шиша ароқ бераман, командирингизга берасиз. Шу билан олам гулистон-да.

Қадаҳларга конъяқ қўйди.

— Қани олинг, сизам, бизам хизматни тутатиб, юртимизга, ота-она, қариндош-уруғларимиз олдига эсономон кириб борайлик.

Ичишди.

Санъатжон дам-бадам дадаси ёнига келиб нималардир чулдирар, сұхбатни бўларди.

— Аяси, Санъатжонн ухлатинг, дам олсин гапни гапга қўшмаяпти. Қани, ўғлим, аянгизди олдига боринг. Энди ухланг. Ҳа, баракалла.

Санъатжон чиқиб кетди.

Ҳасан aka яна қадаҳ тўлдирди. Борган сари яқинроқ танишгани, бунинг устига конъякнинг таъсири туфайли ўртадаги дастлабки бегонасираш, тортиниш анча кўтарилиди. Эски aka-укалардай гурунгни авжига чиқаришди.

Шу маҳал уйнинг чап томонида отишма бошланди. Икковиям жойидан иргиб турди. Ҳасан aka Темирга таскин бермоқ ниятида:

— Кўрқманг, ҳозир тинади. — деди.

Лекин тинчиш қаёқда. Баттар кучайди. Артиллерия ва гранатамётлар ишга гушди.

Ҳасан aka Санъатжон қошига югурди. У отишма бўлаёттан тарафдаги хонада эди. Шунда уйнинг ўнг томонидан ҳам ўқлар уча бошлади. Ҳасан aka Санъатжонни кўтариб чиқди. У эндинга ухлаган экан шекилли, кўзларини ишқалаб: «Дада, урушми?» — деди. Ҳасан aka шошганидан «ҳа», деб юборди. Кейин бу гапи уни қўрқитиши мумкинлигини сезиб, «уруш тугади» деди. Бола бола экан-да, гоҳ у деразага чопади, гоҳ бу деразага. Отишмани томоша қиласди. Муштдеккина бола бунақа отишмаларни кўравериб кўзи писиб кетган чоғи, сира чўчимас, «вуй, дада, анавини қаранг, ҳаммаёқни ёритиб кеттанини», деб ўзича чулдирарди. Ёруғлик берадиган ўқлар осмонда олов чизик қолдириб учар, симёғоч, дараҳт, турли тўсинларға тегиб майда-майда лахчалар бўлиб ёрилиб кетарди. Автомат овозини ора-чорада пулемёт ва тўплар гулдуроси бузиб ўтарди. Ҳамма хона ўртасида тик қотган, нима қилишни, ўзини қаерга олишни билмасди. Ҳозир тўрт одам орасида энг кичиги — Санъатжон ҳаммадан кўра дадил, жасур эди.

Бир нарса қулоқни қоматта келтиргудек қарсилади. Уй ларзага келди, деразалар шарақлаб кетди. Ош-

хона деразаси чил-чил синиб тушди. Уй тепасига снаряд келиб урилган эди. Бетон уй деворларидан кўчган парчалар, снаряд қолдиқлари чор тарафга ўқдай визиллаб учади.

Отишма тахминан ярим соат давом этди. Аммо бу вақт Темир учун ярим кундан ҳам зиёд туюлди. Жантга кирган кезлари ҳам хавотир босган, кўнглидан турли ўй кечган. Лекин ҳозиргиси ҳаммасидан ошиб тушди. Чунки жангга ҳозирлик кўриб, руҳан тайёрланиб боради, қўлида қурол бўлади. Ҳозир-чи, ҳозир аввало қуроли йўқ (Ҳасан аканинг тўппончаси билан иш битармиди), унинг устига не кайфиятда ўтиришувди. Ширин суҳбат, орзу-хаёллар, мазали таом, хушбуй «Самарқанд» конъяги — ҳаммаси жой-жойида қолди.

Баҳор момақалдириғидек ҳаммаёқни алғов-далғов қилиб кетган отишма тинди. Улар оҳиста, bemажол ўринларига ўтиришди. Фақат Санъатжон тинмайди, дेरаздан қараб онда-сонда узоқ-узоқлардан чараклаб кетадиган ёргуни қўли билан кўрсатиб, «Ана, дада, яна отди. Ура-эй, бизникилар енгди», деб қичқираради.

Булар эса жим. Худди яқин кишилари қазо қилгандек, бошларини қуий солиб хаёлга толишган. Санъатжон ҳайқириқларигаям биронтаси эътибор бермайди.

— Ана шунаقا, — деди Ҳасан aka оғир тин олиб.— Кўрдингизми. Темирбек, шу аҳволда ишлаб, шу хавотирда яшаемиз. Бунаقا ҳодиса деярли ҳар ҳафта, баъзан ҳар куни рўй бериб туради. Шундай пайтда «Афғонистонга мўмай пул ишлагани, машина олгани борадилар», дейдиган одамларни ўйлайман. Шулар лоакал бир мартагина шу тўполонни кўришса, балки бу ерда ишлаш улар ўйлаганчалик осон эмаслигини пайкашармиди... Ҳай, майли, ким нима деб ўйласа ўйлайверсин. Қани, Темирбек, овқатта қаранг. Совуб қолди. Ярамаслар ҳеч қурса овқатланиб бўлганимиздан кейин бошламайдими. Кайф ҳам тарқаб кетди-я, — деди кулиб, қадаҳларга конъяқ қуяркан.

— Энди мен турай, Ҳасан aka. Вақт бўп қолди. Кечиксам Куйбишев уришади.

Ҳасан aka ялт этиб Темирга қаради.

— Куйбишев? Ўшами командирингиз? Чирчиклик-а?

— Ҳа.

— Ҳе. Унда парво қилманг. У мени жўрам. Тошкентда танишганмиз. Ажойиб йигит. Боядан бери шуни айтмайсизми, bemalol ўтираверинг. Ўзим бирга олиб бораман, индамайди.

— Барибир нокулай-да, ҳарбий интизом бор.

— Интизомни қўяверинг. Ҳар куни меҳмондорчиликка бориб юрибсизми? Қани олинг, ишқилиб бошимиз омон бўлсин. Оббо, Куйбишев-эй, ҳозир шу ерда дент. Уни анчадан бери йўқотиб қўйган эдим.

Анча ўтиришиди.

Темирнинг қистови билан соат тўққиз яримда турдилар. Ҳасан aka уни кузатиб қўйди. Қисмгача ўн минутлик йўл экан.

Ҳасан aka Куйбишевни топиб, Темир номидан узр сўради.

— Сен келмаганингда бунга бир сутка гулбах бермоқчи эдим, — деди Куйбишев кулиб.

— Темир бизникини кўриб олди, энди бирга боринглар, хўлми. Албатта кутаман.

Ҳасан aka айтгандай бўлмади, Кобулдан қайтиб кетишгунча бошқа учрашмадилар. Темир бир-икки Куйбишевга эслатишни хаёлига келтирди-ю, турли мулоҳазаларга бориб индамади.

Үйига бошқа боролмагани-ку майли-я, Ҳасан aka-нинг адресини олмаганига афсусланди.

### III

Тазунга — ўз қисмига қайтиб, Темирнинг ҳафсаласи пир бўлди. Носиржон йўқ, бошқа қисмга кетипти. Бошқа йигитлар кепти. «Яна Новчага Худо берипти-да, — деб ўйлади Темир. — Буларни яна эзарканда, ярамас».

— Темир, — деди бир куни Новча, — ёш солдатлардан икки-учтасини олсанг. Бир қовун об келайлик. Пишган бўлиши керак.

— Қаердан оласан?

— Полизда тиқилиб ётипти.

— Сенга бераман деб ўтириптими?

— Бермай нима қиласди. Биз улар учун қон кечиб юрибмиз, иккита қовун бермайдими? Бермаса тортиб оламиз.

Темирнинг жаҳли чиқди. Қон кечиб юрган бўлса дехённинг айби нима? Охири кўринмайдиган уруш

жонига тегиб кеттандир. Ҳаммадан ҳам ўшаларга қи-йин. Улар учун урушниям, инқилобниям кераги йўқ. Фақат ер, сув керак. Бечора дехқон, ҳамма жойда уларга оғир экан-да.

— Кетдикми? — деди Новча. Темирнинг хаёли бўлинди. — Мунча ўйланиб қолдинг. Ёки шеър кеп қолдими?

Шеър эмиш... Шу ҳолатда, шу кайфиятда, шу шароитда юракка шеър сиғарканми? Ўйинчоқ экан-да сенга.

— Ўғирлик қилиш мумкин эмас, биласан-ку, ўзинг. Волков нима деди, ёдингдами?

Баъзи енгилтак йигитлар қўй-эчки ўғирлаб сўйишар, буни билиб қолишиша аяшмасди.

Бир аскар қўй ўғирлаётганда эгаси ушлаб опти. Уни уриб, калтаклаб қўя қолмалти, ҳаммаёғига пичоқ санчиб, нимта-нимта қилиб ташлапти. Буям етмагандай, уни қисм олдига келтириб ташлаб кетипти. Кейинчалик маълум бўлишича, унинг шериклариям бор экан, улар бир амаллаб қочишиган, командирдан қўрқиб, бўлган гапни яширишган экан ўшанда. Қачон, қай пайтда олиб келган — ҳеч ким билмайди. Шўрликнинг боши бир тарафда, оёғи бир томонда, қўллари бир томонда. Қараб бўлмайди. Янги келган йигитлар уни кўриб, қўрқиб кетдилар. Бир бола тўрт-беш кунгача ўзига келолмай юрди. Шундан кейин Волков жангчиларни йиғди-да: «Афронлар ҳамма нарсани кечириши мумкин, аммо ўғирликни сира кечиришмайди, шунинг учун ҳеч нарсасига тегманлар. Шусиз ҳам сизу бизни ўлдиришга қулай имконият пойлаб юришади... Жонларингта жабр қилманлар, йигитлар», деб қаттиқ тайнлади. Ҳозир Темир шу воқеани эслади.

— Э, у аҳмоқ қўй ўғирлаган, — деди Новча. — Бизга қўй нима керак? Бир-иккита қовун тилла бўлтими? Сўрасак берар...

Охири, Темир кўниб, йигитлардан иккитасини эргаштириди. Ҳаммаси автоматини елкасига осиб олди. Билиб бўладими.

Полиз бошига боришганда кичкина кала кўринди; ичиди икки йигит ўтиради. Буларни кўриб, ошиқиб чиқишиди. Елкаларига милтиқ осиб олган, кўринишдан баджаҳл, соқол-мўйлови ўсиб кеттан, кўкраги тўла жун.

— Сен гапир, — деди Новча Темирга, — тилига тушунасан.

— Э, қаёқда тушунаман...

Унгача бояги йигитлар пешвоз келди. Кўзлари чўрдай ёнади. Темир бу кўзларда нафрат туйгуларини кўрди. Шу боис бир дам шошиб, гангиб қолди.

— Ассалому алайкум, — деди кейин.

— Ваалайкум ассалом.

Йигитнинг талаффузи ўзбекчага ўхшаб кетди. Булар ўзбек экан чори, деб ўйланиб турувди, ҳалиги йигит:

— Хуш кебсизлар, нима хизмат? — деди соф ўзбек тилида.

Темирга эргашиб келган ўзбек йигитлари анграйиб қолишиди. «Демак, ўзбек экан-да». Темир шу ўй билан бемалол сўз қотди:

— Ҳорманглар, оғайнилар...

Бояги йигит гапни чўрт кесди:

— Нимага келдиларинг бу ерга?

Темир яна довдираб қолди. Новча эса илжайди, иш осонроқ пишади, деб ўйлади шекилли, «Яна тилига тушунмайман, дейсан-а», деди Темирга.

— Ўзбекмисизлар? — деб сўради Темир.

— Ҳа, гапинг борми, гапир.

Йигит гапни чўзишни ёқтирмаётгани, буларнинг бу ерга келганини хуш кўрмаётгани сезилиб турарди.

— Менам, манавилар ҳам ўзбекмиз...

— Ҳамманг бир гўрсан, сенам, анавиларам — баринг шўравийсан. Нимага бошимизга қурол кўтариб келасанлар?

— Сизларга эмас, йўлда душман чиқиб қолмасин деб, ҳар эҳтимолга қарши олганмиз буни.

Йигит бурнини жийирди, жаҳли чиққанидан кўзлари ўйнаб кетди.

— Ким душман? Кимга душман? Сен душман! Манавилар душман! Бироннинг юртига бостириб кирган одам душманми ё юртини босқинчилардан мудофаа қўлмоқча отланган киши душманми? Ҳаммаёқни ғорат қилдиларинг, шаҳару қишлоқлар кули кўкка совурилди. Ким қилди шуларни? Сизлар?

— Ке, қўй, оғайни шу гапларди, — деди Темир мавзуни ўзгартиromoқчи бўлиб. — Ростини айтсам, юртимдан чиққанимга бир йилдан ошди. Қовунни жуда соғиндим. Мумкин бўлса иккитагина беринглар. Шу илтимос билан келувдик.

Йигит бирибир паст тушмади, Темирнинг йўлига юрмади. Аламини тўкиб сола бошлади.

— Наҳотки гўдакларга, қарияларга қаратади ўқ ота-ёттанингда қўлинг қалтирамаса?

Энди Темирнинг ҳам жаҳди чиқди.

— Қачон мен болага ўқ отганимни кўрдинг?

— Сен отмасанг у отади, бошқаси отади. Отиб келяпсанлар-ку ахир. Сенам сўфимасдирсан. Ҳамманг қотилсан. Яна тиржайиб юраверасанлар.

— Менга қара, — деди Темир астойдил. — Бу ерга менам, буларам ўз ихтиёри билан келгани йўқ.

— Демак, қул экансан.

Темирнинг сабр-косаси тошди. Бу ёғига ўзини идора қиломай қолди.

— Ҳай, менга қара, мунча кўп ақл ўргатдинг. Сени олдингга одам деб иккита қовун сўраб келдик тўрт бирдай одам. Айбимиз шуми? Бермасанг берма! — Шундай деб, йигитларга қаради: — Кетдик! Э, қовуни бошини есин. Яна буларни ўзбек деб андиша қилиб ўтирибман-а.

— Бўлмаса отиб ташлармидинг? Сени қўлингдан келадигани шу! Ақли йўқ одам кучига зўр беради.

Темир шарт изига бурилди. Орқасидан йигитлар ҳам эргашди. Гап оҳангидан аҳвол мураккаблигини сезиб турган Новча воқеа бундай тус олиб кетишини кутмаган, Темир қовун олмай орқасига қайтганидан ҳайрон эди.

— Нима гап, Темир? — деди Новча.

Темир жаҳл билан қўл силтади-да, йўлида давом этди. Новча югуриб келиб, йўлини тўсди.

— Шу икки мишиқидан қўрқиб индамай кетаверамизми?

Темир қулоқ солмади.

— Қовун емасанг ўлиб қоласанми? Бор, олсанг ола-вер, лекин мен қайтмайман орқамга.

Шундай деб, Новчанинг қўлини силтаб ташлади. Новча бир зум қаққайиб қолди. Сўнг жаҳл билан сўқинди:

— Отиб ташлайман ҳозир икковиниям.

Темир шарт ўтирилди:

— Эsingни едингми?

— Алам қилмайдими, биз буларни деб қон кечиб юрибмизу иккита қовун бергиси келмайди. Ҳаммасини қириб ташлайман.

Новча қутурган каби полиз томонга югурди. Пуштада дарё тошидай дўнграйиб ётган қовун-тарвузларни тепа кетди. Оғзидан боди қириб, шоди чиқади. Жаҳли қўзиганидан, бир томони кун иссиқ, Новча қип-қизарib кетди.

— Новча, эсингни йир!

Темир ҳали гапини тутатмовдиямки, ўқ овози гумбирлади. Новча қовун пуштасига бўйи баравар учиб тушди. Боя Темир билан баҳслашган йигит Новчага термилиб туар, милтифи милидан тарам-тарам тутун чиқарди. У атайлаб қылдими ёки шошганидан мўлжали нотўғри кетдими, ҳарқалай ўқ Новчанинг оёғига теккан эди. Темир уларга қаради. Иккала йигит энди Темирга ва унинг орқасида турган аскарларга ўтирилди. Темирнинг юраги шувиллаб кетди.

— Ўзларингни босинглар, биродарлар...

Шу маҳал автоматнинг қаҳрли тариллагани сукунатни бузди. Ҳалиги икки йигит баравар йиқилди. Темир Новчага қаради. У ётган жойидан бор кучи билан автомат тепкисини босарди. Ана-мана дегунча магазиндаги барча ўқи тамом бўлди. Темир гангиг қолди, ёнидаги аскарлар эса таёқдек қотган, нима қилишни, қаёққа қочишни билмасди. Шу маҳал яна ўқ овози гумбирлади. Кўкрагини кўтариб турган Новча шилқ этиб йиқилди. Ярадор йигитлардан қайси бириди охирги кучини тўплаб, Новчани мўлжалга олган эди.

Бу воқеалар бир зумда кечди. Аммо юракларни ўртаб кетди. Атиги бир неча дақиқада учта ўлим: улар ким, қайси миллатдан бўлишидан қатъий назар, алам қиласи одамга. Учовиям одам ўлдиришга ишқибоз йигитлар эмас аслида. Лекин вазият уларни қотиллик қилишга мажбур этди. Дилларидағи орзулари, ниятларини ўzlари билан ола кетишли. Эҳ, уруш, уруш...

Темир катта бир кесакка ўтирган кўйи, бошини кафтлари орасига олиб, оғир ўйланиб қолди. Бу нима деган гап ахир. Бу аҳволда охирни нима бўлади? Ҳар икки томондан одам қирилиб кетаверса... Миясини турли фикрлар, қарама-қарши ўйлар пармалай бошлади. У гўё ёнидаги йигитларниям унунтган эди. Қайси бири-

дир: «Темир ака, нима қиламиз энди?»— деганидан кейингина улар эсига тушди...

Узоқ ўтири Темир. Мияси ғовлаб кетди. Нималарнидир ўйлар, аммо нимани ўйлаётганини ўзиям билмас, идрок қилолмас эди.

Кун пешиндан оғди, ҳаво иссик, ҳамон күйдиради. Қайдадир тўргай бўзлади. Хаёли бўлинди. Бошини кўтарди. Губорларни тўкиб ташлайдигандек, бошини қаттиқ силкиди. Чиндан ҳам сал кўзи очилиб, фикри тиниқлашгандай туюлди. Оғир тин олиб ўрнидан турди. Бўғинлари қисирлаб кетди. Туриши билан полизда ётган Новчанинг мурдасига кўзи тушди. Беихтиёр капа томонга қаради. У ерда ҳам иккита мурда, иккита ўзбек йигитининг мурдаси...

## Олтинчи боб

### I

Телепатия деган нарса бор. Ҳарқалай Темир ишонади бунга. Жуда кўп дуч келган, ўз ҳаётида синаб кўрган.

Бугун ҳам шундай бўлди.

Тонгда тушига Гавҳар кирибди. У билан қайсиdir соя-салқин боғда музқаймоқ еб ўтирган эмиш. Гавҳар музқаймоқни чўчиб-чўчиб, эҳтиёт бўлиб ермиш. Яқинда томоги оғриган экан, шу қайталаб қолмасин, деган хавотирдамиш. Темир қистармиш. Бир миршаб келиб, пўписа қила кетипти: «Нимага бу ерда морожний еб ўтирипсанлар?» Темир билан Гавҳар ҳайрон қопти. «Нима ишингиз бор? Ўтирамиз-да», «Бу ерда... мумкин эмас!» «Ие, нега энди. Ахир ҳамма еяпти-ку!..»

Туш ғалати нарса-да, бирдан бояги соя-салқин жойдан пахтазорга ўтиб қолишилти. Пахта тераёттан эмиш-у, Гавҳарнинг қўлида музқаймоқ бормиши.

Хуллас, айқаш-уйқаш туш.

Темир уйғониб, кўрган тушини ўйлаб ётди. «Сентябрнинг ҳам ярми ўтди. Эҳтимол студентлар пахтага чиқиб кетишгандир». Шу топда Темир пахтазорда бўп қолгиси келди. Ўртоқлари билан ҳазил-ҳузиллар, талашиб-тортишишлар, кечқурунги ўйин-кулгилар... Қанчалар завқли... Вақтида ўшаларниям қадрламаймиз. Пахтасиям жонга тегди деб, эртаю кеч нолиймиз... Гавҳар ҳам пахтададир. Ишқилиб, ҳеч ким хафа қилма-

ялтимикан уни? Ким кўп, шилқим йигит кўп. Терим пайтида не-не ишлар бўп кетмайди. Бечора қизлар. Уларнинг тақдири кўпинча пахта билан боғланиб кетгани ғалати...

— Подём!

Дўйиллаган овоз Темир хаёlinи мушук панжасига тушган бедана патидай тўзғитиб юборди. Сакраб турди...

Нонуштадан қайтаёттанда алоқачиларга тегишли хонага кирди. Столда беш-олтита хат ётарди. Темир уларни бирма-бир кўздан кечирди. Таниш дастхатта нигоҳи тушиб севиниб кетди. Гавҳардан!

Хатни очиб, шу жойнинг ўзида тик турганча ўқий бошлади.

«Ассалому алайкум Темир ака!

Ишонсангиз сира ҳаловатим йўқ. Эртаю кеч сизни ўйлайман. Тинч, эсон-омон юрибсизми? Жанглардан иироқмисиз ишқилиб? Ўзингизни эҳтиёт қилинг, жон ака.

Мен яхшиман. Ўқиши бошладик. Қизларнинг айтишича, яна беш-олти кундан кейин пахтага кетармишмиз. Аммо мен бормайман. Биласиз, томогим тез-тез оғриб туради. Дўхтири билан гаплашдим, ангинани олдирмоқчиман. Бўлмаса юрагимга таъсир қилар эмиш. Сал қийналсан ҳам қутулай шундан. Баҳонада пахтадан қоламан. Курсдошларимиз жўнаб кетиши билан касалхонага ётаман...

Негадир кейинги пайтда кам ёзадиган бўп қолдингиз. Мен эса ҳар куни сиздан мактуб кутаман.

Темир ака, сиздан яна илтимос, аввало Худо асрасин, лекин ўзингиз ҳам эҳтиёт бўлинг. Нимагадир дилим ғаш, қаттиқ, хавотирдаман...

Сизни соғиниб қолувчи Гавҳар».

Дарров хат ёзилган кунга қаради. Ўн кун бўпти. Демак, Гавҳар касалхонада. Операция қилдимиликан? Яхши ўтдимиликан? Шундай нияти бор экан, олдинроқ ёзмайдими, Робия опага учрашинг менинг номимдан, деб маслаҳат берарди. Ҳарқалай тажрибали, қўли енгил опанинг... Майли, шифо берсин. Бир жиҳати яхши бўпти, биратўла қутулиб олади.

Бугун у бўш. Казармага кирди. Бироз ётгиси келди.

Каравотга чўзилиб хаёлга берилди. Яхшиям хаёл бор... Қовун воқеасидан бери янаям ўйчан бўлиб қол-

ган. Қарийб бир ой ўтган эсада, ҳеч ёдидан чиқаролмайды, ўйлайверади, ўйлайверади. Ҳозир ҳам хаёли айланиб-айланиб шу воқеага келди. Ўзи билан тортишган йигитнинг фикрлари миясидан сира чиқмайды. «Бироннинг юртига бостириб кирган одам душманни ёки юртини мудофаа қилишга отланган киши душманми?» Ҳақиқатни бўяб кўрсатиш осон экан...

Кўпдан бери қалам ушламай қўйган эди. Негадир ҳозир шеър ёзгиси келди. Қофоз-қалам олиб машқ қила бошлади. Қофозга термилиб узоқ ўтирди. Сўнг нималарнидир ёзи, нималарнидир ўчирди, қайта кўчириди. Аммо барибир кўнгли тўлмади.

Серёжа хаёlinи бўлди.

— Нима қиляпсан, Темир? Ҳа, хат ёзяпсанми? Қизингами?

Темир унга юзланди.

— Нима дейсан?

— Юр, бир айланиб келамиз. Ҳаво жуда яхши.

Темир Серёжани ҳурмат қиласи. Бошқаларга ўхшамаган одатлари бор. Шу боис таклифини рад этолмади.

— Кўймадинг қўймадинг-да, — деди қофоз-қаламини йиғишириб. — Бир нарса хаёлимга келувди, шуни шеърга солмоқчи эдим.

— Шуни айтмайсанми, мен бошқача ўйлапман. Майли бўлмаса, ёзавер унда.

Темир кийина бошлади.

— Бўлди энди, фикр қочиб кетди.

Уларга Андрей деган йигит ҳам қўшилди. Андрей кейинги чақириқда келган бу ерга. Шароитта тез кўниди: анча дадил, ҳеч нарсадан қўрқмайди. Ҳаракатлари, гап-сўзларидан безори, қиморбоз бўлганга ўхшайди. Унда-мунда командирдан яшириб наша чекади. Дастреб Новча Андрейнинг ғашига тега бошлади. Носиржондай унгаям ҳар хил ишлар буюрди. Лекин Андрей қилмади. Новча урмоқчи бўлганда у ҳам хезланди. Иккови роса муштлашди. Пишиб кетган экан чофи, Новча калтаклари таъсир этмади. Новча ҳеч кимдан шунча кўп калтак емаган бўлса керак. Кўринишдан ихчам, чуваккина Андрей унча-мунча каратэ сирларидан ҳам хабардор экан. Шу-шу Новча унга бошқа иш буюрмади. Андрей эса мавқенини тиклаб олди.

Очиғи, ҳозир Темир уни кўриб ғашланди. Чунки у ғалва чиқармай юрмайди. Тўполондан Темирнинг юраги безиллаб қолган.

Бу фикрини Серёжага айтолмади. Орқага қайтишни эса эп кўрмади. Йигит одамга ярашмайди.

Учови елкасига автоматини осиб (бу ерда қуролсиз юриш ҳавфли) қишлоққа йўл олди. Мақсад — дўконларни айланиб, у-бу нарса харид қилиш. Темир ойига ўн тўрт сўмлик чек олади, Серёжа билан Андрей тўққиз сўмдан. Шу важдан ҳозир ораларида «бойи» Темир. Буни улар ҳам биладилар.

— Яхшироқ нарса учраб қолса чекимиз етмаса қарз бериб турасан-да, Темир, — деди Серёжа.

— Бўпти, гап йўқ.

— Қишлоқ ҳувиллаб ётипти. Кўп уйлар вайрон. Айтишларича, икки йил оддин бу қишлоқ қаттиқ жангда қолиб, артиллериядан ўққа тутилган экан. Натижада ярми тамоман йўқолиб кетган. Шундан бери одамлари асабий — шўровийларни ёқтирмаслигини яширмайдилар.

Бир неча дўконларга кирдилар. Тузукроқ нарса йўқ, борлари қиммат.

— Булар атайлаб бизга баланд айтади нархини, — деди Андрей сўкиниб.

— Ўзининг моли, хоҳлаган нархида сотади-да.

Серёжанинг бу гапи Андреяга ботмади. Бир ўқрайиб қараб қўйди.

Тарвузлари қўлтиғидан тушиб, қишлоқдан чиқишиди. Кимларгадир совғалар олишини мўлжал қилишганди-да. Бир чақиримча наридан катта асфальт йўл ўтади. Шу йўлдан кийим-кечак ортган юк машиналари қатнайди. Буни аскарлар яхши биладилар. Ҳатто баъзилари тунда чиқиб, машиналарни тўхтатиб, кийим-кечаклар олишган. Туя жунидан тўқилган свитер, Хитой, Покистон ва бошқа мамлакатларда чиққан турли кийимлар...

Андрей таклифи билан ўша томонга жўнашди. Узоқда бир юк машинаси пайдо бўлди. Буларга қарама-қарши — Ҳайратон томондан келмоқда. Нимадир юкланган, усти брезент билан ёпилиб, арқон тортилган.

— Шуни тўхтатамиз, — деди Андрей.

Машина яқинлашгач, у кўл кўтарди. Ҳайдовчи ёлғиз ўзи экан, қўрқди шекилли, тўхташ ўрнига баттар

тезликни оширди. Бундан Андрейнинг ғазаби қўзида. Машина олдидан шувиллаб ўтиб кетиши билан орқасидан ўқ узди. Баллон қарс этиб кетди-ю, машина бир томонга ориб, ўн метрча судралиб борди-да, тўхтади.

— Нега бундай қилдинг, Андрей? — деди Темир.

— Нимага тўхтамайди?!

— Мажбурми тўхташга? Истамаса тўхтамайди-да.

— Унда жазоси шу.

Серёжа ҳам Темирнинг гапини маъқуллади.

— Икковингам ғирт аҳмоқ экансан, — деди Андрей ҳафсаласизлик билан.

— Қароқчилик қилгани келганимиз йўқ-ку бу ерга, — Серёжанинг жаҳди чиқди.

— Бўлди, — Андрей унга қараб қўл силтади. — Кўп политика суқаверма.

Андрей югуриб бориб, кабинани очди. Ҳайдовчи бошини рулга қўйиб жим ўтиради. Эшик очилиши билан чўчиб тушди. Ранги оқариб кетган, қўллари дав-дағ титрайди.

— Нима бор машинангда? — деб пўписа оҳангида сўради Андрей.

Ҳайдовчи гапига тушунмади шекилли, елка қисди.

Андрей эгчил машина устига чиқди. Чўнтағидан пичоқни олиб брезентни шарт-шарт кесди. Тойланган пахта босилган экан. Андрей ҳафсаласи пир бўлиб тушди пастга.

— Сени юртингдан келяпти чоги, — деди Темирга. — Машинаям ўзимизники-ку. — Сўнг ҳайдовчига бақирди: — Ҳайда! Йўқол кўзимдан, аҳмоқ. Тузукроқ нарса ортсанг ўласанми?!.

Серёжа ҳазиллашди:

— Уч қароқчи йўл тўсишини билганида «Адида» костюмлар, жинси шимлар ортардику-я. Бу аҳмоқ билмаган-да!

Яна йўлда давом этдилар.

Улар анча узоқлашгандан кейингина ҳайдовчи ўзига келиб, кабинадан тушди. Кўтаргични олиб, баллонини алмаштиришга тутинди.

— Кетдик, энди, оғайнилар, — деди Темир.

Серёжа ҳам қўшилди. Аммо Андрей ғазабдан тушмас, овга чиқиб ҳеч нарса отолмай қайтаётган овчидай тажанг эди. Нимадир олиб кетишни истарди.

Орқадан ғувиллаш эшитилди. Енгил машина келарди. Яна Андрей қўйтади.

— Буни нима қиласан тўхтатиб?

Бу ҳам тўхтамади. Андрей бунга ҳам ўқ узди. Ичидаги ўтирганлардан бири бақириб юборди. Темир билан Серёжа югурди. Бирори эшикни очди. Орқа ўринидикда ўтирган аёлга ўқ теккан, оғзидан қон оқиб ётар, ҳайдовчи, — эри бўлса керак, — уввос солиб йигларди. Бу ҳол Темирни қутуртириб юборди. Бамайлихотир келаётган Андрейнинг елкасига автомат кўндоғи билан туширганини ўзиям сезмай қолди. Кутимаган зарбадан Андрей шилқ этиб асфалътга йиқилди.

— Нима қилдинг? — деди Серёжа. — Ўлдириб қўясан-ку.

Темир ҳамон ўзини босолмас, лаблари пирпираб учар, қўли қалтирап эди.

— Ўлдираман! Ўлдираман бу ярамасни. Бу нима қилиқ ахир. Қара ўзинг, Серёжа. Аёл шўрликнинг айби нима?

У Андрейни яна урмоқчи эди, Серёжа қўлини ушлаб қолди. Темир чидаёлмай, асфалътга ўтириб, хўнграб юборди. Худди ўзининг жигари ўлгандай ҳўнграб-хўнграб йиглади.

Серёжа гангиб қолди. На Темирни овутишни билади, на Андрейга қарашни...

Бироздан сўнг Андрей инграб, ўрнидан қўзғалди. Темирни қидирди, чамаси уни уришни мўлжаллар, бироқ мадори етмас эди.

Серёжа келиб уни кўтарди. Андрей автоматини судраб, бир-бир босди. Ҳали қуввати йўқлиги кўриниб турарди. Серёжа автоматни юлиб олди. Кейин Темирнинг ёнига борди.

— Тур ўрнингдан, кетамиз, — деди елкасидан туртиб.

Темир унинг қўлини силтаб ташлади:

— Йўқол! Қўй мени ўз ҳолимга!..

Темир ўзини йигидан тиёлмас, у ёқда афғоннинг фарёди тинмас эди. Афғон йиги аралаш «Шўрави, шўрави» дея сўкинарди. Машинасининг орқа ва олдойналари чил-чил синиб, ер билан битта бўлиб ётарди.

Серёжанинг боши қотди. «Қаерданам Андрейга юр дедим», деб ўзини-ўзи койирди.

Нихоят, Темир ўзини қўлга олди. Базўр жойидан турди. У афонга қўмак беришни ўйлар, аммо бунга ожиз — вақт ўтган эди...

## II

Эрталаб хабар тарқалди: яна жангга кирилар экан... Пешинга бориб миш-миш ростта айланди.

Жангчилар БТР, БМПларга ўтиридилар. Жўнаш ҳақида команда бўлди. Қаерга, неча кунга, қанақа жанг? — ҳеч ким билмайди. Аниқ манзилга, аниқ топшириқ билан кетишгани тузук экан, ҳар қалай шунга руҳан ҳозирлик кўришади. Аммо бугунгиси негадир ўта сирли. Офицерлар қовоғи очилмайди, аслида улар унча-мунча жангни писанд этмас, кайфиятида мутлақо ўзгариш сезилмасди. Демак, жиддий жанг бўлиши керак.

Темир бу сафар Серёжа билан битта машинага тушди. У ойнақдан атрофга разм солиб бормоқда. Но-таниш жойлар. Бир неча қишлоқ, қир-адир орқада қолди. Яйловларда туялар, қора моллар, қўй-эчкилар. Нимаси биландир қишлоғини эслатади. Қишлоғида ҳам мана шундай куз кунлари төғ этагидаги лалми ерларда моллар эринибгина қуриган хашакларни тергилаб юради. Бундай пайтда кўпчилик бедана овига чиқади. Ҳаво булат аралаш ғуборли бўлиб турган кунлари бедананинг рави келади. Беданавозларга Худо беради. Йигирма-ўттизталаб ушлашади бир кунда.

Бу ерларда ҳам бедана кўп бўлса керак, деб ўйлаб бораарди Темир. Тўплар гумбирлаши, дам-бадам отилган ўқлар уларнинг ҳам иинини бузганди. Уруш на одамларга, на ҳайвонларга, на қушларга ором беради.

Зимдан Серёжага қаради. Ҳозир балки у ҳам ўзининг қишлоғини, Рязань далаларини кўз олдига келтириб бораётгандир. Яхшиям шу бор, бундан бўлак сал очилиб-сочилиб гаплашадиган одами йўқ. Носиржон сал-пал ҳангома бериб тураарди, уни ҳам қаёқадир олиб кети什ди. Азим билан Жўракул қайдалигини билмайди. Тани-жонлари соғмикан? Бир мамлакатда бир хил вазифани бажариб юрсангу бир-бирингни адресингни билмассанг, жуда ғалати-да. Азимнинг романтиклиги, устига қизиқёнлиги ёдига тушди. Ишқилиб соғ бўлса бас. Жўракул, бечора жуда мўмин-қобилда. «Қария»лардан роса калтак егандир. Бирорвнинг га-

пини икки қилиб ўрганмаган бола бу азобларга қандай чидаяпти экан. Новчага ўхшаган абллаҳлар ҳамма қисмда топилади... Ҳай, майли, калтак есаям, жони соғ бўлсин. Ўлмай уйига борса бўлди...

Қош қорайганда кенгтина майдонга етиб келишди. Машиналар маълум чизик бўйича ипга тортилганда тизилиб турибди. Икки томон қуюқ дараҳтзор, рўпарада тоғ кўринади. Этақда қишлоқ элас-элас кўзга ташланади. Маълум бўлишича, ўша қишлоқда, унинг атрофларида босмачилар тўдаси ўрнашган экан. Улар ҳаддан ташқари кўп эмиш. Барча йўллар ҳар қаричигача миналаштирилган. Шу боис қишлоққа яқин кириш қийин. Машиналар панасига, иложи борича кўринмайдиган жойларга ўтиш буорилди. Жангчилар ўзларини пана-панага олдилар.

Орадан кўп ўтмади, атрофга шом пардаси ёйилди. Шунда қишлоқ томонда гумбурлаган овозлар эшитилди. Бу овоз кетма-кет давом этди. Артиллерия қишлоқни тўлга тутаётган эди. Шу маҳал кутилмаган ҳужум бошланиб қолди. Ердан чиқдими, осмондан тушдими — душман бостириб кела бошлади. Дараҳтзорда пистирмачилар яширинган экан.

— Олра!

Шиддатли жанг қўлди. Атрофни қий-чув, тўс-тўполон тутди. Машиналардагиларни ишга солиш қийин — ўзимизники билан душманни ажратиб бўлмас, ҳаммаси қоришиб кетган эди. Душман буларга томон бостириб келаёттанини ҳам, қочиб кетаёттанини ҳам англаш қийин. Тўсатдан «ура!» товушлари янгради.

Дараҳтзор орқа томонида ҳам шўро жангчилари ўрнашган, душман ўраб олинган экан. Артиллерия қишлоқни тинчиттандан кейин икки томондан ҳужум бошланиши режалаштирилган, буни пайқаб қолган душман олдинроқ отини қамчилаган экан...

Жанг бир соатча давом этди. Беҳисоб одам қирилди.

Жасадларни ажратиш, ким ўлди, ким қолди — билиш қийин... Салдан сўнг ҳалок бўлган жангчиларни машиналарга орта бошладилар.

Темир бунақа қирғинни — одам боласи чумоли мисоли хор бўлганини кўрмаган эди. Ўқлар шангиллаши, жангчилар қий-чувидан қулоги гарангсиб, нима бўлаёттанини идрок этиши оғирлашиб қолган эди.

Ана шу аҳволда Темир ҳам ўлганларни, ярадор жангчиларни таший бошлади.

Ё алҳазар!

Темир бир мурдани қўлидан ушлаб тортувди, кўзи оқарган бетига тушди. Юраги увишиб, жойида тўхтаб қолди. У бунга ишонмасди. Наҳотки, рост бўлса? Афсуски, кўзлари адашмаган эди. Оғзи-бурнидан қон оқиб ётган Азим эди.

Бечора, раҳматли Азим! Қандай далли-гулли йигит эди. Армиядан қайтсан катта тўй қиласман, тўйимга Шерали Жўраевни олиб келаман, деб юрарди шўрлик!

Темир унинг ёнига ўтириб қолди. Ким ўлдириди уни? Ким учун ўлди у? У ҳозир бошқа ҳеч нарсанни ўйлай олмас, кўрмас, эшигмас, караҳт эди. Йиғлай дейди, йиғлаёлмайди, на товуши чиқади, на кўзларига ёш келади. Мутлақо бегона — бир афғон аёли ўлиги устидаги узвос солиб йиғлаган одам жонажон жўраси ўлганда йиғлаёлмаса-я. Э, Худо, бу не кўргулик, не жазо бу?

Уруш барибир уруш! Одам ҳар қанча кўнгилчан бўлмасин, аста-секин лоқайдлашиб, ўлимни оддий бир ҳодиса сифатида қабул қиласиган бағритош бўлиб бораверар экан. Бошқа на илож? Дўсти тепасида аза очиб ўтиришнинг имкони йўқ!

Темир Азимнинг мурдасини елкасига олиб, машинага элтди. Ана шундагина ичидан қаттиқ, жуда қаттиқ ўкирик келиб, вулқондай отилиб чиқди. Ҳўнграб юборди, кўзларидан дувиллаб ёш куйилди. Уни бу аҳволда кўрган бир офицер сўка кетди:

— Қанақа солдатсан, аҳмоқ! Қиз болага ўхшаб йиғлаб ўтирипсан. Бас қил!

Темир ўзини қўлга олишга интилиб:

— Ўртоғим эди! Бирга ўқир эдик... — деди.

Офицер пинагиниям бузмади.

— Нима қипти ўртоғинг бўлса... Гапини қаранглар...

Балки офицер ҳақдир. Йиғлаган билан не наф? Уруш-да бу... Аммо одам темир эмас-ку. Йиғлаш, кўнглини бўшатишга ҳаққи борми, йўқми? Ҳеч бўлмаса шундай қилиб енгил тортиши мумкин-ку.

Нега энди унинг устидан кулиш керак?

Темир индамай, бир чеккага ўтиб, дўппайиб турган тошга ўтирди. Миясига лоп этиб Жўрақул урил-

ди. У бечора қаерда экан? Азим билан бирга кетувди чоғи. Ҳаётмикан ишқилиб? Уларнинг қисмиям шу атрофда бўлса керак. Манави жангга келишипти-ку.

У ҳозир Жўрақулни жудаям кўргиси келди. Мирриқиб гаплашишни, ажрашиб кетишганидан бери ўтган воқеаларни сўрашни, студентлик чоғларидағи ҳангомаларни эслашни ич-ичидан истади. Яна кўп нарсаларни истади. Лекин хоҳиш осон, унинг рўёбга чиқиши эса ҳамиша ҳам осон эмас. Хусусан, мана бундай жангу жадаллар, қонгоҳ ичида истаган нарсанг амалга ошишини хаёл қилиш — такадан сут кутишдай бир гап.

Тунни улар шу ерда ўтказдилар. Кечаси ҳеч ким деярли ухламади. Беш-үн дақиқа ўтирган жойларида мизғиб олишди, холос.

Нега бундай бўлаёттанини жангчилар тутул, офицерлар ҳам билмасди, билса ҳам айтишмас эди. Жангчилар ўзларича, эртага кетамиз, деб тахмин қилишарди.

Одатда қишлоқ жойларда бундай кечаларда чигирткалар чириллайди, итлар акиллайди, эшакнинг ҳанграгани эшитилади. Бу ерда бирон-бир сас-садо йўқ. Молу ҳол, курт-қумурсқагача ё қирилиб кетган, ё инига кириб нафасини чиқармай пусиб ётипти. Тундаги жангдан нимаям омон қоларди. Чор-атрофда ўқлар ёмфири, гўё дараҳтлардан ўқ отилаётгандай. Ҳалиям одам боласининг жони қаттиқ, бардоши кучли экан. Бу қонгоҳда ундан бўлак тирик мавжудот чидаши қийин. Ҳатто осмондаги юлдузлар ҳам пастдаги қирғинбаротдан чўчигандай пир-пир этади. Одамзодга қўйиб берса уларни ҳам тинч қўймасди, яхшики шунга қолганда қўли калта...

Темир юлдузларга термилиб шуларни ўйлади. Ўйлагани сари фикричувалашиб кетаверади, кетаверади, охирига етолмайди.

Аzonда олов из қолдириб снарядлар учди. «Яна бошланди». Темирнинг хаёлига келган фикр шу бўлди. Лекин нима учундир ҳамма жим. Снарядлар қишлоқ томонга учади. Ўша томонда бақириклар эшитилади. Жангчилар уйроқ, сергак. Аммо бу тўполон тезда тинди.

Коронгида билинмаган экан, тонг ёришгач аскарлар бир-бирини танимай қолдилар: қош-киприклари, юз-кўзларини сариқ тупроқ қоплаган. Болалик йил-

лари эсига тушди Темирнинг Қишлоқнинг сертупроқ кўчаларида ўйнашганида шундай аҳволга тушишар эди...

Машиналар овози тутди ҳар ённи. Улар занжир ҳалқалари каби тизилиб тоғ тарафга — қишлоқ сари йўл олдилар. Темир йўл-йўлакай далаларни, дарахтзорларни кузатиб боради. Ҳамма жой куйган, дарахтлар ёниб кеттан, тутун ҳамон босилмаган.

Машиналар қишлоққа кириб тўхтади.

Қишлоқ... Номи қолган, холос. Тик турган уй йўқ ҳисоби, ҳаммаси вайронага айланган. Ҳар қадамда серсоқол кишилар, аёллар, болаларнинг мурдалари...

Ўн минутча шу ерда туришди. Машиналар атрофидан узоқлашишга ижозат йўқ.

Яна йўлга тушдилар. Энди тоғ этаги бўйлаб ўнг томонга юрдилар. Яна қишлоқ, яна ўликлар, куйган, ёнган, тутаган уйлар...

Темир ортиқ қарай олмади. Кўзларини юмди. Кўнгли айниди, боши айланди. Сир бой бермай, бошини ойнакнинг темир қирғонига қўйиб олди. Аҳволини Серёжа сезди чоғи, аста туртди.

— Темир, сенга нима бўлди?

— Ҳеч нарса.

Тоби қочгани овозидан ҳам билинди. Серёжа унинг бошини кўтарди. Ранги бўздай оқариб кетган эди. Серёжа ташқи алоқа орқали ҳамшира кераклигини айтди. Машина тўхтади. Тиббий бўлинмадан врач етиб келди.

— Бизнинг машинага ўтказиш керак, — деди врач.

Серёжа Темирни суяб, тиббий бўлинма машинасига олиб борди. Врач ичкарига ётқизиб, укол қилди, дори берди. Саддан сўнг Темир ўзига келди. Аммо юрак уриши ҳамон безовта эди.

— Сен кетавер, — деди врач Серёжага, — бу шу ерда қолади.

Серёжа кеттандан кейин машина жилди. Темир чалқанча ётар, туришга рухсат беришмас,— аксинча врач дам-бадам томирини ушлаб кўриб, ҳамширага укол қилиш ёки дори беришни буюрарди. «Нима бўлди, дўхтири?» деган саволга «Ҳеч нарса, ваҳима қиласиган жойи йўқ, бироз чарчагансан, ўтиб кетади», дея врач хотиржам жавоб қилди.

У шу аҳволда ярим соатча ётди. Кейин ухлаб қолди...

### III

Икки ҳафтадан бери Темир ҳарбий касалхонада. Асаби қаттиқ толиққан, бу юрагига таъсир этган экан, ҳар куни бир нечтадан укол олади, дори ичади. Ўзига ўхшаган йигитлар кўп, уларнинг аксарияти ярадор. Ўрнидан туролмай ёттанилари қанча. Ҳар ким ўзи бошидан ўтказгани, кўргани, эшиттанини гапиради. Душманнинг аёвсизлиги, ўта шафқатсизлигидан нолийдилар. Инқилоб, озодлик охир-оқибат ризқ-насиба уларга керак, аммо бизнинг не-не гулдай навқирон йигитларимиз жувонмарг бўлиб кетаётгани афғонларнинг хаёлигаям келмайди. Йигирма ёшга етиб-етмаган ўсмирлар қандайдир мулоҳазакор, қаримсик, лоқайд бўлиб қолган, ҳаётдан кўнгли совиган, улар бу дунё ишларига қўл силтагани сезилиб туради. Кўнгил кўтарадиган, хуморни ёзадиган, дилларга нур берадиган гап йўқ. Маҳзунлик, тушкунлик... Эшитадиганлари Аҳмад Зоҳирнинг изтиробга тўла нолалари...

Темир касалхона борини айланиб хаёл суради. Хизмат тугашигаям оз қолди. Омонлик бўлса яна олти-етти ойдан кейин уйга қайтади. Лекин шу ойларни ўтказиш осмонми. Ҳар кун, ҳар соат хавфда. Эртага нима бўлишини ҳеч ким билмайди. Борар манзилини билмай сахрода тентираб юрган карвондай гап...

Қашқадарёлик Жовли деган йигит билан анча яқинлашиб қолди. У елкасидан яраланган экан. Бир ой бўлти. Ҳозир анча тузук. Темир иккови сайр қиласди, гурунглашади. Шу йигит даҳшатли бир воқеани гапириб берди.

— Биздан уч-тўрт ёш катта Хуррам деган йигит армияга кетди. Опа-сингиллари бору ёлғиз ўғил эди. Отаси бечора ўрлим афғонга кетипти, деб хафа бўлиб юарди...

Дунёнинг ишларига ҳайрон қоласиз. Бирдан қишлоқда Хуррам армияда ўлипти, ўлигини оп келаймиш, деган шов-шув тарқалди. Ростданам икки кундан кейин оп келишди. Ота-онаси Худонинг зорини қилди, лекин тобутти очтирмади бирга келган солдатлар. Қишлоқти, колхозди катталариям ўртага тушди, бироқ боягилар қўймади, мумкин эмас, деб туриб олишди. Шу туриш кўмишди.

Жовли оғир хўрсинди. Эзилган юрагига ором бераёттандай жим қолди. Бир нуқтага термилади. Темир ҳам жим... Бунақа фожия неча юзлаб, неча минглаб хонадонларда бўлдийкан, яна қанча давом этаркан, деган ўй ўртарди Темир дилини.

— Ота-онаси бечоралар тоза тамом бўлди. Энасими бутун қишлоқ Бодом чеча дерди. Шўрлик қон босими ошибб, ярим жон бўлиб қолди, — Жовли астасекин гапирар эди. — Улим армиядан келса уйлантираман, келин қиласман, деган орзу-ҳавасда эди-да бечора...

Бугун йигирмаси деди, эрта қирқи деди, шу билан кунлар ўтаверди. Бодом чеча мозористонга боради, ўғли қабрини кучоқлаб йиглайди. Юраги сиқилиб қон босими ошибб кетади-да, ётиб қолади. Ўн-ўн беш кундан сўнг сал ўзига келиб, яна мозористонга йўл олади, яна ўша аҳвол.

Тўрг-беш ойлардан кейин сал қўниқди. Қизлари, ҳақ-ҳамсоя таскин беравериб, насиҳат қиласвериб бечора бироз ўзига кела бошлади. Тақдирга тан бермай иложи қанча.

Жовли яна жим қолди. Юзига қандайдир кулгига ўхшаш ифода югурди. Темир ҳайрон қолди, ҳатто ичида сал ранжициям. Шундай даҳшатли воқеани гапирган одам юрагига кулги сифадими? Темир ўйларини сезган каби Жовли деди:

— Ҳайрон бўляпсиз-а, Темир? Бу бола жиндими нима бало, бирорди боласи ўлганини гапириб кулади деб. Ҳайрон бўлманг, жўра, мен жиндияммасман, бирорвнинг фожиасидан кулмоқчияммасман. Лекин у воқеа шундай даҳшатлики, на йиглашни биласиз, на кулишни...

Хуррам ака вафотига тўққиз ойлар бўлган, ота-онаси йилини беришга тайёргарлик кўриб юрган кезлар эди. Бир куни, айни пешин чори, Бодом чеча нон ёпаётган экан, эри ҳамсоя қишлоққа жанозага кеттаганакан, дарвозада бир мошин тўхтапти. Бодом чеча ким келдийкан, деган ўйминан нонини ёлаверилти. Дарвоза очилиб бирорвнинг киргани сезилипти. Чеча бечора ўтирган жойидан бурилиб қаралти. Бир солдат кўринипти. Ия, бу саллот кимакан, деб тикилиб турса, бояги аскар: «Эна, танимаяпсизми?» — депти. Бодом чечанинг юраги уриб кетипти, бундай қараса ули Хур-

рам эмиш. Ули ўлганмасми, бечора боламди арвоҳи кўриндими, деп ўйлапти-ю, ўзидан кетипти. «Эна, эна, мен келдим, улингизман, Хуррамман» — депти. Афсуски, Бодом чечанинг жони узилган экан... Оддинги гаплардан бехабар Хуррам ака, энам мени кўриб, суюнганидан ўлиб қолди, деб ўйлапти...

Темир Жовлига термулиб қолди. Жовлиям ундан қўзини олмайди.

— Нималар деяпсиз, Жовли? ..

— Ишонмасангиз Худо урсин, — деди Жовли астойдил.

— Йўқ, ундаи деманг. Мен сизга ишонаман. Аммо бу қадар даҳшатни хаёлимга келтирмаган эдим. Агар шу воқеани кинода кўрсатса ёки китобда ёзишса, ўрай агар, бирор ишонса.

— Тўғри айтасиз, Темир. Лекин бўлган гап. Ўзим кўрганман. Хуррам ака тирик. Оддинги воқеаларни укиши кейин эшиттан. Ҳатто, биласизми, отаси бечора ёлғиз улимди гўри белгисиз қоп кетмасин, деб пенсия пулидан йигиб мармартош ҳам қўйдирган эди. Хуррам ака кўриб, қотиб қолган.

— Э, Худо, — деди тин олиб Темир, — бу қандай кўргиликки, одам ўзининг қабрини ўзи кўриб ўтиrsa.

— Шундайчаларам бўлган, Темир. Кўз кўриб, қулоқ эшитмаган гаплар... Бу афғон уруши одамларди бошига не-не балоларди солмади.

Орага сукунат чўқди. Икковиям ўз хаёли билан банд. Ҳар бири ўзича ўйлар, ўзича фикр юритар, аммо икковининг ҳам ўйлари мағзида афғон уруши, унинг жароҳати, ҳали неча-нечча йиллар минглаб, миллионлаб одамларнинг юрагини парма каби ўядиган, ка-ламуш каби емирадиган сўнгсиз ўқинч, ўчмас армон ётарди...

Бу воқеа анча кунгача Темирнинг хаёлидан чиқмади. Эсламай дегани сари эсига тушаверади. Ўлан, азаси тутилган ўғил эшиқдан кириб келса. Бу ҳолат Темирнинг кўз ўнгидаги жонланар, ўзи кўрмаган, аммо қиёфасини тиниқ тасаввур қилаётган Майрам чечанинг ўша пайтдаги аҳволини ичи-ичидан ҳис этар эди.

Бундан ортиқ жафо борми инсон боласи учун!?

Шундан кейин Темирнинг юраги тағин оғирлашиди. Эрта-индин рухсат берамиз, деб турган врачлар фикридан қайтдилар.

— Жуда юмшоқ феъл экансиз, — деди врач Тे-

мирга унинг электрокардиограмма қофозини кўра туриб.— Ҳамма нарсани юрагингизга олаверманг. Кўнгилни кенг қилиш керак одам. Яхши нарсаларни эсланг, шерикларингиз билан қизиқ-қизиқ гаплардан, қизлардан гаплашинглар, латифа айтинглар. Шунда тезроқ тузаласиз.

Темир кулиб қўйди. Унинг кулгиси маъносини тушунди врач.

— Англадим нима демоқчи бўлганингизни, — деди.— Қайси яхши нарсаларни эслаб, қанақа қизиқ гаплардан гаплашайлик, шу пайтда одамнинг юрагига қизлару латифа сирадими демоқчисиз. Шундайми?

Ё, алҳазар! Кўнглидан кечган гапларни аниқ айтди-я.

— Лекин бошқа иложи йўқ, ука, — врач салмоқлаб гапирди. — У гапларни менам биламан. Аммо чидайсиз. У ёғини суриштирангиз мениям юрагим илматешик бўп кеттан. Сиртимга қараб баҳо берманг, қуруқ суратим қолган... Ҳалиям сизлар ёш, бир-икки йил бўлғандир кеттанингларга, мен эса шу жанжал бошлангандан бери шу ердаман. Сизлар икки йил хизматни тутатиб кетасизлар. Менчи? Худо билади, ука. Баъзилар бизга ўхшаган ҳарбий врачларга ҳавас қиласди, боласини шунга ўқитмоқчи бўлади, пули кўп деб ўйлайди чори. Марги пули, кўрган кунимиз қурсин... Э, ука, гапираверсам гап кўп. Лекин ҳасратингни ким эшигадиу дардингга ким малҳам бўлади...

Темир яна кулди. Энди врач астойдил ажабланди.

— Мен дарду ҳасратимни айтсан сен бола куласан, деб ўйлайпсизми?

— Тўғри-да, — деди врач ўлкалаганинамо, ҳатто гапи сал қўполроқ чиқди.

— Хафа бўлманг, дўхтири, яхши нарсаларни эслаб, қизиқ-қизиқ гаплардан, қизлардан гаплашиб юрсангиз ҳаммаси ўтиб кетади.

Иккови баравар қаҳқаҳа отди.

— Оббо, укам-эй, болладингиз-ку. Нўл қилдингиз аммо. Ёш бўлсангизам гапга уста экансиз. Қойилман, қойилман, тан бердим.

У шундай деб ўрнидан турди. Палата эшигига борганда орқасига ўтирилиб, Темирга қаради:

— Мен айтгандай қилинг-а.

— Хўп бўлади.

Яна кулишди...

## Еттинчи боб

### I

Темир касалхонада бир ойдан кўпроқ ётди. Даволаниб чиққанидан сўнг ўз қисмига жўнатишмади. (Армиянинг ғалати қонун-қоидалари бор-да.) Шу атрофдаги қисмлардан бирига борди. Бу кўнглига шубҳа солди. «Балки юрагим тоза тузалмагандир. Шунинг учун узоққа юбормаётгандир... Ундай бўлса уйга жавоб берса бўлмайдими?..» Лекин бу дардларини кимга айтади, ким эшитади. Армия деб қўйипти буни ахир...

Янги қисм ҳаётига тез кўнишиб кетди. Ўзбеклар ҳам анчагина, деярли барча вилоятлардан бор. Улардан юрт янгиликларини суриштирди. Гарчи булар йўлга чиққанига етти-саккиз ой бўлган эсада, Темир она қишлоғи ҳавосидан нафас олгандай сезди ўзини.

Анчадан бери сокинлик, жанг йўқ, душман ҳужуми ҳам тинган ҳисоби. Онда-сонда чет-чақада битта-иккита душман дуч келиб қолади. Зора, шу билан тинчib кетса, уруш тутгаса.

Бироқ бу ҳали шунчаки орзу эканини, олдинда яна неча йиллар қонли курашлар бўлишини на Темир, на ундан катталар биларди.

Уни биладиганлар бу ердан жуда олисда эдилар...

Кўкламнинг илиқ кунлари, қўёшда турсанг қиздиради, сояда совқотасан. Афғонистон баҳори ана шундай. Қир-адирлар кўм-кўк. Чучмомаларнинг сафсар ранги кўзга ором беради. Яккам-дуккам лолақизал-доқлар очилган.

Темир атрофга суқ билан термилади-да, шундай гўзал гўшани наҳотки уруш қатарон қилаёттан бўлса, наҳотки, эртами-индин мана шу гуллар, ям-яшил майсалар устига ўқлар ёғилса, деб афсусланади, юраги эзилади. Одамзоддай олижаноб, меҳрибон, одамзоддай ваҳший, шафқатсиз жон йўқ бўлса керак бу дунёда. Меъёри билмай ўтади оламдан, ё у ёққа тортиб кетади, ё бу ёққа.

Ана шундай кунларнинг бирида Темир командрорвага жўнайдиган бўлди. Очифи, у гўзал манзарали, ҳозирча нисбатан тинч жойни ташлаб кеттиси келмас, жангу жадаллар жонига тегиб кеттан эди. Хизмати тугашига узори билан уч-тўрт ой қолди. Шуни шу

ерда тинчгина, эсон-омон ўтказишни жуда-жуда орзу қиласади. Шу боис ҳарбий тартиб бўйича қаёққа, нимага, бормайман, деган гаплар айтилмаса-да, Темир юрак ютиб рота командиридан сўради.

— Нима ишинг бор сени, — деди командир гапни кесиб. — Сен буйруқни бажар.

— Буйруқни бажаришга мажбурман, аммо мумкин бўлса айтинг, узоқми-яқинми? Бордию сал-пал иложи топилса мени шу ердан қимиirlатмасангиз.

Командир сапчиб турди-да, сўкина кетди:

— Сен кимсан ўзи? Генералмисан? Кру-гом! Шагом-марш! — деди кескин.

Орқасига бурилиб чиқиб кетишдан ўзга чораси қолмади.

Шундай қилиб, икки бўлим жангчилари бир офицер раҳбарлигида йўлга тушдилар.

Уч соатлар юрилгач, шаҳар кўринди. Темир таниди: Кобул, «Демак, шу ерда бирон иш бордир-да», деб ўйлади.

Шаҳарга яқинлашгач, ўнг тарафда «Бодомбор» деб аталадиган машина-ускуналар сақлаш корхонаси, чап томонда эса шўро аскарлари қароргоҳи кўринди. Темир олдинги гал Кобулга командировкага келганида бу ҳарбий қисм ҳақида эшитган, шу ерда қурол-яроғ омбори, сонсиз казармалар, машқ, полигонлари борлинини билар эди. Ҳарбий иморатлар, тахта уйлар машина бораёттан йўлдан тонгнинг қарийб чўққисигача чўзилган. «Лоақал шу ерда қолдирса ҳам майли эди», деган илинж пайдо бўлди Темирда. Аммо машина, бу ҳарбий ҳашамларга парво қилмаган каби, шаҳарга элтадиган йўлни бир ёнда қолдириб, чекка мавзелар оралаб кетди.

Бир маҳал рўпарада самолётлар, кўзга ташланди.

— Аэропортми? — деб сўради Темир офицердан.

— Ҳа, — офицер гапни қисқа қилди.

«Самолётта чиқамиз шекилли. Қаерга борамиз экан. Масофа узоққа ўхшайди-ку». Сўрашга ботинмади. Бўлгани бўлди, пешонада борини кўради. Ўйлагани тўғри чиқди.

Бироз учишгандан кейин, Темир чидағ туролмади, офицердан сўради.

— Қаерга кетяпмиз?

Офицер анча кўнгли юмшоқ одам қўринади, жилмайди.

— Барибир эмасми, оғайни. Афғонистоннинг у бурчига бординг нимаю бу бурчига бординг нима. Ҳамма жойда уруш, ҳар ерда душман, хавф-хатар.

— Ҳар ҳолда сўраяпман-да.

— Ҳиротга, — деди офицер яна қулиб.

Бу гапни рост айтдими ёки «жуда узокқа» деган маънода ҳазиллашиб айтдими — Темир билолмади.

— Ростданми? Ростдан Ҳироттами?

Темирнинг ҳаяжонли саволи офицерни қизиктириди.

— Рост бўлганда нима, Ҳирот курортми сенга?

— Йўқ, курорт эмас. Аммо Ҳиротта борсак хурсанд бўлардим.

— Сабаб?

— Сабаби у ерда бизнинг буюқ шоиримиз Алишер Навоийнинг қабри бор. Уни зиёрат қиласдим. Агар шу ниятимга етсан бу ерда ўтган умримга, йўқотган соғлигимга ачинмасдим, — деди Темир ҳаяжондан ўзини босолмай.

Офицер маъноли қаради Темирга.

— У ҳолда хурсанд бўлавер, ниятингга етишинг мумкин. Ҳиротта бораётганимиз рост. У ердан яна қаерга кетамиз — буниси менгаям қоронғи. Аэропортда кутиб олишади. Қаёққа деса — шу ёққа кетамиз.

— Шуни олдинроқ айтишмайдими...

Ранжли оҳангда чиққан бу гапни кимга айтди, офицергами, ўзигами, билолмай қолди.

— Олдин билганингда нима қиласдинг?

— Ҳеч нарса.

Чинданам олдин билганида бирон нима ўзгарармиди? Ўзгарарди! Туйғулари ранжимасди, балки таскин топарди, шодланарди. Бирон жойга мажбуран, ўлганингни кунидан борган қаёқда-ю, ўз ҳоҳишинг билан борганинг қаёқда. Буни армиянинг темир интизомига ўрганиб, ўзиям қарийб темир одамга айланиб қолаёзган мана бунга ўхшаган офицерлар қаёқдан тушунсин, ҳис этсин! Булар учун Ҳирот билан Каңдаҳор, Мозори Шариф билан Кобул, Жалолобод билан Кунарнинг фарқи йўқ. Ҳаммаси Афғонистон, ҳаммаси

жанг майдони, ҳаммасини душмандан тозалаш керак! У ерлардаги муқаддас масканлар, табаррук одамларнинг хоки туроби қўйилган азиз жойлар аҳамиятсиз...

## II

Темир анчадан бери йўқоттан бебаҳо нарсасини дафъатан топиб олган одамдай қувонди. Бу заминга келганидан бери бунақа суюнмаганди. Ич-ичидан севинди. Ҳатто Оллоҳга шукроналар билдириди. Чеккан азобларим, хавф-хатарга тўлиб ўтган кунларим бесамар кетмайдиган бўлди, деб қувонди. Ахир ҳазрат Навоий қабрини зиёрат қилиш ҳаммагаям насиб эта-вермайди-да!

Самолёт бир маромда гувиллаб парвоз қиласди. Ҳамма жим, кимдир мудраган, кимдир хаёлга чўмган.

Навоий қабрини зиёрат қилиш истаги унда биринчи курсда ўқиб юрганидаёқ туғилганди. Бунга Fafur Fуломнинг машҳур шеъри сабаб бўлганди. Шеър унинг қалбига кириб борган, икки-уч марта ўқиши биланоқ ёдида қолган эди. Ҳозир ҳам эсида:

Дилим равшанигин ҳиссум йўлига офтоб айлаб,  
Мозоринг бошига турмакдурмен сарҳисоб айлаб,  
Кулогинг сўз эшиштас бўлса ҳам қалбдан хитоб айлаб.  
Ватандошлар саломин неча жилди бир китоб айлаб,  
Навоий деб Мусаллога келибман интихоб айлаб.

У ерга киритармикан? Мақбарага ўқ тегмаганми-кан? Зиёратчилар кўпдир...

Шунга ўхшаган саволлар қуршовида ўзини Навоий қабри тепасида тасаввур этди. Тасаввур этдию юрагининг бир чеккасида ғашлик пайдо бўлди. «Шундай буюк зотнинг қабри тепасига елкамда автомат билан борсам-а. Қандай даҳшат! Етти ухлаб тушимга кирганими шундай қилиш?! Умри бўйи уруш-жанжалларни қоралаб, беклар, амирлар, ҳаттоқи ота-болалар ўртасидаги низоларни бартараф этиб келган Навоийдай табаррук зотнинг қабрини зиёрат қилгани қурол кўтариб бориш — ақлга сифмайди. Бу юртда бўлаётган жангу жадаллардан ҳазратнинг руҳи чирқираётган бўлса ажаб эмас...

Сўнг, Темир ўзига ўзи таскин берди. «Майли, нима бўлсаем боришим, зиёрат қилишим шарт. Ахир авто-

мат кўтариб юришга мажбурман-ку, ўз хоҳишим билан олиб юрганим йўқ-ку буни...»

Самолёт паstлай бошлади. Темир бутун кучини кўзига жамлаб қўйига — ҳазрат Алишер Навоий таваллуд топган ва ҳозир хоки туроби ёттан машхур Ҳирот шаҳрига қаради.

Маълум муддатдан сўнг самолёт оёқлари аэропортнинг бетон йўлкаларига келиб урилди. Темир енгил нафас олди. У гўё елкасига автомат осиб, душманларга қарши жанг қилиб юрган жангчи эмас, билъакс бир адабиёт, шеърият муҳлиси, табаррук жойларни зиёрат қилиб юрган сайёҳ, каби ҳис эта бошлади ўзини. Ҳозир қўнағадан автобусга ўтирадию Навоий қабри томон йўл олади.

Қани эди шундай бўлса...

Улар самолётдан тушибоқ машиналарга ўтиришди. Навоий қабри қаёқдаю улар қайси томонга кетишаپти — билмайди.

Анчагина йўл босишли. Назарида шаҳардан ташқарига чиқиб кетишаётганда туюлди. Темир хавотир илиа офицердан сўради:

- Шаҳардан чиқиб кетяпмиз шекилли?
- Саёҳатта келаётганинг йўқ ҳар ҳолда.

Офицер пичинги ҳафсаласини пир қилди. Наҳотки, орзулари саробга айланса, етдим деганда қоқилса.

Афсуски, шундай бўлди. Улар тушган машиналар аллақачон шаҳардан узоқлашиб кетган эди.

Темирнинг кайфияти тушиб, кўнглига ҳеч нарса сифмай қолди.

Узоқ юрдилар. Қош қорайиб, одам одамни таниши қийинлашди. Тазун қишлоғи атрофидагига ўхшаш тепаликлар, қир-адирлар бошланди. Чор-атроф ҳувиллаб ётипти. Тонг саҳардан бери йўлда келаётган жангчилар толиқдилар, кўзлари юмилиб, уйқу элитди. Қаёқча кетишаپти, нимага шунча сарсон бўлиб боришияпти — ақлга сифмайди. Шу ерларнинг ўзидаям ҳарбий қисмлар бордир ахир.

Кутилмаганда, оёқнинг остидан чиққан илондай, чап тарафдаги қоя остидан ўқлар визиллаб уча бошлади. Мудраб келаётган жангчилар кўзи чараклаб очилди. Дуч келган томонга автоматларини бўшатишиди. Лекин

дushman қаерда, қайси тош панасида — ҳеч ким билмайди. Машиналар тезликни пасайтирмади. Икки тарафдан шангиллаб ўқлар учиши авж олди.

Бир маҳал Темирнинг чап тирсаги жаз этди. Ўнг қўли билан ўша жойини ушлади: хўл. «Ўқ тегди, та мом». Хаёлига келган фикр шу бўлди. Яраланган қўлини кўттармоқчи эди, бўлмади.

Хайриятки, ҳайдовчиларга зиён етмади, машиналар тўхтамади. Қояни айланиб ўтишгандан кейингина отишма тинди.

— Ҳеч кимга ҳеч нарса қилмадими? — деди офицер.

Темир яраланганини айтди. Дарров қўлфонарни ёқиб қўришди. Тирсагидан пасти шалвираб осилиб ётарди. Боя иссигида билинмаган экан, совугандан сўнг оғрий бошлади.

Тиббий ходимлар уни зудлик билан ҳарбий касалхонага олиб бориш зарурлигини айтишди.

Бахтига касалхона яқин экан.

Жарроҳлик столига ётқизишганини билади, у ёғини эсләёлмайди.

Кўзини очса палатада ётипти, тепасида ҳамшира. Дарров қўлига қаради. Тирсагидан кесиб ташланган. Кўзларидан дувиллаб ёш оқиб кетди. Хаёли чархпалақдай айланди, кўз ўнгида ота-онаси, Гавҳар, опа-сингиллари гавдаланди. Оғриқданмас, энди умр бўйи бир қўл бўлиб қолганидан йиглади, эзилиб йифлади.

Оқ халатли ҳамшира йигит кўзида ёш кўриш нақадар оғирлигини сезардию, нима дейишини билмас, фақат нозик бармоқлари билан унинг ёноқларини артди.

Ичидаги дардлари кўз ёшларига қўшилиб чиқиб кетдими, анчадан кейин сал енгил тортгандай бўлди. Ҳамшира ўтирганини гўё энди сезгандай, унга маъюсланиб қаради.

— Мени кечиринг, — деди хаста товушда. — Ўзимни тиёлмадим.

— Бошингиз омон бўлсин ишқилиб. Пешонангизда бор эканда, нима қиласиз. Хафа бўлманг... — Ҳамшира хўрсинди-да, гўё ўзига ўзи гапираётгандай пичирлади: — Не-не йигитлар ўлиб кетди-я.

Йигирма кунлардан кейин яраси сал битиб ҳовлига чиқиб юрадиган бўлди. Ҳеч кимни танимайди, ёлғиз ўзи айланиб юради. Бирда кўнгли ўқсиб, ичидан йиги босиб келади, бирда омон қолганига шукур қиласди. «Ўша ўқ қўлимгамас, бошқа жойимга текканида нима бўларди. Ҳозир бу дунёда юрмасдим. Ҳалиям Худо асрди».

Бир куни касалхона ҳовлисидаги эндиғина гуллай бошлаган олчалар соясида айланиб юрган эди, кимнингдир «Темир» деб чақиргани қулогига чалинди. Шарт ўтирилиб қаради: ҳеч ким кўринмади. Мени бу ерда ким танирди, бошқа бирорни чақиргандир, мендан бўлак Темир йўқми бу дунёда, деган ўйда йўлида давом этди. Бояги товуш яна, фақат яқинроқдан эшитилди. Темир яна қаради. Нариги йўлақдан бир киши оқсоқланиб келарди. Э воҳ, қараса — Жўрақул!

Иккови бир-бирининг кўксига отилди. Қучоқлашиб турдилар, узоқ турдилар...

Тиллар жим, диллар сўзлашарди. Жўралардан бири силкиниб кетди, қайси бири — икковиям билмай қолди. Ажралишганда ҳар иккисининг кўзи намали эди.

Унсизгина бориб скамейкага ўтирдилар.

— Хайрият, кўришар кунимиз бор экан, — деди Жўрақул.

— Учрашган жойимизни қара-я.

— Шуни айт.

— Кобулда ажрашганимиздан кейин энди учраш масак керак бу ерда, деб ўйлагандим...

Икковиям бошидан ўттанини гапириб берди. Жўрақул оёғидан яраланган экан.

— Носиржон қалай, биргамидинглар? — деб сўради Жўрақул.

— Бошида бирга эдик, кейин уни бошқа жойга жўнатди. Қаерга кетди билмайман. Ҳатам ёзмади, ёзган бўлсаям етиб кемадими, менам у ёқдан-бу ёқقا кўчиб юрибман. Тайнли бир жойимиз йўқ.

— Азим-чи, Азим? Ундан дарак борми?

— Биргамасмидинглар?

— Йўқ, Кобулдан кейин у сизлар билан кетган, деб юрайдим.

Темир Азимни қачон, қаерда, қай аҳволда кўрганини кўзига ёш олиб айтиб берди. Жўрақул «Худо раҳмат қиласин» деб юзига фотиҳа тортди.

— Раҳматли ўт-олов йигит эди-я. Душманни қириб қаҳрамон бўламан, деб юрайди шўрлик.

— Қаҳрамон эмиш... Бошини есин ўша қаҳрамонлиги, ўзи омон бўлса майли эди...

Бир томондан қўлидан айрилгани, оғриқ, бир томондан зерикиш юрагини қон қилиб юборганди Темирнинг. Худо ўзи етказди Жўрақулни, ҳар нечук гаплашиб турадиган одам топилди-ку.

— Навоий қабрини зиёрат қилдингми? — деб сўради бир куни Темир.

— Шу алам қиляпти-да. Бурнингни тагида турсаю боролмасанг.

— Яқинми бу ерга?

— Аниқ билмайману эллик-олтмиш километр чиқса керак.

— Бу ердан чиққанимиздан кейин борсак бўлмасмикан-а?

— Рухсат беради, деб ўйлайсанми?

— Ким билади...

Бир ҳафталардан кейин Жўрақулга жавоб берадиган бўлишди. Аммо қаёқча боради, қисмгами ёки уйига кетадими — номаълум.

Врачлар сўзида турдилар, айтилган вақтда Жўрақул сафар халтасини елкалади, уйига кетадиган бўлди. Хайрлашар чори Темир унга тайинлади.

— Жон жўра, танишлардан биронтасигаям бу ердалигимни айтма.

Туркманистондан турли томонга тарқаганмиз, қаерда хизмат қилаёттанини билмайман, де.

— Кўнглинг тинч бўлсин.... Сенам тезроқ тузал. Эсон-омон Ўзбекистонда кўришгунча...

Кучоқлашиб хайрлащилар.

Шундай қилиб, Жўрақул жўнаб кетди.

Темир учун яна зерикарли кунлар, ёлғизлик изтироблари бошланди. Жўрақулга ўрганиб қолувди. У кетгандан бери гўё ён-атрофида ҳеч кимса қолмагандай, ҳаммаёқ ҳувиллаб ёттандай туюлади. Қўли анча тузалиб, юзигаям сал-пал ранг кириб қолган бўлса-да, кайфияти ҳамон тушкин...

## Саккизинчи боб

### I

Мана энди ўша оғир кунлар ортда қолди...

Темир, уйда уч ҳафтани ўтказиб, Тошкентта ошиқа бошлади. Пойтахтдаги ҳарбий комиссариятта учрашмоги керак. Лекин асосий мақсади тезроқ Гавҳарни кўриш эди. Анов куни отасидан ижозатини олгандан кейин ер-кўкка сифмай қолди.

Эрталаб Темир самолётга чиқди, Тошкент қўналрасига қўнгунича Гавҳарни ўйлаб келди.

Ичида Худодан тилаб бордики, Гавҳар Тошкентда бўлсин деб. Ўйлаб кўрса ундан хат олмаганигаям анча бўп қопти. Тазунда олуви охиргисини. Кейин ёзган бўлсаям Темирга етиб бормади. Касалхонада эканлигида ўзи хат битиб, ҳозирча ёзмай туриング, манзилим ўзгариши мумкин, аниқ бўлгандан кейин ўзим маълум қиласман, деганди. Яралангани, касалхонага тушгани борасида лом-мим демаган. Бу аҳволда кўриб Гавҳар қандай аҳволга тушаркан?.. Айниб қолмасмикан?

Темирнинг миясида минг хил ўйлар чирпирайди. «Бордию Гавҳар эрга тегиб кетган бўлса-чи? Отноаси қараб ўтирамиди? Йўғ-э, ундай бўлса ёзмасмиди. Хатларида бу ҳақда ҳеч гап йўқ-ку. Турмушга чиқса аввало мени унутарди. Ростда, эрга теккандан сўнг бегона йигитта хат ёзиб нима қиласди... Йўқ, Гавҳар унақаларданмас, у мени кутади, ишонаман».

Худди бирор билан тортишашётгандай Темир ўзи билан ўзи фикран олишар-ди. Ҳаёл экан-да, у жиловга сифмаса, истаган томонга, хоҳлаган гўшасига кираверса. Ҳаёл туфайли гоҳо одам жоҳиллик қилиб қўяди, энг яхши қадрдан одами тўғрисидаям гумонларга бориб қолади. Бўлмаса ҳеч нарсадан ҳеч нарса йўқ. Темир Гавҳар ҳақида шу ўйларга борармиди? Наҳотки, Гавҳардай мулоҳазали, ақдли қиз севган йигити армиядан келгунча кутмаса? Кутади, ҳали икки йил эканку, ўн йил бўлса ҳам кутади. Бунга Темир ишонади.

Темир ўзини ўзи койиб, ўзига ўзи таскин бериб, фикран олишиб Тошкентта етди. Соат тўртта яқинлашган эди, Тошкентда ҳарорат қирқдан зиёд, нафас олишгаям қийналади одам.

Олдин жой масаласини ҳал этмоғи керак. Ким билади, икки йил давомида Нина Ивановнаникода нима

гап, ўзи уйидами-йўқми, ёзда Красноярсқдаги қарин-дошлариникига жўнаб қоладиган одати бор эди. Ундан ташқари жой борми-йўқми, буни билиши керак. Ижарачисиз ўтирумайди кампир.

Шу ўйлар билан бекатта келди-да, такси тўхтатди.

У кириб борганда кампир ҳовлисидағи бир тупгина олча соясида ўша пастаккина стулчасида пайпоқ тўқиб ўтиради. Темирни кўрди-ю, ҳанг-манг бўлиб қолди.

— Темирчик, сенмисан?

— Менман, Нина Ивановна,— деди Темир хотиржам.

— Қўлингта нима қилди? Афғонистонда бўлдингми?

— Шундай.

— Вой, бечора болам, роса қийналибсан-ку. Қачон келдинг?

— Ҳозир келишим.

— Армиядан-а?

Темир кулди.

— Э, йўғ-э, уйдан келяпман, Нина Ивановна, ишларимни тўғрилагунимча бир-икки кун қолишимга тўғри келади. Жой борми?

— Нималар деяпсан, Темирчик, сенга жой бўлмаса кимга жой бўлади.

— Ижарачи қўйгандирсиз, демоқчиман-да.

— Қўйишга қўйгандирман, аммо сен учун ҳамиша жой топилади.

— Раҳмат, Нина Ивановна. Бўлмаса мен кетдим.

Кечқурун бемалол гаплашамиз.

— Чой ичмайсанми?

— Йўқ, аввал ишларимни битказай.

Керакли ҳужжатларини олди-ю, дипломатини қолдириб, чиқиб кетди.

Катта кўча сари илдамлаб, режа тузди: олдин район ҳарбий комиссариатига учрашади, кейин Азимникига кириб фотиҳа ўқиб чиқади, кечқурун, ётоқхонага — Гавҳарнинг олдига боради.

Ҳарбий комиссариатдагилар ҳали у, ҳали бу деб, анча тутиб қолишли. У ердан бир оз кайфияти бузилиб чиқди. Азимникига бормоқни ўлади. Аммо фикридан қайтди. Эрталаб уйда еган овқати билан юргани учун қорни очди, бирон жойдан тамадди қилиш даркор. Унгача анча кеч бўлиб кетади. Қолаверса, ҳозир боргиси келмади. Билади — борса ота-онасининг яраси қайтадан янгиланади, онаси бечора оби-дийда қилали... Ўзи йўлдан чарчаб келди, устига устак анов маҳди...

камада асабига тегиши. Шу аҳволда яна юрагини эзишни истамади, бу оғир, албатта. «Эртага эрталаб бораман яхшиси. Ҳозир бирон жойдан овқатланиб, кейин Гавҳарнинг оддига жўнайман».

Гавҳарни ўйлаб, сал қайфияти кўтарилди. Ўқиб юрган кезлари марказий хиёбондаги «Дўстлик» қаҳвахасини ёқтиради, чўнтағига пул тушди дегунча ўша ерга борарди дўстларини етаклаб. Гавҳар билан ҳам икки-уч марта кирган.

Шулар эсига тушиб ўша жойга боришга қарор қилди. «Балки один Гавҳарни топишим керакми? У билан бирга келсам бўларми?... Йўқ, аввал ўзим тамадди қилиб олай, уни қачон топаман? Қорин пиёз пўсти бўп кетди».

Шоша-пиша овқатланиб, ширин хаёлларга кўмилганча, йўлга тушди. Афсуски, Гавҳарни тополмади. Ётоқхона, қоровулдан бўлак ҳеч ким йўқ, ҳувиллаб ётарди...

Тарвузи қўлтиғидан тушиб изига қайтди. Ётоқхона ёнидаги хиёбонга кирди-да, ёғоч ўриндиқقا ўтири. Ўтган-кетганни томоша қилиб сигарет чекди. «Эҳ, бўлгани бўлди, энди кампир билан валақлашамиз бутун. Эртага Азимникига кириб чиқаману кейин кетаман. Сандирақлаб юраманми Тошкентни жазирамасида... Сентябрда насиб этаркан-да энди Гавҳар билан кўришиши».

Нина Ивановна билан телевизор кўриб, анчагача гаплашиб ўтири. Кампир ҳаммасиини эринмай сўради. Сентябрдан бошлаб яна шу ерда туришга Нина Ивановна билан келишиб одди...

Темир ўқиб юрганида бир-икки борган эди Азимларникига. Дадасиям, ойисиям танирди. Агар хотираларидан кўтарилган бўлмаса, ҳозир ҳам танишлари керак.

Эшикни Азимнинг дадаси очди.

— Ассалому алайкум.

— Баалайкум ассалом.

Сезилдики, у киши Темирни танимади. Темир, гангуб, «Мен Азимни ўртоғиман», деса дабдурустдан, қандай бўларкин?

— Келинг, ўғлим, марҳамат, — деб ичкарига бошлади мезбон.

Ҳовлига стол-стул қўйилган экан, шу ерда ўтиришди. Азимнинг ойиси ҳам уйда экан.

— Мени танимадингиз чамамда, — деди Темир.

— Айбга буюмайсиз энди.

- Менинг исмим Темир... Азим билан бирга ўқирдик.  
Мезбон ялт этиб қаради.
- Шундай денг.
- Менам яқинда келдим армиядан.  
Мезбон Темирнинг қўлига қаради-ю, сўрашга ис-тиҳола қилди.
- Сизам Афғонистонда хизмат қилдингизми?
- Ҳа, мана битта қўлни ташлаб келдик... Биз Азим билан бирга жўнаган эдик. Туркманистондаям бирга эдик. Афғонистонга борганимиздан кейин ҳаммамизни ҳар ёқда сочиб юборди... Бир фотиҳа ўқиб, сизлардан кўнгил сўраб кетай, деб келувдим.
- Мезбон фотиҳа ўқиди.
- Раҳмат, ўғлим, умрингиздан барака топинг, —  
Азимнинг ойиси Темирни дуо қила-қила йиглаб юборди.  
Орага оғир сукунат чўқди.
- Бўлди. Ҳадеб йиглайверганинг билан фойдаси борми?
- Қиличдай ўғлим ўйнаб-кулиб жўнаб кетса-ю...
- Она шўрлик оғир хўрсинди, азиз фарзандини то-бутда олиб келишганини айтишга тили бормади.
- Хе, дунё!..
- Темирнинг кўзларидан ҳам ёш тирқиради.  
Азимнинг дадаси хотинини чалғитиш учун:
- Бор, чой дамлаб кел, — деди.
- Хотини туриб кеттандан сўнг Темирдан сўради:  
— Азим бундай бўлганини кимдан эшитдингиз?  
Темир кўрган-билганини қисқача айтиб берди.  
Азимнинг дадаси Темирнинг ҳикоясини тинглаб,  
баттар эзилди.
- Унугилаёзган дарди қайтадан ачиштира бошлади юрагини. Ўзини босиб, ичдан титраб кетаёттанини сез-дирмай ўтирди.
- Бу гапларни ойиси билмай қўя қолсин. Бўлмаса тоза эзилиб кетади. Аммо сизга минг раҳмат, ўғлим.  
Умрингиз узоқ бўлсин.
- Она бечора бу гаплардан бехабар қолди. У келиши билан эри гапни бошқа тарафга бурди...
- Пешингача сухбатлашиб ўтиришди.
- Кетар чоғи Темирга чопон, дўппи кийдириб, бели-га қийиқча боғлаб қўйишиди. Темир «овора бўлманг-лар, керак эмас», деган эди.
- Азимнинг ойиси кўз ёшларини тиёлмай деди:

— Раҳматли Азимимга олиб қўйган эдим... Умрингиз ўхшамасин. Илоё куёв бўлганингизда, яхши кунларингизда кийинг, ўғлим. Энди бизга қадрдан бўп қолдингиз, тез-тез келиб туринг. Ўғилларим билан акука бўлинг.

Хонадон эгалари Темирни дуо қилиб кузатиши...

## II

Август охирлаб қолган бўлса-да, Тошкент иссики тафтидан тушмаган, жизиллаб куйдиради офтоб. Ургутнинг салқин ҳавосидан чиқиб келган Темирга иссиқ бошқача таъсир этди. Ҳаво дим, ҳаммаёқда асфальтнинг бад бўйи. Ўқиб юрган пайтлари сезмаган эканми ёки кўниги қолганми — билинмасди.

Нина Ивановнанинг кафтдай ҳовлисида, одча соясида бироз ўтириди. Қилт эттан шабада йўқ. Тўрт тарафи уйлар билан ўралган бу ҳовлига шамолни боғлаб қўйсаям турмайди ёки нафаси қайтиб адо бўлади. «Бекорчилик бадга урди, ҳаммомга тушгандай бўлиб димиқиб ўтиргандан кўра кўчага чиқай, ҳарқалай салпал бўсаям шабада бордир, ҳам ишим битади».

У тўғри факультетга борди. Деканатта кирди. Ҳеч ким йўқ. Нима қиласини, кимдан сўрарини билмай турувди, бир қиз келиб эшикни очди. Деканни сўраб, изига қайтиди.

Кўчага чиқди. Энди Гавҳарни топиши керак. Келганикан? Келгандир. Эрта ўтиб, индин ўқиш-ку.

Шу ўйлар билан ётоқхона томонга юрди.

Гавҳарнинг олдинги хонасини биларди, кўп келган. Лекин ҳозир ҳам шундамикан? Таваккал деб таниш эшикни тақиллатди. Ичкаридан «ҳозир» деган товуш эшитилди. Гавҳарми? Нимагадир овози бошқачароқ чиқди. Балки бошқадир? Ёшгина бир қиз (бу йил ўқишга кирган бўлса керак) эшикни очди.

— Кечирасиз, синглим, Гавҳар деган қиз қайси хонада туради, билмайсиз-ми?

Темирнинг тахмини тўғри чиқди — қиз шу йил ўқишга кирган, юқори курс талабаларидан ҳеч кимни танимас экан. Ҳайрон бўлиб, не қиласини билмай, ўйланиб турувди, йўлакнинг нариги бошида бир қиз кўринди. Ундан сўраш учун шу томонга юрди.

— Танийман, — деди қиз, — бешинчи курсда ўқийдими? Фарқоналиқ-а?

— Ҳа, — деди Темир қувониб.

— Учинчи қаватда туради. Мана шу томондаги энг охирги хонада бўлса керак.

Темир раҳмат айтиб, юқорига кўтарилди. Қиз тушунтиргани бўйича йўлакнинг охиридаги эшикни тақиллатди.

— Ким? Кираверинг.

Темирнинг юраги ўйнаб кетди. Бу ўша! Гавҳар! Овози таниш. Худди ўзи.

Икки йил ичида қанча-қанча одамлар билан гаплашган, не-не воқеаларни кўриб қайтган эса-да, Гавҳарнинг овози қулогига сингиб қолган экан, адаштирумади.

Эшикни тортди. Очик, экан.

Хонада Гавҳар ёлғиз (омадни қаранг) эди. Темирга кўзи тушди-ю, ҳайкалдай қотиб қолди. Темир ўзини дадил тутиб, қиз томонга юрди.

— Гавҳар!

Қиз ўзини йигитнинг қучоғига отди.

— Темир ака!

Ҳаётнинг энг ширин, энг лаззатли онлари!

Улар шу ҳолда узоқ турдилар.

Йигит аста қизнинг бошини кўтарди. Унинг қопқора кўзлари, узун-узун, қалин киприклари жиқقا ёш эди. Темир ёшли кўзларига лабларини босди. Сўнг лўппи ёноғи, тиниқ бўйнидан ютоқиб ўпди, ўпди, ўпди. У гапиролмас, фақат узоқ югуриб чарчаган одам сингари ҳансирар, бўса олишдан тўхтамас эди. Йигитнинг ҳам, қизнинг ҳам юраги қафас деворига урилаётган каптардай потирлар эди...

Темир стулга, Гавҳар каравотта ўтириди.

— Қалайсиз? Тузукмисиз? — Темир сал ўзини босиб олиб сўради.

Қиз соchlарини қўли билан тўғриларкан:

— Раҳмат. Ўзингиз яхши келдингизми? — деди. — Кўзларим тешилиб кетди кутавериб.

— Келдим, мана. Лекин...

Гавҳар унга саволчан қаради. Темир кўнглидаги дардни — «Мен бир қўлимдан айрилиб келдим, айнимайсизми мендан» демоқни ўйлади.

— Лекин, мана!.. — ногирон қўлига ишора қилди.

— Илтимос, Темир ака, мени яхши кўрсангиз бу ҳақда гапирманг. Кўриб турибман... Сиз курортгамас, Афғонистонга — жангу жадалга бориб келганингиз-

ниям биламан. Аммо ҳозир гапирманг, вақти-соати билан айтарсиз. Айтмасангиз ҳам мажбур қилмайман. Энг муҳими, жонингиз соғ қайтиб кебсиз-ку.

Темир қизга сүк билан термилди. У ҳозир уй кийимида — устида оддийгина чит халат, пардоз-андозлари ҳам йўқ, лекин шу ҳолда ҳам гўзал, истараси иссиқ эди.

— Ростми, Гавҳар? — деди Темир унинг соchlарини силаркан. Унинг товуши хастароқ чиқди. Томогига бир нарса тиқилганидан қийналиб гапирганини қиз сезди. Йигит юзини қизнинг кўксига қўйди. Мақсади — кўз ёшларини беркитиш эди. Лекин бекитолмади, кўзларини яширса-да, елкаси титраб кетганини ўзиям билмай қолди. Гавҳар аста унинг бошини кўтарди. Кўзларига термилди. Йигитнинг киприклари нам эди.

— Рост, жоним! — деди Гавҳар майнин оҳангда. — Ишонинг менга!

Деразадан ботаёттан қуёшнинг қизғиши шуъласи тушди.

— Қани бўлмаса кийининг, кетдик!

— Қаёққа?

— Кетдик, кўчага чиқамиз.

— Кўчада нима қиласмиш?

— Юринг дегандан кейин юраверинг.

Улар қадрдан жойлари марказий хиёбондаги «Дўстлик» қаҳвахонасига келишди. Икки-уч соат гурунглабиш ўтиридилар.

Қаҳвахонадан чиқишиганда ҳам кайфиятлари енгил, диллари чоғ эди. Гўё орадан икки йил ўтмагандай, Темир армияга эмас, қишлоғига бориб келгандай — шундай тасаввурда эдилар.

Темир Нина Ивановнанинг кулбаси сари бошлади. Гавҳар унамади, гарчи ичидан Темирдан ажralишни истамаёттан бўлса-да, ўзини тутиб, ноқулай деб турниб олди.

— Нимаси ноқулай? Кампир сизни билади, яхши танийди...

— Кетдик! Барибир қўйиб юбормайман бутун.

Темирнинг қатъий гапидан сўнг ноилож йўлга тушди.

Улар келганда кампир ухлаб қолган эди.

Кичкинагина, деярли ҳеч қандай жиҳози йўқ хона Гавҳарга жуда қадрли, ўз уйидай кўнглига яқин эди.

Ана шу мўъжазгина хонанинг чироғи шу куни тонггача ўчмади...

1988—2000 йил

## КЎҚКЎЛ

### I

Сочидан қайтганидан сўнг Ботир хаёлчан, камгал бўлиб қолди. Ишхонасидағилар, дўстлари ҳайрон. «Дам олишдан келган одам қувноқ, тетик бўлгучи эди, Ботир тескариси...» Бу гапни унинг ўзига очиқ айтганлар ҳам топилди. Аммо аниқ жавоб ололмадилар.

Кун ўтди, ой ўтди, ойлар ўтди. Ботирнинг хаёлчалиги тарқамади. Аста-секин бу ҳолнинг боиси дўстларига бир қадар равшанлашди. Унинг гапларидан аён бўлди. Ботир асосан икки мавзуда сўзлайди: бири — севги, иккинчиси — Озарбойжон. Дўстлари ўзаро тажмин қилишди: «Ҳойнаҳой бу бола дам олишга борганда биронта озарбойжон қизини яхши кўриб қолганга ўхшайди».

Бир куни Ботир Бокудан хат олди. Бундан хабар топган ҳамкаслари бояги гумоннинг тўғрилигига имон келтиришди. Қитмирроқлари «Ҳа, Ботирвой, насиб этса, Бокуга тўйга борар эканмиз-да», деб учирма ҳам қилишди. Ботир бу гапларга эътибор бермади. Унинг хаёли чўнтағидаги хатда: «Нима деб ёзди экан? Гулгинанинг ўзи ёздимикан ёки отасими? Кечикиб кеттанидан энди жавоб келмаса керак, деб ўйловдим. Бари бир ёзипти-да...» Хатни очиб ўқий деса, ҳамхонаси шилқим, эзма бир одам. Кўрингандан суюнчи олиб юради. Аксига олиб хонадан чиқмай ўтиришини қаранглар.

Ботирнинг юраги сиқилиб кетди. Чекиш баҳонасида ташқарига чиқди. Холироқ бир жойга ўтди-да, апилтапил пакетни очди, чиройли ҳуснихатда битилган хатни ютоқиб ўқий бошлади.

«Ботир муаллим, салом! Мактубингизни олдим. Ташаккур. Аҳволингиз нечук? Дашканда не хушхабарлар вар?

Манимда, атаминда тани саф, ҳамиси яхши.

Сиз ила гечан гунларни, сухбатларни эслаяжакмиз. Сизи шеър ўхушингиз маним ҳушима галур.

Бакийа галин. Биза қўноқ ўлин. Жалил муаллим сиза чўх саломлар деюр.

Сиза сиҳатлик, хуш кайфият тилаюрам. Соғ ўлин!  
Гулгина».

Хатни ўқиб, Ботирнинг бутун вужуди жимирилаб кетди. Кўз олдида Гулгина гавдаланди. Унинг товуши қулоқлари остида жаранглагандай туюлди. Чуқур хўрсинди, айни чоқда ички бир қониқиши, нимадандир суюниш ҳиссини туйди.

Шу куни ишдан кейин тўғри шаҳарлараро телефон станциясига йўл олди. Гулгинанинг мактубига жавоб ёзишга сабри чидамай, у билан гаплашгиси келди, унинг овозини эшитишни жуда-жуда истади.

Навбатчи бир соатлар кутасиз, деди. Рози бўлди. Зотан, ҳозир у эрталабгача кутишга ҳам тайёр. Фақат Бокуни улаб берса, симлар орқали бўлса-да, Гулгинанинг ёқимли овозини, ширали тилини эшитса бас. Бундан муҳим, бундан лаззатли, бундан ёқимли нима иши бор ҳозир!

Ташқарига чиқиб сигарет тутатди. Чўнтағидан хатни олиб яна кўз югуртириди: «Сизи шеър ўхушингиз маним ҳушима галур». Бу сатрлар Ботирнинг кўзига нур, дилига роҳат, томирларига қон каби йўғриларди.

Кимнингдир озарбайжонча гапиргани қулоғига ча-линди. Ялт этиб атрофига қаради. Чиройли бир қиз ёнидаги йигитта нима ҳақдадир куйиб-пишиб сўзларди. Унинг овози Гулгинанинг товушига ўхшарканми ёки бу ерда, кутилмаганда озарбайжонча суҳбат эшитганиданми — Ботирнинг юраги ҳаприқиб кетди.

Шу маҳал кутиш залида навбатчининг «Баку седмая кабина. Баку седмая кабина» деган овози эшитилди. Ботир югуриб еттинчи қабинага кирди.

Бири кам дунё деганлари шу-да. Гулгина уйда йўқ экан. Жалил Жамолзода билан гаплашди...

Бари бир Ботирнинг кўнгли ёруғ эди. У минг андиша билан хат ёзганди Гулгинага. Ҳадеганда жавоб келавермагач, бир оз хижолат, ҳатто пушаймон ҳам бўлган эди. Бугун эса Гулгинанинг мактуби унинг кўлида. Мана, ҳозиргина Гулгинанинг отаси билан сўзлашди.

Гапларидан билиниб турипти — хат ёзганидан, қўнғироқ қилганидан у ҳам хурсанд.

Демак, энди бемалол мактуб битавериши, имкони топилганда телефон қилиши мумкин.

Шундай бўлди. У хатлар ёзди. Гулгинадан жавоблар олди. Бокудан мактуб олган куни — Ботир учун байрам. Телефонда эса икки мартагина гаплаша олди, холос, Гулгина билан.. Унда ҳам қисқагина ҳол-аҳвол сўрашишдан, бир-бирини Тошкентга ва Бокуга таклиф этишдан нарига ўтолмадилар. Ботир кўнглида бир дунё гаплар билан киради телефон кабинасига. Гулгинанинг юракни сариёдай эритиб юборувчи сўзларини эшитгач, бутун гаплари эсидан чиқиб кетади, довдирраб қолади...

Бир йил ана шундай ўтди.

У энди сабрсизлик билан отпускасини кутди. Бутуноқ отпускага чиқса-ю, қанот боғлаб Бокуга учса...

\* \* \*

«Тошкент — Боку» самолёти тонг ёришганда ердан кўтарилиди.

Иллюминатордан ташқарига қараб ўтирган Ботир ўйга толган. Нигоҳи Тошкентнинг осмонўпар биноларига, бир-бирини қувиб кетаётган машиналарга, янги массивларда қўзиқориндек потраб ёттан бетон уйларга тушса-да, хаёл кўзлари Каспий соҳилида эллипс шаклида ястаниб ётган Бокуни, унинг сершовқин кўчаларини кўрар, рассом Жалил Жамолзода ва унинг қизи билан бўлажақ учрашувини тасаввур этар эди.

Жалил Жамолзода билан бир йил олдин Сочида, дам олиш уйида танишган. Аслида уларнинг танишувига Жамолзоданинг қизи сабабчи бўлган эди.

Ботир бунаقا жойларга биринчи келиши. Нонушта қиласидиу денгизга чопади. Чўмилиб чиқиб пляжда китоб ўқиб ётади. Аммо ҳар кун бир хил машғулот, гарчи у жуда завқди бўлса-да, одамни зериктиради. Аста-секин Ботирнинг ичи қизиди. Ўтган-кетгандан гурунглашай деса, бирон-бир киши билан яқинроқ танишгани йўқ. Кўпчиликнинг шериги бор. Ботирга ўхшаб ёлғиз юрганлар кам.

Бир куни тушликка бир оз кечикиб келди. Ошхона эшигининг дастасига шундай қўлини узатиши билан эшик ичкаридан очилди-да, рўпарасида бир қиз

пайдо бўлди. Шошиб келаёттан Ботир бу соҳибжамолни кўриб таҳтадай қотиб қолди. Унинг чаросдай қоп-қора кўзларини найза қаби киприклари қўриқлаб туради. Елкасини қоплаган сиёҳ соchlари шундай ярашган, шундай ярашган... Бу қадар гўзал, бу қадар ярашикли сочни Ботир ҳали кўрмаган эди. Қиз унинг олдидан оху сингари сассиз-садосиз ўтаркан, нимадир деди. Ботир азбаройи гангиг қолганидан унинг сўзини англаёлмади — салом бердими, бошқа бир сўз дедими — билолмади. Бир қўли билан эшик тутқичини ушлаганча, унинг ортидан термилиб қолди. Устидағи жинси қўйлаги қоматини самбитдай тутиб турад, Ботирга коридордан одам боласи эмас, ҳовлидаги сарвалардан бири оҳиста юриб кетаётгандай туюлди...

Стюардессанинг товуши унинг хаёлини бўлди: «Ҳурматли пассажирлар! Бизнинг самолётимиз Ўзбекистон, Қорақалпоғистон, Туркманистон территориялари, Орол ва Каспий денгизи устидан ўтади-да, Боку аэропортига қўнади».

Ботирнинг чап ёнида ўтирган семиз киши унга гап қотди:

— Оддин ҳам борганимисиз Бокуга, ука?

— Ҳа, бўлганман,— гапни қисқа қилди Ботир. Бироқ семиз кишининг саволи тугамади.

— Менинг биринчи боришим, у ерда гастинса масаласи қандай экан, билмайсизми?

— Билмадим,— деди Ботир,— ҳамма жойга ўхшагандир-да.

Ботирнинг кесиб-кесиб гапиргани ёқмадими ёки саволи тугадими, семиз киши жим бўлди. Креслога ястаниб ётиб олди. Ҳаш-паш дегунча унинг хурраги эшитилди. «Роса бекам одам экан-да. Гапириб туриб ухлаб қолди-я...» Ботирнинг одати самолётда, автобусда — қанча юришидан қатъий назар — ухлаёлмайди.

«Эҳтимол, маълум даражада шунақаси ҳам тузукдир. Ҳеч нарсадан бехабар ётаверади». Бу фикр унинг хаёлидан ўтишга ўтди-ю, аммо ўзи ҳеч қачон унга амал қилолмаслигини, ҳатто бу қадар бегамлик одам боласига ярашмаслигини ич-ичидан туйди. Зотан, унинг энг ёмон кўргани лоқайдлик. Ўрини, муттаҳамни кечириш мумкин, аммо лоқайд одамни кечириб бўлмайди, деб ҳисобларди. Чунки ўрининг, каззобнинг ния-

ти маълум, киши ўзини шунга тайёрлаб юради, лекин лоқайд одамнинг мақсади ноаниқ, тушунарсиз...

Ўша учрашувдан кейин Ботир ҳаловатини йўқотди. Овқат маҳали ҳам, пляжда ҳам ҳалиги қизни қидиради. Аммо ҳадеганда уни учратавермади.

Кечки овқатдан сўнг ҳовлидаги скамейкада дам олиб ўтирганди, ўша соҳибжамол ўтиб қолди. Унинг ёнида ёши элликни қоралаган, қалин соchlари ўсиб кетган, қирғий бурун, қарашлари ҳам бургут кўзларидай ўткир бир киши бор. Ботир бўшашиб кетди, негадир юраги гупиллаб урди, гарчи бу қизнинг лоақал исмини ҳам билмаса-да, ёнида эркак киши юргани нечундир унинг ғашини келтирди. Ўзининг бу қилиғидан ўзи ҳам ҳайратга тушди. «Хўш, менга нима? Ахир уни танимасам, билмасам, нега энди жаҳлим чиқади? Қизиқ-ку...»

Ботирнинг фикри охирига етмасданоқ, бояги киши унинг ажабланиб қараб турганини сездими, ёнига келиб кўл узатди:

— Салом, сиз Ўзбекистондансиз?

Унинг гапиришидан сездики, озарбойжон экан.

— Ҳа,— деди Ботир,— сиз-чи, Озарбойжонданми?

— Бали,— у Ботирнинг ёнидан жой олди, нариги томонига ўша соҳибжамол ўтирди.— Маним отим Жалил Жамолзода, рассомман. Сизи отингиз нади?

— Ботир... журналист.

Жамолзода қалин соchlарини бармоқлари билан орқага силтаб ташлади-да, кулди. Кулганда унинг кўзлари янада яшнаб, сухбатдошини таъқиб этувчи бир тус олар экан. Бундай кўзларга тик қараш амримаҳол.

— Журналист? Чўх яхши, чўх гўзал. Маним журналистлара ҳурматим баланддир... Бу маним гизим — Гулгина, Гулгинахоним.

Қиз Ботирга қараб кулди. Унинг кулишлари ҳам гўзал эди... Эътибор берганмисиз, баъзи чиройли қизларнинг кулиши негадир хунук бўлади, ўзига ярашмайди. Бу гўзални «қизим», деб таништирганидан Ботирнинг кўнгли бироз ёришди, ҳали уларни кўрган маҳали дилининг бир четига ёпишган хиралиқ парда-си кўтарилгандаи туюлди.

— Танишганимдан хурсандман,— деди Ботир. — Мен сизни сиртдан танийман. Асаларингизни била-ман. Ўзбекистонда Озарбойжон адабиёти ва санъати

кунлари ўтказилганда очилган кўргазмада бор эди. Ундан кейин бултур Бокуга борганимда ҳам Марказий кўргазмалар залида кўриб эдим.

— Ташаккур, ташаккур...

Сұхбатга Гулгина қўшилди.

— Атамин ҳанси<sup>1</sup> асарлари ёдингизда?

Ботир бир лаҳза довдираб қолди. Йўқ, у кўрмаган асарларини қўрдим, деб ёлғон гапиргани йўқ. Каловлаб қолишига боис бу эмас. Чиндан ҳам Жалил Жамолзода деган рассомни у билади. Фақат кўргазмада эмас, «Искусство» журналида ҳам бу рассомнинг ишларидан намуналар эълон қилинган эди. Унга маъқул тушган картиналари ҳам ёдида. Ҳозир қизнинг гапидан сўзини йўқотиб қўйди. Зеро, қизнинг сўzlари шу қадар майин, шу қадар эркаловчи оҳангда эдики, ҳар қандай эшитувчини сеҳрлаб қўйиши тайин.

Жамолзода қизига танбеҳ берган каби:

— Кишини хижолатта қўймоқ на лозим. Балки номи эсида йўқдир,— деди.

Ботир ўзини қўлга олди:

— Йўқ, Жалил муаллим, ундай деманг. Эсимда, менга кўпроқ тарихий мавзудаги асарларингиз ёқдан. Хусусан, Бобак ҳақидаги картиナンгиз кўз олдимда турибди.

Рассомнинг юзлари ёришиб, лабларига табассум югурди. Ботирга миннатдорлик билдиришдан ўзини тия олмади.

— Ташаккур сиза, чўх ташаккур. Дуз дейирсиз.— Кейин қизига деди:— Кўрдингми, азизим, бу ўғлон ҳаммасини билар экан. Ҳолбуки, ўзимида кўпчилик билмайди ёки билса ҳам назарга илмайди.

— Атами асосий асарларини кўрган экансиз. Лекин яна бир машҳур картинаси вор: «Кўккўл». Кўрмаганмисиз?

Ботир ўйга толди. Йўқ, бундай асарни кўрмаган ёхуд хотирасидан кўтарилган.

— Сиз бунин гапларийа эътибор берманг,— деди Жамолзода.

— У картина ҳали кўргазмалара қўйилмаган.

...— Сув ичасизми, ука?

<sup>1</sup> ҳанси — қайси (озар).

Семиз кишининг саволидан хаёли бўлинди. Стюардесса сув таклиф қилиб турарди. Пластмасса стакнчадан бирини олди.

— Жуда хаёл суреб кетяпсиз, ука,— деди семиз киши. — Тинчликми ўзи?

— Самолётда бошқа нимаям қилиш мумкин. Хаёл сурасиз, булутларни томоша қиласиз. Шу-да.

— Бокуга оддин ҳам борган бўлсангиз биларсиз, у ернинг ҳавоси қандай экан?

— Иссик-да,— деди Ботир. — Июнь ойи ҳамма жойдаям иссиқ келади-ку. Ҳавоси дим. Терлаб кетаврасиз. Намлик баланд. Ҳаммомнинг буғхонасига киргандаи гап.

— Оббо, унда роса маза қиларканмиз-да.

Самолётнинг салқин салонида терлаб-пишиб ўтирган бу одам Бокуга борганда қандай аҳволга тушишини Ботир тасаввур қилиб кўрди. Бир лаҳзада бутун кийим-боши жиққа хўл бўлиб қолса керак.

— Ундей эса отпускада бу ёққа келиб нима қиласиз? Сочигами, Ялтагами бормайсизми? Маза қилиб дам олиб, чўмилиб келасиз. Жононлар тиқилиб ётипти.

«Туя ҳаммомни ҳавас қилган экан. Қорнини базур кўтаради-ю, яна жононлардан гапиради».

Ботирнинг шўхлиги тутди. «Қани бир гапга солиб кўрай-чи, бу одам ким, нима иш билан кетяпти Бокуга?»

— Командировкага кетяпсизми?— деди.

Семиз киши оғзини очмасдан кулди. Кулганда унинг япалоқ юзлари кенгайиб, оғзи бир тилими олинган қовундай бўлиб қулоқларигача чўзилиб бораркан.

— Командировкадан ҳам муҳимроқ иш билан кетяпман. Тўй ташвиши...

— Ўхў, зўр-ку,— деди Ботир кулиб. — Ўғил уйлантироқчимисиз?

— Ҳа, шундай.— Семиз киши ўғлидан бироз ранжиган оҳангда гапирди. — Ўзимизда қиз қуриб қолгандаи Озарбайжондан уйланмоқчи.

Бу гап Ботирни ўйлантириб қўйди. «Бир куни келиб менинг отам ҳам кимгадир шундай нолирмикан? Умуман, шундай бўлармикан?»

Ҳали ҳеч нарсанинг дараги йўғу, ўзича ширин хаёл суроёттанидан Ботирнинг кулгиси келди. Аммо шундай бўлишини жуда истади. Бу истак кўз ўнгидага яна

Гулгинани намоён этди. «У нима деркан? Балки турмушга чиқиб кетгандир. Беҳуда хаёл суриб юргандирсан эҳтимол... Гулгина...»

Ботир ширин бир туйғу ила хўрсинди...

— Ўғлингиз нима иш қиласди? Озарбойжон қизи билан қандай танишипти?

— Ирригация институтини битиряпти. Спортчи. Қанақадир мусобака деб, Бокуга келувди. Шу ерда танишиб қопти. Уям спортчи эмиш. Йўқ десам, кўнмади. — У ўтирган жойида бир қўзғалиб олди. — Ҳозирги ёшларга бир гапни тушунтириш ҳам азоб. Хўп, ука, анча бамаъни йигитга ўхшайсиз, айтинг-чи, узоқдан уйланиш осонми? Қанча ҳаракат. Ундан кейин келинни олиб келган билан иш битмайди-ку. Қуда-андачилик, борди-кељди, дегандай.

Ботир шеригининг кўнглини кўтарди:

— Ҳаммаям Озарбайжондан келин олавермайди-ку...

...Ботир иллюминатор томонга ўтирилиб яна хаёлга толди. Аста-секин Жамолзода билан яқинлашиб кетди. Энди улар тез-тез сұхбатлашиб туради, ҳар оқшом кинога ҳам учови бирга тушади. Дам олиш уйининг ҳовлисида сарвлар, магнолиялар, самшитлар, пальмалар, самбуттуллар майин шабодада яшил баҳмалдай товланиб ётади. Бетон плиталар ётқизилган йўлкалардан узоқ юриб гурунглашадилар. Пляжга ҳам бирга бориб, бирга қайтишади. Рассомнинг қизи чўмилмайди, қайиқча олиб сузади, холос.

Бир куни қизиқ бўлди.

Жамолзода билан иккови чўмилар, Гулгина қайиқда сузиб юради. Бирдан тўлқин туриб колди. Бешикбешик тўлқин унга түянинг ўркачини эслатди. Тўлқинда гоҳ, кўмилиб, гоҳ, юзага чиқиб сузаркан, кўзи Гулгина-да эди. Унинг қайиги дengiz сатҳида мисоли ҳасдек ўйнарди. «Қани энди унинг қайиги ағдарилиб кетсаю мен уни сувдан қутқариб олсан». Бу фикр Ботирнинг хаёлига қаердан, қандай келди, ўзи ҳам билмай қолди.

Йўқ, тўлқин тинмади, қиз ҳам бўш келмади. Тўлқин кучайган сари у яйрар, ҳаво гимнастикачиси каби қайиғини қум барҳанларига ўхшаш тўлқинлар узра сакратарди. Бу ҳам етмагандай Ботирга бақирди:

— Галин бура! Қайиққа миндирайми? На роҳат бу!

Нима деган одам бўлдинг энди? Яхшиям фикрингни ўзингдан бошқа бирор англаамади. Одамзод бир-бирининг хаёлидан кечган фикрларни билмайди. Қандай яхши! Бордию биригининг хаёлинин иккинчиси англаб етганда борми, аллақачон одамлар бир-бирини еб адо қилган бўларди...

Ботир ҳар куни зимдан Гулгинани кузата бошлиди. Унинг ҳар бир сўзига, имо-ишорасига, ҳаракатларига разм солади. Ана шу кузатиш асносида у бир нарсани сезди. Сиртдан қувноқ, шўх, ҳазилкаш кўринган қизнинг кўзларида, боқишиларида қандайдир дард, нимадандир норозилик туйфуси зоҳир эди. Бунинг сирини Ботир тушунолмайди. Сўрашга юраги дов бермайди. Нима ишинг бор, деб қайириб ташласа-чи. Нима деган одам бўласан. Рост-да, бирор билан нима дарди бор?

Шу андиша билан кўнглидан кечган саволини тилига чиқармади. Лекин андишанинг ҳам, сабр-тоқатнинг ҳам чегараси, меъёри бор. Одам ўз хоҳиш-истагини ҳар қанча жиловламасин, ахир бир кун жилов узилиб, истак ўз билган йўлидан кетар экан. Ботирда ҳам шундай бўлди.

У тушликдан сўнг ўзи ёқтирадиган самбитгул соясидаги скамейкада китоб ўқиб ўтиради. Бетон йўлкада хотин-қизлар учли туфлисининг тақ-тақ этган товуши эшитилди. Китобдан нигоҳини олиб ўша томонга қаради. Бир-бир босиб Гулгина келарди. У ғоят паришон, нима ҳақдадир чуқур ўйланиб бораётгани юришидан маълум эди. У ҳатто рўпарасидаги Ботирни ҳам сезмади. Илкис салом берсам чўчиб кетмасин деб, Ботир астагина йўталди. Қиз ялт этиб унга қаради.

— Салом, Гулгинахоним.

— Салом... Сиз шу ердамисиз?

— Ҳа, бир оз китоб ўқий деб келдим. Денгизда тўлқин, чўмилиб бўлмайди. Хонада ётавериб одам зерикади. Шу ер менга жуда ёқади.

Гулгина унинг ёнига ўтирди.

— Яхши жой экан. Сокин. Мана бу қанақа дарахт? Ҳиди ажойиб экан-а.

— Олиандр, яъни самбитгул. Ҳиди менгаям ёқади. Биласизми, биз томонда оқ ўрик бўлади, Фарқ, пиш-

ганда шунақа хушбўй ҳид таратади. Самбитгулнинг иси менга ўша ўрикни эслатади.

— Рост айтасиз,— деди Гулгина самбитгулнинг бир шохчасини эгиб ҳидларкан.— Бизда ҳам бор шунақа мева, бизлар арик деймиз.

— Ўзбек тили билан озарбойжон тилининг фарқи кам. Асли ўзаги бир-да. Биласизми, бир вақтлар озарбойжонлар Алишер Навоийни, ўзбеклар Фузулийни таржимасиз ўқишган. Ҳозир ҳам Фузулий ғазаллари бизда машҳур. Фузулий ғазаллари билан айтиладиган қанча қўшиқларимиз бор...

Гулгина Ботирнинг сўзларини бўлиб деди:

*Низомий болидан ҳалво пишурмиш  
Навоий забт этиб туркий жаҳонни.*

*Бир лаҳза кўлидан қўйганми ўзбек,  
Ўзинг айт, Фузулий битган девонни.*

*Азизим, шилимда асраб юрибман  
Насимий қолдирган собит имонни.*

*Вурғуннинг шеъри деб жон чекса ўзбек,  
Озар ҳам аярмиFaфурдан жонни.*

деган-ку, сизларнинг Абдулла Орипов деган шоирларнингиз.

Ботирнинг ҳайрати ошди. «Наҳотки, бу қиз ўзбек шеъриятидан хабардор бўлса? Кўринишидан шеър ўқийдиган қизга ўхшамайди-ку».

Фикрини унга айтди.

— Ўқиганман,— деди у кулиб.— Тўғри, жудаям кўп эмас. Ҳар ҳолда ўзбек шоирларининг у-бу нарсасини ўқиганман.

— Кечирасиз, сўраганинг айби йўқ, дейдилар, агар сир тутмасангиз касбингиз нима?

Гулгина маънодор кулди.

— Сир эмас. Яқинда пединститутни битирдим, филология факультетини.

— Шунақа денг. Шеъриятта қизиқишингиз бекорга эмаскан-да.

Дадангизнинг изидан бормабсиз-да. Ёки она касбини танладингизми?

Қиз индамади. Унинг юzlари жиддийлашди, бирмунча сўлғиналашди. Афтидан Ботирнинг савомлари унга хуш келмади.

— Унисининг ҳам, бунисининг ҳам изидан бормадим. Ўз йўлимни топгим келди, ўз изимни қолдириши истадим. — Унинг сўzlари кескин, ҳазидан холи эди.

— Тузук,— деди Ботир. Билдики, сухбатни бу тарзда давом эттириш мумкин эмас. Пластилкани дарҳол ўзгартириш зарур.— Жалил муаллим кўринмайди?

Қиз ўрнидан турди-да, дengиз томонга қараб қуличини керди.

Уммонни қучоқлаб олгудай сиёҳи бор.

— Ким билади дейсиз, қаерларда юрибди. Этюднигини кўтариб чиқиб кетувди. Бу ерларда яхши пейзажлар чизиш мумкин эмиш. Эртаю кеч ўйлагани асари, ман унинг хаёлига ҳам келмайман.

Демак, шунинг учун у кўпинча ёлғиз юрар эканда. Балки унинг чехрасидаги ғамгинлик кўланкасига ҳам сабаб шудир.

— Мана шундай жойларга олиб келгани — сизни ўйлагани эмасми? Дам олишга одатда кўпчилик хотини билан боради. Қизини ёки ўғлини олиб борадигандар жуда кам.

Гулгина шартта Ботир томонга қаради-да, томдан тараша тушгандек пақ этказиб савол ташлади:

— Уйланганмисиз?

— Йўқ,— деди Ботир унинг мақсадини тушунолмай.

— Аввал уйланинг, ана ундан кейин биласиз хотиннинг қадрини. Ҳозир бу гапларни қўйинг. — Унинг сўzlари негадир асабий эди.

Қизнинг бу гаплари Ботирнинг ҳайратини оширди.

Гулгина яна унинг ёнига келиб ўтирди.

— Манга қаранг, хафа бўлдингизми гапимдан. Илтимос, кўнглингизга олманг. Одатим шунаقا ўзи, баъзан кимлигига қарамай шартта гапириб юбораман.

Ботир унинг юзларига, кўзларига бокди. Гўё ҳозиргина дengизга қараганча тик туриб гапирган қиз билан манави — ёнида ўтирган қиз иккови бир одамми ёхуд бошқа-бошқа қизларми — аниқламоқчи бўлганидек астойдил разм солди. У умрида бировга, хусусан қизларга бунаقا тикилмаган. Буни Гулгина ҳам сезди шекилли, ҳа, намунча термидингиз, деди. Шундан кейингина у ўзига келди.

— Кечирасиз, ўзим шунчаки, хаёл суриб қопман.

Шу маҳал девордек қалин дараҳтзор орасидаги йўлакнинг бошида Жамолзода кўринди. Уни Гулгина кўрмади.

— Отангиз келяпти,— деди Ботир.

Қиз аввалига бир қизарди, кейин дарҳол ўзини қўлга олди.

Жамолзода уларга яқинлашаркан, деди:

— Оббо сизлар-эй, бу ерда ўтирган экансизлар-да. Ман бўлсам боядан бери қидираман қаерга кетди булар деб. Нечуксан, Ботир?

Бу гапдан Ботирнинг ҳайрати яна ошди; «Ҳозирги на қизи отам ишлайпти, девди. Отаси эса сизларни қидириб юрибман, дейди. Қўлида этюдник ҳам, мўйқалам ҳам — ҳеч нарса йўқ. Қайси бирининг гапига ишониш керак?»

...Стюардессанинг таниш овози эшитилди: «Ҳурматли пассажирлар! Креслоларни вертикал ҳолга келтиришингизни, камарларни боғлашингизни илтимос қиласман. Самолётимиз пастлай бошлади. Ярим соатлардан сўнг самолётимиз Боку шаҳрининг аэропортига қўнади. Бокуда ҳарорат йигирма беш даражা иссиқ».

— Йигирма беш бўлса унчалик иссиқ эмасканку, — деди семиз киши.

Ботир индамади. Аммо ўзича ўйлади: «Ҳа, иссиқ эмас. Ҳали пастга тушайлик, кўрасан иссиқ эмаслигини. Тошкентнинг қирқ даражасию бу ернинг ўттизи».

Самолёт шувиллаб пастлаб борар, Ботир иллюминатордан кўз олмай атрофни томоша қиласанди. Ҳозир денгиз кўринади... Ана денгиз, Каспий — Ҳазар денгизи, баҳри Ҳазар. Нега унинг номини ўзгартирди экан? Ўзи яхши эмасми. Ҳазар денгизи!

Ботир денгизга суқ билан термилди. Денгиз жимир-жимир қилгану кейин қотиб қолгандай, қимир этмайди. Аслида пастда чайқалиб ётгандир. Ҳув ўша — ҳар жой-ҳар жойда пахта сингари оқарип кўринаётган нарса тўлқиннинг кўпиги.

Самолёт тобора пасайиб бормоқда. Гўё денгизга кўнадигандай тасаввур қолдиради. Ботирнинг елкаси оша йўғон бўйинини чўзиб ташқарига мўралаётган семиз киши чўчиб кетди чофи, ие, денгизга қўнадими,

нима бало, деб юборди. Ботир унга қарадиу ўзини кулгидан тия олмади.

— Ҳа, нимага куласиз, ука. Қаранг, денгиз бир қадам қолди ахир,— деди. Унинг гапиришида чиндан ҳам кўркув ҳисси акс этиб туради.

— Кўрқманг, амаки, сувга қўнмайди. Сизга шундай туюляпти, ҳали анча юқоридамиз...

Ботир гапини тугатмасданоқ самолёт денгиз устидан ўтиб, аэропорт чегарасига кирган, у ўлжасига ташланган бургутдай ерга қўйилиб бораради. Ана-мана дегунча ғилдираклар ерга тегиб, самолёт бир силкиндию унинг товуши бирдан ўзгарди: одам нафас олмасдан оғзини очиб узоқ о-о-о деб турсаю, кейин бирдан нафас олса, овозида кескин ўзгариш рўй беради. Самолёт ҳам худди шунга ўхшайди: то ерга қўнгунча бир маромда, бутун вужуди таранг тортилиб ванғиллаб борадида, ғилдираклари ерга тегиши ҳамоно енгил нафас олган каби оғир вазифани бажариб бўлиб, уҳ, хайрият-эй, дегандай бирдан товуши ўзгарди. Мана шу товуш ўзгариши билан одамлар ҳам беихтиёр енгил нафас оладилар. Йўловчилар ўзлари билмаган ҳолда самолёт мотори кўйига тушиб, асаб томирлари таранг тортилиб туради.

«Ту-154» кўрдингми мени, Тошкентдай жойдан шунча одамни кўтариб учиб келдим, дегандай керилиб аэропортни айланиб чиқди-да, бир чеккага келиб силкиниб тўхтади. Бир зум ванғиллаб турди-ю, кейин пувв этиб моторлари ўчди.

Самолёт зинасидан пастга тушиши билан гуп этиб нефть ҳиди, иссиқ нам ҳаво юзга урилди. Гўё нафас олиш оғирдай. Бояги семиз киши лапанглаб зинадан тущди-да, тўғри Ботирнинг олдига келди.

— Э, ука, йигирма беш девди, қирқдан ошиқ шекилли. Нафас олиб бўлмайди-ку. Бу сасиб ётган нима бало?

Ботир кулди.

— Нефтнинг иси келяпти-да.

— Шаҳардаям шунақами?

— У ерда бундан баттар. Шаҳар денгиз бўйида жойлашган. Бу ер-ку ҳалиям денгиздан узоқроқ.

Автобус уларни аэропорт биноси томонга олиб кетди. Чамадонлар этиб келгунча Ботир телефон будкасига кирди.

- Алло, Жалил муаллимнинг уйими?  
Трубкадан таниш аёл овози эшитилди.  
— Бали.  
— У кишини телефонга мумкинми?  
— Ҳозир.

Бу Жамолзоданинг қизи эди. Ботир унинг овозини таниди. Танидию ҳаяжонланиб кетди. Демак, ўзи ҳам, қизи ҳам шу ерда экан... Гулгина! Унинг гапириш оҳангি, товуши Ботирнинг қулогига ўрнашиб қолган. Чамаси у танимади. Қаердан ҳам танисин.

- Алло,— деди дўриллаган, жарангдор овоз.  
Ботирнинг кўз ўнгида Жалил Жамолзоданинг жанговар қиёфаси намоён бўлди.  
— Салом, Жалил муаллим. Бу мен — Ботирман.  
— Ботир?! Нежирсан Ботир? Ҳардан занг уриорсан?  
— Аэропортдан, ҳозир келдим.  
— Манга қара, ўша ерда қўмирламай тур, ман ҳозир етиб бораман.

Кераги йўқ, ўзим бораман шаҳарга, демоқчи эди, улгурмади, Жамолзода трубкани шарақ эткизиб қўйди. Ботир Жамолзоданинг қилиқларини эслаб мийигида куларкан, телефон будкасидан чиқиб юкларни берадиган хона томонга кетди...

## II

Аэропорт майдони олдидағи дараҳтларнинг соясига чамадонини қўйиб, сигарет тутатди. Тик туравериб оёғи толди. Уч-тўрт қадам наридаги скамейкага бориб ўтириди. Яна хаёл ўз оғушига олди. Унинг кўз ўнгида Жамолзодадан ҳам кўра қизи кўпроқ гавдаланади. Бирда ғамгин, бирда шодон кўринувчи бу қизни ҳеч тушунломас, гапларидан, қарашларидан нимадандир кўнгли нотинч эканлигини сезиш қийин эмасди.

Кечагидек эсида Ботирнинг. Бир кун Гулгина билан пляжда суҳбатлашиб қолди. (У гарчи чўмилмасада, чўмилиш кийимини кийиб пляжга келиб ётарди.)

- Гулгинахоним, айбга буюрмасангиз бир нарса сўрамоқчи эдим.  
— Марҳамат,— деди у кулиб.  
— Янглишмасам, кўпинча нимагадир хомуш қўринасиз.  
— Ким билади...

Соатлаб дарёга қармоқ ташлаб биронта ҳам балиқ тутолмаган одамнинг ахволини тасаввур қила оласизми? У на кета олади, ва балиқ тутишда давом этади. Кетай деса — қуруқ қўй кетиш алам қилади, машғулотни давом эттирай деса, натижга йўқ; қармоқ қаттиқ силкинади, вақтни бой бермай шартта тортса, балиқдан дарак йўқ, аммо чувалчангни еб кетган.

Ҳозир Ботир шу ахволда. Саволларни давом эттирай деса, жавоблар қисқа-қисқа, ҳатто бирмунча терс. Буни, йифиштир саволларингни, деган маънода тушуниш ҳам мумкин. Бас қилай деса, у билан гаплашгиси бор. Саволига аниқроқ жавоб ололмагани алам қиласди... Бир ишни бошладингми — охирига етказ.

— Мени тўғри тушунинг, Гулгинахоним, ҳавас қилса қилгудек гўзалсиз. Биламан, шу ернинг ўзида қанча йигитлар сизни зимдан кузатиб юришибди. Сиз билан лоақал бир марта гаплашишга орзумандлари қанча.

Гулгина кулиб юборди. Унинг кулагиси шу қадар жаранглаб кетдики, беш-олти қадам нарида ўзини офтобга тоблаб китоб ўқиб ётган аёл булар томонга маънодор қараб қўйди. Бироқ унинг қарашига на Ботир, на Гулгина эътибор берди. Аслида бу ернинг одати шунаقا: ҳеч ким билан ҳеч кимнинг иши йўқ.

— Жуда ошириб юбордингиз-ку. Шу қадар гўзал эканимни билмалман-а,— деди Гулгина.

— Йўқ, бу хушомад эмас, рост айтяпман. Унинг устига шундай машҳур рассомнинг суюкли қизисиз. Ҳали студентлик остонасидан чиқар-чиқмас Сочига келиш ҳаммага ҳам насиб этавермайди. Шундай экан, кўнглингизнинг бир чеккасида ғашлик бўлишига боис нима?

Гулгина ўйланиб қолди. Ҳозиргина очилиб, шараклаб кулиб турган қиз чехрасига вазминлик юкурди. Баҳор офтобини кутилмаганда булат тўсганидек, унинг шодон қарашлари ўрнини қандайдир маъюслик эгаллади.

— Гапларингиз тўғри,— деди у вазминлик билан,— аммо биласизми, бу дунёда ҳар жиҳатдан кўнгли тўқ, одам ё йўқ, бўлса ҳам бармоқ билан санарли. Бир кам дунё, деган мақол бор бизда, эҳтимол сизларда ҳам бордир. Шу мақол бекорга чиқмагандир ахир.

«Хўш, бу қизнинг кўнгли нимадан яримта? Ким билсин. Айтмаяпти-ку! Нега айтсан? Мен кимман унинг

учун? Дардини тўғри келган одамга айтиб кетаверадими. Хусусан, қиз бола. Қизлар ҳуда-беҳудага қулфу дилини очавермайди. Уларнинг кўнгил сандигини очишдан кўра анави оқ соч тоғлар қаърида нима борлигини билиш осонроқдир... Ке, кўй, ортиқча эзмалик қилмайин. Лозим топса ўзи айтар, бўлмаса шарт эмас...»

Ботирнинг индамай ўйланиб қолганини кўриб:

— Гапларим сизни ҳам ўйлатиб қўйдими. — У кулади. Аммо кулгиси табиий эмас, ўзини ўзи зўрлаб жилмайди. Унинг мана шу — сунъий кулгиси ҳам ўзига ярашикли эди. — Келинг, бу гапларни қўйинг, ахир бу ерга сиз ҳам, биз ҳам дам олгани келгандиз-ку! Дунёнинг ташвишларидан вақтинча эса-да қутулмоқ ниятида юрибмиз-ку бу ерларда... Самад Вурғун шеърларини ўқиганмисиз? Бир гўзал ғазали бор. Ўқиб берайми?..

У Ботирнинг жавобини ҳам кутмай ғазал ўқий бошлиди:

*Агар сендан тонар бўлсам, насибам оху зор ўлсин,  
Баҳорим қишига айлансан, чечаксиз бир гиёр ўлсин...  
Чаманзорим боғим-боғчам, тўкилсан бари хор ўлсин,  
Мазорим ўт олиб ёнсан, бу ишқим ошкор ўлсин.*

Қиз ғазални шундай гўзал, ширали ўқирдики, Ботир гўё сархуш бўлиб қолди. Унинг устига озарбойжон тилининг гўзал талаффузи, ғазал сўзларининг мазмундорлиги уни ўз сеҳрига олди. Энди унинг қулогига денгиз тўлқинининг шалоп-шалоп этиб қирғоққа урилиши ҳам, дам олиб ётганларнинг ўзаро фўнгир-фўнгир овози ҳам кирмасди. У фақат биргина товушни — Гулгинанинг ёдай майнин, тоғ жилғасидек тиник, кўнғироқдай жарангдор овозини тингларди, холос.

*Кўй, эй булбул, тин, эй довул, ки хоҳиш истироҳатдир,  
Бу ерларда шинжим ўқ, юпанчим бир саёҳатдур.  
Ўлим, э, воҳ, у неъматдир, у бир шонли саодатдир,  
Агар бевақт ўлар бўлсам, рақибим баҳтиёр ўлсин.*

Ғазалнинг сўзлари, оҳанги жой-жойига тушар, Гулгина эса гўё ҳамма нарсани унугтган, у ғазал руҳи билан яшар, ҳозир унинг томирларида шоирнинг оташин қони гупурар эди. У тобора ғазал руҳига сингиб

борар, ҳар бир мисрани, ҳар бир сўзни чертиб-чертуб ўқир, гўё бу билан шеър мазмунини тингловчи онгига қўйиб қўймоқни истарди:

*Ҳаётдан интиқом истаб, жўшар руҳимда бўронлар,  
На инсофни, на виждонни билар, ё раб, бу инсонлар.  
Ёз, эй Вурғун, яна жўшсин, бу кун оламда тўфонлар,  
Йиқилсан меҳвари олам, у тубдан тор-мор ўлсин.*

Ғазал тугагач, у кўзларини юмганча жим қолди. Чамаси, у ҳали ўзи ўқиган шеър сеҳрининг тўрларидан озод бўлолмаган эди. Ботир ҳам миқ этмади. У гапиришдан, бирон ножӯя сўз айтиб унинг кайфиятини бузиб қўйишдан чўчирди. Ботирнинг назарида, Гулгина ҳозир дунёдаги энг баҳтли, лаззатли онларини бошидан кечирмоқда эди. Ана шу лаззатдан, ана шу оромдан уни мосуво қилиш — гуноҳи азим.

Орадан қанча вақт ўтди — иккови ҳам билмайди. Қиз оҳиста кўзини очди. Йигиттга қаради. Йигит киприк қоқмай унга термилиб ўтиради.

— Ғазал ёқдими сизга?

— Жудаям... Биласизми, мен ҳам бу ғазални ёддан биламан. Менга шу қадар ёқади у.

Қиз кулиб юборди.

— Ана холос. Сиз ёд биларкансиз-у, ман Америка очгандай куйиб-пишиб ўқиб ўтирибман-а.

— Йўқ, Гулгинахоним, ўқиганингиз жуда яхши бўлди. Бу ғазални жуда кўпчилик ўқиганини эшиштанман, аммо ҳеч ким сизчалик гўзал ўқимаган эди.

— Демак, сиз озарбойжон адабиёти билан қизиқар экансиз-да?

— Унча-мунча. Хоҳлайсизми, мен ҳам бир шеър ўқиб бераман.

— Бажонидил. Озарбойжон шоириданми?

— Йўқ, ўзбекча.

*Кўндан кутган эдим, орзиқиб мана,  
Булутлар тарқалди, тўкишиб кўзёш,  
Хаёлим осмондай ёришиди яна,  
Ёрур кунларимдай порлади қуёш.  
Шошқин гарёларнинг зангордир лаби,  
Шамоллар ўйнайди йироқ-йироқда.  
Юргил саир этайлик, юргил малагим,  
Дунё ташвишлари қолсин узоқда.*

*Кўряпсанми қандай яшармиш олам,  
Бепарво гўдакдай жилмаяди жим.  
Гўдагим, бу чирой қайтмаиди ҳеч ҳам,  
Қайтамагани каби менинг ёшлигим.  
Хазонрез августнинг бирор оқшоми.  
Уни кўрарсанми тушингда тақрор.  
Майлига, ўзгадир кузнинг илҳоми  
Бутун-чи, кўз ташла, атрофда баҳор.  
Қани қўлгинангни бергил жимгина,  
Шу маъсум ўйлчига қўяйлик ихлос,  
Шоирлар алдайди бизни, жонгинам,  
Баҳор доим эмас, уч ойдир, холос.*

Шеър тугаши билан Гулгина Ботирнинг қўлини олиб табриклиди.

— Соғ ўлин, чўх соғ ўлин! Гўзал, чўх гўзал шеър. Кими шеъриди?

— Абдулла Ориповники...

— Ай, соғ ўлсин, ул нақадар гўзал шоир. — Қиз бирдан сергак тортди. — Биз узоқ қолиб гатдик, атам мана излаб юрган чиқар.

У шундай деб ўрнидан турди. Ботир унинг яна бир оз ўтиришга, яна озгина сухбатлашишга, иложи бўлса яна бирор ғазал...

Машинанинг қаттиқ сигналидан Ботир чўчиб тушди. Ширин туш кўриб ухлаб ётган одам кучли шовқиндан илкис уйғониб кетгандай, Ботир ҳам хаёлини йифишириб олгунча бир зум саросимага тушиб қолди. Ўзига келганда рўпарасида қулочини ёзид келаётган Жалил Жамолзодани кўрди. Улар қучоқлашиб кўришдilar.

— Аҳволларинг нечук? — деди Жамолзода кулиб.

— Яхши. Ўзингиз қалайсиз? Гулгинахонимнинг соғлиги тузукми?..

— Жуда зўр,— деди рассом,— ана ўзи.

Ботирнинг шундоқ бурнининг тагида оппоқ «Волга» турар, унинг рулига суюнганча Гулгина уларни кузатиб ўтиради. Жамолзода билан Ботир унга томон ўтирилиши ҳамон Гулгина машинадан тушди. Ё, қудратингдан, ҳамон ўша-ўша, қоп-қора қошлар, ёниб турган кўзлару найза мисоли киприклар, елкаси билан битта бўлиб тўлғониб ётган қўнғироқ соchlар — ҳамма-ҳаммаси ўша.

- Салом, Ботир муаллим.  
Овозлар ҳам ўша — пляжда ғазал ўқиган овознинг худди ўзи.
- Салом, Гулгинахоним. Нечуксиз?
- Ташаккур.
- Қани, кетдик, вақт ўтмасин,— деди Жамолзода.  
Жамолзода билан Ботир орқага ўтиришди. Гулгина машинани кийикдай учирди. Бир зумда аэропорт бинолари орқада қолди. Ботир билдирамай Гулгинага разм солди. Олдингидан бир оз тўлишибди. Аммо ҳаракатлари чаққон, кайфияти жойида кўринади.  
Жамолзода Ботир томонга ўтирилди.
- Хўш, Ботир, ишларинг нечук? Отпускага чиқдингми?
- Яхши,— деди Ботир.— Ишлар кетяпти. Отпускага чиқдим. Баъдага мувофиқ, мана, келдим.
- Жуда яхши қиссан. Мана, Гулгинахоним бизнинг ихтиёrimиз-да. Кўриб турибсан, санинг келишингга янги машина олдик. Кўккўлга борамиз. Низомий мақбарасини кўрасан, Шушага, Шамахага олиб бораман! Тўғрими, Гулгинахоним?
- Гулгина чапдастлик билан машина рулини бошқа-паркан, мийигида кулиб «бали» деди. «Волга» сувдай елиб борарди.
- Машина ҳайдашни яхши ўрганиб опсиз,— деди Ботир ҳавас билан.
- Бу гапдан Гулгина мамнун жилмайди.  
Жамолзода эса гапни илиб кетди.
- Нимасини айтасан, профессионал шофёрлар ҳам бунинг олдида ип эшолмайди. Эътибор беряпсанми, қанча машиналарни ортда қолдирияпти.
- Ҳаммаси баравар кулишди.
- Эсингиздами, Ботир муаллим,— деди Гулгина қўзини йўлдан олмай,— бултур ман Ҳиндистонга бораман деган эдим.
- Ҳа, дарвоқе, эсимда, бормадингизми?  
— Бормай бўлти,— деди бирдан Жамолзода.  
— Бориб келдик.  
— Шунақами.— Ботир Гулгинага юзланди.  
— Ахир сиз у ёқда турмушга чиқмоқчи эдингиз-ку.  
Гулгина хандон отиб кулди:  
— Тегмоқчи эдим, Жалил муаллим қўймади...

Кечки овқатдан кейин Ботир ҳовлидаги скамейка-да дам олиб ўтирган эди, Жамолзода билан Гулгина унинг ёнига келди.

— Кинога кирамизми? — деди Жамолзода.

— Унчалик тушгим йўқ.

— Нега? — деди Гулгина. — «Тақдир ҳокими» деган ҳиндча фильм экан-ку, юринг, бирга кирамиз. Ёки ҳинд фильмлари сизга ёқмайдими?

Ҳинд фильмларини Ботир унчалик хуш кўрмайди. Аксарияти эртакнамо, воқеалар давом этади-этади-да, охирида ҳамма қаҳрамонлари мурод-мақсадига етиб, фильм тугайди.

Бу фикрларини уларга айтмади. Кўриниб турибиди-ки, Гулгина ҳинд фильмларига ўч экан. Аслида қайси йигит-қиз ҳинд киносига ўч эмас! Майли, ҳафсаласи пир бўлмасин. Умуман, ҳайратта тушмасликдан кўра ҳамма нарсадан ҳайратланган яхшироқ, деган эди кимдир.

— Кетдик, Ботир, — деди Жамолзода, — бари бир битта ўзинг зерикаб ўтирасан. Журналист дегани ҳамма нарсани кўриши керак. Яхшининг яхшилигини, ёмоннинг ёмонлигини билиш учун ҳам сабр билан кўрмоқ ва ўқимоқ лозим. Баъзи танқидчиларга ўхшаб ўзинг кўрмай ёки ўқимай, бирорлардан эшиттанинг бўйича фикр юритиш инсофдан эмас.

Рассомнинг бу гапларидан кейин Ботир ноилож ўрнидан қўзгалди.

Фильмдан сўнг учаласи хиёбонда сайд қилишди.

— Кино ёқдими сизга? — деб сўради Гулгина Ботирдан.

— Ёмон эмас. — Ботир мужмал жавоб берди.

— Яхши-ку, — деди жўшиб Гулгина. — Қаранг, қандай ажойиб. Манга жудаям ёқди. Искандарни қаранг, қанақа жасур, ботир йигит экан.

Ботир индамади. Жамолзода қизи гапирса қизига, Ботир гапирса Ботирга қараб, уларнинг гапини тасдиқлаб индамай бормоқда. Гўё қани буларнинг мунозараси нима билан тугайди, деб кузатиб бораёттанга ўхшарди. Гулгина кинони мақташда давом этди.

— Ҳинд кинолари маним хушима галур. Одамнинг завқини келтиради, мудраб ёттан юракларни ҳам уйғотиб юборади. Яшашга, ҳаётни севишга ўргатади.

— Қип-қизил киношунос экансиз-ку. — Ботирнинг оғзидан беихтиёр чиқиб кетган бу гапдан Жамолзода кулиб юборди, қиз эса бироз сергак тортди. Буни Ботир ҳам пайқади.

— Узр, ранжиманг, ҳазиллашдим,— деди Гулгинага.

Улар неон чироқлар сутдай ёритиб турган йўлакдан гўё қадамини санаёттандай бир-бир босиб боришарди.

— Ботир муаллим,— деди Гулгина шартта юришдан тўхтаб,— биласизми, ман Ҳиндистонга кетмоқчиман. — Томдан тараша тушгандай айтилган бу гапдан Ботир гангиб қолди. Бу қизнинг эси жойидами ўзи? — Бирон-бир ҳинд йигитига турмушга чиқаман. У ерда яшагим келади.

Ботир кулади. Чиндан ҳам бу қиз ўта романтик экан. Йигит-қизларнинг кўпчилигида шунаقا кайфият бўлади. Ҳинд фильмарини кўради-ю, ўша ёқقا кетгиси келиб қолади. Гўё у ерда яшаш осон, мазза. Киноларида шундай тасвирлайди-да. На иш бор, на ташвиш. Ҳамма ўйнаб-кулиб ашула айтиб, рақсга тушиб, сайд қилиб юради.

— Ҳиндистонда ҳақиқий аҳвол қандай эканлигини наҳотки билмасангиз, Гулгинахоним?! Ахир бу кино-ку.

— Нима бўлти,— деди Гулгина бўш келмай.

Ботир бошқа гапирмади. Орага оғир жимлик чўқди. Бу сукунатни Гулгина туфлисининг «тўқ-тўқ» этиб бетон плитага урилиши ва денгизнинг салобатли шовиллаши бузарди, холос...

— Хўш, Ҳиндистонда аҳвол қалай экан?— деди Ботир.

Гулгина ҳам ҳозир ўша сұхбатни эслаб кетаётган экан чоғи, орқасига ўтирилиб Ботирга қаради.

— Ёдингиздан чиқмапти-да,— деди кулиб.— Ўн марта эшитгандан бир марта кўрган афзал, дейишади-ку.

Гапга Жамолзода аралашди:

— Шу қадар тиланчилар кўпки, ҳатто юришга қийналасан. Аммо бойлари бор, э, нимасини айтасан, унаقا-бунаقا бой эмас. Бизни бир тўйига таклиф қилишди. Э, бунаقا тўйини умримда кўрган эмасман. Бизнинг Кавказ тўйларини мақташади, ҳаддан зиёд катта, дабдабали дейишади. У тўйнинг олдида бизнинг тўйлар оддий бир зиёфатдай гап.

Шаҳарга киргач, уларнинг суҳбати узилди. Ботир Боку кўчаларини томоша қилиб бораради.

— Энди гап бундай,— деди Жамолзода. — Ҳозир «Озарбайжон» меҳмонхонасига борамиз. Бутун дамингни ол. Эртага эрталаб чиқиб кетамиз.

— Балки бир-икки кун шаҳарни айланармиз. Мен таниш-билишларимни кўрсам.

— Кўрасан, ҳаммасига улгурасан. Вақтинг бемалол-ку. Димиқиб ёттан шаҳарда нима бор. Аввал тоғларга чиқайлик, Озарбайжон табиати билан таниш. Кейин, кетишингга бир-икки кун қолганда томоша қиласверасан, шаҳарни.

Машина денгиз соҳилида жойлашган ўн олти қаватли «Озарбайжон» меҳмонхонаси олдида тўхтади.

У сан шу ерда бир нафас ўтириб тур, деди-да, ўзи бир хонага кириб кетди. Ботир юмшоқ креслога чўқди. Ўтиб-қайтаёттанларга разм солди. Аксарияти ажнабийлар. «Оддийроғи ҳам бўлаверар эди. Ҳеч паст кетмайди-да, бу одам», деб хаёлидан ўтказди. Рўпарадаги буфетта бориб бир стакан муздай мандарин шарбати ичди. Унгача Жамолзода қайтиб чиқди.

— Паспортингни бер.

Хужжатларни расмийлаштиргач, еттинчи қаватта чиқишиди. Бир кишилик хона экан.

— Қалай, маъқулми?— деб сўради Жамолзода.

Унинг бу саволида «кўрдингми қудратимни?» деган мақтаниш ҳисси акс этди. Балкон денгиз томонда. Юқоридан қараганда денгиз оёқ остидагидай чайқалиб ётибди. Меҳмонхона билан денгиз орасида йўл ва қалин дараҳтзор — хиёбон. Ажойиб манзара.

— Йўлда чарчагансан. Бир-икки соат ухлаб, дамингни ол. Биз соат иккida қеламиз. Бирга тушлик қиласамиз.

— Балки бугун сизлар ҳам ўз ишларингиз...

Жамолзода унинг гапини кесди:

— Бокута келдингми, энди инон-ихтиёринг бизда. Қачонки, Тошкентта учадиган самолётта ўтирасан, шундан кейин ўз ихтиёринг ўзингда бўлади. Унгача нима десам қулогингни қимирлатмай кетаверасан. Ҳозирча хайр. Яхши дам ол.

Жамолзода унинг гапини ҳам эшиитмай эшикни ёпиб чиқиб кетди.

### III

Ботир душга тушди. Чарчоқлари ёзилиб, ўзини қушдай енгил ҳис этди. Бир оз чўзилди, кўзини юмиб ҳеч нарсани ўйламай ётишга уринди. Лекин буни эплаб бўлса экан. Одамзоднинг хаёлсиз турмоги гумон. Самолётда бирга келгани — чол ёдига тушди. Мехмонхонага жойлаша олдимикан? Ўғлимни уйлантираман, деб шунча йўлдан сарсони ачиб келяпти-я...

Жиндек мизғимоқчи эди, бўлмади, ухлаёлмади. Буфетта бориб қаҳва олди-да, балконга чиқиб ўтирди. Иссиқ қаҳвани ҳўплаб денгизни томоша қилди. Денгиз томондан салқин шабада эсади. Бу шабада гоҳо-гоҳо нефтнинг қўланса ҳидини олиб келади.

Ана порт. Бир кема причалга кириб келяпти, иккинчиси жўнади.

Оғир-вазминлик билан денгиз ичкарисига сузиб кетган кемани кузатиб ўтирган кўйи Бокуга олдинги гал келганини эслади...

Ўшанда ҳам ёз эди. Беш кун юрди. Ашраф деган дўсти билан.

У билан танишуви ҳам қизиқ кечган.

Бу воқеага икки йилча бўлди. Май ойи эди. Ботир эрталаб ишга келиб янги газеталарни варақлаб ўтирганди, телефон жиринглади.

— Алё.

Трубқадан нотаниш одамнинг овози эшитилди.

— Ман Бокудан келганман, кирсам майлими?

— Марҳамат,— деди Ботир.

— Пропуск бюросига айтсангиз, рухсатнома ёзиб берса: Жаводов Ашраф.

— Ҳозир айтаман...

Ўн беш минутлардан кейин баланд бўйли, қорача бир йигит кириб келди. Унинг бир қўлида дипломат, иккинчисида ёмғирпўш. Ҳол-аҳвол сўрашишди, Ботир Бокудаги янгиликлар хусусида қизиқди. Мехмон унинг сўровларига қисқа-қисқа жавоб берар, афт-ангридан нимадандир ҳафсаласи пир экани ёки ортиқча эзилгани кўриниб туради. «Эҳтимол, ҳозир келиб тушгандир. Йўлда чарчагандир», деб ўйлади Ботир.

— Кечирасиз, қачон келдингиз? Ҳозирми?— деб сўради.

— Йўқ, уч кун бўлди. Яна икки кундан кейин кетаман. Бизнинг газетамиз Ўзбекистонга бағишиланган қўшсаҳифа тайёрламоқчи. Шунга материаллар олиб кетгани келувдим. Сизнинг редакциянгизга ҳам бир кирай дедим, балки биз учун бирор бир қизиқроқ нарса чиқиб қолар.

— Бизнинг редакциядан бирон киши билан гаплашувдингизми?

— Йўқ, биринчи келишим.

— Шундай денг,— деди Ботир ўйчан ҳолда. — Умуман ишларингизнинг кетиши қалай? Тузукми, материаллар олдингизми?

Ашраф сигарет тутатди.

— Ёмон эмас, у-бу нарсалар олдим. Баъзилар бу гунга ваъда беришган. Бутун кечгача ишим битса керак. Афсуски, билетни кечроқча олиб қўйибман, бўлмаса эртага кетар эдим.

— Нега бунча шошилмасангиз. Нима зерикдингизми? Тошкент ёқмадими? Қаерда турибсиз?

Меҳмон ҳафсаласизлик билан қўл силтади:

— Қаерда бўларди, меҳмонхонада-да.

— Қайси меҳмонхонада?

У сигарет тутунини бир чеккага пуллади-да, Ботирга ғалати қарап қилди:

— Сизга бари бир эмасми қайси меҳмонхонада туришим...

Тушунарли, ҳаммаси тушунарли. У зериккан. Бирор бу ёққа юр демаган, ўзи ҳеч кимни танимайди, ҳеч қаерни билмайди.

— Биринчи келишингизми Тошкентта?

— Биринчи ва охирги бўлса керак.

Ботирга бу гап оғир ботди. Шаҳрингта биринчи бор келган одам яна қайтиб келмаслигини ошкор айтадими, демак яхши кутиб олишмаган. Шаҳар ҳар қанча гўзал, чиройли, обод бўлмасин, агар одамлари қўпол бўлса, меҳмонларни яхши қаршиламаса, иззат-ҳурматини жойига қўймаса, бундай жойга бир келган одам қайтиб келиши ҳақида албатта ўйлаб кўради.. Бу йигит дастлаб кимга учраши экан? Сўрасинми? Хўш, сўраганда нима фойдаси бор? Қайтангта бунинг ярасини янгилаш мумкин-ку... Лекин шуниси аниқки, қандайдир бир бефаросат одамга дуч келган. Киши бошқа жойдан келган меҳмон билан гаплашганда ҳушёр

бўлмоги лозим. Бир одамнинг нозик диidi, юксак маданияти билан бир халқ ҳақида яхши тасаввур қолиши ёхуд, аксинча, бир фаросатсиз туфайли бутун халқномига доғ тушиши мумкин.

Ашраф ярим чекилган сигаретни кулдонга эзғилаб ўчирди.

— Муҳаррирингиз қачон келади? Гаплашсам, балки бирон-бир тузукроқ материалми, суратми топиб берар... Кейин кетай, ҳали яна бир-икки учрашадиган жойларим бор.

У шундай деб ўрнидан турди.

— Демак, гап бундай,— деди Ботир ҳам ўрнидан туриб. — Ҳозир муҳаррир келади, балки келгандир ҳам. Унинг олдига олиб кираман, гаплашасиз. Кейин бошқа учрашадиган одамларингиз билан кўришинг. Пешинда шу ерга келасиз, бирга тушлик қиласиз. Кечкурун меникига борамиз.

— Йўқ, ташаккур, ман меҳмонхонага бораман.

— Унақа гапни қўйинг. Мен айттанимдай қиласиз. Эртага мен муҳаррирдан рухсат оламан, шаҳар айланамиз. Қани, куртка билан дипломатни менга беринг. Шу ерда туради.

Ашраф ўйланиб қолди. Ботир унинг билагидан курткасини, қўлидаги дипломатни олди.

— Дипломат керак,— деди Ашраф.

— Яхши. Дипломат ўзингизда турсин.— Курткани шкафга осиб қўйди. — Юринг, қарайлик-чи, муҳаррир келдимикан.

...Ботир университетни битириб, Тошкентда ишга қолган. У бир татар кампирнинг уйида ижарада туради. Кампирнинг феъли кенг, Ботирнинг ўртоқлари пайдар-пай келишса ҳам баъзиларга ўхшаб минғирламас, унинг шу жиҳати Ботирга маъқул эди. Ашрафни астойдил, ҳеч нарсани ўйламай таклиф этиши ҳам шундан.

Тушлиқдан кейин бир-иккита кўнгил етар дўйстларига воқеани тушунтириб, уларга ҳам юринглар, деди.

Уйга келгач, татар кампирга узоқдан меҳмон келганини айтди. Чоғроққина ҳовлидаги ягона дарахт — олма тагига сув сепиб, стол-стул қўйди. Бир пиёладан чой ичишгач, сизлар гаплашиб ўтиринглар, деб ўзи ошга уннади.

Қош қорайиб, ҳовлидаги чироқлар ёқилганда Ботир қўлбола ошни катта чинни лаганга сузиб келди.

Кип-қизил қовурма паловнинг ҳиди ўтирганларнинг димофини қитиқлади. Пахта бунтидай уюлиб турган ош устидаги саримсоқ пиёзларни очаркан, қани ошга марҳамат, деди Ботир.

Ўша оқшом ярим тунгача гаплашиб ўтиришди.

Эртаси куни Ботир иккаласи шаҳарни айланишди.

Ашрафнинг командировкаси тутагунча Ботир у билан юрди.

Меҳмонхонага кетгани қўймади.

Учинчи кун аzonда меҳмонни аэропортта олиб чиқди. Билетни рўйхатдан ўтказгач, улар сигарет чекиши мақсадида ташқарига чиқиши. Хайрлашиш олдидан Ашраф кўнглинин ёрди:

— Биласанми, Ботир, агар сени учратмаганимда ўзбек халқи ҳақида бошқача фикрда кетар эдим. Ман ўзбек ёзувчиларининг асарларини ўқиганман. Улар ҳақида бошқа халқларнинг фикрларини ҳам эшигтанман. Шуларнинг ҳаммаси сани учратгунимча кўзимга ёлғон кўрингган эди.

Ботир унинг мақсадини тушунди, лекин фикрига қўшилмади.

— Йўқ, Ашраф, сен билан мен журналистмиз. Ҳар бир ишда хулоса чиқаришга шошилмаслигимиз керак. Эҳтимол, сен қандайдир бефаросат, одамгарчиликни билмайдиган тўнкага йўлиққандирсан. Бу билан бутун ўзбек халқининг устидан қора чизик тортиш яхши эмас. Бундайлар бор. албатта. Лекин, афсуски, унақалар ҳамма халқ, ҳамма миллатда бор. Озарбойжонларда шунақалар йўқ дейсанми? Тўғри, улар халқнинг номини булғайди, ерга уради. Лекин илож қанча. Уларни билсанг-ку, кўричак мисоли олиб ташлайсан, афсуски ҳамишаем билавермайсан-да...

Ёнидаги стул оёғининг бетонга ишқаланиб дириллагани хаёлини бўлди.

— Бу жой бўшми? — деди бир қўлида қаҳва, иккинчисида ликопчада қўймоқ ва тухум кўтариб турган киши.

— Марҳамат... Бўш...

Боя причалдан чиққан оқ кема соҳилдан узоқлашиб кетган, поёнсиз денгизда оқ чорлоқ каби сузуб борарди. Ботир унга термилди. Қаерга кетяпти экан? Балки Нефттошларга бораётгандир.

Нефттошлар... Афсонавий шаҳарча. Ўтган сафар келганида ҳоли-жонига қўймай Ашраф олиб борган эди. «Кўрасан, жудаем ажойиб. Вақтинг кетганига пушаймон қилмайсан», деб туриб олганди.

Ашрафнинг айтганича бор экан. Инсон қўли билан яратилган мўъжиза.

Нефттошлар — нефтичилар шаҳри. Озарбойжон нефти асосан шу ердан олинади. Шаҳарчанинг асоси — еттига эски кема чўктирилиб, шунинг устида майдон ясалган. Кейинчалик аста-секин у кенгайтирилган. Ҳозир икки-уч қаватли уйлар, маъмурӣ бинолар бор. Магазинлар, парклар, кинотеатр, маданият сарой...

Денгиз оралаб бир машина сифадиган тахта йўл қилинган. Унинг узунилиги уч юз километрдан ошиқ. Бу ерда фақат юқ машинаси юради. Шу боис Нефттошларни енгил машинаси, мактаб ва боғчаси йўқ ягона шаҳар, деб аташади.

Хаёл билан ёнида ўтирган киши туриб кетганини ҳам сезмай қопти. Соатига қаради. Ўн икки. «Энди туриш керак».

У хонага кирди-да, каравотга чўзилди. Ярим соатлар ором олмоқни ўйлади. Эрталаб қизифида билинмаганди, энди сезиляпти чарчагани...

Эшикнинг тақиллаганидан уйғониб кетди. Ўрнидан сакраб турди.

— Ҳозир...

Апил-тапил кийиниб эшикни очди: Жамолзода.

— Қалай, ухладингми? — деди у хонага кириб.— Қани, кийин, кетдик, пастда Гулгинахоним кутиб туритти. Қорнинг ҳам пиёз пўсти бўлиб кеттандир.

Улар пастта тушишганда меҳмонхона олдидағи майдончада Гулгина машина эшигини очиб ўтиради. Унинг эгнида ҳиндий юпқа кўйлак, пардоз-андозини янгилаған шекилли, боягидан ҳам очилиб кетган, кулиб турарди. Ботирни кўриши ҳамоно қўлинини кўтариб салом берди.

Гулгина машина рулини Ичкари шаҳар томонга бурди.

— Бокунинг Ичкари шаҳарини кўрганмисиз, Ботир муаллим? — деб сўради Гулгина.

— Бир марта борганиман, лекин батафсил айланиб чиққаним йўқ.

— Қадимда карvonсарой бўлган жой бор, ҳозир миллий хўраклар тайёрлайдиган емакхона қурилган. Ўша ерга борамиз,— деди Жамолзода.— Бокута келдингми, унинг ўзига хос жойларини кўр, миллий хўракларидан танаввул қил. Ресторан ҳамма жойда бор ва асосан бир хил.

Машина баланд-паст, тор кўчалардан бориб, кичикроқ бир майдонда тўхтади. Атроф қадимги гиштлардан тикланган девор. Майдонга «мусулмон гишти» тўшалган. Рўпарадаги бағоди дарвоза тепасига электр чироқлар билан «Карvonсарой» деб ёзилган.

— Карvonсарой номи сақлаб қолинган экан-да,— деди Ботир ёзувга қараб.

— Албатта-да. Аслида шундай қилингани тузук. Акс ҳолда, биласанми, қадими жойларга бутунги кун тушунчасидаги номлар берилса, унинг тарихийлиги йўқолади. — Жамолзода дарвозадан ичкарига бошлар экан, сўзида давом этди. — Масалан, мана шу емакхонага ҳамма жойдагидек, «Бинафша», «Лола», «Гулчехра», «Наргиз» деб ном қўйса, манимча, кулгили бўлур эди.

Дарвозадан ичкарига киргач, чоғроқ майдон, ўртада мўъжазгина ҳовуз, унда фаввора отилиб турибди. Майдоининг атрофида қатор ҳужралар. Жамолзода уларнинг бирига бошлади. Ҳужра унча катта эмас, нари борса ўн киши сиғади. Ўртага хонтахта қўйилган. Атрофида бир қарич баландликда ўтиргич. Хона нимқоронги, салқин.

Миллий кийим кийган ёш йигит кириб келди.

— Хош галмишсиниз!

Жамолзода ташаккур билдириди-да, тез-тез гапириб нималарнидир тушунтириди. Йигит «дуз» дедиyo чиқиб кетди. Бир зумда катта дўмалоқ лаъли кўтариб кирди. Унда нон, чой, турли кўқатлар, қанд бор эди. Мезбон армудига<sup>2</sup> чой қўйиб Ботирга узатаркан:

— Таъбингта қараб қанддан сол. Ноңдан ол,— деди.

Улар бир стакан чойни ичиб бўлар-бўлмас бояги йигит кабоб олиб кирди.

Бир оздан кейин хизмат қилувчи йигит учта ли-копчада хамирдан қилинганд овқат қўйиб кетди. Кабобдан сўнг мезбон янги таомга таклиф қилди.

<sup>2</sup> Нок шаклидаги стакан.

— Бунинг отини кутаб деймиз,— деди Жамолзода. Учбурчак шаклида туғилиб, ичига қийма солинган таомни узун қилиб ўради.— Одатда буни мана бундай қилиб қўлда ейилади.

Жамолзоданинг астойдил тушунтиришидан Гулгин на қулиб юборди:

— Худди ажнабийларга уқтиргандай ҳижжалаб тушунтирасиз-а. Ахир Ботир муаллим чет элдан келмаган-ку. Балки буларда ҳам бордир бунақа хўрак.

— Бизда ҳам бор,— деди Ботир.— Фақат номи бошқача.

«Ўзимизнинг филмиңдига ўхшар экан-у, фақат ичига атала ўрнига гўшт солинаркан-да», деб ўйлади Ботир.

Овқатдан сўнг Жамолзода ташқарига эмас, ўнг қўлдаги бир эшикка томон юрди.

— Энди пастга тушамиз. Келганингда кўриб кетгина-да.

Жамолзода зинадан пастга туша бошлади. Унинг ортидан Ботир билан Гулгина эргашди. Ташқарида кун қизиган, жазирама. Бу ер эса салқин. Бирон жойига кондиционер ўрнатилганмикан, деган хаёл билан Ботир билдиримай атрофга разм солди. Ҳеч қаерда ҳеч нарса кўринмади. Хонанинг эни уч-тўрт, узунлиги эса ўн метрдан зиёд чиқади. Стол-стуллар қўйилган. Бир чеккасида буфет. Турли ноз-неъматлар, шарбатлар, салқин ичимликлар. Магнитофонда қайсиdir озарбойжон хонандаси куйламоқда. Бурчақдаги столда бир йигит билан қиз бурни-бурнига теккудай бўлиб пичирлашяпти. Нариги столда эса тўрт йигит нима ҳақдадир овозини баланд қўйиб баҳслашяпти.

— Бу Карвонсаройнинг остки хоналари,— деди Жамолзода.— Яқинда очилди. Бу ёқда яна хоналар бор.— У чап томонга юрди. Бу хона олдингисидан ҳам катта. Унинг эшиги қалин, қоп-қора. Кўринишидан жуда оғирга ўхшайди. Куч билан итариб ёпиб-очиларкан. Қаттиқ дараҳтдан ишланган шекилли. Хонанинг ўтрасида узун стол, устига оппоқ дастурхон солинган. Айлантириб стул қўйиб чиқилган. Эллик-олтмиш одам бемалол сиғади. — Бу ерда ҳозир турли зиёфатлар ўтказилади. Нариги томонда бундан сал кичикрок, яна битта хона бор.

Карвонсаройнинг ҳамма хоналарини айланиб қўришибди. Ботирнинг хаёлини ҳар бир халқ ўз ўтмиши-

ни қадрлаши лозимлиги, келажагини ўйлаган халқ шундай йўл тутиши ҳақидаги фикрлар банд қилди. Ҳозир кўрганлари бунинг бир мисоли эди...

#### IV

Уйга қайтиб келгач, Гулгина отасидан сўради:

— Нечун айтмадингиз бор гапни?

Жамолзода ҳовлидаги тўқима креслога чўкиб, сигарет тутатди.

Қизига бир қараб олди-да, оҳиста деди:

— Томдан тараша тушгандай нима дейман... Мавриди келса айтарман... Ҳали шу ерда-ку.

Унинг сўзлари шу қадар вазмин ва маҳзун чиқдики, беихтиёр иккови ҳам жиҳдийлашиб, хаёл дарёсига шўнғиди. Жамолзода сигарет тутунини чуқур-чуқур тортаркан, марҳума хотинини эслаб кетди. Қандай ажойиб аёл эди у. Орадан неча йил ўтиб кетди, аммо Жамолзода уни сира унотолмайди.

Шундай кезларда у ёлғиз қолишни, тўйиб-тўйиб хаёл сурини истайди. Ҳозир ҳам кўнгли шуни тусади. Бироқ бундай кайфиятта тушганини Гулгинага билдирамасликка ҳаракат қиласи. Билиб қолса, кўймайди у, бир амаллаб хаёлини чалғитади. Лекин Жамолзода ўша ўй сира фикрини тарк этмаслигини хоҳлади баъзан.

Сигарет қолдигини оёғининг тагига ташлаб пошнаси билан эзғилаб ўчирди-да, зўрма-зўраки жилмайиб ўрнидан турди.

— Сан энди бориб дамингни ол. Эртага узоқ йўл юрамиз, чарчайсан. Ман бир оз ишламоқчиман,— деди.

— Сиз ҳам ором олинг. Саҳар тургансиз. Сабах яна тонгла уйғониш лозим.

Жамолзода Гулгинанинг пешонасига тушиб турган кўнғироқ соchlарини эҳтиётлаб силади.

— Ҳозирча чарчаганим билинмаяпти. Озгина бўлсада, ишлаш кайфиятим бор.

У ҳовлининг чап томонидаги устахонасига томон юрди. Хонага кирди-да, у ёқ-бу ёрига турли ранг бўёқлар теккан енги калта катақ кўйлагини кийди. Деразадан билдирамай Гулгинага қаради. У уйга кириб кетган эди.

Рассом қўлига мўйқаламини олди. Анчадан бери битказолмаётган ишига узоқдан разм солди. Нигоҳи

чала полотнода, аммо кўзлари уни кўрмас, хаёли мутлақо бошқа жойда. Бояги ўйлар қуршовидан ҳали кутулмаган, ҳали бери қутулишни истамасди ҳам...

\* \* \*

Тақдир тақозоси билан рассом Жалил Жамолзода анча кеч уйланди. Аввал ўқиш деди, кейин сал ўзимни тиклаб олай деди, хуллас, ёши ўттиздан ошиб кетди. Бу орада у рассом сифатида кўзга кўриниб қолди. Унинг асарлари нуфузли кўргазмаларда намойиш қилинار, матбуотда Жамолзода ижоди хусусида баҳс-мунозаралар авжига чиққанди.

Ана шундай ажойиб кунларнинг бирида тақдир уни Мадина билан учраштириди.

Мадина шаҳар поликлиникаларидан бирида ҳамшира бўлиб ишларди. Иссиқ ҳаммомдан чиққан Жамолзода Бокунинг аёвсиз шамолига дуч келдию хасталанди. Врачга учрашган эди, қаттиқ шамоллабсиз деб, пенициллин билан витамин ёзиб берди. Ҳар биридан ўнтадан укол оласиз, деди.

Эртаси куни дориларни кўтариб «Процедурная» деган хонанинг эшигини тақиллатди. Қошу кўзи попукдай, қадди-қомати сириқдай қиз унинг қўлидан қогозию дориларини олди. Бу — Мадина эди. У врачнинг тавсиясини ўқиб кўрди-да, ётинг деди.

— Нега? — деб ажабланди Жамолзода.

— Нега бўларди, укол қиласман.

Жамолзоданинг ранги оқариб кетганини кўриб, Мадина кулди. У шприцга дори сўрдиаркан, Жамолзодага қарамай деди:

— Бўлинг тезроқ... Дори қотиб қолади.

— Ётмасам бўлмайдими? — деб сўради Жамолзода.

У гуноҳкор боладай елкасини қисиб турар, овози ҳам базур чиқарди.

— Манга барибир... Фақат тезроқ бўлинг.

— Нима қиласман?

Ҳамширанинг жаҳли чиқди.

— Умрингизда укол олмаганимисиз? Ечинг. Бўксангизга қиласман уколни.

Чиндан ҳам Жамолзода шу ёшга кириб бирор марта укол олгани йўқ. Тўғри, болалигида бирми-иккими укол қилишувди. Орқасига — курагининг остига. Мадина-

нинг гапи ўшани ёдига туширди-да, кўйлак-майкаси-ни елкасигача кўтарди. Мадина кулиб юборди:

— Қанақа одамсиз... Туширинг, бўксангизга қилиш керак.

Жамолзода бўшашиб Мадинага ўтирилди:

— Нималар деяпсиз, хоним? Курагимнинг тагига қиласверинг-да.

— Мумкин эмас. Ҳамма уколни юборадиган ўз жойи бор. Мана бу дорингизни билагингизга қиласман. Тезроқ, бўлинг...

У шприцни осмонга қаратиб поршинчасини бош бармоги билан секин босган эди, нинанинг учидан тиз этиб дори отилди. Жамолзода ноилож камарини бўшатди. Мадина пахтани спиртга ҳўллаб келди:

— Ўзингизни бўш тутинг. Акс ҳолда нина кирмайди ёки ичингизда синиб қолади.

Жамолзода бир сакраб тушди.

— Хоним, сиздан илтимос. Укол қилмай қўя қолинг. Шу уколни олмасам ўлиб қолмасман.

— Гап ўлиш-ўлмаслиқда эмас, саломатлиқда. Сизнинг соғлигингиз фақат ўзингиз учун эмас, халқимиз, санъатимиз учун керак.

Жамолзоданинг орзи очилиб қолди. «Мани рассом-лигимни қаёқдан била қолди экан, бу ҳамшира?»

— Шунақа денг... Ташаккур сиза, хоним... Майли, тиқинг нинангизни, шу гапларингиз учун ҳамма нарсага чидайман.

Мадина спиртли пахта билан унинг баданини арти-да, карт эткизив нинани урди.

— Мана бу эркакча гап... — Дорини Жамолзоданинг баданига юбориб, нинани суғуриб олди, ўрнини спиртли пахта билан яна артди. — Шунча танқидларга чидаган рассом ингичкагина нинадан қўрқиб ўтираса-я...

Жамолзода тескари қараб кийимларини тўғрилади.

— Менга қаранг, хоним. Сиз бу гапларни қаердан биласиз?

— Биласан-да,— деди Мадина хотиржам. — Ман тасвирий санъатни чўх хуш кўраман. Ҳар бир янги кўргазмага албатта бораман. Сизнинг асарларингиз билан ҳам танишман.

Жамолзода бошқа гапирмади. Ташаккур айтиб чиқиб кетди.

Бу хонага йигирма кун қатнади. Бу орада Мадина билан анча яқинлашиб қолди. Ҳатто бир-бирига телефон номерларини беришди. Жамолзода соғайиб кетди. Аммо ҳамшира Мадинани унтуломади. Гүё дорилар билан бирга юрак кўрини ҳам унинг томирларига юборган эди. Рассомнинг қон томирларида Мадинанинг меҳри ҳам айланарди.

У бир-икки марта поликлиникага қўнғироқ қилиб, Мадина билан гаплашди. Лекин симлар орқали бўлган мулоқот уни қаноатлантирумади. Энди у Мадинани сўраб борадиган одат чиқарди. Мадина аввалига уялди, қўйинг, битта-яримта кўриб қолса, гап қиласи, деди. Бироқ Жамолзода фикридан қайтадиганлардан эмасди.

Аста-секин Жамолзода билан Мадинани биргаликда кинода, театрда, концертларда кўришди.

Ота-онасидан эрта айрилиб ёлғизлик уқубатларини бошидан кечирган Жалил Жамолзоданинг хонадонига қуёш нури яқинлашмоқда, ой шуъласи тушмоқда эди.

Орадан олти ой ўтар-ўтмас уларнинг тўйи бўлди.

Мадинанинг гаплари рост чиқди. У тасвирий санъатни ҳаддан зиёд яхши кўрар экан. Жаҳон классик рассомлари, уларнинг асарларидан хабардор эди. Бу аввалига Жамолзодани ҳайратга содди. Бора-бора кўниқди, тақдир шундай умр йўлдошинираво кўрганидан ич-ичидан севинди.

Ойнинг ўн беши қоронғи бўлса, ўн беши ёруғ экан. Жамолзоданинг ҳам ёруғ кунлари келди.

Мадина бутун умрини, ҳаётини, куч-қувватини Жамолзодага, унинг истеъоди равнақига бағишлиди. Ишини ҳам йиғиштириди. Рўзғор ташвишларини ўз зиммасига олиб, эрини барча юмушлардан озод этди. Жамолзода батамом ижодга берилди. Фақат Мадина овқатта таклиф этганда хонасидан чиқиб танаввул қиласи, кейин яна ишга шўнгиб кетарди. У тарих ҳақидаги ҳужжатли, илмий, бадиий асарларни, қомусларни ўқиб-урганар, шулар асосида тарихий шахсларнинг сиймосини холстга туширади. Унинг қатъий режалари бор: Низомий, Бобак, Фузулий, Нотавон, Насимий, Воқиф, Видодий, Ҳожибеков сингари озарбойжон халқининг ўтмишида ёруғ юлдуз каби порлаб турган сиймоларнинг образини яратмоқни ҳаётининг, ижодининг маз-

муни, деб тушунади. Шу эзгу ният йўлида бир неча полотнолар яратди. Улар жамоатчилик, мутахассислар томонидан турлича баҳоланди. Хусусан, миллий қаҳрамон Бобак образи тасвирланган асари кўп муно-зараларга сабаб бўлди. Бундан баъзан кўнгли ўксир, гоҳо «демак, асарда нимадир бор эканки, у ҳақда шун-ча баҳслашишяпти, акс ҳолда бир чеккада эътиборсиз қолиб кетаверар эди-да», деб ўзига ўзи таскин берарди. Шундай кезларда Мадинахоним унинг кўнглини кўтарар, асар хусусида фикрлар қўзғалгани маъқул, деб уни овутарди. Бу етмаса ярим ҳазил, ярим чин оҳангда ашула айтиб хаёlinи чалғитарди.

*— Ман Баҳруд<sup>3</sup> хаёlli бир рассом ўлсайдим,  
Гўяр чин алини чакардим сани.  
Тоғлонинг устинा булатдек ҳана,  
Сиёҳ тэлларингни чакардим сани.  
Илҳом парисини чак десайдилар,  
Зухро улдузини чак десайдилар,  
Илҳом парисини чак десайдилар,  
Гунаши ўзини чак десайдилар,  
Гунаш жамолингни чакардим сани...*

Шундай деб у кулар, Жамолзодага ҳазиллашарди...

— Билдингми, азизим. Рассом ўлсанг Баҳруд хаёл-ли ўл, йўқса ижод заҳматини чакмайинг на лозимди?!

Жамолзоданинг чеҳраси ёришиб, Мадинахонимнинг пешонасидан авайлаб ўпид қўярди...

## V

Ботир эрта уйғонди. Одати шунаقا: бирон жойга борса кўникунча бир-икки кун яхши ухлаёлмайди. Кеч ётади, эрта туради.

Шифтта қараб ётиб ўйга толди. Ҳадемай отланадиган сафари ҳақида ўйлади. Кўккўлни жуда мақташади. Ростданам гўзал жоймикан? Ўзимизнинг Омонқўтонга, Шоҳимардону Баҳмалга ўхшаган жойлардир-да. Хаёлан Кўккўлни Қўлиқубонга менгзади.

Фикрлари айланиб Гулгинага келди. Уни ўйлаши билан юраги ўйнаб кетади. Кеча эрталаб самолётда келаёттганда ҳам шундай бўлган эди. Одам бировни

<sup>3</sup> Баҳруд Кангарли — XIX аср охири ва XX аср бошида яшаб ижод этган озарбойжон классик рассоми.

яхши кўриб қолса шундай ҳолга тушади. Сочидаги илк учрашувдан буён хаёлида Гулгина... Аммо у-чи? Севармикан? Ўшанда аниқ бир гап айтмади-ку. Нима учун йиглади ўшанда? Ёки бирон яхши кўргани бор-микан? У ҳолда нега очишини гапирмади?..

Энди дадил айтади дардини. Аниқ жавобини сў-райди.

Жамолзодага ёради кўнглини. Аслида шунинг учун келмадими Бокуга... Турмушга чиқмагани аниқ. Ота-синикида экан-ку.

«Гулгина... У Ўзбекистонга кетишга кўнармикан?.. Менинг ота-онам нима дейди ҳали... Тақдиримиз қўшилган бўлса нима қипти. Кечаги чолнинг ўғли ҳам шу ердан уйланяпти экан-ку...»

Бу саволу ўйлардан унинг боши шишиб кетди. Ўлайверса охири йўқ. Бири-бирини етаклаб келаве-ради. У ўрнидан туриб бир оз бадантарбия қилди-да, ювингани ваннахонага ўтди...

Ботир уч йил олдин университетни битирди. Ҳамон бўйдок.

Ота-онаси қачондан бери қистайди уйлангин, деб. Бугун бу дейди, эрта у. Куналар, ойлар, йиллар ўтиб боряпти. Унча-мунча қизлар ёқмайди. Бирини озгин деса, иккинчисини семиз, дейди. Бошқасининг сочи ёқмаса, яна бири пакана. Отаси-онаси сенга осмондаги ойни қаердан оламиз деб, жаҳли чиқади. Кошки шунга яраша ўзи қизларнинг ақдини шошириб қўядиган даражада хушрўй йигит бўлса экан. Қотма, қорача юзларида катта-катта кўзлари ўйнаб туриди, озгинлигидан новча бўйи яна новчароқ кўринади. Шу ҳолига бу кишимнинг дидлари нозиклигига, талаблари юксаклигига ўласанми...

Хўш, йилда бир насиб этадиган, одамлар кечаю кундуз орзиқиб кутадиган отпускани олиб, Боку кўчаларида нега дайдиб юрибди? Севгининг қудрати эмасми бу?

У кийиниб бўлгач, соатига қаради: етти яrim. Ў-ҳў, ҳали барвақт-ку.

Столдаги «Баки» деган йўл кўрсаткичнинг тахини ёзиб кўз югуртирди. У ҳали фикрини жамлаб ултурмаган ҳам эдики, эшик тақиллади. Чўчиб тушганидан кўли титраб кетди. «Келди, яхшиям эртароқ турганим...» У эшик томон йўналди...

Улар шаҳардан чиқишигандан соат энди саккиз ярим эди.

— Бу ёғида юриш осон,— деди Гулгина Ботирга ўтирилиб.— Шаҳарнинг ичидаги транспорт кўп, одамнинг асаблари толиб кетади. Шаҳарда икки соат юргандан кўра мана бунаقا йўлдан икки юз километр жойга бориш осонроқ.

Машина тобора тезлашади. Бундан Гулгинанинг ўзи ҳам завқ олади шекилли, ўриндиққа жойлашиброқ ўтириди-да, тезликни баттар ошириди. Унинг нозик қўллари руль чамбарагини гоҳ ўнгга, гоҳ чапга енгил айлантирирар, ҳаракатлари аниқ ва эпчил эди. Гулгинанинг орқасида ўтирган Жамолзода ўнгта — Ботир томонга бурилди.

— Хўш, Ботир, қалай дам олдинг?

— Яхши, Жалил муаллим, ташаккур,— деди Ботир.

— Тўғри Кўккўлга борамизми ёки йўлдаги шаҳарларни ҳам кўриб ўтамизми?

Ботир кууди:

— Тошкентта учадиган самолётта чиққунимча инонихтиёrim сизда, унинг қалити билан рули эса Гулгини нахонимнинг қўлида. Нариги дунёга десангиз ҳам кетавераман. Миқ дейиш йўқ.

Жамолзода ўзининг кечаги гапини эслаб жилмайди. Гулгина эса шараклаб куларкан, Ботирга юзланди.

— Дуз деюрсиз, Ботир муаллим. Иккингизнида қисматиниз ҳозир маним алимда.

Учкови баравар кулишди.

Сукунат. Машина моторининг бир маромда гувиллаши эшитилади, холос. Ботир атрофни кузатади. Чор атроф кўм-кўк, боғ, токзор. Ажойиб манзара. Фир-ғир шабада.

— Демак, гап бундай,— деди Жамолзода жимликни бузиб. — Йўлда ҳамма жойда тўхтаб юрмаймизу фақат Мингечаурга кириб ўтамиз. Ўша ерда овқатланамиз. Яхши балиқлар бор. Хоҳласанг чўмиламиз, катта сув омбори бор. Маъқулми, Гулгини нахоним?

— Гулгина бош ирғаб тасдиқ оҳангини билдириди. Жамолзода Ботир томонга бурилиб гапида давом этди.

— Мингечаурга кирайлик деганимнинг яна бир сабаби бор. Биринчидан, у бутун Кавказнинг қоқ маркази ҳисобланади. Иккинчидан, уни қуришда санинг юртдошларинг ҳам иштирок этишган. Чўх байналми-

нал шаҳар. Ҳа, дарвоқе,— деди у муҳим гап эсига тушгандай сергак тортиб. Қалин, узун соchlарини бармоқлари билан орқага тараб ташлади. — У ерда санинг бир юртдошинг бор. Ман уни яхши танийман. Тўқимачилик комбинатида ишлайди. Шаҳардаги маданият саройида маним шахсий кўргазмам очилганда келган, тантанали йиғилишда сўзга чиққан эди. Истасанг топиб сұхбатлашамиз.

Бу гап Ботирни қизиқтириди. Рост-да, Ўзбекистондан қанча олисда — Кавказнинг қоқ марказида ўз ҳамшаҳарини учратиш қизиқ-да.

— Майли, борамиз,— деди Ботир.

Жамолзода кулди:

— Ўзим ҳам йўқ демасанг керак, деб ўйловдим.

Томирингда ҳақиқий ўзбек қони гупурур экан.

Ботир Жамолзодага синовчан назар ташлади.

— Нега ундай деяпсиз?

— Акс ҳолда бефарқ ўтиб кетаверар эдинг-да,— деди Жамолзода. У шошилмай, ҳар бир сўзни салмоқлаб гапирди. — Ҳа, бир ўзбек аёли бўса бўпти-да, деб қўя қолишинг мумкин эди-ку. Ўз ҳалқи, унинг тақдири, келажаги учун жон куйдирган одамгина қаердаки ҳалқи ҳақида сўз кетса шундай сергак тортади.

Ботир бир оз хижолат тортиди.

— Йўғ-э, жуда ошириб юбордингиз.

Сұхбатта Гулгина қўшилди:

— Камтарлик на лозимди, Ботир муаллим, Жалил муаллим рост айтяпти.

Гулгинанинг гапидан кейин Ботир баттар хижолат чекди.

Умуман, Гулгинанинг ҳар бир гапи Ботирни довдиратиб, жавоб топишга шошиб қолмоқда. Хайриятки, бу сафар бирон нима дейишшга ҳожат қолмади, гапни Жамолзода илиб кетди.

— Биласанми, Ботир, камтарлик — яхши, ҳадеб бўса-бўмаса мақтанавериш, кўкракка уравериш одобдан эмас. Лекин, очигини айтсам, ҳар бир нарса меъёрида бўлгани маъқул. Жумладан, камтарлик ҳам. Ортиқча камтарлик ҳам яхшиликка олиб келмайди. Нима, сан ўйлайсанки, камтарлигингни ҳамма тушунадими? Йўқ, кечирасан, сан бир чеккада қолиб кетаверасан, аллақандай талантсиз, лўттибоз одамлар устингдан бо-

сиб ўтиб кетаверади. Бу ҳам етмагандай санинг устингдан кулади. Шунинг учун одам ўз қадрини билиши керак. Вақти келганда ўзининг кимлигини, нимага қодирлигини кўрсатиб ҳам қўймоқ зарур.

Унинг жўшиб, ҳатто асабийлашиб бораёттанини сезган Гулгина машина радиосининг қулогини буради-да:

— Бўлди! — деди Жамолзода га ўтирилиб. — Лекция тамом! Энди музика эшитамиз.

Радиодан шўх қўшиқ янгради:

*Ман бир ушаг, ман бир ушаг  
Сан бир ана, сан бир ана,  
Озарбайжон, Озарбайжон, Озарбайжон.*

— Зайнаб Хонларова-ку,— деди Ботир.

— Ёқтирасанми?— ашулани эшитиб Жамолзода-нинг кўзлари ўйнаб кетди.

— Ҳа. жудаям яхши кўраман. Умуман, бизда уни кўпчилик ёқтиради. Жуда оммавийлашиб кетган.

Гулгина, қўшиқ тутамай, радиони ўчирди.

— Нега ўчирдингиз, Гулгинахоним?— деди Ботир. — Яхши куйлаяпти-ку.

Гулгина афтини бужмайтириб:

— Маним хушима галмайир,— деди.

Ботир индамади. Нима ҳам десин. Ботирнинг назарида Гулгина санъатнинг ҳамма соҳасини нозик тушинар, қадрлар, яхши-ёмонини одилона фарқлай олар эди. Унинг ҳозирги гапидан кейин ўша фикридан қайтди. «Йўқ, янгишган эканман! У санъатнинг бошқа турларини билмадиму, аммо қўшиқни тушунмас экан. Бўлмаса, Зайнаб Хонларовадай хонандани ёқтирумайдими?»

Унинг бироз ранжиганини Жамолзода сезди. Чунки Ботир ўйчан, ҳатто ўзи билмаган ҳолда қош-қовоғи осилиб қолган эди.

— Очиб қўй радиони,— деди у қизига. — Санга ёқмаса бошқаларга ёқади. Мехмон эшитмоқчи, ахир.

— Йўқ, шарт эмас,— деди Ботир. — Мен кўп эшитганман.

Гулгина чап елкаси оша отасига бир ўқрайиб қаради-да, радиони очди. Ҳамон Зайнаб куйларди:

*Билмам мани у на учун отмиш, унумтиш,  
Отиган агосина турбан ўлдигум.*

Баҳс ораларидағи сұхбатта сув сепди. Гурунг совиди. Ҳамма ўз хаёли билан ёлғиз қолди...

Кўринишиданоқ янги эканлиги, йигирма беш-үттиз ийларнинг нари-берисида қурилгани сезилиб турган шаҳарга кириб боришганда вақт пешинга яқинлашган эди.

Гулгина машинани ўнгта бурди. Бироз юргач, қуюқ дараҳтлар орасыдаги ошхона олдида тушишди. Ўртада фаввора. Унинг атрофига стол-стуллар қўйилган. Салқин. Йўлдан, хусусан, иссиқ кунда келган одамнинг тани ором олади.

— Шу ерда овқатланамиз. Сал нафас ростлаб, кейин кўлга борамиз. Сўнгра тўқимачилик комбинатига ўтиб, санинг ҳамшаҳарингни кўрамиз,— деди Жамолзода.— Матъулми?

Ботир тасдиқлади. Гулгина фавворадан отилаётган сув заррачаларига юзини тутиб ўйнарди. Унинг ҳаракатлари гўё ёш бола қаби эди. Ботир қизни зимдан кузатаркан, бориб унга сув сепиб ўйнашгиси, Гулгинанинг кайфиятини кўтаргиси келди.

Жамолзода билан Ботир чеккадаги столга бориб ўтириши ҳамоно бир ёш йигит уларнинг олдига югуриб келди.

— Салом, Жалил муаллим. Хош галмишсиниз.

— Ай, соғ ўл,— деди Жамолзода, — таниш ўлинг, маним қўноғим, Ўзбакистондан, Ботир.

Йигит Ботир билан кўришар экан:

— Чўх яхши, сиз ила таниш ўланимдан чўх розијам, — деди.

Жамолзода йигитта нималарнидир тушунтириди.

Ботир уларнинг гапига унча аҳамият бермади. Боз устига унинг нигоҳи ҳам, хаёли ҳам Гулгинада эди. У ҳамон фаввора атрофидаги кумуш заррачаларга юзини, қўлини тутиб ҳузур қиласарди. Унинг юпқа ҳиндий кўйлаги намланиб кеттан, аммо қиз буни сезмасди. Чамаси, иссиқдан келгани, машина ҳайдаб чарчагани учунми бу заррачалар унга хуш ёқар, у жажжи қизалоқ, қаби ҳамма нарсани унтутиб, атрофдаги одамларга ҳам парво қилмай сув ўйнарди.

Бояги йигит бир зумда стол устини турли нознеъматларга тўлдириди. Узун чинни идишда балиқ келтирди. У гўё тирикка ўхшарди, ёнларига кўкатлар

қўйилган. Ботир ажабланиб қаради. Буни сезган Жамолзода изоҳ берди:

— Бу ерда балиқни шунаقا пиширишади. Худди тирикка ўхшайди-а. Аммо ичи тозаланган. Бир чекка-сидан кесиб ейилаверади.

Балиқ анча катта, тахминан уч-тўрт килоча келарди.

— Ажойиб экан,— деди Ботир ҳайратини яширомай.

Жамолзода балиқнинг ярмини майдалаб кесди.

Гулгина ҳамон келмас, фавворанинг нариги тарафига ўтиб кеттанди. Жамолзода уни чақирди:

— Гулгинахоним, гал бура.

Гулгина отасига деди:

— Сан ҳардан билирсанки, бу су на роҳатди?

Гулгина гўзал чехраларидағи марварид доналари каби сув томчиларини арта-арта булар томон юрди.

У Ботирнинг қаршисидағи стулга келиб ўтирди...

Улар сув омборига келишганда вақт пешиндан оққан эди. Сув омбори дегани денгиздай поёnsiz, чайқалиб ётарди.

— Жуда катта экан-ку,— деди Ботир кўз илғамас уфққа қараб.

— Ҳа, чўх буюк кўл.— Жамолзоданинг сўзларида фахр-ифтихор туйғулари бор эди.— Эни ўн етти, бўйи етмиш километр.

— У-ҳў!

Ҳув нарида катер кўринди.

— Жалил муаллим, катерга тушамизми?— деди Гулгина.

Жамолзода Ботирга қаради. Ботир ҳам шуни истаб турган, Гулгинанинг таклифи айнан унинг кўнглидаги гап эди. Шу боис ҳеч иккиланмай рози бўлди.

Ўша томонга юришди. Жамолзода катер ҳайдовчини имлаб чакирди.

Катер кўлнинг ўртасига қараб шитоб билан сузиб бораради. Бу жуда ҳам гаштли, одамнинг завқини келтираради. Ботир кўлнинг соҳилларига кўз югуртирди: кўм-кўк. Унинг нигоҳи Гулгинага тушди. Қиз ҳам атрофга завқ ила боқар, кўринишидан ички бир ҳаяжон унинг туйғуларини жўш урдираради. У ўзини босолмади, овозини баралла қўйиб шеър ўқиди:

— Қўй, эй булбул, тин, эй довул, ки хоҳиш истироҳатдир,  
Бу ерларда илинжим ийк, юланчим бир саёҳатдир.

Жамолзода унинг шеър ўқишидан завқланиб ўти-  
рад, Ботир эса Гулгинанинг шамол тӯзғитаётган соч-  
ларидан, нозик қўлларининг нафис ҳаракатларидан кўз  
узолмасди. Қиз эса тобора жўшиб шеър ўқирди. Бу  
шеър бултур Қора дengiz соҳилидаги суҳбатни ёдига  
солди.

Чамаси, Гулгинанинг ҳам эсига ўша суҳбат тушди  
чоғи, шеърни тутатди-да, Ботирга қаради.

— Сизда гўзал ўқијорсиз, Ботир муаллим. Бир  
шеър ўқинг. На ажаб манзара бу.

Жамолзода уларнинг суҳбатини тинглаб, кулиб ўти-  
ради. Бу жойларнинг гўзаллигини, кўлда сайр қилиш  
завқли эканлигини у билади, кўп бор туйган бу туйгу-  
ни. Бироқ бу сўлим соҳилларга келавериб, асар чи-  
зиш асносида унга термилавериб, ҳаммаси таниш бўлиб,  
бирмунча кўнишиб кеттган. Аслида шундай, ҳар қандай  
гўзал жойни ҳам одам қайта-қайта кўраверса, унинг  
гўзаллигига кўзи ўрганиб қолади.

— Ўқи, Ботир,— деди Жамолзода ҳам,— ўзбакча  
ўқи, бир эшитайлик.

Ботир қиздан нигоҳини ололмас, гўё унинг сехрига  
тушиб қолгандай эди. Ўша ўтиришда ғазал ўқий бош-  
лади:

— Қайси уйнинг шамидир у, қайси жойда хонаси,  
Ўтрага жонни, сўранг, кимнинг эрур жононаси?

Ботир худди бу сўзларни ўзи Гулгинага айтиётган  
каби ўқиб, баъзан қўлини унга томон чўзиб юборга-  
нини ўзи ҳам сезмай қоларди:

Ёраб, ул ой юзли, юлдуз чеҳрали олий нишон,  
Қайси коннинг гавҳари, кимнинг эрур дурдонаси?  
Қилди ичмасдан лабининг бодаси дилни ҳароб,  
Кимга улфат, ким эрур ҳамкоса, ҳам паймонаси?

Гулгина Ботирнинг ғазал ўқишини завқ билан ку-  
затар, мисралар узра тизилган шўхчан оҳанг унинг  
дилини яйратарди.

Ботир ғазални тутаттач, Гулгина ҳаяжонини яши-  
ролмади:

— Чўх гўзал ғазал! Ташаккур сиза, Ботир муаллим. Маним урайима зарофат бахш этди. Чўх соғўлин!

Бир соатлардан кейин улар шаҳарга йўл олишди. Гулгина кайфияти кўтарилган, йўлда унинг кўнгли узра тушган хира губор батамом тарқаб кетган. Энди у машина рулини завқ билан бошқаарди, гўё ҳозир ашула айтиб юборадиган ҳолатда.

Уларнинг машинаси Мингечаур тўқимачилик комбинати олдида тўхтади.

— Сизлар ўтириб туринглар, ман сўраб чиқай-чи, Фаридахоним шу ердамикан,— деб машинадан тушиб кетди Жамолзода.

Гулгина ўнг қўлини ўриндиқ суюнчигига ташлаб, Ботир томонга ўтирилди.

— Нежирсиз, Ботир муаллим? Ториқмаяпсизми?

— Йўқ, — деди Ботир. — Сиз билан юрсам ҳеч маҳал зерикмайман.

Қиз қиқирлаб кулди. Ботир унинг кулгиси маъносини тушунолмади.

— Шунаقا денг,— Гулгинанинг қошлари чимирилди.— Гапга чўх чечан экансиз.

Ботир дил изҳорига жавоб олиш пайти келди, деб ўйлади-да, гапни илиб кетди.

— Гулгинажоним, менинг бултур айтган гапим эсин-гиздами?

Қиз унга савол назари билан қаради. Бу қарааш замиридаги ишва йигитнинг юрагини ўртаб кетди. Бе-ихтиёр қўлини унинг қўлига қўйди.

— Пляждаги гап-чи? Жавобини айтмовдингиз... Мен шунинг учун келдим.

Ўша мулоқот қизнинг ҳам ёдига тушди. Бироқ нима деб жавоб беришни ўйлагунча рўпарада Жамолзода кўринди.

— Айтинг,— деди Ботир шошиб.

— Жалил муаллим...— деди қиз.

У ўттиз ёшлардаги кўхликкина жувонга нималарнидир тушунтириб келарди.

Ботир машинадан тушиб уларга пешвоз юрди.

— Хайрият, Фаридахоним шу ерда экан,— деди Жамолзода.

— Марҳамат, танишинглар.

Фарида Ботир билан қўл бериб кўришди. Ҳол-аҳвол сўрашдилар. Фарида меҳмонларни уйига таклиф этди.

Ботир учун Жамолзода жавоб берди:

— Йўқ, ташаккур сиза Фаридахоним, биз кеч қоламиз. Кўккўлга боряпмиз. Ботирни бир томоша қилдидрай, деб олиб юрибмиз.

— Кўккўл жуда гўзал, чиройли жой. Элдор бизни тез-тез олиб боради у ёқقا,— деди Фарида.

Улар хайрлашиб йўлга тушишди.

— Қайтишда тушинглар бўлмаса бизникига. Хўпми, албатта, келинглар, кутамиз.

Гулгина ҳайдаб бораётган «Волга» юз метрлар чамаси юргач, ўнгта бурилди. Фарида унинг ортидан термилиб қолди...

## VI

Эътибор берганмисиз, на қуруқлиқда, на ҳаводаю на сувда текис йўл бор. Машина-ку тинмай силкингани майли — унинг гидриаги ер узра айланади, аммо самолёт билан кема-чи? Уларга нима халақит беради? Бўм-бўш ҳавода учиб бораётган самолёт бирдан нотекис йўлга тушиб қолган машинадек тўқир-тўқир қиласади, бир кўтарилади, бир пастга тушади. Кема ҳам шу — гоҳ тинч сузади, гоҳо бешикдай чайқалади.

Инсон ҳаёти ҳам ана шу йўлларга ўхшайди: баъзан бир текис, силлиқ давом этади. Баъзан остин-устун бўлиб кетади.

Жалил Жамолзода билан Мадинахонимнинг ҳаёти ширин, улардан бахтли одам йўқ эди. Муҳаббат бобида ҳам ҳавас қилса қилгудек эди улар. Лекин бу ширин ҳаёт узоқ чўзилмади. Уларнинг турмуш қурганига беш йилдан ошди. Шу йиллар давомида икковининг ҳам бир нарсадан кўнгли ярим. Бу — фарзандсизлик доғи. Жамолзодадан ҳам кўпроқ Мадина эзиларди. У ажойиб ўғил-қизлар кўришни, улар отаси каби истеъодди бўлишини орзу қиларди. Жамолзода уни нене врачларга кўрсатмади. Йиллар ўтаверди, бироқ натижа йўқ. Жамолзода унга таскин беради: «Майли, сан сиқилма, бир кунмас-бир кун фарзанд кўрамиз. Борди-ю, пешонамизга фарзандсизлик ёзилган бўлса, унда ҳам қайғурма. Энг муҳими, ман сани севаман, манга кўрсатаётган яхшиликларингни, фидойилигинг-

ни сира унутмайман. Яратган асарларим — бизнинг фарзандларимиз... Хотиним түфмади, деб ман мутлақо ранжимайман...»

Таскин керак, таскин яхши. Лекин таскиннинг ўзи билан иш битмайди-да. Шундай онлар бўладики, фарзандсизлик дунёдаги энг ашаддий баҳтсизлик экани рўй-рост билинади. Ана шунда жамики омаду баҳтлар бир пулга айланади. Дунёдан воз кечиб юборгиси келади одамнинг.

Эртаю кеч ижод билан машғул Жамолзода эҳтимол бундай ҳолга тушмагандир. Аммо Мадинахонимни бунақа туйғу неча бор ўраб-чирмаб олган — ёлғиз унинг ўзи билади.

Иллар ўтган сари унинг ўйлайдигани шу бўлиб қолди. Жамолзода хотинининг хаёlinи чалғитишга қанча уринмасин, таскин бериб, овутмасин, фойдаси йўқ. Ёлғиз қолган кезлари йиглаётган дилининг охи кўз-ёшларга айланиб ташқарига сизиб чиқади. «Ман баҳтсиз аёл эканман. Ўзим баҳтсиз бўла қолсан ҳам гўрга эди, бир йигитнинг ҳам баҳтини қаро қилдим. У мани қанчалик яхши кўради. Ўзим-чи? Усиз ҳаётим кўмир. Ўзига ўҳшаган ақдли, истеъодди йигитлар ато эта-ман, деб ният қилувдим... Қани улар?!»

Дунёда ҳамма дарднинг давоси бордир эҳтимол. Лекин бу дарднинг давоси ҳали топилгани йўқ.

Унинг давосини топганга Мадина бутун борлигини, мол-мулкини беришга тайёр. Фақат фарзанд кўрса, суюкли эрига паҳлавон ўғил туғиб берса бас. Булар орзу, хаёл эди, холос.

Жамолзода узоқ районларга ижодий командировкаларга кеттанида Мадинахоним ҳайҳотдай ҳовлида ўтириб эртадан кечгача хаёл сурарди. Қани энди мана шу ҳовлида рассом Жалил Жамолзоданинг ўғил-қизлари қий-чувлашиб юришса. Униси бориб отасининг чала ишини ағдариб юборса, буниси бўёғини тўкиб ташласа... Мадинахоним уларни уришмасди, баъзи оналарга ўхшаб қарғамасди. Юмшоқ жойларига астагина уриб ағанаган эскизларни жойига — Жамолзода қандай ўрнатган бўлса шундай тўғрилаб қўярди, бўёқ, тўқилган полни ёғ тушса ялагудек қилиб артиб оларди. Эри командировкадан чарчаб келганда болаларининг бири у елкасига, бири бу елкасига осилса майли эди. Мадинахоним уларга танбех берар эди: «Тинч

ўтиринглар, отанг толиқиб келган, дам олсин». Жамолзода хохолаб қулади: «Қўявер, Мадина, ўйнашаверсин, чарчаганим йўқ. Буларнинг ўйинини кўрсам чарчоқларим тарқаб кетади, руҳим енгиллашади...»

Бу ўй-хаёлларнинг охири кўринса экан. Ҳаммаси сароб, мисоли туш...

Темирни занг чиритади, одамни ғам қаритади, деганлари рост. Тубсиз ўйлар аста-секин Мадинахонимни қурт каби емирди. У ичини қурт еган нақш олмага айланди. Сиртдан қарасангиз, яшнаб турибди, аммо ичи... Ичидан завол кетган ҳар қандай нарсанинг ҳам, жонзотнинг ҳам умри қисқа. Ҳаётнинг шафқатсиз бу қонуни Мадинахонимни ҳам четлаб ўтмади. У хафақон касалига чалинди. Бу Жамолзодани қаттиқ ташвишга солди. Энди унинг хаёлини фарзандсизлик доғидан кўра хотинини бу хасталиқдан фориғ этиш банд қилди. Кўп врачларга, таниш профессорларга кўрсатди. Ҳаммасининг фикри бир: сиқилмасин, ҳеч нарсани ўйламасин, ўйнаб-кулиб юрсин. Бу насиҳатларни эшитавериб Мадинахонимнинг қулоқлари том битди. Лекин бир лаҳза ҳам ўйламай туролмайди. Эри билан гаплашиб туради-ю, хаёли бошқа нарсаларда юради. Буни Жамолзода сезади, лекин иложи қанча. Бирорвнинг хаёлини жиловлаб бўлмаса...

Мадинахонимни шу дарди бедаводан фориғ этиш учун турли жойларга саёҳатларга, курортларга олиб борди. Шуни деб ойлаб қўлига мўйқалам олмади. Кошки, лоақал қилча фойда берса, Мадинахонимнинг қарашлари сўлгин, юзлари ғамгин бўла борди.

Ейдиган таомининг тайини йўқ. Ҳаракатлари ҳам олдингидаи чакқон, абжир эмас. Баъзан Жамолзода уни зимдан кузатиб ўтиради-да, юрак-бағри эзилиб кетади. Пешонаси шўр одам эканман, деб тақдиридан нолийди...

Шу ўйлар, фикрий олишувлар билан бир неча йил ўтди. Бу йиллар Жамолзодага ҳам анча таъсир этди. Кўргазмаларда унинг янги асарлари яккам-дуккам кўринадиган бўлиб қолди. Буни санъатшунослар, мухлислар, касбдошлари сезмаслиги мумкин эмасди. Шу боис аста-секин унинг ижоди хусусида турфа фикрлар қўзғалди. Кимдир нафасни ростлаш даври деди, яна кимдир жиддийроқ асарга қўл ургандир деса,

бошқаси йўқ, унинг истеъдоди сўнди, яратадиганини яратиб бўлди, деган фикр билдириди.

Тешик қулоқ — бу гаплардан Жамолзоданинг ўзи ҳам бехабар қолмади. Бу оламда ижодкордай нозик, таъсирчан одам кам. Жамолзода эса ўзининг қатъияти, иродасининг мустаҳкамлиги, учча-мунча гаплардан устун юра олиши билан кўпчиликни ҳайратта соглан. Ўша дастлабки тарихий асарлари, хусусан, Бобакка бағишлиган полотноси намойиш қилинганда, улар ҳақида жиддий мунозаралар бўлганда Жамолзода ўзининг ана шу хислатларини ошкор эттан ва худди мана шу жиҳати билан ҳаммани ҳайратта согланди. Саба-би — у на ижобий, на салбий фикрга муносабат билдириди. Устахонасидан чиқмай ишлади. Бу асари тўгрисидаги баҳс-мунозара тинар-тиммас иккинчисини намойиш этди. Мунозара оқими энди янги асарга қараб бурилади. Жамолзоданинг ўзи яна уфқда кўринмайди.

Шунда баъзилар кулди: Жамолзода арининг инини қўзғаб қўяди-да, ўзи панага бекиниб томоша қилиб ўтиради.

Бу гапларга аралашишдан не фойда. Ундан кўра ишлаш керак. Ҳар хил майда-чуйда, олди-қочди гапларнинг кетидан қувиб юриш ўрнига ишлаган, асар яратган маъкул. Бу мунозаралар ўтади-кетади, аммо асар қолади.

Жамолзоданинг шиори шу эди. Шунданми, мажлисларда чиқиб нутқ сўзлайвермайди, газета-журналларга кетма-кет интервью беравермайди...

Хаста хотинининг саломатлиги йўлида елиб-юрган ийллари ҳам ўзи ҳақида пайдо бўлган фикрларга, қарашларга эътибор бермади. Қайси бир одамга, эй, азизим, маним талантим сўнгани йўқ, ҳали кўплаб бақувват асарлар яратишга курбим ҳам, куч ва истеъдодим ҳам етади, фақат оиласвий шароитим чатоқ, кўнглим нотинч, шунинг учун қўлимга мўйқалам ушлаёлмаяпман, агар билсанг, устахонага киришга вақт тополмаяпман, деб айтиб чиқади. Бунинг иложи йўқ! Майли, ким нима деса деяверсин. Вақти келиб ҳамма фикрлар ёлғон, унинг истеъдодига нисбатан бўхтон эканлигини исбот этади. Бунга унинг ишончи комил. Фақат суюклиси Мадинахоним тезроқ соғайиб кетса бас.

Бироқ бу кунлар ҳали у қадар яқин эмаслигини, аксинча, олдинда ҳозиргидан кўра оғирроқ ташвишлар кутиб турганини у билмасди. Қаердан билсин?..

Юраги сиқилиб юрган кунларнинг бирида ярим ке-часи уйғониб кетди. У ёқса ағдарилди, бу ёқса ағда-рилди, уйқуси келмади. Охири Мадинахонимни уйро-тиб юбормаслик учун аста ўрнидан турди-да, устахо-насига ўтди. Анчадан бери чала ётган ишини давом эттиromoқни хаёл қилди. Бир ойлардан бери интизор ётган мўйқаламини қўлга олди. Ўзининг энг яхши кўрган шоири Фузулий портретини ишлаётган эди. Чала портретта олисдан термилди, узоқ термилди. Қайси жойга қайси ранг ишлатишни ўзича тасаввур этди. Фузулийнинг «Сўр» радифли газалини хиргойи қил-ганча ишга киришди: «Кавокиб сайрини шаб то саҳар бедор ўландан сўр...»

У ишини, ижодини, бўёқлар ҳидини соғинган эди. Узоқ ишлади. Илҳом билан, берилиб ишлади, ҳузур қилди. Тонг отиб, чошгоҳ бўлиб кетганини ҳам сезмади. Ҳар кун тонг билан уйғониб уни чойга чақиради-ган Мадинахоним бугун негадир жим. Балки ишига халақит бермай, деб бу одатини тарк этдимикан? Ун-дай деса ҳовлида шарпаси ҳам эшитилмайди-ку. Ёки қаттиқроқ ухлаб қолдимикан?

Жамолзода мўйқаламини жойига қўйди, қўлининг бўёқларини артди-да, устахонадан чиқди. Ҳовли, ош-хона томон ҳам сув қўйгандек жимжит. Унинг юраги шувиллаб кетди. Нега турмади экан? Тез-тез юриб хобгоҳга кирди. Мадинахоним ўрнида ётар, аммо уйроқ эди. Хайрият, деди ўзича.

— Узоқ, ухлаб қопсанми, азизам? — деди хотинининг ёнига бораркан.

— Сиз шу ердамидингиз? — Эрининг бўёқ қўлла-рига кўзи тушди-да: — Ишладингизми? Маним дар-дим билан овора бўлиб ишингиз ҳам қолиб кетди,— деди.

Мадинахонимнинг овози жуда хаста чиқди.

— Санга нима бўлди, азизам? — Жамолзода шундай деб, хотинининг пешонасига қўлини қўйди.— Ис-сигинг борга ўхшайди-ку. Врач чақирайми?

Мадинахоним чап қўлини кўрпадан чиқариб эри-нинг бўйнига ташлади.

— Ўнг қўлим билан ўнг оёғим тощдай оғир, қимир-латолмаяпман.

Турай десам, туролмадим. Қарасам, сиз йўқсиз, келишингизни кутиб ётдим.

Жамолзода чап қўли билан хотинининг кўлидан олди, ўнг қўлини унинг орқасидан ўтказиб туришига ёрдамлашди. Аммо Мадинахоним туролмади... Унинг ўнг томони — бошдан-оёқ шол бўлиб қолган эди.

Шу куни улар бир-бирига термилиб йиглади, узоқ йиглади: «Бу кўргилик ҳам бор экан бошимизда». Фарзандсизлик, хафақон касали... Бу дардлар устига энди янги дард...

## VII

Низомий Ганжавий мақбарасининг атрофи — иккичектар ер панжара билан ўралган. Бу ерда турфа гуллар, дарахтлар. Низомийнинг мўъжазгина ҳайкали. Зинадан пастга тушилса, буюк шоирнинг қабри. Ботир Шарқнинг буюк шоирларидан бири — Низомий Ганжавий қабрини зиёрат айларкан, Алишер Навоий, Бобур ҳақида, уларнинг қабри хусусида ўйлади. Уларнинг қабрини истаган пайтда бориб зиёрат қилишнинг иложи йўқлигидан афсусланди. Очиги, шу маҳалгача бу нарса унинг хаёлига келмаган эди. Ҳозир қадими Ганжа тупроғида Низомий қабри устида шу ўй, шу афсус юрагини тирнаб ўтди...

Машина Низомий ватани Ганжага яқинлашди.

— Шаҳарда кўп тўхтамаймиз,— деди Жамолзода.— Вақт кеч бўляпти, ҳали яна эллик километрдан зиёд йўл юришимиз керак.

Қоронги тушмай Кўккўлга етиб олайлик.

Ганжа шаҳрини машинадан тушмай айланиб чиқишиди. Жамолзода шаҳар ҳақида йўл-йўлакай қисқача гапириб берди.

Шаҳарда ўтмишни эслатувчи бинолар, мадрасалар, кўчалар кўп эди. Ботир машина ойнасидан гоҳ, ўнгта, гоҳ сўлга термиларкан, қачонлардир мана шу йўллардан улуғ Низомий юргандир, эҳтимол, ана у бинога киргандир, деб ўйлади.

Қуёш парпара бўлганда Гулгина эпчиллик билан бошқариб бораёттан машина гарб томонга йўл олди. Тахминан ўн-ўн беш километрлар юргач, тоғ бошланди. Йўлнинг икки томони қуюқ ўрмон. Хаво салқин.

«Волга» ана шу ўрмонзор ичидан ўнгу чапга абжир бурилиб, кийикдай учиб тобора юқорига қўтарилиб бормоқда.

Қош қорайганда манзилга етиб келишиди. Машинадан тушиши билан Ботирнинг юзига муздай шабада урилди. Ганжада ҳаво иссик, битта қўйлақда терлаб кетаётган одам бу ерда костюмсиз совқотади.

— Жуда салқин-ку,— деди Ботир.

— Бу ерда ҳаво доим шунақа салқин бўлади. Мана шу биз турган жой денгиз сатҳидан бир минг саккиз юз метр баланд.— Жамолзода Ботирнинг қўлтиғидан олиб олдинга бошлади. — Ана Кўккўл. — Рўпарасида катта қўл кўринди. — Биласанми, бу қўлнинг пайдо бўлиши ҳақида бир ривоят бор. Айтишларича, XII асрнинг ажойиб кунларидан бирида кечаси жуда қаттиқ зилзила бўлган эмиш. Ўша зилзила натижасида мана шу тоғларда еттита қўл пайдо бўлган. Кўккўл уларнинг энг каттаси. Шунинг учун уни қўллар қироли дейишади. «Қирол»нинг чуқурлиги юз метргача боради. Ривоятнинг энг қизиқ жойи шундаки,— деб ҳикоясини давом эттириди Жамолзода,— ўша зилзила кечаси Низомий туғилган эмиш.

Ботир бу ривоятда чуқур рамзий маъно кўрди. Низомий ва мана бу қўл. Бири одамларга оби-ҳаёт берса, иккинчиси маънавий озиқ баҳш этади. Бири қўллар қироли, иккинчиси шеърият қироли. Бунинг устига иккаласининг ҳам умри боқий, асрлар давомида халқ хизматида...

Йўл юриб толиққан эдилар, вақтлироқ ётишиди.

Одатига кўра Ботир барвақт турди. Жамолзода мириқиб ухларди. Уни безовта қилмаслик учун аста ташқарига чиқди. Кечаси ёмғир ёғиб ўтибди. Ҳаво тоза, қаймоқдай. Салқин этни жунжиктиради. Атроф шу қадар сокинки, ҳув нарида юрган одамнинг қадам шарпаси эшигилади.

Ботир меҳмонхонанинг чап томонига ўтди. Қаёққа қарамасин, кўм-кўк. Кўз яшнайди, дил қувнайди. Ўт-ўланлар, дов-дараҳтлар тунги ёмғирдан зумрад зирраклар таққан. Қуёшнинг акси тушган шабнамлар эса кумуш каби ялтираб, кўзни қамаштиради. Дараҳтлар оралаб симтўр тортилган. Унинг ичидаги жайронлар, охулар юрибди. Улар тонгти күёш нурига ўзини тоб-

лайди. Ботир симтўрга яқинроқ борди. Ундан бир қадамгина нарида оппоқ оҳу. У чиройли кўзларини Ботирдан узмайди. Оҳу кўзлари... Унинг кўзларини қизларнинг кўзига ўхшатиш керакми ёки аксинча, қизларнинг кўзини унинг кўзига қиёслаш маъқулми. Биринчиридан гўзал. Ботир оҳу кўзларини сира кўрмаган эди. Чиндан ҳам чиройли экан. У бунаقا мафтункор кўзни умрида биринчи марта кўриши. Табиатнинг қудратига қойил қолди.

Жайрон ҳам, оҳу ҳам Ботирдан ҳайиқмас, ҳуркмасди. Қайтанга ундан нимадир умидвор сингари симтўрга яқинроқ келди. Ботир тўр устидан аста қўлини узатди. Оҳу чиройли бўйини чўзиб, унинг қўлини яламоққа тутинди. Ботир оҳунинг юзларини, бўйини силади. Силаркан аъзойи бадани жимиirlаб кетди.

Бироздан сўнг Ботир ўзича оҳу билан хайрлашдида, кўл томонга юрди. Рўпарада баланд тизма тоғлар. Гўё бир неча түя қаторасига чўқкандай. Тоғлар ҳам кўм-кўк. Фақат энг баланд чўққиларда дараҳт йўқ: тош. Оралиқ-оралиқлар оппоқ кўринади.

Улар — қуёш нуридан яшириниб қолган қорлар. Балки бу қорлар мангу эrimас. Мана бу кўл сувларининг манбаи ўша чўққилардир.

Тор йўлак, ундан кейин сўнгсиз зиналар пастта, кўл бўйига олиб тушади. Ботир зинага қадам қўяркан, қизиқчилик учун уни санай бошлади. Бир, икки... ўн, йигирма... юз... юз эллик... икки юз... уч юз тўқсон, деганида қаердадир, узоқда эмас, унинг ёнгинасида булбул сайради. Ботирнинг хаёли қочиб, атрофга аланглади, куюқ дараҳтлар орасидан булбулни қидирди. Энди ўнг томондан эшитилди булбул овози. Бу ўшами ёки бошқасими? Қаёқдан билсин! Хуллас, булбулни кўзи илғаёлмади. Йўлида давом этди. У ёғида яна нечта зина бор — билмади, адашиб кетди.

Кўл — исми-жисмiga монанд — ҳаддан зиёд кўмкўк эди. Унинг кўз илғаган жойигача соҳилига разм солди. Бирон-бир жойида на очик тупроқ, на очик тош кўрди. Гўё атайлаб экиб чиққандай кўлнинг бутун соҳили қалин дов-дараҳт билан қопланган. Шоҳ-шаббалар худди сув ичайтгандай кўлга эгилиб турибди. Қарашнинг, кузатишнинг ўзи роҳат. Бу дунёning не-не гўзал жойлари бор-а! Ҳамиша ҳам шуларнинг қадрига етамизми? Бу каби гўзалликлардан баҳра ола би-

ламизми? Табиатнинг ақл бовар қилмас сехру қудрати билан барпо бўлган гўзалликларни топтаёттаганлар йўқми? Кошки эди! Афсуски, бу гўзалликни ҳис қила олмайдиганлар, уларни бузиб, тракторларнинг, бульдозеру экскаваторларнинг шафқатсиз тишлари, оёқлари остида ғажиб ташлайдиган кимсалар бор.

Бу фикру хаёллар Ботирни ўзи туғилиб ўсган қишлоғига етаклади. Болалик йилларини эсга солди. Уларнинг қишлоғидан уч-тўрт километр юқорида кенг тўқайзор, боғлар, токзорлар бор эди. Унинг тенгдошлари ўша тўқайзорларда қуён, тулки қувлаб юрадилар. Буталар соясида ухлаб ётган қуённи томоша қилишдан зиёд завқ борми?! Қизиги шундаки, қуён ухласа ҳам кўзи очиқ туради. Буни Ботир билмасди. Ўйғоқ экан деб ўйларди. Кейин — отасидан, акаларидан эшишиб билди бу сирни.

Ўша тўқайзор орасидаги стадионнинг ярмича келадиган ерга Ботирнинг отаси қовун-тарвуз экарди. Полизнинг бир тарафи токзорга туташ эди. Ўртадаги баланд сўрига ўтириб қуён, тулки, олмахонларни томоша қиласди. Уларнинг узум, қовун ейиши шунчалар завқли эдики, Ботир эринмай соатлаб кузатарди.

Улар қани энди?..

Тустовуқлар-чи? Ҳар қадамда оёқ остидан парт этиб катта-катта тустовуқлар учарди. У шу қадар чиройли бўларди, айниқса хўрози — қип-қизил, унинг олдида товус ҳам ҳеч гап эмасди.

Қаёққа кетди улар?..

Ёввойи ўрдаклар, ғозу тувалоқлар, каптарлар... Жарликка ин қўйган каптарларга улар белидан арқон боғлаб туширишарди. Кейин жарлик остидаги сойга тушшиб чўмилишар, ўша ердан туриб каптарларни инига кириб-чиқишини, гув-фув этиб ўтиришини зерикмай томоша қилишарди.

Улар энди хотира бўлиб қолди...

У жойларнинг ўзига хослиги, бошқа ерларга ўхшамайдиган жиҳатлари бор эди. Улар йўқолди. Энди бу жойларнинг бошқа районлардан фарқи қолмади. Пахтазор, гўза ҳамма жойда бир хил...

Ботирларнинг қишлоғидаги ҳозирги болалар ёввойи қуённи билмайдилар, тулки билан олмахонни ҳайвонот боғида кўришган. Улар тўқайзор оралаб оёғига тикан кириб қуён қувмайдилар, унинг узум ейишини

томуша қилолмайдилар, белига арқон боғлаб жарга тушмайдилар. Ҳаммаси бекорчи гаплар, ортиқча ишлар! Ахир футбол турганда тўқайзорда нима бор? Каптар эмиш. Ана телевизорда жамики ҳайвонларни, паррандаларни кўрсатиб турибди. «Ҳайвонот оламида» деган кўрсатувнинг бир сонини кўрса қанча ҳайвонлар билан «танишади...»

Ботирнинг боши гувлаб кетди. Қулочини кериб чукур нафас олди.

— Боти-ир!

Бу — Жамолзоданинг овози. Чамаси, у Ботирни қидиради. Ботир орқасига ўтирилиб, кафтларини оғзиға карнай қилиб бақирди: «Мен бу ердама-ан!»

Зинапоянинг тепасида Жамолзода кўринди. У Ботирнинг товушини эшилди чоғи, пастта туша бошлади. Эшилмай-чи, бу ерда салгина овоз ҳам узок-узокларга таралиб, акс садо беради.

— Кўл билан сирлашяпсанми? — деди Жамолзода Ботирга яқинлашгач. — Боядан бери қидираман, йўқсан. Бегона жойда адашиб кетмадимикан, деб роса хавотир олдим.

Ботир:

— Ёш боламидимки, адашиб кетсам... Гулгинахоним қани? — деди беихтиёр.

— У қўриқхона томонга кетди. Ҳам оҳую жайронларни томуша қилмоқчи, ҳам сани қидирмоқчи.

— Ў-хў, намунча. Ишқилиб милицияга хабар бермадингларми?

— Сал топилмасанг, шундай қилардик. Кўлнинг суви ажойиб-а, — деди Жамолзода сувга яқинроқ бориб. — Кўлнинг нима учун мунча кўм-кўклиги сабабини биласанми? — Унинг жавобини ҳам кутмай ўзи изоҳ берди: — Ўша зилзила рўй бермасдан олдин бу ерлар қалин арчазор экан. Кўлнинг тагида қолиб кетган арчалар. Шунинг учун кўл шунаقا кўм-кўк.

Иккови соҳилда бир оз айлангач, зинапоядан юқорига кўтарилди. Тушаёттанды у қадар билинмаган эди, кўлнинг сатҳидан меҳмонхонагача анча баланд экан. Ярмига бормасдан иккови ҳам ҳансираф колди.

— Ҳар куни эрталаб шу зинадан бир тушиб чиқса одам, — деди Жамолзода.

— Унда спортчи бўлиб қолиш ҳеч гап эмас.

Улар гаплашиб тепага чиқиши. Меҳмонхона олдида ҳеч ким йўқ. Эрталабки қуёш нури қиздира бошлаганди.

— Бу ерда доим шунаقا одам кам бўладими? — деб сўради Ботир.

— Ҳа,— деди Жамолзода.— Умуман, бу ерга тунаб қолувчилар кам келади. Манзили узоклар, санга ўхшаган меҳмонлар тунашади, холос.

— У ҳолда шунча катта меҳмонхона қуришнинг нима ҳожати бор эди?

Жамолзода Ботирга ғалати қараш қилди. Унинг боқиши маъносини Ботир тушунмади.

— Баъзан керак бўлади-да. Кўпроқ меҳмонлар келиб қолса, нима қилади? Унинг устига жуда унақа катта эмас-ку.

Ботир индамади, бошқа эътиroz билдиrmади.

— Қўриқхона томонга ўтайлик,— деди Ботир.— Гулгинахоним ҳайвонлар орасидан мени излаб юрган бўлмасин яна.

Қўриқхонанинг ёнидан төғ томонга кетган ёлғизёёқ йўлдан юриши. Ҳадеганда Гулгина қўринавермади. Яна давом этиши йўлда. Эллик-олтмиш қадамлар боришгач, Гулгина қўринди. У қўриқхонанинг нариги ёнида охуларга термилиб ўтиради. Симтўрнинг ичкарисида оҳу, ташқарисида Гулгина. Ботир уларга тикиларкан, турли қиёфалардаги икки оҳу сассиз сұхбатлашаёттандек туюлди. Йўқ, оҳу Гулгинага илтижо қилаёттандай эди. Гўё бу тўрдан ўзини озод килишини сўраёттандай қўринди.

Жамолзода Гулгинага қараб турди-да, ички завқ ила Ботирга деди:

— Қара, Ботир, Гулгинахоним оҳу ила сўзлашяпти. Нақадар гўзалди бу ҳолат! Таассуфки, фотоапаратимиз йўқ, суратга олиш керак эди.

— Мана шу манзарани тасвиirlашингиз мумкинку,— деди Ботир.— Қайтанга, фотодан кўра жонлироқ чиқади.

Ботирнинг гапи негадир Жамолзоданинг чеҳрасига вазминлик солди. Ҳозиргина унинг юзида, кўзларида жилва қилиб турган ҳайрат ва ҳаяжон ўз кушандаси-

дан ҳуркиб, ўрмон ичига қочган охудек бир зумда йўқолди. Нега бундай бўлди? Одатда ижодкорларга ўз ижоди хусусида гапирса яшнаб кетади, сиртдан камтарлик қилиб турса-да, ботинан яна гапиришини, мақташини истайди. Хўш, Жамолзода нега бунақа ўзгариб кетди? Бошқа рассом бўлганида «тасвирлайман, бундан ҳам чиройлироқ этиб тасвирлайман», дейиши аниқ эди. Лекин Жамолзода...

Бу муаммони ечишга Ботирнинг ақли етмади. Расомдан сўрашга журъат этмади.

Жамолзода билан Ботирнинг кузатиб турганини Гулгина кўриб қолди. Гапирсам, оху қочиб кетади, деб ўйлади шекилли, қўли билан имлаб чақирди. Олдин Жамолзода, орқасидан Ботир йўлга тушди. Ичкарига кириб борган сари ўрмон қуюқлашар, қўриқхонада турли ҳайвонлар кўринарди. Қушларнинг сайраши жам бўлиб ажиб бир симфонияни эслатарди.

Улар ярим соатча айланиб, турфа жониворлару ҳар хил қушларни томоша қилдилар. Бу ерда бир ҳафта яшаган одам ҳар қандай дардан фориғ бўлиши ҳеч гап эмас. Ботир атрофга завқ-шавқ билан боқаркан, ўзини қушдай енгил ҳис қилас, бу ерларга келганидан ич-ичидан севинарди...

— Кетдик энди,— деди Жамолзода. — Нонушта қиласиз.

Улар орқага қайтиши.

Нонуштадан кейин Жамолзода Ботирни бир тепалик сари бошлади.

— Ажойиб жой, бутун тоғлар, кўл мисоли харитадагидай кўриниб туради.

Унинг гапини Гулгина ҳам тасдиқлади.

Ўн минутлар юргач, ўша ажойиб жойга чиқиши.

— Жалил муаллим «Кўккўл» асарини мана шу ерда ишлаган,— деди Гулгина.

Атрофни ўйчан кузатаётган Жамолзода Ботирнинг гапига лоқайдлик билан жавоб берди:

— Бокуга борганда кўрарсан... У ҳали уйда, ҳеч қаерга берганим йўқ.

Мехмонхона олдидаги шийпонга қайтиши. Хизматчи йигитлар янги сўйилган қўй гўштидан кабоб тайёрлашаётган экан. Узун-узун сихли машҳур кавказча кабоб ейиш бу тоғ ҳавосида кимга ёқмайди...

## VIII

Мадинахоним шу ётганидан қайта турмади, уч йил ётди. Жамолзода на кундузи ҳаловат билади, на кечаси. Хотинини дардан ҳалос этиш учун кимларнинг остонасига бош уриб бормади. Боқтиргмаган врачу профессор қолмади ҳисоб. Таниш-билишлари ёрдамида Москвадан мутахассислар олиб келди. Аммо дард оғирлашса оғирлашди, ҳеч енгиллашмади. Мадинахонимнинг ўзи аллақачон ҳамма нарсадан умидини узуб қўйган, Жамолзоданинг кўнгил кўтарувчи гапларини ҳам шунчаки бир таскин тариқасида лоқайдлик билан эшитарди...

Тақдири азалдан, тақдири бешафқатдан айри кетиш, унинг қонунларини четлаб ўтиш қийин экан. Бу, эҳтимол, мингдан бир одамга насиб этар. Лекин ўша баҳтли одам ким? Балки қаердадир шундай одам бордир. Аммо Мадинахоним унинг кўчасига ҳам кира олмади. Ўзи учун, суюкли умр йўлдоши Жалил Жамолзода учун энг оғир, энг қора бўлган бир тунда у узилди. Буни Жамолзода сезмай қолди. Ўша оқшом Жамолзода хотинининг ёнида узок ўтириди, вақт яrim тундан оққанда ҳам у ухламади. Негадир Мадинахоним билан сухбатлашгиси, яхши дамларни хотирлаб, унинг кўнглини кўтаргиси келарди. Боиси — Жамолзоданинг назарида Мадинихоним анча тетик кўринарди. Бир ҳафта олдин Москвадан келган профессорнинг маслаҳатлари, муолажалари шифо беряпти чоғи, деб ўйлаганди. Буни хотинига ҳам айтди: «Мана, кўрасан, азизам, тезда соғайиб, ҳеч нарса кўрмагандай бўлиб кетасан. Профессор айтди... Кейин Кўккўлга борамиз. Ўша ерда санинг портретингни ишлайман». Мадинахоним эрининг сўзларини ним табассум билан тинглади. Лекин унинг кўнгли ҳар доимгидан хира, ҳатто қоронилашиб бораради. Уч йил тўшакка михланиб ётди, бироқ ҳеч қачон бугунгидек талвасага тушмаган эди. Одатига кўра, бу ҳолни ҳам Жамолзодага билдирамади. Аксинча, ўзини тетик, олдингидан кўра бардамроқ тутди. «Энди ухланг, ҷарчадингиз», деди у эрига. Жамолзода кўнгли бир оз равшан тортиб, жойига ўтиб ётди.

Жамолзода туш кўрди. Тушида Кўккўл соҳилларида юрганимиш, Мадинахонимнинг портретини ишлаш учун қулагай жой қидиравмиш. Мадинахоним эса у

ёқдан-бу ёққа югуармиш. Қиқирлаб кулармиш. Жамолзодага қараб: «Мани тутолмайсиз... Суратимни ҳам ишлаёлмайсиз. Учиб кетаман. Кейин мани тополмайсиз. Қўлингиз етмайди, кўзингиз илғамайди», дермиш. Жамолзода «Ман аввал қулагай жой топай, кейин кўрасан, осмонда учиб юрсанг ҳам ишлайвераман суратингни. Фақат санинг юрак уришингни, нафас олишингни ҳис қилиб турсам бас», дермиш. Аммо ҳадеганда ўша қулагай жойни тополмас эмиш...

У тонг ёришганда уйғонди. Кўрган тушини ўйлаб бироз ётди. Яхшиликка кетсин ишқилиб. У чопиб юрибди, парвоз қиласман, дейди, демак, энди соғайиб кетади. Кўккўлга албатта олиб бораман, суратини ишлайман. Унинг фонида Кўккўл тонгти акс этади. Худди шундай кўринишда тасвирлайман. У шодланади. Ахир у Кўккўлни жудаям яхши кўради-ку.

Шу хаёллар билан ўрнидан турди. Мадинахонимнинг ёнига келди. У ухлаганды кўкрагидан юқорини ёпмас эди. Бугун эса негадир юзларигача бекитиб опти. Совқотдимикан?

Жамолзода хотинини уйғотиб юбормаслик ниятида чойшабни астагина очди... Очдию.. тош қотди, муз бўлиб қолди...

\* \* \*

Мадинахоним вафотидан сўнг Жамолзода девонага айланди-қўйди. На қиласар ишининг тайини бор, на еяр овқатининг. Ҳар кун бирор, йўқ, бирор эмас, юрагининг бир парчасига айланиб қолган Мадина кириб келаётгандай туюлаверади. Гўё у бозорга чиқиб кеттагану ҳали замон турли мева-чева тўлдирилган оғир сумкани кўтариб кириб келади. Сўнг чаққонлик билан нонушта тайёрлаб «Қани, замонамиз Баҳрузи, дастурхонга марҳамат», деб Жамолзодага ҳазиллашади. Мадинахоним бу сўзларни айтмай қўйганига неча йил бўлиб кетди, бирор Қамолзоданинг қулоқлари остида кечагидай жаранглаб турибди.

Ҳар гал шифонерни очганда унинг кийимларига кўзи тушади ва аллақаерида битта томири чирт узилгандай бўлади. Баъзан кун бўйи ўтириб оғир хаёлга толади, гоҳида узоқ кечаларни бедор ўтказади.

Аммо ҳаёт ўз изида давом этаверади, тарих фидираги айланаверади, ҳеч қачон тўхтамайди. Кўзга кўрин-

мас бу улкан ғилдирак олдида Мадинахонимга ўхшаганларнинг ўлими нима бўпти — қудратли танкага бир чаноқ паҳта отгандай гап. У сезмайди, ҳаракатини, йўналишини қилча ўзгартирмайди. Аксинча, унинг орқасидан бўзлаб қолгандарни аста-секин ўз измига солади, улар ўзлари билиб-бilmagan ҳолда чархи кажрафтор оқимиға қўшилиб кетадилар.

Жалил Жамолзода ҳам бани одам. Ойлар ўтди, йиллар кечди. Бутун у иш, эртага у ташвиш. Шогирдлари келди, дўстлари чақирди.

Булар уни ғам-андуҳлардан, оҳу фифонлардан ҳолос қила борди. Бошқа нима иложи ҳам бор.

Энди у ўзини қўлга олиб ишга киришди. Эртадан-кечгача устахонадан чиқмайди.

У анча асарлар яратди. Уларни дўстлари, мутахассислар мақташди, кўргазмаларда намойиш қилинди. Жамолзода бу гаплардан шодланади, лекин шу яхши кунларни Мадинахоним кўрмай кеттанини эсласа, юраги эзилади, кўнглига хуфтон чўқади. Мадинахоним эсига тушиши ҳамоно унга берган ваъдаси ёдига келади. Унинг портретини ишламоқчи эди. Ишлайди, албатта ишлайди. Майли, орадан беш йил ўтсин, ўн йил ўтсин — бари бир ишлайди. Бир-икки қўл уриб кўрди, лекин мадори етмади, қўли қалтираб, бутун вужуди титраб мўйқаламни кўтаришга ҳам ҳоли келмади. Бир оз совигач, албатта ишлайди. Йўқса унинг хотираси олдида гуноҳкор бўлиб қолади...

Мадинахоним Ҳонлар районидан эди. Унинг отонаси Кўккўл яқинидаги қишлоқда яшарди. Жамолзода билан турмуш қургандан кейин иккови биргалиқда бир неча марта келишди.

Хотинининг вафотидан сўнг ҳам Жамолзода бу хонадонга икки-уч ташриф буюрди. Кейин сал оёғини тортди. Йўқ, қайнота-қайнонаси унга бир оғиз ҳам ёмон гапиргани йўқ, қайтангта ҳаммаси уни ўпиб-кучоқлашар, сизни кўрсан Мадинани кўргандай бўламиз деб, аёллар кўз ёши қилиб олишарди. Худди мана шулар учун келмай қўйди Жамолзода. Уларнинг гапларини эшишиб, йиғисини кўриб, ўртанган, куйган юраги баттар ўртаниб, куйиб кетади. Уларни ҳам, ўзини ҳам қийнаб, ўчаётган ўтта керосин сепиб нима қиласиди.

У Мадинахоним портретини ишлаш учун Кўккўлга неча марта борди — ўзи ҳам билмайди. Ўндан ошиқ эскизлар қилди — биронтасиям кўнглига ўтирмади. Унинг вафотига беш йил бўлибди-ю, ҳали ваъдасини удалай олмайди. Қийин-қийин ўлганга қийин, орқасида қолганлар бир кун йиглайди, икки кун йиглайди, бир ой йиглайди... Шу билан аста-секин кўнигади, унугтади.

Наҳотки, шундай бўлса?! Наҳотки, Жамолзода ҳам Мадинани унугтган? Йўқ, мумкин эмас! Жамолзода уни ҳеч қачон унугтмайди!.. У ҳолда нега беш йилдан бери унинг портретини ишлаёлмайди? Шуми унугмагани?

Бир куни Жамолзоданинг қулогига кимдир шундай дегандай туюлди. Ким экан бу, деб атрофга аланглади: ҳеч кимни кўрмади.

Эртасига саҳарда йўлга тушди. Ҳамма эскизларини уйда қолдирди, биронтасини, ҳатто ўзига энг маъқул келганини ҳам олмади. Бошқатдан ишлайди, тамоман янгича манзара, кўриниш, руҳ топади. Мадинахонимнинг қиёфасини, туришини, юз ифодаларини ҳам мутлақо янгича ифодалайди. Ўша машъум тунда кўрган тушини эслади, ўша тушида қидирган қулай жойни топади, топмасдан қўймайди. Токи ўша жойга чиқиб, Мадинахонимнинг портретини ўзи истаган даражада ишлаб тутгатмагунча орқага қайтмайди. Майли, бир ҳафта ўтсин, бир ой, бир йил... Бари бир тутгатиб қайтади. Шу ишни ниҳояламагунча бошқа ҳамма нарсага қўл силтайди, кўз юмади.

Жалил Жамолзода бошқариб бораётган қизил «Жигули» пойгада кетаётган Фарлеп<sup>4</sup> каби учиб бормоқда...

Тушида кўрган ўша қулай жойни топди. У бир тепалик эди. Бу ердан бутун тоғлар салобатли, кўлнинг нафосати кўринар, ўрмоннинг шовиллаши эшитилиб турарди. Кўккўлга келганига уч кун бўлди. У ҳар кун эрта тонгдан шомгача чизади. Баъзан соатлаб қаерга қайси рангни ишлатишни ўйлаб қолади. Тушликдан кейин Жамолзода эскизлари турган жойга қайтиб ишини давом эттириди. Уч-тўртта қилқаламни бармоқлари

<sup>4</sup> Фарлеп — 1930 йилларда турли пойгаларда биринчи ўринни олган, пойга қироли, деб ном чиқарган Австралиянинг машҳур оти.

орасига қистириб, хув анови кўз илғамас чўққини қайси рангда тиникроқ тасвиirlаш мумкинлигини ўйлаб қолди. Шу маҳал кимнингдир қиқирлаб кулгани эшитилди. Унинг назарида Мадинахонимнинг кулгиси жаранглагандай туюлди. Зотан, ҳозир унинг хаёлида марҳума хотини яшарди: у хаёлан уни кўриб турарди. Чор атрофга аланглади. Уч-тўрт қадам нарида — дарахтлар орасида бир қиз турарди. Ё алҳазар! Мадинахоним тирилиб келдими? Худди унинг ўзи-ку! Жамолзода аввалига чўчиб кетди. Кўзимга унинг арвоҳи кўриняпти, деб ўйлади. Бироқ қиз яна кулди, унга томон кела бошлади. Ё тавба, одам ҳам шунчалар бир-бирига ўхшайдими? Майин жилмайиб келаётган қизнинг қош-кўзлари, сал узунчоқ, оппоқ, юzlари, бўйбасти, ҳатто кулгиси ҳам Мадинахонимнинг айнан ўзи эди!

Унга қараб анграйиб қолган Жамолзода бироздан сўнг ўзини қўлга олди. Унгача қиз салом берди:

— Салом, муаллим.

— Салом,— деди Жамолзода ҳам. Унинг товуши титраб чиқди.

— Кечирасиз хоним, кимсиз, қаердан келдингиз, кимни қидириб юрибсиз?

— Ўҳ-ӯ,— деди қиз,— бирданига шунча савол. Раскоммисиз? Ёки терговчи?

Жамолзода бу гапдан сал сергакланди.

— Узр,— деди бўшашиб.

— Бокуданман, толиба, ҳеч кимни қидираётганим йўқ. Саёҳатта келувдик, айланиб юрибман. Сизни кўриб қолдим. Қарасам, расм чизяпсиз. Томоша қилгим келди. Майими?

Жамолзода бидирлаб гапираётган қизга термилиб турибди-ю, қулоқларига унинг сўzlари кирмас, аслида излаган ранглари, тасвиirlари жонланарди.

— Сиз ўзингиз қаердансиз? Қанақа асар ишляяпсиз?

Жамолзода ҳам кулди.

— Ман ҳам Бокуданман. Бир хонимнинг портретини ишлаш ниятидаман.

Қиз унга яқинроқ келди. Бошини ўнг елкасига қийшайтириб, ноз ила деди:

— Гўзалми у хоним?

Жамолзода йиғма стулига ўтирди. Сигарет олиб тутатди.

— Ҳа... Гўзал эди у хоним. Тенги йўқ гўзал эди.

Қиз ҳушёр тортди. Жамолзодага ачинган кўйи:

— Нима, у хоним ҳаёт эмасми? — деди.

Жамолзода сигарет тутунини чуқур тортди-да, деди:

— Шундай... У хонимнинг вафот этганига беш йилдан ошди.

Беш йилдан бери ишлайман.

— Ўҳ-ў, беш йилдан бери бир суратни ишлаёлмаётган бўлсангиз, қанақа рассомсиз?

Жамолзода қизга синчковлик билан қаради. «Бу қиз ижод мащаққатини, унинг дардини қаёқдан билсин?»

— Шунақа, хоним,— деди ўйчан.— Беш йилдан бери ишлаёлмаяпман. Энди топаёттанга ўхшайман излаган нарсамни.

Босиб-босиб сигарет чекаётган рассомнинг елкасига тушган қалин соchlарига, ўткир боқувчи кўзларига, қоп-қора қуюқ, қошларига қиз разм солди. Уни қаердадир кўргандай бўлди. Қаерда? Ҳа, эслади: телевизорда кўрган эди чоги. Қаердадир кўргазмаси очилган экан, ўша ердан репортаж олиб беришганда ўзини ҳам кўрсатганди. Оти нима эди унинг? Жалил... Жалил Жамолзода. Ўшамикан? Сўрасинми?

— Кечирасиз муаллим, сиз Жалил Жамолзода эмасмисиз?

Жамолзода сигарет қолдигини пошнаси билан эз-филаб ўчирди-да, ўрнидан турди.

— Сиз қаердан биласиз, хоним?

— Телевизорда кўрганман. Сўнгра қайсиadir газетадами-журналдами суратингиз ҳам чиқувди.

Қизнинг гаплари рост. «Адабиёт ва инжасанъят» газетасида унинг ижоди тўғрисида мақола берилганда Жамолзоданинг суратини ҳам босишуви.

— Ташаккур сиза, хоним.

Жамолзода қилқаламларини олди-да, чаққонлик билан ишга киришди. Қиз унинг эпчил ва нозик ҳаракат қилаётган қўлларини, рангларни жой-жойига ишлататёттанини, нафис бир чизиқ билан холстда «гавдаланаётган» хонимнинг кўзими, қошими акс этаётганини кўриб ҳайратта тушди. У тасвирий санъатни хуш кўрарди, аммо ҳеч қачон рассомларнинг ишлаш жараёнини кузатмаган эди. «Жуда ажойиб-ку! Мана санъатининг сехри, ана истеъоддининг кучи! Манави

оддий бўёқлар санъаткор қўлида суратта жон ато этяпти...»

У рассомнинг ишини кузатганча бир жойда қотиб қолганини ўзи ҳам сезмади. Рассом эса гоҳ-гоҳ унга қараб-қараб қўяр, эпчиллик билан гоҳо у қилқаламини, гоҳо бунисини олиб завқ билан ишларди. Қиз ўзи билмаган ҳолда рассомнинг объектига айланган эди. Бундан Жамолзода севинар, ишқилиб кетиб қолмасин-да, деб жадал чизарди.

Йўқ, Жамолзода куттандай бўлмади.

— Вой, мани ўтиришимни қаранглар, шерикларим кетиб қолмасин тағин.

У шундай деб югурди. Оҳу мисоли енгил учеб бораркан, орқасига ўтирилиб: «Хайр, Жалил муаллим. Соғ ўлинг!» деди. Жамолзода ҳам унинг орқасидан қўл силкиб хайрлашди.

...Жамолзода Кўккўлдан бир ҳафтадан кейин қайтди. «Кўккўл» асари асосан биттан эди.

Унинг кайфияти чоғ. Мадинахонимнинг руҳи шод бўлади. Унинг армони йўқ энди. Хотинининг хотираси олдида юзи ёруғ.

Бокуга олиб борадиган йўлнинг танобини тортиб кетаркан, шулар ҳақида ўйларди...

Шаҳарга киргач, машина рулини уйига эмас, қабристон томонга бурди. Машинасини дарвоза олдида қолдирди-да, бир-бир босиб Мадинахоним қабри тепасига борди. Қора мармарга ўрнатилган суратига термилиб, сукут сақлади. Лаблари пичирлади. Кейин худди тирик одам билан гаплашгандай паст овозда сўзлай бошлади: Мадинахоним, ман келдим яна! Тинч ётибсанми? Тинч бўл, азизам! Мандан хавотир олма. Биласанми, санга берган ваъдамни бажардим. Ҳозир Кўккўлдан келяпман. У ерда санинг портретингни ишладим... Бутун ижодимда энг яхши асарим шу бўлаjak. Чунки унда сан борсан, азизам!..»

Унинг кўзлари намланди, елкаси титраб, силкиниб кетди...

\* \* \*

Ажойиб кунларнинг бирида Жамолзоданинг уйида телефон жиринглади.

— Алё.

— Салом, Жалил муаллим, нечуксиз?

— Ташаккур. Кимди бу? — Жамолзода қўнғироқ қилувчининг овозини танимади.

— Танимадингизми? Бу ман... Эсингиздами, ўн беш кунлар аввал Кўккўлда учрашган эдик.

Жамолзоданинг ёдига тушди. Беш йилдан бери битиролмай келаётган асарини тезлаштиришга туртки бўлган қизни таниди.

— Ҳа, хоним, танидим энди. Ўзингиз нечуксиз?

— Яхши,— деди қиз.— Асарингиз битдими? Рухсат берсангиз бир кўрмоқчи эдим.

Жамолзода тамоман битмаган асарини ҳеч кимга, ҳатто энг яқин дўстларига ҳам кўрсатмас эди. «Кўккўл»нинг ҳам сўнгти ишлари қолган эди. Шу боис ҳеч иккиланмай деди:

— Йўқ, хоним, ҳали бироз ишлари бор. Хўп, десангиз, бирор ҳафталардан сўнг келинг. Унгача битади.

— Йўқ, бир ҳафтадан сўнгра яна қўнғироқ қиламан.

Жамолзода трубкани жойига оҳиста қўяркан, қизнинг отини сўрамаганидан афсусланди.

Бир ҳафтадан кейин қиз Жамолзоданинг устахонасига ташриф буюрди. У «Кўккўл»ни кўриб оғзи очи-либ қолди. Ўшанда кўргани ҳозирги полотонининг олдида оддий эрмак эди, холос. Унинг назарида бутун Кўккўл, сонсиз чўққилар, ўрмон — ҳаммаси рассомнинг устахонасига кўчириб келтирилгандаи эди. У полотнога термиларкан, Кўккўлнинг сут бетидаги қаймоқдай жимир-жимирини кўргандай, ўрмоннинг шоввиллашини, қушларнинг чуғур-чуғуруни эшиттандай бўлди. Оппоқ чўққи ортидан ярми кўриниб турган қип-қизил баркашдай қўёшнинг заррин нурлари кўзларини қамаштиргандай туюлди. Кўл томонга чопиб бораётган қиз сурат эмас, гўё тирик одам эди.

Қизнинг тилига сўз келмас, санъатнинг сеҳрию қудрати олдида забонсиз, мадорсиз қолганди. Жамолзода эса бир чеккада сигарет чекканча уни кузатиб ўти-парди.

Узоқ сукунатдан сўнг қиз чуқур хўрсинди. Дераза олдидағи креслога келиб ўтирди.

— Жалил муаллим,— деди қиз вазмин оҳангда,— агар сир бўлмаса айтинг, бу хоним ким эди?

Жамолзода сигаретни буруқситганча хонанинг у бошидан бу бошига юра бошлади. Бунга сари қизни оғир ўй, турли хаёллар босиб келарди.

— У маним юрагимнинг бир парчаси эди,— гүё ўзи билан ўзи сўзлашаёттандай гапиради.— У ҳаётдан кетдию ман ёлғиз қолдим. У нафақат уйимнинг, балки ҳаётимнинг гули, ёритиб турган машъали эди.

Рассом сўзлашдан тўхтади. Ҳамон юришда давом этар, қизга қайрилиб қарамас, мисоли хонада танҳо эди. Бу ҳолатдан қиз хижолат чекди. Рассомнинг эски ярасини янгилаганини пайқади. Икки елкасидан босиб турган оғир юкни куч билан кўтаргандек, оҳиста ўрнидан қўзғалди.

— Сизни ранжитдим шекилли, муаллим, узр. Ман борай энди.

— Йўқ, йўқ,— деди Жамолзода шошиб,— ман ўзи шунақаман. Мадинахоним ҳақида сўз очилса, мана беш йилдирки, шу аҳволга тушаман. Сиз бундан бошқа хаёлга борманг... Юринг, чой ичамиз.

— Ташаккур, муаллим. Ман кетаман.

Қиз чиқиб кетди. Жамолзода ортиқча қаршилик билдирамади. Зеро, ҳозир унинг қолишидан кўра кетгани маъқул эди.

Қиз сершовқин шаҳар кўчасидан бораркан, на машиналарнинг гувиллашини, на одамларнинг бақирибақиришини эшитар, на Бокунинг тўполон шамолини сезарди. У ҳозиргина полотнода кўрган хонимни, беш йилдан бери унинг хотирасини юрагида эъзозлаб келаёттган, бутун эса унга мангу ҳайкал қўйган Жалил Жамолзодани ўйлар эди. Миясида садоқат, вафо, муҳаббат сўzlари чарх уради. Негадир рассомга ачиниб кетди. Нақадар бешафқат ҳаёт! Билмаган кимса дунёда Жалил Жамолзодадан кўра баҳтли одам йўқ, деб ўйлади. Аслида унинг бутун ҳаёти фожиадан иборатга ўхшайди-ку...

## IX

Гулгинанинг машинаси тоғ йўлларини орқада қолдириб, Ганжага яқинлашди. Унгача учови ҳам миқ этмади. Чамаси ҳар ким кўрган билганлари хаёли билан банд эди.

— Хўш, Ботир, Кўккўл санга ёқдими? — деб сўра-ди Жамолзода ниҳоят.

— Жудаям зўр экан...

— Нима учун сани Озарбайжоннинг бошқа район-ларига эмас, айнан Кўккўлга олиб келганимни била-санми? — деди Жамолзода. — Ахир республикада бунга ўхшаган гўзал жойлар оз эмас!

Кутилмаган бу саволга Ботир жавоб беролмади. Ку-лимсираб елка қисди.

— Билмадим...

— Бунинг сабаби бор. Кўккўл ман учун ҳам, Гул-гинахоним учун ҳам чўх қадрли, табаррук жой.

— Озарбайжоннинг ҳар бир фарзанди учун унинг ҳар қарич ери табаррук, қадрли, — деб ўйлайман.

Жамолзода унга томон бурилиб, яқинроқ ўтиреди.

— Гапинг тўғри. Лекин Гулгинахоним билан ман учун Кўккўл алоҳида аҳамиятта эга.

Улар Қозох райони йўлига тушдилар.

— Қозох — Самад Вурғун туғилган район. Бу ерда Мақсад Шайхзода таваллуд топган, — деди Жамолзо-да. — Ахир у ўзбеклар учун ҳам, озарбайжонлар учун ҳам бирдай қадрли-ку. Шунча йўлдан келиб Шайхзода ватанини кўрмай кетасанми?

\* \* \*

Бокуга уч кундан кейин қайтишди. Ботир «Меҳ-монхонага борай, дўстларимни топай», деган эди, Жамолзода қўймади: «Ҳаммасига улгурасан. Ҳозир биз-никига борамиз. Бироз дам оламиз. Чой ичамиз. Иста-санг «Кўккўл»ни кўрсатаман», — деди. «Кўккўл»ни эши-тиб Ботир розилик берди.

Бир стакандан чой ичишгач, Жамолзода билан Ботир унинг устахонасига киришди. Гулгина таом пи-шириш билан овора. Устахона деворига суяб қўйилган «Кўккўл» полотносини кўриб, Ботир лол қолди. Асар-да тасвирланган кўл, товлар, дараҳтлар ўзи кечагина кўриб келгани Кўккўлдан, осмонўпар чўққилардан, ўрмондан кўра бойроқ, гўзалроқ туюлди. Жамолзода-нинг унча-мунча асарларини кўрган, унинг истеъдо-дига тан берган, аммо мана бунаقا асар яраттанини хаёлига ҳам келтирмаган эди.

Жамолзода креслога чўкиб сигарет чекарди. Ботир унинг рўпарасига ўтиреди. Нигоҳи ҳамон картинада.

Унда тасвирланган қиз Гулгинага жуда ўхшарди. «Айтаман, кўнглимдаги дардимни айтаман энди», деб ўйлади Ботир.

— Жалил муаллим,— деди рассомга юзланиб,— сиздан бир нарсани сўрашга рухсат этинг.

Жамолзода сигарет тутунини ўйчан тортаркан, деди:

— Марҳамат.

— Қизингиз институтни ҳам битирибди. Нега...

Рассом унинг гапини кесди:

— Нега турмушга узатмайсиз, демоқчимисан?

— Мен бу ерга айланиб томоша қилиб кетиш, ҳам бир яхши умид билан келган эдим. Ростини айтсан, Гулгинаконимни севиб қолганман. Бултур, Сочида...

Жамолзоданинг кўриниши жиddий тус олди. Лекин негадир ҳадеганда гапиравермади. Ботирнинг юраги така-пуга. Ҳозир уришиб ташласа керак, деб ўйлади.

— Гулгинанинг ўзига айтганмисан бу гапни?— деди ниҳоят.

Ха, унинг ўзига айттан...

Эртага Ботирнинг муддати тутайди. Дам олиш уйи, бу гўзал жойлар билан хайрлашади. Бир нарсадан кўнгли хижил: Гулгинага дилини очолмади. Дардини ёришни, унинг кўнглини билишни хоҳлайди. Бунга имконият қидиради.

Тушлиқдан кейин пляжга йўл олди. Кун иссиқлиги учунми ҳали чўмилувчилар кам эди. Ботир қўзиқоринга ўхшаш соябонлардан бирининг остига ўтириб денгизни томоша қила бошлади. Сафари қаригани учун денгизга суқ билан тикилар, уни тўйиб-тўйиб кўриб олгиси келарди.

— Ха, Ботир муаллим, шу ердамисиз.

Бу — Гулгина эди.

Дард аримоқчи бўлса табиб ўз оёғи билан келармиш.

Ботир унга ўтирилиб қаради. Қиз ёлғиз эди.

— Жалил муаллим қани?

— Ҳозир келади.

Қиз унинг ёнига ўтирди.

— Мен эртага кетаман,— деди Ботир имкониятни кўлдан бермаслик ниятида шошиб.

— Шундайми?— деди Гулгина.

— Гулгина, биласизми, сизга айтадиган гапим бор. — Қиз унга жилмайиб қараб ўтириби. — Мен сизни яхши кўриб қолдим.

Қиз хандон отиб кулди. Унинг кулгиси денгизнинг шовимлашига қўшилиб кетди.

— Кулманг, илтимос,— деди Ботир. Унинг товуши титраб чиқди. — Мен жиддий айтяпман.

— Ахир, ман ким, қанақа қиз эканимни билмай-сиз-ку.

— Барибир... Ўшанда, ошхона эшигида ilk бор учрашганимизда юрагим жизиллаган эди. Шундан бери кечаю кундуз сизни ўйлайман. Фақат отангиздан ис-тиҳола қилдим, холос. — Қиз индамади, аксинча, у ҳам бирмунча маъюс тортди. — Хат ёзиб турсам май-лими? Жавоб ёзасизми?

Қиз ҳамон жим. Гүё Ботирнинг сўзларини эшитма-ган каби. Ботир унинг чиройли кўзларига термилди. Қўли ихтиёрсиз тарзда унинг қўллари томон чўзилди. Қиз қўлини тортди.

— Қўйинг, керак эмас...

Унинг лаблари титради. Сўнгра киприклари намлан-ди. Ботир ўзини босолмади. Шартта қизни бағрига тортди. У ҳам қандайдир лаҳзалар жим қолди. Аммо шу заҳоти йигитнинг бағридан юлқиниб чиқди. У энди росмана йигларди. Фақат овози чиқмас, кўз ёшлари гўзал чехрасида марварид доналари каби думаларди.

— Йўқ,— деди қиз бошини силкиб, — йўқ, бу фикрингиздан қайтинг. — Унинг ёшли кўзлари Ботир-нинг кўзларида эди.

Хув нарида Жамолзода кўринди.

— Ҳозир отангизга ҳам айтаман,— деди Ботир.

Қизнинг ранги оқариб кетди.

— Йўқ!— деди қатъий. — Илтимос қиласман сиз-дан, бу ҳақда унга сўз очманг.

У шундай деб ўрнидан турди-да, денгиздан ҳовуч-лаб сув олиб юзларини юва бошлади...

Ҳозир бу гапларни Жамолзодага батафсил айтиб ўтирмади.

Фақат «ҳа, унга ҳам айтганман» деб қўя қолди.

— Хўш, у-чи, нима деди?— деб сўради Жамол-зода.

— У индамади... Кулди, холос.

Рассом ўйга толди. Яна сигарет тутатди.

— Бир нарсани санга ёлғон гапирганим учун узр сўрайман,— деди у Ботирнинг кўзларига тикилиб. Унинг боқишилари шу қадар ўткир эдики, ҳар қандай одам узоқ қараб туролмасди. Ботир ҳам нигоҳини унинг кўзларидан олиб қочди.— Яқинда Гулгинахоним билан тўйимиз бўлди.

Ботир илон чаққандай сапчиб тушди. Юраги гуппиллаб ура бошлади. Тили калимага келмай, боши гувиллади. Бутун баданидаги қон бошига йигилиб боргандай сезди ўзини. Унгача Жамолзода сўзини давом эттириди:

— Олти ой бўлди. Ҳиндистонга борганимизни эшитдинг, ўша никоҳ саёҳати эди. — У оғир тин одди. — Мадинахонимнинг жамики хислатларини Гулгинада кўраман. Аниқроғи, ундан топдим. У маним ўчган чироримни қайта ёқди, сўнган илҳомимни қайта алангаратди. Шу боис Гулгинахонимдан бир умр миннатдорман.

Ё фалак! Бу не синоат! Қизим деб юргани хотини бўлса! Хотинини қизим деб таништирса! Истеъодига тасанно ўқиб юргани мана бу одам ким ўзи? Нега уни шунча вақт лақиллатди?!

Бу сўзларни баралла айтишга Ботирнинг мадори етмади.

Ҳар бир сўзи қулоғига ёғдай ёқаётган, кулишларини жон деб тинглаган, қарашлари, қош-кўзлари юрагини ўртаб юргани қиз — Гулгина... Энди унга қарай олмайди, сук билан термила олмайди. Ахир у бирорнинг жуфти ҳалоли... Эҳ, каллаварам, сен эса нима хаёлларда юрибсан-а!

— Биламан,— деди ўйчан ҳолда Жамолзода. — У ҳолда нега қизим, деб таништиридингиз, дейсан. Ва ҳақлисан! Эҳтимол, мандан бу ёлғон сўзим учун ранжирсан. Лекин ўшанда шундай дейишга мажбур эдим...

\* \* \*

Гулгина Жалил Жамолзоданинг уйига келиб, «Кўк-кўл» асарини кўриб кетгандан сўнг тез-тез у ҳақда ўйлайдиган одат чиқарди. Назарида, у яхши сўзга, меҳрга муҳтоҷ туюлди. Рассомга қандай ёрдам бериш — унинг доимий ўйига айланди. Ўқищдан бўш кезлари Картиналар галереясига чопади. Жамолзода асарлари каршисида соатлаб ўтиради. Гўё уларга тер-

милиб, рассомнинг қалб дафтарларини вараклади. Унинг барча асарлари Гулгинани ҳайратта сола бошлади. Бироқ «Кўккўл»нинг ҳайрати ўзгача эди.

Ўйлаб-ўйлаб бир куни Жамолзоданинг уйига қўнғироқ қилди. Унинг ижозати билан полотнони бориб кўрадиган бўлди. Қизнинг бу қўнғироги рассомни ажаблантириди: «Кўриб эди-ку, нега энди яна кўргиси келиб қолди экан?» Лекин уйингта бораман, деган одамга рад жавоби бериш одобданми?

Гулгина келиб «Кўккўл»га узоқ термилди. Нималарнидир ўйлади чоғи, ўзича уҳ тортди, хўрсинди.

— Бу асарингиз манга ҳам қадрли бўлиб қолди,— деди у Жамолзодага. — Билмадим, унинг яратилиш жараёнидан хабарим борлиги учунми ёки асарнииг таъсири кучли эканлигиданми — ҳар қалай уни тез-тез кўргим келади.

Жамолзода кулди. «Жуда романтик қизга ўхшайди», деб ўйлади.

— Ташаккур сиза, хоним. Кечирасиз, ўшанда студентман девдингиз. Қайси институтда ўқийсиз?— деди Жамолзода.

— Педагогика институтида, келаси йил битирман.

— Маним ижодимга шунчалар қизиқиб, эътибор берганингиздан хурсандман. Қолаверса, бу асарнинг битишида маълум маънода сиз туртки бўлдингиз. Сиздан чўх розиям, хоним. Келинг, бир стакандан чой ичайлик ёки қаҳва истайсизми?

Қиз индамади. Жамолзода сукут — аломати ризо, деб ошхонага кириб кетди. Хиёл ўтмай иккита балдоқди пиёлада қаҳва олиб чиқди-да, ҳовлидаги столга кўйди. Тўқима креслоларнинг бирига ўзи ўтириди, иккинчисига қизни таклиф этди.

— Марҳамат, хоним. Ўтилинг, қаҳва ичинг. Бироз сухбатлашайлик, кейин борарсиз. Ота-онангиз койишмайдими?

Гулгина қаҳвани қошиқча билан қўзради-да, Жамолзодага қаради. Унинг қарашлари рассомнинг юрагини жизиллатиб юборди. Йўқ, у қизга нисбатан ёмон бир ниятда эмасди, балки унинг боқиши Мадинахонимнинг қарашларини ёдига солди.

— Йўқ, койишмайди... Улар мани бу ерга келганимни билишмайди. Сабаби — улар бу ерда эмас.

— Шундайми? — деди Жамолзода қаҳвадан бир ҳўплаб кўяркан.— Бокулик эмасмисиз?

— Ман Шамахаданман.

— О, шамахаликман денг? Чўх гўзал жой. Ман у ерга кўп борганман. Бир неча асарларимнинг эскизлари Шамаха тоғларида яратилган... Демак, ётоқхонада турасиз, шундайми?

Гулгина бош иргаб маъқуллади.

Шу куни улар анча суҳбатлашдилар. Гулгинанинг адабиёт, санъат ҳақидаги фикрлари, қарашлари Жамолзодага хуш келди. Бир студент қиз шунчалар саводли, санъатни шунчалар тушуниши уни қувонтириди.

Жамолзода Гулгина билан суҳбатлашганидан кўнгли равшан тортди. Одам тафтини одам олади, деганлари шу-да. Унинг юрагида қат-қат ётган дардлари бироз енгиллашгандай кўринди.

Тўғри, Жалил Жамолзоданинг ҳам ўзига яраша дўйсту биродарлари, шогирдлари бор. Улар имкони борича Жамолзодани ёлғизлатиб кўймасликка интилишади. Лекин онда-сонда келиб бир соат-яrim соат гурунглашиб кетган билан иш битмайди-да.

Уларнинг келиши яхши — уйда шовқин-сурон, одам овози эшитилади. Лекин кетиши оғир — Жамолзоданинг кўнгли бошқатдан ҳувиллаб қолади.

Ҳозир Гулгина чиқиб кетгандан сўнг шу аҳвол такрорланди. Нима қилсин, у шунга ўрганган, беш йилдан бери шу ҳолатга бир неча бор тушиб, энди кўнишиб қолган...

Орадан бир йил ўтди. Улар анча яқинлашиб кетишиди. Энди Гулгина тез-тез келадиган, иккови узоқузоқ суҳбатлашадиган, дунёнинг борди-келиларидан дардлашадиган бўлишиди. Қиз унинг ҳар бир янги асарини интиқдик билан кутади.

Июль ойининг ўрталарида Жамолзода Сочига — дам олиш уйига жўнаб кетди. Бу пайтда Гулгина давлат имтиҳонлари топшираётган эди.

Бир куни хонада дам олиб ётганди, эшик тақиллади. Шу ерда танишган дўстлардан бири бўлса керак, деб Жамолзода ётган жойидан бақирди:

— Эшик очик. Кираверинг.

Эшик аста очилиб, бир қиз мўралади. Жамолзода кўзларини каттароқ очиб, ҳушёрроқ қаради — осто-нада Гулгина кўринди. У ўрнидан сапчиб турди:

- Гулгина!  
— Ман,— деди қиз жилмайиб.  
Жамолзода довдираб қолди.  
— Қандай келдингиз? Имтиҳонлар...  
— Мани табриклишингиз мумкин, институтни битирдим.

У шундай деб Жамолзодани қучоқлаб олди. Кутимаган бу ҳаракатдан Жамолзода тамоман ўзини йўқотди. Тушми бу ёки ўнгими?

— Гулгина...

Гулгина рассомнинг юзларидан ўпди.

— Сизни сориндим...

— Нималар деяпсиз, хоним... Ахир...

Қиз унинг бўйнига осилганча кўзларига тикилди:

— Рост айтяпман... Ман сизсиз туролмайман...  
Ҳаётимни, умримни сизга баҳшида этдим.

Жамолзода қизнинг қўлларини бўйнидан аста бўшатди.

— Ахир сиз ўн гулидан бир гули очилмаган қиз бўлсангиз, ман эса...

Гулгина уни гапиргани қўймади. Оппок, юмшоқ кафтини унинг лабларига босди.

— Ҳаммасини биламан, ҳаммасини ўйлаб кўрдим. Ўйлаб-ўйлаб шу қарорга келдим. Сўнгра йўлга чиқиб, оддингизга келдим... Йўқ, демасангиз, кетгунингизча ёнингизда қоламан. Кейин бирга қайтамиз. Қачон тўй қилиш сизнинг ихтиёригизда.

Жамолзода ҳамон ўзини қўлга ололмас, бир-биридан ажабланарли, бир-биридан кутимаган сўзлар уни таъқиб қилас, нима дейишини, нима қиласини билмай довдиради. У креслога чўқди, Гулгина ҳам ўтиради. Унинг ўйга толганини кўриб, Гулгина яна тилга кирди:

— Ёки сиз рози эмасмисиз? Агар шундай эса айтинг, ҳозироқ қайтиб кетаман. Бу одобсизлигим учун узр сўрайман...— Унинг Жамолзодага жавдираб турган кўзлари намланди.

Жамолзода ҳамон карахт, тилига бирон-бир жўяли сўз келмасди. Гулгина аста ўрнидан турди. Жамолзода шошиб қолди.

— Шошманг, хоним... Ўтиринг бирпас. — Қиз ўтирамди. Рассом унга қараб деди: — Ота-онангиз нима дейди?

Бу гапдан сўнг қиз ўтиради.

— Жалил муаллим, адашмасам сиз ўз ҳаётингизда нимаики воқеа рўй берган бўлса — ҳаммасини яширмай айтгансиз. Шундайми? Ман ҳам асосан гапириб берганман. Лекин бир нарсани сиздан сир туттан эдим. Энди айтаман. Маним ота-онам йўқ. — Жамолзода сергакланиб қизга яхшироқ термилди. Бу билан гўё олдимда ўтирган қиз ўша — бир йилдан бери ўзим яхши биладиган Гулгинами ёки бошқами, деб аниқдатмоқчидал эди. — Биз, яъни ман билан синглим холамнинг кўлида ўстганмиз. Ота-онам машина авариясида қолиб ҳалок бўлишганда ман беш ёшда, синглим икки ёшда эканмиз.

Жамолзода унинг сўзларини тингларкан, бу қизнинг кўнглида дарду аламлари кўплигини англади. Ўша узоқ-узоқ сухбатларида ота-онаси хусусида кам гапиришининг сабабларини энди тушуниб етди. Нима учун бу ёшгина қиз доимо ўйчан, қандайдир дардли юришининг боиси бу ёқда экан-да.

Қиз гапдан тинди. Зўрма-зўраки жилмайди:

— Шунаقا гаплар, Жалил муаллим. Биласиз, ман Шарқ классик адабиётини жуда яхши кўраман. Ўзингизга ҳам ғазаллар ўқиб берганман. Алишер Навоийнинг бир ғазали бор. Биласизми у қандай бошланади:

*Мехр кўп кўргиздим, аммо меҳрибони топмагдим,  
Жон басе кидим фидо, оромижони топмагдим.*

У жим бўлиб қолди. Жамолзода ҳам сукутда. Жимликни яна унинг ўзи бузди:

— Сизнинг ҳаётингиз учун, ижодингиз учун кўмак бўла олсан, Мадинахонимнинг ўрнини босолмасам-да, у қилган ишларнинг ўндан бирини қила олсан — ҳаётимдан розиман. Нима учун бундай қарорга келганимнинг сабабини сўраманг. Чунки қачон, нега сизни севиб қолдим — ўзим ҳам билмайман.

Жамолзода Гулгинанинг қизарган кўзларига термилди. Кейин аста ўрнидан туриб унинг ёнига келдида, ёмғирдан сўнг гуркираб турган гул япроқларида киприклари ўраб турган қоп-қора кўзларидан ўпди...

\* \* \*

Ботир Жамолзоданинг ҳикоясини тинглаб оғир ўйга толди.

— Энди тушунгандирсан, қизим деб таништирғанимнинг сабабини.

Ботир миқ этмади. Бинобарин, сўз ортиқча эди. У бошқа нарса — ўзининг Гулгина билан суҳбатлари, дengиз соҳилида бир-бирига шеър ўқиб берганлари ҳақида ўйларди. Гулгина билан танишгандан бери ўтган бир йил давомида уни неча марта ўйлагани, ҳатто тушларига киргани, қўнғироқ қилгани, хатлар ёзгани, отпуска олибоқ Бокута учгани... Мана шулар ҳозир унинг хаёлинни банд қилганди. Ботир ўзини ожиз, йўқ, қандайдир кўнгли ҳувиллаб қолгандай ҳис этди. Гўё бу гапларнинг ҳаммаси ширин бир туш эди-ю, уйғониб кеттанидан пушаймон чекарди. Зотан, уни бу ерларга етаклаб келган, бошлаб юрган илинж энди йўқ, ҳаммаси саробга айланди...

Ҳовлидан Гулгинанинг овози эшитилди:

— Жалил муаллим, хўрак тайёр.

Ботирнинг юраги жиз этди. У ялт этиб Жамолзода қаради.

— Қани юр энди, овқатланайлик.

— Мен меҳмонхонага кетаман,— деди Ботир.

Жамолзода ажабланиб унга қаради:

— Бу нима деганинг?! Тайёр овқатни ташлаб кетсанми? Ҳаммасига улгурасан дедим-ку. Гулгинахоним ранжийди.

Ҳовлидаги стол ноз-неъматта тўла. Жамолзода стол ўртасида турган «Кўккўл» конъягини очди.

— Йўлдан чарчаб келдик, эллик граммдан олайлик.

Иккита билур қадаҳга лоларанг шаробдан қуиди.

У Гулгинахонимга қарай олмас, мабодо уларнинг кўзлари тўқнашиб қолса ҳам Ботир ножўя иш қилиб қўйгандай қизарип кетарди.

Ботирнинг томоғидан овқат ҳам ўтмади. Мезбонларнинг қистови билан у-бу нарсадан чимдib ўтириди. У тезроқ туришни, меҳмонхонага боришни, йўқ, умуман бу ердан — Бокудан кетишини истарди. Назаридан энди у бу ерда ортиқча эди. Мезбонларнинг ҳар қанча қистовига қарамай, ўрнидан турди. Ноң-туз, меҳмондорчилик, саёҳат учун ташаккур билдириди. Гулгина машинада элтиб қўяман деди, аммо Ботир кўнмади. Зотан, ҳозир унга ёлғизлиқдан бошқа нарса ёқмас, кўнглига сирмас эди...

Кўчага чиқди-да, тўғри келган бир машинани тўхтатди. Уч кун олдин жуда чиройли, завқли кўринган тунги Боку энди унинг кўзига совуқ, бегона туюлди.

Мехмонхона йўлагидан кетаётган эди, кимдир «ҳов, ука» деб чақирди. Ўзбекча гапни эшитиб тўхтади.

Самолётдаги йўлдоши — семиз киши унга қараб лапанглаб келарди. «Оббо, шу пайтда бу қаерда турган эди». У Ботирнинг қўлини олди.

— Омонмисиз, ука? — Унинг кайфияти чоғ, кўри-нишидан ишлари жойида экани билиниб турарди. — Ишлар юз, ука. Қудамиз жуда ажойиб одам эканда. — Оғзидан гуп этиб арақ ҳиди анқиди.— Ўзингиз нима қилиб юрибсиз? Қайларгadir бормоқчи эдингиз...

— Яхши, табриклайман,— деди Ботир. — Бориб келдим... Кечирасиз, шошиб турувдим. Кейин гаплашамиз.

У шундай деб йўлида давом этди. Семиз киши унинг орқасидан бақириб қолди:

— Шошманг, қайси хонадасиз? Бу яхши гаплар учун бир олайлик ахир...

Ботир индамади.

Хонага кирдию каравотта чўзилди. Мияси ғувиллар, боши зилдай эди. Ташқарида шамол қўзғалди. Гоҳ оч бўридай увиллар, гоҳ сичқондай чийилларди. Бу Ботирнинг юрагини баттар сиқар, кўзига мутлақо уйқу келмас эди.

Тун бўйи тўлғониб чиқди. «Нега келдим? Нега? Энди ҳаммаси тугади... Бунинг устига бировнинг хотини... Эрига сизнинг хотинингизни яхши кўраман дейдими?! Эҳ, хом калла...»

Бу хаёллар, фикрий олишувлар орасидан Гулгина-ни чиқариб юбора олмасди. Ҳар бир фикри, ўйи унга бориб тақаларди.

«Гулгина, эҳ, Гулгина. Нима учун ўша пайтда бор гапни очиқ айтмадинг? Хатларингда ёзишинг ҳам мумкин эди-ку... Нега йигладинг ўшанда?.. Энди билдим йиглаганинг сабабини. Мен эса ўзимча тушунибман йигинг боисини... Эҳ, галварс...»

У оғир-оғир хўрсинар, у ёқдан-бу ёққа ағдарила-ди.

Шамол ҳам тинмади. Унинг увиллаши Ботирнинг юрагини ханжардай тилар, назарида бутун Боку унга қўшилиб йиглар, оҳ, чекар эди...

## Х О Т И М А

Ботир яқинда Бокудан — Жамолзодадан хат олди.

«Салом, Ботир!

*Ишларинг, соғлиғинг қалай? Биз яхши юрибмиз... Биз деганимки, оиласа кўпчилик бўлиб қолдик. Гулгинахонимнинг синглиси ҳам Бокуга кўчиди келди. Ҳозир у биз билан туради. Гулгина сан ҳақингда унга кўп гапиради.*

*Яқинда биз учун қувончли воқеа содир бўлди. Фарзанд кўрдик. Гулгинахоним отини Мадина, деб қўйди...*

*Нега хат ёзмайсан, қўнгироқ қилмайсан? Бокуга қачон келасан?*

*Гулгинахонимдан, унинг синглисидан санга буюк салом!*

Ж.Жамолзода».

Ботир хатни ўқиб, беихтиёр Кўккўлни, Гулгинани, Жамолзодани эслади. Гулгина билан Қора денгиз бўйидаги суҳбатлари, Кўккўл сафаридағи гурунглар эсига тушди. Жамолзодага ҳаваси келди...

Ботир бир варақ оппоқ қоғоз олди-да, хат ёзишга киришди...

Пицунда — Тошкент  
1986 йил.

## ТАЪТИЛ КУНЛАРИ...

### Биринчи боб

#### САЛОМ, БОБО ҚУЁШ!

Ёз оқшоми. Атроф жимжит. Онда-сонда итларнинг вовуллагани, қаердандир эшакнинг ҳанграгани қулоққа эшитилиб туради.

Шаҳриёр осмонда жимиirlаб ётган юлдузларга қараб узоқ хаёл сурди. «Мана, таътил ҳам бошланди. Энди уч ой маза. Эрталаб мактабга бориш, дарс тай-ёrlаш йўқ. Муаллим мендан сўраб қолмасмикан, деб титраб-қақшаб ўтиришлар тутади... Истаган пайтимда ётаман, хоҳлаган чоғимда тураман. Жўраларим билан ўйнаймиз, дарёга, кўлга бориб чўмиламиз. Қандай маза... Отам шаҳарга олиб борадилар. Ўзлари айтдилар-ку, каникулга чиқсанг Самарқандни томоша қилдирман, деб...»

Шундай ширин хаёллар оғушида ухлаб қолди. Лекин ўйлаганидай узоқ ухлаёлмади. Ҳар куни барвақт уйғониб мактабга боришга ўрганиб қолмаганми, бугун ҳам ана шундай бўлди. Дарвозахона тарафда супургининг «шув-шув» этган товуши эшитилди. Ёстиқдан бошини кўтариб ўша томонга қаради. Онаси ҳовли супураяпти. Бошқа ҳеч ким кўринмайди. Отаси ҳам жойида йўқ — у одатига кўра саҳарда турган.

Бердиқул бобо олтмишдан ошган. У ёшлигида бригадир, кейин эса ҳисобчи бўлиб ишлаган. Ҳозир ҳам тинмайди. Колхознинг у-бу ишларига қарашади. Хирмонга қоровулми, тарозибонми ишқилиб, қўлидан келган ишни қилиб кетаверади. Хирмон пайти-ку буғдой совуриш қишлоқдаги беш-олтита чоллар зиммасида. Узумни узиб майиз қиласидан кунлари Бердиқул боғонинг қўли қўлига тегмайди.

Колхознинг узумини ҳам шулар босиб беришади. Ундан ташқари ҳар куни ҳашар — гоҳ у ҳамсоя, гоҳ

бу ҳамсоя узумимизни босиб беринг, деб илтимос қилади. Бердиқул бобо йўқ демайди, чарчаганига қарамай боради.

Бу ерда уйларнинг томи ҳар йили кузда сувалади. Қалин сомонли лой қилиб сувалмаса қишида, баҳорда чакка ўтиб кетади. Бундай пайтда ҳам Бердиқул бобо ҳашардан бўшамайди. «Сиз андавани яхши тортасиз», деб туриб олишади.

Бу йил Бердиқул бобо хирмон қоровуллигиниям олмади. «Қўйинглар энди мени, қариб қолдим. Иш бўлса шундай қарашавераман», деди. Шахриёр яна ёстиққа бош қўйди. «Ҳали офтоб келишига анча бор, бироз ётай. Шошиб нима қилдим, мактаб бормасам...»

Ховли супуриб бўлган онаси сўрига яқин келди.

— Шахриёр, тур болам. Шунча ухлайсанми. Қўйларимни боққа олиб бораман, девдинг. Қачон борасан, тура қол, ўғлим. Ҳадемай кун исиб кетади. Салқинда сал-пал ўтласин жониворлар,— дея куюнчаклик билан сўзлади Бўстон хола.

Мингбулоқ, — Шахриёрларнинг қишлоғи тоғ этағида. Бу жойларда пахта экилмайди, одамлар боғдорчилик, узумчилик, чорвачилик билан машгул.

Боғ дегани — қишлоқ тепасидаги токзор. У ерда Шахриёрларнинг ҳам боғи бор. Бир гектарча келадиган узумзор, атрофида турфа дараҳтлар: олма, ўрик, ёнғоқ, шафтоли, олча, қароли, гурдоли... Боғнинг кун ботиш томони тўқайзор — қора дўлана босиб кеттан. Ёввойи қуёnlар, тулкилар ўйнаб юради.

Бир куни жуда қизиқ бўлди. Шахриёр тўқайзор оралаб секин кетаётган эди, бута орасида ётган қуёнга кўзи тушди. У гўё Шахриёрга термулиб турарди. Шахриёр тўхтади. Қуёнга қараб тураверди. Ораси уч-тўрт метр келади. У нимага қочмаёттанидан Шахриёр ҳайрон. «Мени менсимаяпти шекилли», деб ўйлади-да, қуёнга қараб юрди. Икки қадам қўйиши билан қуён бошини илкис силкидию жойидан сакраб турди ва дуч келган томонга ўзини урди.

Кейинчалик билса, отаси айтиб берди, қуён ухлаб ётган экан. У ухлаганда ҳам кўзи очиқ тураркан...

Шахриёрларнинг қишлоғи илгари анча қуйида эди. Эски қишлоқда уйлар бир-бирига тақаб қурилган, бирининг томидан иккинчисига ўтиш мумкин эди. Ҳов-

лилар ҳам тор-танқис эди. Номи қишлоқ бўлгани билан экин-тикин қиласиган ери йўқ эди. Шу боис ҳамма оила эрта баҳордаёқ қишлоқ тепасидаги боққа кўчиб чиқарди.

Чайлада яшардилар. Экин-тикинлар йигиштириб олингач, кеч кузда қишлоққа қайтиб тушишарди. Бешолти йил бўлди, бутун қишлоқ янги жойга кўчди. Энди ҳамманинг уйи олдида ери — томорқаси бор. Аммо боғларга қараш тартиби олдингидаи — ҳар бир боғ бир оиласа биркитилган. Ўша оила ишлайди, сугоради, токларни баҳорда очади, кузда кўмади. Нимаики иш бўлса ўзлари бажарадилар. На раис, на бригадир уни қил, буни қил, деб аралашмайди. Токларнинг қанчалар ҳосилдор бўлиши колхоздан ҳам бурун одамларнинг ўзига фойда.

Ҳосил етилгандан кейин колхоз раҳбарлари томонидан тузилган комиссия аъзолари боғларни бирмабир кўриб, ҳосилни чамалаб чиқишиди. Шунга қараб, фалон тонна узум, фалон кило ёнғоқ, ўрик берасиз, деб шартнома тузишиди. Келишилган ҳосил топширилгач, ортгани шу оиласинг ўзиники. Хоҳласа бозорга олиб бориб сотади, истаса майиз қилади. Ихтиёр ўзида. Шахриёрларнинг боғи унчалик кўп эмас. Лекин ҳосилдор. Ота-онасининг айтишича, бу боғни, яна тоғалари, амакилари қарайдиган боғларни унинг бобалари — Бердиқул бобо билан Бўстон холанинг отала-ри экишган. Шахриёрнинг икки бобоси бир-бирига амакивачча бўлган экан...

Улар ҳар йили қарийб икки тонна узум, қанчанча олма, ўрик, ёнғоқ, олча топширадилар колхозга. Ўзлари ҳам бир-икки қоп туршак, майиз қилиб олишиди...

Шахриёрга отаси баҳорда тўртта қўзи олиб берган. У қўзиларини ўша боққа олиб чиқиб боқади. Боғ атрофида заяк ерлар, соя-салқинлар кўп...

Онасининг гапини эшитса-да, эшитмаганга олиб ётди. Бўстон хола ҳам, ўғлим бечора бирпас ухласин, майли, ҳар кун барвақт туравериб чарчаган, деб ўйладими, бошқа индамади, ўчоқ бошига ўтиб кетди. Шахриёр бугун қиласиган ишларини ўйлади. «Ҳозир туриб чой ичаман. Қаймоқ бормикан? Энамга айтсан сутнинг бетини олиб берадилар. Нон ботириб еб олсан мазза. Кейин қўйларни ҳайдаб боққа чиқаман.

Болалар ҳам боришар. Ким чиқиши мумкин? Анвар, Фолиб, Аҳмад, Ақбар... Саттор-чи? Э, қўй, шуни, бормагани тузук. Ҳар нарсага инжиқлик қиласерид жонга тегади... Қўйларни ўтга боғласам-да, сўнг болалар билан чўмилишга борсак. Бугун бир мириқайлик...»

Боғ ёнидан ўтадиган тип-тиниқ тоғ дарёсида чўмилишни ўйлаган эди, баданлари яйраб кетди. Дарёning суви шунчалар тиниқки, унинг остидаги тошлар, қурвақатўн ўтлар шундоқ қўриниб туради. Совуқлиги-чи, кун қайнаганига қарамай одам бирдан тушишга сесканади. Лекин Шахриёр парво қилмайди — кўзини чирт юмадио — бирдан ўзини сувга отади. Аввалига аъзойи баданига чақадиган ўт теккандай «жизз» этади, кейин муздай сув хуш ёқади, иссиқнинг лоҳаслигиям, ланжлигиям бир зумда тарқаб, ўзини қушдай енгил ҳис этади. Сувдан чиқиб ариқ бўйидаги кўмкўк чимзорга ётади. Бу ер худди баҳмал кўрпачага ўхшайди — майин, юмшоқ. Тўғри, айрим ўтларнинг учи ўткир баргчалари баданини чимиллатади, лекин бир ётиб олгандан кейин билинмай қолади. Чимзорда чалқанча ётган кўйи кўзларини юмиб, киприклари орасидан қуёшга қарайди. Қуёш гоҳ қип-қизил чўғдай, гоҳо қорайиб кўринади. Аста-секин кўзларини тамом юмади, сўнгра қаттиқ юмади. Бари бир қуёшни кўраверади, аввалига оқ-қора, қизғиши-сарғиши доғлар кўринади, кейин улар бир-бирига қўшилиб қуёшга айланади. Шахриёр ўзича ўйлади: «Қуёшни ҳеч ким, ҳеч нарса тўсолмайди». Ўзи билмаган ҳолда оғир хўрсинади. Бу хўрсиниш замирида қуёшга ҳавас туйфуси мужассам...

Шахриёр ётган жойидан қуёшни қидирди. У ҳали уйнинг ортида эди. Нимадир эсига тушгандай бирдан сергак торти. «Ие, ҳали бетимни ювмадим-ку». Яхшиям панада экан, бўлмаса юзини ювмай қуёшга кўзи тушиб қолиши мумкин эди. Юз ювмай қуёшга қарашиб — гуноҳ. Отаси айтган. Бутун борлиқ, жамики мавжудот қуёш туфайли тирик. У жудаям муқаддас, пашшадан филгача, чумолидан одамларгача, ўт-ўланлару ҳайвонларгача, дарёю тоғу тошларгача — ҳаммасига қуёш меҳрибон. Шундай меҳрибон, шундай олижаноб нарсага юзини ювмай қарашиб нотўғри-да. Бердиқул бобо билиб айтади. Шахриёр бу гапга қаттиқ ишонади. Ҳеч қачон ювинмасдан қуёшга юз тутмайди. Ким-

ки, шундай қилса иши юришмас эмиш. Буни ўзи си-  
наб кўрган.

Сира эсидан чиқмайди. Бир кун эрталаб ухлаб қол-  
ди. Якшанба бўлгани учун bemalol ётганни, шундай  
кўзини очса тепасида қуёш турибди. Унинг юраги шу-  
виллаб кетди. «Бетимни ювмай қуёшга қарадим-а. Энди  
нима бўлади?.. Қуёш мени кечиравмикан. Ахир бил-  
масдан кўзимни очдим-ку. Атайлаб қараганим йўқ...  
Эй, қуёш, ишқилиб ўзинг кечир мени...» Кечгача кўнгли  
ғаш бўлиб юрди.

Эртаси куни биринчи соат математика эди. Бирдан  
муаллим уни тахтага чақириб қолди. Ўтган дарсни сўра-  
ди. Шаҳриёр оғзини очолмай қолса бўладими. На  
қоидани айтиб беролди, на мисол ишлаб беролди. Бу  
ҳолдан ҳатто муаллим ҳам ҳайратта тушди. Синф бўйи-  
ча математикани энг яхши биладиган Шаҳриёр эди-  
да. Отасиям шу ўғлим буғалтир бўлади, деб юрарди.  
Уч ўёқда турсин, тўрт ҳам олмаган — ҳаммаси беш  
эди. Бутун лоақал учга ҳам жавоб беролмаяпти. «Сен-  
га нима бўлди, Шаҳриёр?» деди муаллим. Шаҳриёр  
миқ этмади, унинг юzlари қизариб, баданини тер бос-  
ди. Муаллим, тоби йўқ шекилли, деб ўйлади-да, ўтири,  
майли, кейинги дарсда тайёрлаб келарсан, деди.

Танаффус бўлиши ҳамоно Шаҳриёр ташқарига  
отилди. Бир чеккага ўтиб қуёшга термулиб ялинди:  
«Жон қуёшжон, мени кечир! Иккинчи ундай қилмай-  
ман! Кеча билмасдан сенга қараб қўйибман. Энди ҳеч  
қачон ювинмай юзингта боқмайман! Кечир, қуёшжон!  
Ахир сен меҳрибон, бағри кенг, кечишимисан-ку. Ёки  
отам алдайдиларми? Кечирмайсанми? Жон қуёшжон,  
кечир мени!»

Қуёш уни кечирди. Отаси рост айтган экан, кимки  
қуёшга астойдил илтижо қилса у инобатта олар экан.  
Шаҳриёр ҳам ваъдасини бузмади. Шу чоққача бирон  
марта ҳам бетини ювмай қуёшга рўбарў келгани йўқ.  
Ўша-ўша дарсда мулзам бўлиб қолиш ҳам бошқа так-  
рорланмади. Қайси дарсда бўлмасин, муаллим сўраган  
нарсани шариллатиб айтиб беради.

Ўрнидан турдию апил-тапил кийинди. Ўрик остида  
шилдираб оқаёттан ариқда ювинди. Негадир у ҳозир  
қуёшни жудаям кўргиси келди. Ўчоқбошида куймала-  
ниб юрган Бўстон хола ўғлини кузатиб турган эканми.  
«Ҳа, Шаҳриёр, қаёққа кетаяпсан?» деди. У онасига

қарамай «Ҳозир» деди-да, уйнинг кун чиқар томонига ўтиб кетди. Қуёш тоғдан бир қулоч кўтарилган экан. Шаҳриёр унга термулди. Беихтиёр лаблари пичирлади: «Салом, бобо қуёш! Мана, мен турдим!»

\* \* \*

Қўйларни боғ ёнидаги заякка боғлади.

Анварларнинг боғи уларнинг боғига туташ. Шаҳриёр шу томонга юрди. Одатда Анвар ҳам қўйларини ҳайдаб келарди. Ҳозир негадир у кўринмади. «Анвар! Ҳо, Анвар!» деб бир-икки чақирди. Ҳеч қандай жавоб бўлмади. Ҳали келмаяпти, деб хаёл қилди. Оқ ўрик соясидаги баланд уватта чиқиб ўтирди. Бу ердан бутун қишлоқ, қишлоқ нарисидан ўтадиган катта асфалът йўл шундоққина кўриниб туради.

Асфалът йўлнинг бир томони Самарқандга, иккинчи томони Китобга олиб боради. Ундан кейин яна қаёқларга боради — буни Шаҳриёр аниқ билмайди. Ҳар қалай шундай катта йўл Самарқанд билан Китобда тутгаслиги тайин. Катталарнинг айтишича, шу йўл Тошкенттаям борармиш. Шаҳриёр қирни ёқалаб кетган йўлдан дам-бадам ғизиллаб ўтаётган машиналарга термулганча хаёл сурис кетди. «Тошкент катта шаҳармикан? Ўзбекистоннинг пойтахти-ку. Катта бўлмаса пойтахт бўлармиди».

Тошкентни ўйлаши билан акаси ёдига тушди. Унинг Пиримқул деган акаси Тошкентда ўқийди. Шаҳриёрнинг эсида, Пиримқул мактабни битиргач Тошкентта ўқишга бораман, деди. Ота-онаси Самарқандда ўқий қол, яқинроқ, деб шунча қистади, йўқ, Пиримқул кўнмади, сўзида туриб олди: «Мен рассомликка ўқимоқчиман, Самарқандда унақа институт йўқ», деди. Ота-онаси ҳам иложсиз қолди.

Шунгаям беш йил бўлди. Бу йил Пиримқул ўқишини битиради. Энди у катта рассом бўлади. Ҳар ёзда таътилга чиққанида ичига турли бўёқлар, қилқаламлар солинган қутини елкасига осиб келади. Боғларга, қирларга, дарё бўйларига бориб расм чизади. Шаҳриёр кўпинча акасининг ёнида ўтириб расм ишлашини томоша қиласди. Бир марта унинг суратини ишлаб берган. Ўшанда акасига Шаҳриёрнинг жуда ҳаваси келган эди. Мен ҳам мактабни битириб Тошкентта ўқишига бораман, деб дилига тугди.

Ўша воқеани эслаб, кўнгли бир энтиқди. Яна неча йилдан кейин Тошкентга бориши мумкинлигини чамалади. «Бу йил сентябрда еттинчи синфга бораман. Демак, бир, икки, уч, тўрт... Тўрт йилдан сўнг... Войбўй, мунча узоқ... Акам бу йил ўқишни битириб келса, мен кимнинг олдига бораман, қаерда тураман? Институтни қандай топаман? Акам бирга олиб борармикан. Э, шошма, акамнинг ўзи кимнинг олдига борган, кимникида турган? Ҳеч сўрамаган эканман-а. Ҳадемай таътилга чиқиб келади, сўраб оламан. Йўғ-э, битириб келади-ку...»

Узоқдан кимнингдир «Шаҳриёр, о Шаҳриёр» деб чақиргани эшитилди-ю, унинг хаёли бўлинди. «Анвар шекилли», деди-да, уларнинг боғи томонга юрди. Рўпарадаги олма тагида Анвар кўринди.

— Қачон келдинг? Мен сени излаб юрипман,— деди Анвар.

— Э, қачон эди кеганим, ўзинг кечикдинг-ку. Қўйларинг қани, қаерга бойладинг?

— Ҳов этакда.

— Анави заякка обке. Мени қўйларимам ўшақта. Бирга ўтлаб юришади,— деди Шаҳриёр.

— Майли. Юр, бирга бориб келайлик.

Улар қўйларини қўшиб қўйишли. Бунгача кун чошгоҳ бўлиб, қуёш қиздира бошлади.

— Чўмилгани борамизми? — деди Анвар.

— Ҳозирми? Бироз гаплашиб ўтирайлик, ҳадемай пешин бўлади, қўйларни сугориб сояга оламиз-да, кейин борамиз. Майлими?

Анвар кўнди.

— Сурхокларинг<sup>1</sup> пишмаганми? Бир бошдан олайлик,— деди Анвар.

— Қараб кўрайлик-чи. Сурхокни билмадиму даройи<sup>2</sup> пишган бўлиши мумкин.

Шаҳриёрларнинг боғида бир қатор сурхок, бир қатор даройи бор. Икки жўра аввал сурхокни қарашди. Ҳали кўм-кўк. Кейин даройи қаторига ўтишиди. Ҳар қалай бунга сал-пал ранг кирипти. Отаси айттандай, даройи ола бўпти. Иккови бир бошдан узум олди. Боғ четидан ўтадиган ариқقا бориб узумни ювди-да, бобо ёнроқ тагида ўтириб даройи ея бошладилар.

<sup>1</sup> Сурхок — чиллаки узум.

<sup>2</sup> Даройи — чиллакининг бир нави

Үёқдан, бүёқдан гаплашиб ўтиришди. Шахриёр бирданига кулиб юборди.

— Ҳа, нимага куласан? — деди Анвар.

— Қизиқ нарса эсимга тушеб кетди.

— Нима?

— От обқочганини айтиб берганманми,— деди Шахриёр.

— Кимни обқочган?

— Кимни бўларди, мени-да.— Шахриёр бироз керилиб, ғуур билин гапирди.

— Йўқ, эшитмаганман,— деди Анвар қизиқсиниб.

Шахриёр кафтидаги узум доналарини оғзига ташларкан, мириқиб қулди. Эринмай узумни чайнади. Кейин катталарга хос вазминлик, салобат билан ҳикоясини бошлади.

## ОТДАН ЙИҚИЛИШ

У пайтда эски қишлоқда турардик. Мен биринчи синфда ўқирдим. Боққа кўчуб чиқсан эдик.

Ўша йиллари отам бригадир эдилар. Жийрон қашқа Болабек жуда ювош бўлгани учун отам мени кўп миндирардилар. Тушликка келганларида, кечқурун Болабекка миниб олардим. Ҳечам кўрқмасдим.

Бир куни пешинда отам келишлари билан мен югуриб бориб отнинг жиловини ушладим.

— Миндириб кўйинг,— дедим.

Отам шарт кўтариб Болабекка мени миндириб кўйдилар. Жиловни қўлимга тутқазиб қамчини узатдилар. Чайла томонга юрарканлар, эҳтиёт бўлгин, деб кўйдилар. Ўкоқда чой қайнатаётган энам, отни бойламайсизми, дедилар.

— Ҳеч нарса қимайди. Шахриёр билан Болабек бир-бирига ўрганиб қолган,— дедилар отам.

— Билиб бўладими, ҳайвон-да.

Энам гапларини ҳали тутатганиям йўқ эди. Болабек аста-аста юра бошлади. Мен эса унинг юришига завқим келиб жиловни бир қоқдим. От қадамини тезлатди.

— Қаранг,— дедилар энам отамга,— обқочмасин яна.

— Ваҳима қилаверма. Шунча вақтдан бери обқочмаган, энди обқочадими.

Унгача Болабек йўрга юришини бошлади. Анави уватта қараб бошини бурди. Шу уватнинг нарёғидаги майдонга чайла қургандик. Манави ёнғок, зардоли, бошқа дарахтларам илгари жуда катта, шохлари тарвақайлаб кетган эди. Йилдан-йил гоҳ у шоҳи, гоҳ бу шоҳи қуриб, синиб адо бўляяпти-да. Чайламизнинг рўпарасида уватдан пастга тушадиган ёлғизоёқ йўл бор. Кўргандирсан. Болабек шу йўлга тўғри бўлди. Отнинг авзойи ёмонлигини энам сездиларми ёки кўрқиб кетдиларми, бирдан бақириб юбордилар:

— Ушласангиз-чи, отингизни! Боламни йиқитиб кетади ҳозир. Қаранг деяпман!..

Энамни ҳеч қачон бунаقا қаттиқ гапирганини эшитмаганман.

Опамларни, акамни, мени уришсалар ҳам овозини баландлатмас эдилар. Отамга-ку бақириш у ёқда турсин, кўзларига тик қарамайдилар.

Бу ҳол отамниям таажжубга солди, албатта. Лекин энамга бир оғиз ҳам индамадилар. Билишимча, отамнинг ўzlариям Болабекнинг ҳаракатидан ташвишга тушиб қолгандилар. Отнинг орқасидан юрдилар.

— Шаҳриёр, жиловни торт!

Мен жиловни тортаман девдим, от йўртишга тушки. Унинг бу қилиғидан юрагим шигиллаб кетди. Отам: «Болабек, тўхта, э, эси йўқ, тўхта» деб қадамларини тезлатдилар. Болабек унга сари баттар йўртди. Анамана дегунча уватта келди. Аъзойи баданим музлаб кетди. Ҳозир уватдан пастга қараб чопса — тамом!

Орқада энамнинг ҳаяжонли овози қулогимга чалинди: «Вой ўлай, вой ўлай! Ҳозир бир бало қиласди. Нимага миндирасиз-а ёш болани. Бойлаб қўйинг дедим-а. Э худойим-а...»

Айтганим бўлди. Болабек бирдан пастга қараб энкайди. Йўлнинг икки томонида зардоли шохлари эгилиб турипти. Нима хаёlda, қандай қилиб осилдим билмайман — икки қўллаб зардоли шохига тармашдим. От пастга қараб чопди. Мен зардолига осилиб отдан тушиб қолдим. Шохнинг ингичкароғидан ушлаган эканман, у шарт узилиб тушди. Бир маҳал қарасам йўлда чангга беланиб ётипман, қўлимда зардоли

шохчаси. Кўрққанимдан йиглашам эсимдан чиқиб кеттипи.

Отам югуриб келиб кўтариб олдилар.

— Чавандозам шунаقا пўрриқ<sup>3</sup> бўладими.

Отамни кўрибми ёки бирон жойим оғридими — йиглаб юбордим.

— Йиглама, йиглама, ҳеч нарса қилмайди,— деб овутдилар отам. — Йигит деган шундай қилиб пишийди.

Бир пиёла сув кўтариб энам югуриб келдилар.

— Ма, болам, манавини ич, кўрққанинг босилади, — дедилар қозонкуя солингган сувни тутиб.

Титраб-қақшаб сувни ичиб юбордим.

— Бирон жойинг оғрияптими? — деб сўрадилар отам.

— Ҳеч қаерим оғримаяпти.

— Соғананинг бундайча одати йўқ эди-ку.

Отамнинг бу галига энамнинг жаҳли чиқди.

— Ҳайвон-да, билиб бўладими. Миндирманг, миндирманг, дедим, қулоқ солмадингиз.

— Ким билади дейсан... Ҳа, майли, зарари йўқ. Сен буни олиб бор, мен отта қарай. Қаёққа соб кетди соғана.

Болабек аллақачон тўқайзорга оралаб кетган эди.

Энам мени кўтариб чайла томонга, отам эса Болабекни қидириб дўланазорга қараб кетдилар...

\* \* \*

— Шундан кейин отта минмай қўйгандинсан-а,— деди Анвар.

— Қаёқда... Миндим. Болабек ўзи жуда ювош от эди-ю, ўша куни нимаям бўлиб елиб қочди-да. Кейин қанча миндим.

У отни менам биламан. Йўрга юриши бор дейишади-я.

— Уни қишлоқда ҳамма билади. Ҳозир анча қариб қолди. Йўрга юриши ҳозирал бор. Аммо илгари зўр юрарди-да, сувдай майнин кетарди.

— Ҳозирал миниб турасанми, ҳеч кўрмайман?

— Минаман,— деди Шаҳриёр. — Болабекти қизиқ бир одати бор. Олдидан одам чиқса тўхтайди. Отам

<sup>3</sup> Пўрриқ — лапашант.

бригадирлик чөләрида далани айланиб, учраган кишининг олдида тўхтаб гаплашиб, иш тайинлаб юрганлар-да. Болабек шунга ўрганиб қолган.

Анвар узумнинг чиварасини бир чеккага иргитди-да, ўрнидан туриб ариқдан ҳовучига сув олиб ичди, бетини ювди.

— Менга қара, Шахриёр, — деди ариқ бўйида турган кўйи. — Нимага шу отнинг оти Болабек? Шахриёр ҳам жойидан турди, Анварнинг ёнига бориб сув ичди. Кейин Болабекнинг тарихини гапириб берди.

Бердиқул бобо болалигидан отта ишқивоз. От деса ҳамма нарсадан кечади. Отининг эгар-жабдуқини забаб, қулогига кўзмунчоқ тақиб қўяди.

Анча йиллар олдин Бердиқул бобо бир от сотиб олди. Қашқадарёданми, Жиззахданми олиб келди. Отмисан от. Кўрган одамнинг ҳаваси келади. Бунинг устуга Бердиқул бобо роса безатди. Чиройли одамга асл кийимлар ярашгандай, от жониворгаям қизил духобадан тикилган ёпқич, қошли эгар, мисдан ишланган узанги шу қадар мос тушган эдики, от худди қўғирчоққа ўхшарди.

Бердиқул бобо унга қаращдан эринмайди. Эртаю кеч емишидан, сувидан ҳабар олади, ҳатто ярим кечаси туриб, олдига беда ташлайди. Сал сарғайган бедани бермайди, фақат гул беда едиради.

От шундай етилдики, ҳатто Бердиқул бобонинг ўзи-ям уни одамларга кўрсатишдан қўрқади. Кўз тегиши мумкин.

Қиши тушиб, тўйлар бошланди. Қўшни қишлоқда бўлган тўйда жуда катта кўпкари берди. Бутун райондан чавандозлар йифиди. Не-не отлар, чавандозлар ўртага тушди.

Бердиқул бобо ҳам бир чеккада отини миниб томоша қилиб туради. Гоҳ у чавандоз, гоҳ бу чавандоз Бердиқул бободан отини сўраб келди.

Чавандозларнинг шундай тартиби бор. Агар бироннинг отида чопса, кўпкаридан тушган солимнинг асосий қисми от эгасига тегади.

Бердиқул бобонинг кўзига солим ҳам кўринмайди, отини авайлайди. Шунинг учун чавандозларнинг биронтасига ишонмади отини.

Оқтепа қишлоғида Исмоил деган чавандоз бор. Унинг донғи бутун районга кетган. Ҳам бақувват, ҳам

дангал одам. Исмоил чавандоз отни қийнамайди, қачон қамчи босишнинг ҳадисини олган. Айрим чавандозлар бўлса-бўлмаса отни ураверади, айниқса, бошига урганичи. Бердиқул бобо отнинг бошига қамчи солган чавандозни жинидан баттар ёмон кўради. «От жониворда нима айб. Ўзининг уқувсизлиги аламини отдан олмоқчи бўлишади. Бу — номардлик. Исмоил чавандоз — ҳақиқий чавандоз. Ҳечам отга азоб бермайди, ўз ҳолига қўяди».

Бир маҳал Бердиқул бобонинг ёнидан Исмоил чавандоз ўтиб қолди. Бердиқул бобонинг бир кўнгли Исмоил чавандозга айтмоқчи бўлди: «От ҳали кўпкарига кўп кирмаган, бир миниб кўрасизми, Исмоил. Жиззакироқ чавандозларга берсам отни бездириб қўядими, деб кўрқаман». Аммо истиҳола қилди, отини бозорга солаяпти, деб ўйламасин, деган хаёлга борди.

Исмоил чавандоз Бердиқул бобо билан салом-алик қилди. Кейин отига разм солди.

— Нимага бир чеккада турибсиз, Бердиқул ака. Чопмайсизми? — деди Исмоил чавандоз.

— Мен кўпкари чополмайман, биласиз-ку, Исмоил. Шунчаки ишқибозлик-да бизники.

Исмоил чавандоз отдан кўз узмади. Яхши чавандоз отнинг асилини дарҳол ажратади, деганлари рост шекилли.

— Кўз тегмасину отингиз асл отта ўхшайди. Кўпкари кирганми-йўқми? — деб сўради Исмоил чавандоз.

— Бир марта ўзим олиб кирганман. Локин ҳеч қайси чавандозга берганим йўқ. Бугунам беш-олти киши сўради, очиги, хўп дейишга кўнглим бўлмади. Ҳали кўпкарига ўрганмаган отни бездириб қўйиши ҳеч гапмас-да,— деди Бердиқул бобо.

Исмоил чавандоз гапнинг дангалига кўчди.

— Бордию ишонсангиз менга беринг. Бир қўл чопиб кўрай.

Бердиқул бобо кулимсиради:

— Майли. Сиздай чавандозга ишонмасам кимга ишонаман. Сизнинг от чопишингиз менга маъқул, — деди сўнгра.

Бердиқул бобо отдан тушди-да, унинг айил-пуштасини яхшилаб тортди. Жиловни Исмоил чавандозга узатар экан, худо ўзи омадингларни берсин, деб дуо қилди.

Исмоил чавандоз отга абжир минди. Чортоқقا қараб түданинг ичига солди. Бердиқул бобо Исмоил чавандознинг отини минган кўйи кузатиб турипти. От жонивор сувни иккига ёриб сузиб бораётган кема каби тўдани икки бўлиб ичкарига кирди.

Солимчилар «бир гилам ва бир қўй», деб улоқни иргитди. Улоқ Исмоил чавандознинг ўнг ёнига келиб тушди. У чаққонлик билан ёнидаги чавандоздан улоқни юлиб олди-да, тақимиға босди. Кейин отнинг жиловини чапга бурди. Икки томонидан отлар қисилиб тургани учун унинг бурилиши қийин кечди. Четдан кузатиб турган Бердиқул бобонинг юраги пўкиллайди. «ҳеч нарса қилмасин-да, ишқилиб».

Исмоил чавандоз минган от қандай қилди — ҳеч ким билмай қолди — чапга бурилиб, ўзини ўнглаб олди. Шунда Исмоил чавандоз отнинг биқинига салгина нуқиди-да, «ҳа, жонивор, бўшаашма», деб жиловни қўйиб юборди. Шу маҳал гўё мўъжиза рўй берди. От шердай олдинга ташланди-ю, кўз очиб-юмгунча тўдадан ажралиб чиқди. Чавандозлар ҳам, томошибинлар ҳам ҳайратдан ёқа ушлаб қолдилар.

Кимдир «Ҳалол! Ҳалол!» деб бақирди. Унга бошқа товушлар ҳам қўшилди.

Бу олқишлирдан Бердиқул бобонинг эти жимиirlаб кетди. Аъзойи баданида чумоли ўрмалагандай туюлди.

Исмоил чавандоз улоқни чортоққа элтиб ташлади. Бердиқул бобонинг олдига келиб отдан тушди-да, уни қучоклаб ўпди.

— Шунча йилдан бери кўпкари чопиб, не-не отларни миниб бунаقا отни кўрмаган эдим,— деди ҳаяжонланиб.— Илоё кўз тегмасин, умри узоқ бўлсин. Фақат эҳтиёт қилинг, ҳар кимга бераверманг. Худо хоҳласа бу отингизнинг олдига тушадиган от йўқ бу атрофда.

Бердиқул бобо суюнганидан нима дейишини билмайди, «Рахмат, умрингиздан барака топинг», дейди холос.

— Отингизнинг оти нима, Бердиқул ака, — деди Исмоил чавандоз.

Бу саводдан Бердиқул бобо шошиб қолди.

— Оти... оти йўқ.

— Кўнглингизга олмангу исмингиз қул бўлса-да, бекларнинг отидай отингиз бор экан. Шунинг учун, агар хўп десангиз, отингизнинг исмини Бек қўйинг.

Исмоил чавандознинг сўзлари самимий экани гапиришидан билиниб турарди.

— Майли, — деди Бердиқул бобо. — Сиз айтганча бўлсин.

— Ишончингиз учун раҳмат, Бердиқул ака. Отни миниб борсангиз солимни беришади.

— Йўқ-йўқ, — деди Бердиқул бобо шошиб. — Бирга борамиз. Уларни сиз олинг, сизди меҳнатингиз.

Исмоил чавандоз бошини ирғади.

— Йўқ, Бердиқул ака, солим отники. Уларни олиб отнинг ўзига ишлатинг.

Охири иккови келишди. Гиламни Бердиқул бобо, қўйни Исмоил чавандоз оладиган бўлди...

Шу куни Бердиқул бобо отига Бек исменин қўйиб, олдига чўғдай ёниб турган қип-қизил гиламни ўнгариб уйига қайтди...

— Болабек ўша отнинг боласи, — деди Шаҳриёр керилиб. — Унинг оти Болабек бўлиши ана шундан.

— У от — Бек нима бўлган, ўлганми? — деб сўради Анвар.

— Мен аниқ билмайман. Эшитишимча, қариганда Бекни сўйишган. Жуда қимматчилик бўлиб, одамлар ейишга нарса тополмай қоптилар. Эшиқдаги молларни ҳам сўйиб тутатишилти. Нима қилишни ҳеч ким билмас эмиш. Шунда отам, «Майли, Бекни сўйинглар. Ҳар қанча бўлсаям от одамдан азиз эмас! Бунинг устига, ўзиям қариб қолди. Ишқилиб, одамларни сақлаб қолсак бас», дептилар. Отни сўйишилти.

Отам унинг олдига келиш у ёқда турсин, гўштидан ҳам емаптилар.

Бу воқеа Анварни ҳам ўйлантириб қўйди.

— Сўйимаса бўларди-ку.

Шаҳриёр индамади. Анвар ҳам миқ этмайди. Чамаси икковининг ҳам хаёлида афсонавий Бек эди.

Бу оғир хаёлдан қутулиш ниятида Анвар гапни бошқа томонга бурди.

— Болабек ҳам кўпкарига кирганми?

— Ёшлигида чопгандир, мен билмайман. Аммо кейин кўпкарига кирганини кўрганим йўқ. Мен эсимни таниганимдан бери отам шундай миниб юрадилар.

Икки жўра анчагача у ёқ-бу ёқдан гурунг қилиб ўтирди. Кун қизиб, атрофни жizzиловуқларнинг «ви-

ев-виеев»и тутди. Ариқ бўйидаги гулларга қўниб-учиб юрган капалаклар ҳам эринчаклик ила қанот қоқади. Қандайдир мусичанинг ку-куси эшитилди. Шаҳриёр Анварга юзланди.

— Мусича нима деяпти, биласанми?

Анвар елка қисди.

— Мусо қўй келтирас, Исо тўй келтирас, деяпти.— Шаҳриёр ўзини билимдонлика олиб мусича ку-куси ни шарҳдай бошлади.

— Сен қаёқдан биласан?

— Биламан-да.

Анвар уватга чиқиб қулочини кенг ёйди-да, мири-қиб керишди.

— Ҳай, майли, қўй келтирса келтирас! Бари бир бизга фойдаси йўқ. Юр, ундан кўра ўзимизнинг қўйлардан қолмайлик, уларни сояга олайлик. Кун қизиб кетди. Кейин чўмилишга борамиз.

Сояда — сув бўйида унча билинмаган экан, офтобда ҳаво роса димиқиб кеттани аён бўлди.

— Бу иссиқда қўйлар ўт емайдиям. Роса хансираб ётгандир, — деди Шаҳриёр.

— Жазирамада ўтлагандан кўра салқинда кавш қайтариб ёттани яхши. — Энди Анвар ўзини билимдан тутар, аста-секин гапиравди. Иссиқда қолган қўй мондимайди, дарров этидан тушади. Қўйим семирсин, деган одам уни салқиндан обчиқмайди.

— Бизарди қўйлар ўрганиб кеттан, — деди Шаҳриёр кулиб. — Уларга иссиқ таъсир этмайди.

— Шунинг учун қўйларимизга жир битмайди-да.

Гап билан овора бўлиб қўйларга яқин келишди. Чиндан ҳам қўйлар тумшугини бутанинг соясига тикиб, бир жойда қимирамай туради. Ҳар замон қаттиқ акс уриб, ер тепиниб чивинни ҳайдайди, холос.

— Ичиям куйиб кетгандир жоноворларнинг, — деди Шаҳриёр қўйларига ачиниб. — Буларниям дарёга олиб борамизми? Чўмилтирамиз, маза қиласи-да!

Анвар қўл силтади.

— Эй, қўйсанг-чи, юрамизми шу иссиқда ҳай-ҳайлаб. Тумшугини ерга тираб юрмайдиям. Сугорамизда, ёнроқнинг соясига бойлаймиз. Олдига озгина ўт ташлаб қўйсак, чайнаб ётади. Ўзимиз чўмилиб келиб, кун қайтгандан сўнг ўтта опчиқамиз. Ҳув кечки салқинда яхши ўтлайди.

Болалар айтганини қилишди: қўйларни сугориши, сояга боғлашди, одига бир тутам-бир тутамдан ўт ташлашди. Ўзлари эса дарёга чўмилгани кетиши.

## ҚУЁН ҚУЁН БЎЛДИ

Шаҳриёрларнинг боғи ёнида чамаси бир гектар чиқадиган ангор бор. Бердиқул бобо бу жойда деҳ-қончилик қиласи: бир йил зигир экса, иккинчи йил нўхат, сўнгра қовун-тарвуз, мошми, тариқ ёки қўноқми — ишқилиб ҳар йил нимадир экади. Ангорнинг ўртасига баланд қилиб сўри қуради — у қоровулхона, шу сўрида ётиб экинни, узумни ҳам ёввойи ҳайвонлару қушлардан қўришади. Сўрининг ҳаччасида Бердиқул бобонинг қўшогиз милтиги осигуриқ туради. Кечаси тоғдан ёввойи чўчқа, бўри тушиб келиши мумкин. Бердиқул бобо неча марта тунда узумзордан тўнғизни қувган.

Бу йил қовун-тарвуз экишган. Кундузи Шаҳриёр қоровуллик қиласи. Унинг ёнига жўралари — Анвар, Фолиб, Аҳмад, Акбар келишади. Кунбўйи гурунглашиб ўтирадилар. Баъзан гапга қизишиб узумни чумчук талаб кетсаям сезмай қолишади. Шаҳриёр неча марта отасидан дашном эшитган.

Тунда эса Бердиқул бобонинг ўзи келади.

Таътил бўлгани учун бутун Шаҳриёр ҳам отасининг ёнида қолди. У сўрида ухлашни жуда яхши кўради.

Ярим кечаси Бердиқул бобонинг «ҳай, ҳа сағана» деб бақирганидан Шаҳриёр уйғониб кетди. Кўзини очиб қараса, отаси боғдан ниманидир ҳайдаяпти. У катта, қоп-қора маҳлук. Ой сутдай ёруг бўлгани учун Шаҳриёр уни аниқ кўрди. Тоғдан ёввойи чўчқа тушипти. Бердиқул бобонинг қўлида милтиқ бору, негадир тўнғизни отмайди. Бундан Шаҳриёр ҳайрон қолди. «Нимага отмайдилар-а», деб ўйлади ўзича. Ҳатто «Ота, отинг тўнғизни» деб бақирмоқчи бўлди. Аммо овози чиқмади. Сўрида, кўрпага бурканиб ётипти-ю, оёқ-қўли дағ-дағ титрайди.

Бердиқул бобо тўнғизни кўздан ройиб бўлгунча ҳай-ҳайлаб ҳайдади. Кейин изига қайтди. Отаси келгач, Шаҳриёр ўзини сал босиб олди.

— Ота, чўчқани нимага отмадингиз? Шундай яқинида турувдингиз-ку.

Бердиқул бобо милтигини ҳар доимги жойига осдида, яктагини ёчиб жойига кирди.

— Уйғониб кетдингми, ўғлим. Қўрқмадингми?

— Шаҳриёр сир бой бермади.

— Йўқ. Ҳозир отасиз, ҳозир отасиз деб турдим, отмадингиз.

— Отишнинг фойдаси йўқда, ўғлим, милтиқда сочма ўқ, бу билан у ўлмайди. Қайтанга қутуриб менга ҳамла қилиши мумкин эди. Уни ўлдириш учун чўчқа ўқ, керак.

— Йўқмиди чўчқа ўқингиз?

— Тамом бўп қолган эди, сағана.

— Отиб ўлдирсангиз томоша қилмоқчи эдим. Ҳеч ёввойи чўчқани кўрмаганман, — деди Шаҳриёр афсусланиб.

— Нимасини кўрасан шуни, хунук бир маҳлук-да

— Ота, — деди Шаҳриёр бироздан сўнг, — тўнгиз узум ейдими?

— Узумни еганиям гўрга-я, ҳаммаёқни пайҳон қилиб ташлайди.

Шаҳриёр бошқа гапирмади, савол ҳам бермади.

Жимлик чўқди. Ҳаммаёқ жимжит. Фақат қора чигиртканинг чириллагани сукунат пардасини тешиб ўтади...

\* \* \*

Нонуштадан кейин Бердиқул бобо қишлоқда тушиб кетди. Бешбулоқда кимдир қазо қипти — жанозага боради.

Шаҳриёр қўйларини серўт жойга боғлаб келди-да, сўрида чалқанча ётган кўйи хаёлга берилиди. Мактаб, синфдошлари ёдига тушди. Турли воқеалар кўз ўнгидан ўта бошлади. Бирини эсласа кулгиси қистайди, бирини эсласа кўнгли маҳзун тортади.

— Шаҳриёр, ҳой Шаҳриёр!

Полиз четидаги ёнроқ томондан эшитилган товуш унинг хаёлинини бўлди. Жойидан иргиб турди-да, ўша томонга қаради. Кўзи Анварга тушди.

— Қўйларингни қаерга бойладинг?

Шаҳриёр боғ орқасига ишора қилди.

— Шарракни олдида. Ўша ёққа ўтавер, кўрасан.

Жуда ўтли жой.

Кўйларингни обориб ўшаққа бойлаб кел. Мен шу ерда ўтириб тураман.

Анвар «хўп» деди-ю, қўйларини боғнинг орқа томонидаги шаррак томонга етаклаб кетди, Унинг келганидан Шаҳриёр суюнди. Ҳар қалай, якка ўзи, ичи қизиб ўтирумайди.

Бир оздан кейин Анвар келди.

— Эрталаб уйларингта борсам, энанг, даштда — отасининг ёнида қолган, деди. Бу ёқса чиқиб келавердим, — деди Анвар сўрига чиқиб чўзиларкан. — Қовунларинг пишганми?

— Ҳали қаёқда дейсан. Энди тўрлай бошлади.

— Пишмаган бўлса нимасини қоровуллайсилар? Хом қовунни бирор обкетармиди.

Шаҳриёр катталардай ёстиқقا тирсаклади.

— Бўйласам-чи. Унинг устига мол-ҳол оралайди, кечаси жондор келади.

— Қанақа жондор? — ҳайратланиб сўради Анвар.

Шаҳриёр катталарга тақлидан салмоқланиб сўз бошлади.

— Қанақа жондор бўларди, ёввойи чўчқа, бўри келади.

Анвар лабини бурди:

— Қўйсанг-чи лофни. Тўнғиз билан бўри ёзда ҳечам келмайди-да.

Шаҳриёр тирсагини кўтарди. Астойдил, куйиб-пичиб гапирди.

— Келмайди дейсан-а, бугун оқшом ўзим кўрдим тўнқиз келганини. Отам милтиқ билан қувдилар. Бирорам катта, бирорам катта, кўрсанг, чўммоқ ҳўқиз борку, шунча келади-ёв..

Анвар бари бир ишонмади.

— Ёзда шунча одам, итлар юради кечасиям, қандай келади бўри.

— Ишонмайсанми? Қасам ичайми? Худо урсин агар ёлғон айтсан. Ҳали отам келсалар сўра, ишонмасанг...

Анвар лабини буриштириб, елка қисди.

— Ким билади, келса келгандир...

— Ҳув бир йили ёзда бўри қишлоқقا оралаганини, кейин тоғам билан амаким уриб ўлдиришганини эшигтанмидинг? — деди ҳаяжон илиа Шаҳриёр.

— Йўқ!

Шаҳриёр чордана қуриб ўтируди-да, қизиқ воқеани ҳикоя қилиб берадигандек, астойдил гапга тушибди.

— Ярим кечаси энам ҳовлига чиқибдилар. Сутдай ойдин кеча экан. Уйимизнинг ёнидан битта катта кучук аста-секин кела бошлапти. Энам шундай қарасалар, бегона ит эмиш. Ҳайрон бўптилар. Кучук энамни кўриб ҳайиқмас эмиш. Ўзимизниг кучугимиз тут тагида экан. Бояги бегона кучук шу томонга юрипти. Кучугимиз уни кўрипти-ю, шингиллаб думини қисганча ўзини панага опти. Бу ҳолдан энамнинг эти увушиб, юраги шифиллаб кетипти. Кучук нимага бундай қилди, бу қурғур қоришқулми<sup>4</sup> дейман-ов, деб ўйлаптилар. Ютуриб уйга кириб отамни уйготибдилар. Отам тўнини елкасига ташлаб ҳовлига чиқиптилар. Ҳалиги кучук бир-бир босиб амакимизнинг ҳовлисига ўтаётган экан. «Ие, бу бўри-ку», дептилар отам. Амакимнинг уйлари бизникига рўпара эди-да. Ҳовлидан туриб уларни чақириптилар. У ёқдан амаким, бу ёқдан отам, ён тарафдан тоғам чиқиптилар. Оғилимизнинг ёнида торгина йўлак бор эди, кўрганмидинг? Бўри ўша йўлақдан бориб девордан сакрамоқчи бўлганда одиндабой пойлаб турган амаким пешонасига кетмон билан урипти. Орқасидан қувиб борган тоғам ҳам қўймичига кетмонни туширипти. Икки тарафидан зарба еган бўри шилқ этиб йиқилипти.

Эрталаб бутун қишлоқ йирилди ҳовлимизга. Ишонасанми, бир зумда бўрининг тиши қолмади-я.

— Нимага? Ким олди?

— Ким оларди, аёллар-да!

— Нима қилади уни?

— Боласининг бешигига осиб қўйса, бола ҳеч нирадан қўрқмас эмиш. Бўридай довюрак, бақувват бўлиб ўсармиш.

— Мен эшитмаган эканман,— деди Анвар. — Қачон эди у?

— Э, анча бўлди. Унда пастки ҳовлида эдик.

— Вой-вуй, минг йиллик гапни гапирайпсанми.

— Бари бир эмасми. Ёзда бўри кемайди, деганингга айтдим-да...

Шаҳриёр бирдан гапидан тўхтади. Токзор томонга термулиб қолди. Унинг бу ҳолатидан Анвар ҳайрон.

Үртага сукунат чўқди.

<sup>4</sup> Қоришқул — бўри

— Ҳа. Шахриёр, нима бўлди? Нимани кўрдинг? — деди Анвар охири сукунатни бузиб.

— Анавини қара,— деди Шахриёр ҳаяжонланиб. Кўрсаткич бармоги билан токзорга ишора қилди. Анвар у кўрсаттан томонга қаради. Битта қуён узум емоқда эди. Унинг ҳаракатлари шунчалар завқли, ҳаяжонли эдики, икки жўра бараварига оғзини очиб қуёnga термулиб қолди. Энди на Шахриёр, на Анвар миқэтмас, уларнинг нигоҳи узум еяётган қуёngа қадалган эди. Улар ҳатто бир-бирига ҳам қарамас, гапириш ўёқда турсин, сал қимирласа қуён қочиб кетадигандай туюларди.

Шахриёр аста шивирлади:

— Зўр-а, Анвар!

— Секинроқ. Овозингни эшишиб қолса, қочиб кетади.

— Қочмайди, — деди Шахриёр.— У ҳар куни келади.

— Кўрганмисан?

— Кўрмасамам биламан. Қара, bemalol eyiшини.

Ўрганиб қолган-да.

— Ким билади, дейсан... Ушламаймизми?

— Қандай қилиб ушлайсан?

— Секин пана жойдан пойлаб борамизу шартта ушлаб оламиз.

— Сени пойлаб боришингни кутиб ўтирамиди.

Шартта қочади кетади-да.

— Таваккал-да, нима қипти.

— Ундан кўра томоша қилиб ўтирайлик, — Шахриёр қуёndan кўзини узмасди.

Анвар у деди-бу деди, Шахриёрни кўндириди. Иккови секин пастга тушди. Анвар олма тарафдан, Шахриёр ўрик томондан пусиб келадиган бўлди. Борадиган йўлларини оддин чамалаб олишди.

Келишувга мувофиқ икковиям секин ўт-ўланни, шоҳ-шаббани шитирлатмай худди душманни қўлга туширгани кетаётган аскардай эмаклаб манзилга қараб бораверди.

Қуёngа икки-уч қадам қолганда беихтиёр Анвар қаттиқ акса уриб юборди. Бундан чўчиб тушган қуён шартта ўзини токзор ичига урди. Анвар қувмоқчи эди, оёғи ток навдасига илашиб, оғзи билан йикилди.

Бу воқеаларни кузатиб ўтирган Шаҳриёр беихтиёр кулиб юборди. Иложи борича овозини чиқармай кулишга интилди. Анвар сезиб қолса хафа бўлади-да. Кулгидан Шаҳриёрнинг юzlари қизариб, кўзлари юмилиб кетди, ўзини тўхтатаман дейди-ю, тўхтатолмайди.

Тирноғига қараса кулги босилади, деб эшитган эди, бош бармоғининг тирноғига тикилди — қаёқда, кулгиси баттар қўзиса қўзидики, камаймади. Силкиниб-силкиниб кулганидан қорни оғриб қолди. Икки қўли билан қорнини ушлаб кулди.

Анвар ўрнидан турди-да, уст-бошини қоқди. Атрофга аланглаб, Шаҳриёрни қидирди. Шаҳриёр бирпас индамай ўтирди. Кейин аста ўрнидан турди.

— Анвар, қуённи буёқда обкел, — деди Шаҳриёр кулгидан ўзини тийиб. — Бир томоша қилайлик.

Анвар миқ этмади. Бироз шу жойида серрайиб турди-да, сўнгра сўри томонга кета бошлади. Орқасидан Шаҳриёр ҳам эргаҳди.

Сўрига чиқиб иккови икки тарафга чўзилди. На униси, на буниси гапиради. Шаҳриёрни ҳамон кулги тарк этмаган, ҳай-ҳай демаса шарақлаб кулиб юборадиган даражада. Аммо бунинг иложи йўқ. Анвар ранжиди, афт-ангоридан кўриниб турибди. Қайтанга унинг кўнглини кўтариш керак, хафа бўлмасин.

Шаҳриёр Анвар томонга қараб ўтирилди. Ўнг тирсагини ёстиққа тиради-да, аста гап бошлади.

— Анвар, менга қара...

Анвар индамади, ҳамон тескари қараб ётарди.

— Эшитаяпсанми, Анвар?

— Нима дейсан... — деди ўша ҳолатда ётганча.

Шаҳриёр гапни мутлақо бошқа томонга буришга жазм этди. Қуён воқеаси гўё бўлмагандай, у ҳақда сира сўз очмасликка аҳд қилди. Биладики, ҳозир шу борада гап кетса бари бир Анварга алам қиласди, таъсир этади. Ўйлаб-ўйлаб мактабдаги бирон-бир қизиқ воқеани эслагиси келди. Хайрият, шундай ҳодиса ёдига тушди.

— Анвар, менга қара, Шарифнинг қулогини парта қисиб қолгани эсингдами? — деди кулиб.

Анвар унга томон ўтирилди. Унинг бояги тунд юзи энди сал ёриша бошлаган эди.

— Шариф ўзиям жуда ажойиб бола-да,— деди Анвар эсига қизиқ гап тушганидан суюниб. Унинг бу

ҳолатини кўрган одам ҳозиргина қуённи ушлаёлмай, бунинг устига юз тубан йиқилиб тушган Анвар шу бола эканига ишонмайди. Бир зум илгари қовогидан қор ёғилиб ўтирган Анвар энди бир қоп ёнғоқдай шалдираб кулар эди.

## ШАРИФНИНГ ҚУЛОФИНИ ПАРТА ҚИСГАНИ ХУСУСИДА

Темиров деган физика муаллимининг ғалати одати бор: бир қарасанг ўта талабчан, бир қарасанг жуда ҳазилкаш. Бир кайфияти кеп қолса, дарс қоп кетади, турли ҳангомалар, афанди ҳикоя қилиб беради.

Жўрттага қилгандаш шу ўқитувчининг дарсида ҳар хил ҳангомалар тез-тез содир бўлиб туради.

Янги ўқув йилининг бошлари эди. Орқа партада ўтирадиган Шариф «Вой, энажон...вой-вой-й» деб бақириб юборди. Бутун синф гувв этиб унга қаради. Шариф партадан бошини кўтармай додлаб йигларди. Аввалига ҳеч ким гап нимада эканини тушунмади. Темиров кўлидаги бўрни столга кўйди-да, унга томон юрди. «Вой, қулогим, вой энажон, қулоққинам», дейди Шариф. Муаллим унинг олдига келиб: «Ҳа, Шариф, нима бўлди?», деди. Шарифнинг ўнг юзи партада, юзлари қизариб кетган, гапириш ўрнига йиглайди. Темиров секин унинг бошини кўтармоқчи бўлди, лекин кўтаромади. Шариф эса баттар вой-войлади.

Маълум бўлдики, унинг қулоғини партада қисиб қолган экан. Шариф бошини партага қўйгану очилиб-ёпиладиган қопқоғини ўйнаб ўтирган. Шунда нимаям бўлиб ўнг қулоғининг бир чеккаси партани қопқоғини кўтарганда орасига кириб қолган. Ўзи бундан бехабар қопқоқни ёпган, натижада қулоғи қисилган. Шунда беихтиёр додлаб юборган. Қопқоқни кўтарса-ку очилиб қулоғи бўшайди. Шошганда лаббай топилмас деганиларидек, Шариф бунинг ўрнига қулоғини тортади. Унга сари қулоғи оғрийди.

Темиров аста партада қопқоғини кўтарди. Шарифнинг қулоғи бўшади. Энди қулоқ шўрликнинг ҳолини кўрсангиз: қип-қизил бўлиб шишиб кетган. Шариф унга кафтини босади — ҳам оғриқ, ҳам уят. Кўзларидан шувуллаб ёш оқади.

— Гап кирмайдиган қулоқнинг жазоси шу,— деди муаллим.

Аммо бу учирма гап кирадиган қулоқларгаям кирганий йўқ. Ҳамма Шариф ва унинг қулоғи билан овора. Бирор кулади, бирор тез дўхтирга бор, дейди, яна кимдир, мунча ваҳима қиласизлар, ҳеч нарса қилмайди, ҳозир қайтиб кетади, деб Шарифгаям, бошқаларгаям таскин беради. Шариф шўрлик кимнинг сўзига қулоқ солишини билмайди. Унинг нияти — тезроқ бу ердан кетиб, ҳеч кимнинг кўзига кўринмай, ҳоли, салқин уйда ётиб ухлаш. Бироқ, Темиров жавоб берадими кетишга? Шариф бу аҳволда сўрай олмайди. Бир жиҳати сўрамаганиям тузук, акс ҳолда балога қолиши тайин. Темировга гап топилмайди, ҳадеган-да майна қилаверади. Ҳали шуёғиям етади биринки йилга.

Қизлар бари бир болаларга нисбатан раҳмдилроқ экан. Бешови (синфда атиги бешта қиз бор) баравар Темировдан илтимос қилди.

— Уйига кетаверсин энди муаллим...

— Бу аҳволда қандай ўтиради дарсда...

— Бари бир ҳозир калласига ҳеч нарса кирмайди.

— Қулоғига десанг-чи.

Кимдир луқма ташлади:

— Худди бошқа пайтда миясига бирор нарса кирадигандай галиради-я.

Темиров луқма ташлаган болани қидирди, аммо ғалавонур ичиди унинг ким эканини аниқлай олмади. Ҳолатидан, юз ифодасидан маълум эдики, бу луқма Темировга маъқул тушди.

Қизлар ўз сўзида туришди.

— Ҳозир бунинг соғлигини ўйлашимиз керак...

— Қулоқ нозик аъзо, дейишади. Бир балога гирифтор бўлиб юрмасин тағин, дўхтирга кўрсатсан..

Шариф йифидан ўзини босиб ололмас, қулоғини дам-бадам силаб қўяр эди.

— Балки бирор бирга борар дўхтиргача.— деди болалардан кимдир.

Шахриёр Шарифнинг бу аҳволидан на кулишини, на йиғлашини билмай ҳанг-манг эди. Бир томондан чинданам кулгили, аммо қулоғини кўрган одамнинг дилини кулги тарқ этади, унга раҳми келади. Ана шу кейинги туйғу Шахриёрда устун чиқди.

— Мен бирга бораман.— деди дабдурустдан.

— Ўзи кетаверади-да, нима, қўрқадими,— деди бирров.

— Бирга борса яхши-да...

Темиров мунозарага чек қўйди:

— Бўлди болалар. Шариф билан Шахриёр бирга боради. Қолганлар жой-жойига ўтиурсин. Дарсни давом эттирамиз деб, Шахриёрга юзланди. — Сен Шахриёр, Шарифни аввал дўхтирга олиб бор, кейин уйигача бирга бориб, ота-онасининг қўлига топшири. Тушунарлими? Боринглар энди.

Шахриёр ҳам ўзининг, ҳам Шарифнинг сумкасини олди. Оддин Шахриёр, орқасидан калласини ўнг томонга қийшайтирганча Шариф эшиқдан чиқиб кетди.

Синфнинг у ер-бу ерида пиқ-пиқ кулги ҳамон бо силмаган.

Шу воқеагаям қариб бир йил бўлди. Шундан бери Шарифнинг кўзини очиришмайди. Бу орада бутун мактабга ёйилди. «Қулоғинг қалай, оғримаяптими?», «Шишмаган чори-а?», «Мюнхаузен бўл-эй, партага қулоғингни қўйиб кўчада бўлаётган гапларни эшитсан-а», «Эшитиш қобилияти Шарифда жуда ривожланган деса бўлади».

Э-ҳе, бунга ўхашаш гаплар, пичингу масхараларнинг чеки-чегараси йўқ. «Қулоқ» деган сўзни эшитса, Шарифнинг асаби қўзиб кетади. Темировга-ку тоза худо берди — бўлса-бўлмаса «болалар, қулоқ солинглар... Ҳай, қулоғинг борми ўзи? Одамда қулоқ бўлмаса қийин экан-да. Икки қулоғинг билан эшит...» Хуллас, ҳар гапида қулоқни тиқмаса кўнгли жойига тушмайди. Яна дeng қулоқ дейиши билан Шарифга юзланади. Буни болалар сезиб қолишган. Улар ҳам Шариф ўтирган томонга гув этиб ўтириладилар.

Шариф гап кўтармайдиганлар хилидан, жаҳли бурнининг учидатурди. Дарров қизариб-бўзариб кетади. Унинг аччиғи чиққани сари болалар баттар ғашига тегади.

Аксига олгандай ўша кунлари тариҳдан қулоқларни синф сифатида тутатиш мавзуси ўтила бошланди. Муаллим дарс мавзусини эълон қилиши билан синфда бўлди кулги, бўлди кулги. Ўқитувчи ҳайрон:

— Нима гап ўзи?

Ҳеч ким гапирмайди. Ҳамма кулади, холос. Муродов болаларни бирма-бир кузатди. Фақат охирги партада ўтирган Шариф кулмас, бироз қизарган күйи дераздан ташқарига қараб ўтиради. Муаллим унга мурожаат қилди:

— Шариф, сен ўрнингдан тур-чи. Қани, менга тушунтир, нима гап ўзи?

Болалар баттар кулиб юбордилар. Қийқириқ авжига минди. Шариф ўрнидан турди-да, бир оғиз ҳам гапирмай, югуриб синфдан чиқиб кетди. У эшикни шундай зарб билан ёпдики, деразалар зириллаб кетди. Бу ҳол Муродовнинг ҳайратини ошириди. У асабини босолмади. Синф журналини олиб жаҳл билан столга «пақ» этказиб урди.

— Жим бўлинглар!!!

Синф сув сепгандай жим бўлди-қолди. Муаллим индамай эшик ва дераза томонга бир-икки бориб келди. Унинг ранги оқариб кеттан эди. Муродовнинг бу мактабга келганига икки-уч йил бўлди, холос.

Ўзи қўшни қишлоқдан. Айтишларича, институтда зўр ўқиган. Ўзи тарихдан дарс берса-да, географияни, адабиётниям яхши билармиш. Ўқитувчилар билан кўп масалада келишмай, тортишиб юради. Буни ўқувчилар ҳам кўп кўришган, эшитишган.

Унинг ташаббуси билан мактабда тарих, мусиқа тўғараклари очилди. Рубоб, тор ва доира чалишни қишиб қўяди. Туппа-тузук ашгулаям айтади. Бўш бўлди дегунча китобга термулади. Кекса муаллимлар билса ҳазил, билмаса чин қабилида унга пичинг айтишади.

«Шунча билим, шунча талант билан муаллимлик қилиб юрганингизга ҳайронман»,— деди бир куни Тимиров. Муродов аввалига индамади, аммо чидаёлмади. «Болалар саводсиз ўқитувчилар қўлида қолиб кетса, эртага аҳволимиз нима кечади?» деди вазминлик билан.

Парталар уч қатор қилиб қўйилган. Муродов ўрта қаторнинг рўпарасига келди-да, ўқувчиларга қаттиқ термулди.

— Уят! Шармандалик!... Шариф нимага чиқиб кетди? Демак, бир гап бор. Синфдошларингни масхара қилишга уялмайсизларми? Ким айтади сизларни юртимизнинг келажаги деб...

Биринчи қаторда ўтирган Шарофат ўрнидан иргиб турди.

— Рост айтасиз, муаллим. Ҳаммаси Шарифнинг устидан кулаяпти. Бир куни...

У бўлган воқеани гапириб берди. Муродов баттар асабийлашди. Қўлини орқасига қилиб ўёқдан-бу ёқقا юра бошлади.

— Кўрдингларми болалар, биз нақадар майдалашиб, бачканалашиб кетаяпмиз. Ҳолбуки, бизнинг аждодларимиз нақадар улуғ одамлар бўлишган. Навоий классик ғазал ёзиб қўйиб устози Лутфийни лол қолдирганида сизлардан анча ёш бўлган. Бобур сизнинг ёшингизда салтанатни бошқарган. Пушкин, Лермонтов, Моцартнинг сизлардай пайтида ёзган шеърлари, музикаси жаҳон маданияти хазинасидан ўрин олган...

— Ҳамма Навоий ёки Пушкин бўлавермайди-ку...

Орқа томондан эшитилган бу луқма Муродовнинг фикрини бўлди.

— Ким айтди шу гапни?

— Мен айтдим,— деб жойидан дадил турди Юсуф.

Муродов энди анча бамайлихотир эди. Шошилмай, оғир-вазминлик билан Юсуфга қаради. Бир зум индамай тикилиб турди.

Кейин дераза томонга юрди-да:

— Ўзимам сен айтган бўлсанг керак, деб ўйловдим,— деди. — Хато қилмаган эканман. Чунки сенга бу гапларнинг қизиги йўқ. Навоий, Бобуру Пушкинлар уёқда турсин, синфдошинг Шахриёр беш олади-ю, сен лоақал уч ҳам ололмайсан. Чунки сенда интилиш йўқ, қунт йўқ. Бўлганим шу деб тураверасан. Ваҳоланки, ҳаракат қилсанг ҳаммадан яхши ўқишинг мумкин. Сендаги жасурликка, дангалликка ҳавасим келади. Яширмайман. Дангасаликни, ялқовликни ташласанг ҳаммаси изга тушади. Бунинг учун одамда иродада бўлиши керак. Афсуски, ана шу йўқ сенда. Айтиб қўяй, бир кун бари бир пушаймон қиласан. Эсиз ёшлик, қадрига етмабман, деб афсусланасан. Лекин унда кеч бўлади. Бордию бир умр ҳозирги ақидага амал қиладиган бўлсанг, бурнингни остидан нарини кўрмай ўтасан...

У стулга келиб ўтирди. Болаларга разм солди. Уларнинг аксарияти ўзига термулиб турганини, яна нима

дер экан, деб қулоқ солаётганини кўрди, сезди. Шу боис фикрларини жиловламади.

— Болалар, мени тўғри тушунинглар, Юсуфнинг қараши, ақидаси билан иш битмайди. Ҳамма нарса ҳаракатта, интилишга боғлиқ. Мен шундайман, борим шу, деб ўтирасак ўтираверамизда. Вақт, умр ўтиб кетаверади... Бир синфдошимизнинг ҳолидан кулиб, ҳажим қилиб юрибмиз. Ҳўш, қулоғини партага қисиб қолган бўлса — нима қипти? Атайлаб тиқиптими партанинг орасига. Шуни шунча чўзиб юриш керакми...

— Темиров ҳар дарсга кирганида шуни гапириб, Шарифни калака қиласди,— деди Шарофат ҳаяжонланаб.

Бу гапдан Муродовнинг жаҳли қўзиди.

— Темировга ўхшаган ўқитувчилар қўлида ўқиганнимиз учун ҳам бир умр итнинг кейинги оёғи бўлиб юрамиз-да.

У бу фикрни айтишга айтди-ю, аммо пушаймон еди. Ўқувчилар олдида бошқа муаллимни ёмонлаш маданиятсизлик. Энг хавфлиси, болаларнинг тарбиясига ёмон таъсир қиласди. Ўқувчиларда ўқитувчиларга нисбатан ишонч, эътиқод қолмайди. Гапни дарров бошқа томонга бурди.

— Хуллас, бу гапларни қўйинглар, болалар. Шунча кундан бери гапирганинглар етар. Энди бу ҳақда на ўзларингча, на Шарифнинг олдида гапирманнинглар. Шаҳриёр, сен чиқиб Шарифни топиб кел. Дарсни бошлайлик.. Ҳўш, ўттан дарсда қайси темани ўтувдик... Ким айтади?

\* \* \*

Бу воқеани эслаб икки жўра роса кулишди.

— Темиров ўзи жа ғалати муаллим-да,— деди кулгидан тўхтаб Анвар. — Раҳимга ғишт кўтартиргани эсингдами?

Шаҳриёр қизиқсиниб Анварга қаради.

— Қачон? Эсимда йўқ. Уйига ҳашарга боргандами?

— Йўқ. Синфда.

— Демак, мен йўқ эканман-да ўша дарсда. Қачон эди?

— Анча бўлди. Қишида эди.

— Мен шамоллаб қолиб мактабга бир ҳафта бор-мадим-ку, ўша пайтда экан-да.

Анвар чордана қуриб ўтириб олди. Муҳим гап айтадигандек, томоғини қириб, вазминлик билан ҳикоясини бошлади.

## АНВАРНИНГ ҲИКОЯСИ

Февралнинг бошлари. Уч кун тинмай қор ёғди. Тиз-задан келади. Совуқ кўз очирмайди.

Биринчи дарс физика эди. Биласан-ку. Раҳим ҳар доим кечикиб келади. Темиров энди дарсни бошловдиди, эшикни тақиллатиб Раҳим кирди.

— Мумкинми, муаллим?

Темиров қошини чимиради.

— Хўш, кир-чи. Нимага кечикдинг?

— Совуқ, муаллим.

— Муаллим совуқми?

Ҳамма кулиб юборди.

— Йўқ...

— Нега унақа дейсан бўлмаса?

— Ташқари совуқ деяпман!..

— Ташқари совуқ бўлса сенга нима?

Раҳим индамади.

— Совуқ бўлса кечикиб келасанми? Бошқаларга совуқ эмасми?

Шошганда лаббай топилмас, деганларидаи, Раҳим бечора довдираб қолди.

— Уларнинг уйи яқин.

— Сенинг уйинг узоқ бўлса биз айбормизми...

Кимдир луқма ташлади:

— У ўзи иссиқдаям кечикиб келади.

Бу гап Темировга қўл келди.

— Кечикмай келган вақтинг борми сени? Совуқда — совуқ дейсан, иссиқда — иссиқ. Ёмғиру қор ёғса-ку, тоза худо беради сенга... — Темиров атрофга разм солди. Кўзи печка устидаги фиштта тушди.— Анави риштни ташқарига опчиқиб ташла,— деди Раҳимга.

Печканинг темири ўрнига битта синиқ фишт туради-ку, шуни кўрсатди. Раҳим фиштни олиб эшикка яқинлашувди, Темиров, тўхта, деди. Раҳим бир қўлида папкаси, бир қўлида фишт кўтарганча эшик олдида тўхтади. Бутун синф ҳайрон. Фиштни чиқариб таш-

лашнинг нима кераги бор? Печканинг оғзи очилиб қолади, тутун чиқиб кетади.

Болаларнинг ажабланганини Темиров сезди. Аммо ҳеч кимга ҳеч нарса демади. Стулга ўтирди-да, журнални вараклай бошлади.

— Хўш, қани, ўтган дарсни ким айтади?

Ҳамманинг кўзи Раҳимда. У шўрлик пальтосиниям ечмаган. Ташқари совуқ бўлгани учун ичкарига кирганида юзлари қизариб кетди.

Темиров баланд овозда бояги саволини қайтарди. Ҳеч кимдан садо чиқмади.

Раҳим безовта бўла бошлади. Фиштни ташлай деса — Темировдан қўрқади, ушлаб туравериш — иссиқ. Ҳаракатидан билиниб турипти — қўлига иссиқ ўтди. Охири чидаёлмади чофи, Темировга термулди. У эса Раҳимга эътибор бермайди, гўё унинг эшик олдида турганини унутгандай.

— Ким айтади дарсни деяпман?.

Шу маҳал Раҳимнинг бўғиқ, аламли овози синфни тутди.

— Иссиқ, муаллим.

Болалар кулиб юборишиди. Темиров жиддий. Раҳимнинг ўзини унутгандай, сўзини ҳам эшитмаган каби тутди ўзини.

— Ким гапирди? Бирор мен жавоб бераман, дедими?

Бу Раҳимнинг гапига шама эди.

— Э, муаллим, иссиқ.

— Энди муаллим иссиқ бўлдими? — деди Темиров Раҳимга ўтирилиб. — Ҳозиргина совуқ эди-ку.

— Фишт иссиқ... — Раҳимнинг гапида илтижо, ялиниш бор эди.

Темиров ҳамон пинагини бузмади.

— Фишт иссиқ бўлса яхши-да, совқотдим, дединг-ку, ахир... Бирпас ушлаб тур исийсан.

— Ташқарига опчиқиб ташлайми?.

Болалар ўзларини кулгидан тиёлмадилар.

Темиров дўйқ урди:

— Нега куласизлар?

Раҳимнинг қўли куйди шекилли, баттар безовта бўлди. Бу қўлига алмаштирай деса, қўли банд — папкаси бор.

— Ташқарига опчиқиб ташла, дедингиз-ку ўзингиз. Йиғламоқдан ўзини базур тийиб гапирди Раҳим бечора.

— Бирпас ушлаб турсанг, кечикиб келиш қанақа бўлишини биласан.

Шу маҳал ёз куни осмонида момақалдироқ гумбурлагандай кутилмаган воқеа рўй берди.

Анварнинг ҳикояси шу ерга келганда Шаҳриёр ҳам сергак тортди. Кўрқинч оҳангида Анвардан сўради:

— Раҳим бечора ўзидан кетиб қолдими?

— Йўқ,— деди Анвар.— Юсуф жойидан иргиб турди. Ҳамма «гув» этиб унга қаради. Темиров билан Раҳимнинг ҳам диққати унга йўналди.

— О, муаллим, қанақа одамсиз ўзи? — деди Юсуф кескин.— Нимага у бечорани қийнайсиз? Кечиккан бўлса, кечикибди-да, энди! Осмон узилиб тушмабдику, ахир! Ўқиса ўзи учун ўқийди, сиз учун эмас! Лекин сиз унга азоб берманг. Бундай қилишга ҳаққингиз йўқ!

Ёз осмонида гумбурлаган бу момақалдироқ ҳаммани ҳайратта солди. Очиги, Темиров ҳам гангид қолди. Юсуфга термулиб турибди-ю, нима дейишини билмайди. Синф сув қўйгандай жимжит бўлиб қолди. Темиров қизариб кетди. Юсуфга нимадир демоқчи бўлар, аммо айтмоқчи бўлган гапини тополмасди.

Шу маҳал бир нарса гуп этди. Ҳамманинг нигоҳи Раҳимга қадалди. Унинг қўлидаги фишт полда ётарди. Раҳим уни атай ташлаб юбордими ёки қўлидан тушиб кетдими, бизга қоронғу эди. Алининг аламини Валидан опти, дегандай, Темиров Раҳимга бақирди:

— Фиштни жойига қўй! Полни ифлос қилдинг.

Раҳим фиштни печканинг устига элтиб қўйди.

— Ўтир жойингта! — деди Темиров. Кейин Юсуфга яқин келди.— Тилинг чиқиб қоптими Эргашев. Бунчалар маҳмадоналигинги билмовдим сенинг. Оладиган баҳонг икки бўлса, катта кетишинг чакки эмас-ку, а?! — Юсуфнинг қулогидан бурай бошлади. — Шу бидирлаган тилингни бир кўрсат менга. Узиб олиб итга ташлайин.

Юсуфнинг қулоги оғриди шекилли, инграб юборди. Темиров ҳамон қўйиб юбормас, гёё шу билан ундан аламини олмоқчи бўларди...

Анварнинг ҳикоясини эшитиб ўтириб Шаҳриёрнинг ҳам қулоги оғриб кетди чоғи, ўнг қулогини силаб қўйди.

— Ҳеч ким индамадими? — деб сўради у ачиниш билан.

— Ким индайди. — Анвар ҳикоясини давом эттириди. — Энг қизиги кейин бўлди. Юсуф додласаям Темиров қўйиб юбормади. Бечоранинг жони ачиди шекилли, бир маҳал Темировнинг кўкрагига гуп эткизисиб бир мушт тушириди. Темиров ҳамма нарсани кутган бўлиши мумкин, лекин бу ишни кутмаган чиқади. Довдирааб қолди. Бутун синф олдида ўз ўқувчисидан калтак ейиш — муаллим учун оғир. Ранги аввал оқарди, сўнгра эса қип-қизил тусга кирди.

— Аблах! — деди лаблари титраб. — Сен билан ҳали гаплашаман. Директорнинг олдида. Ярамас! Шу мактабда ё сен ўқийсан, ё мен ишлайман.

У журнални, китобларини йифишири бошлади.

— Бугунги дарсни ўтмайман. Бунинг учун сен ярамас айбдорсан. Жавоб берасан. Сенлар гувоҳсанлар, — деди болаларга.

Шундай деб эшикни қарс этказиб ёпиб чиқиб кетди...

Анвар жим қолди. Шахриёр ҳам. Нихоят сукунатни Шахриёр бузди.

— Юсуф билан Темировнинг ит-мушук бўлиб қолиши шундан экан-да,— деди у ўзига-ўзи гапиргандай бир тарзда.

— Бўлмасам-чи. Директор Юсуфнинг отасини чақиртириди, уни мактабдан ҳайдамоқчи бўлди. Эҳ-ҳе қанча машмаша бўлди-ку. Юсуфнинг отаси билан Темиров роса сўкишган. Охири кимдир ўртага тушиб икковини яраштириб қўйган дейишиади. Ҳозир ҳам Темиров Юсуф билан гаплашмайди, сезмаганмисан? Ҳатто дарсниям сўрамайди ундан.

— Биламан,— деди Шахриёр паст овозда.— Очиғи, Темиров ҳам гоҳида ҳаддидан ошиб кетади-да. Болаларни ҳеч менсимайди, баъзиларни ҳатто пашиша ўрнида кўрмайди. Юсуф бечораям чидаёлмай кетган-да!..

Унинг гапини Анвар бўлди:

— Нима бўлгандаям урмаслиги керак эди. Муаллимга қўл кўтариш яхши эмас.

— Албатта... Аммо Темиров ҳам шу даражага бориши инсофдан эмас-да. Ўзигаям, Юсуфгаям ноқулай.

— Юсуфнинг отаси Темировнинг устидан ёзган дейишиади.

— Нима деб ёзади?

— Саводсиз, ўз фанини билмайди. Фалон йилдан бери физикадан дарс беради, шу вақт ичида мактабдан биронтаям физик чиқмади. Агар Темиров яхши ўқиттанида шундай бўлмас эди. Бошқа ҳамма фанлар бўйича яхши кадрлар етишиб чиқяпти, фақат физикадан йўқ деб ёзганмиш. Бунинг устига қўпол, ўқувчилар билан ишлашга нолойик, педагогликдан четлатиш керак, деганмиш.

— Ростданми? Ким айтди сенга? — қизиқсиниб сўради Шаҳриёр.

— Рост. Бир куни муаллимларни гапини эшлиб қолдим.

— Қаерда?

— Ҳайит аканинг тўйида Муродов, Аҳмедов, Сатторов, яна бошқа муаллимлар гаплашиб ўтиришувди. Мен чой-нон ташиб юрувдим. Бир маҳал қулогимга «Юсуф, Темиров... Юсуфти отаси ёзипти», деган гаплар чалиниб қолди. Тўғриси, қизиқдим. Сал нарироққа бордим-да, тескари қараб ўтиредим. Худди артистларни томоша қилаётгандай бўлиб уларни гапига қулоқ солдим.

Шаҳриёр кулди.

— Туппа-тузук шпион экансан-ку.

Анвар ҳикоясида давом этди:

— Ўзимизнинг синф бўгани учун қулоқ солдим-да, бўлмаса менга нима эди-я!.. Шунда шу гапларни айтишди. Қанча комиссиялар кепти мактабга. Директор ўртага тушиб сақлаб қолганмиш. Қариндоши экан-да.

— Шундайми? — деди Шаҳриёр ажабланнб.

— Ҳа. Бўласи экан.

— Ростданам Темиров яхши ўқитмайди-да, Анвар. Ўзингам биласан-ку: қачон қарасанг, қаёқдаги гапларни айтиб ўтказади дарсни.

— Аҳмедовнинг айтишича, Темиров физикани яхши билмас эмиш-да. Қанча масалалар бор экан, бизларга ҳеч масала ишлатмайди-ку.

— Шунинг учун бизарди лакиллатиб ўтирса керак-да, — деди Шаҳриёр.

— Мактабимизни битирган болалардан биронтаси-ям физика факультетига ўқишига киролмаслигининг сабаби шундан, дейди Аҳмедов. Унга Сатторов айтадики, биронта бола институтни битириб келса, ўрнимни олиб қўяди, деб қўрқади, дейди.

Шахриёр Темировдан ранжиган оҳангда гапириди:

— Ўзи саводсиз экану яна ҳаммани қийнайди.

Боғ этагидаги ёлғизоёқ йўлдан Акбар, Голиб кўринди.

— Акбар билан Голиб келаяпти,— деди Шахриёр.

— Акбарни қўлида коптоги бор. Футбол ўйнаймизми?  
Унгача Акбар билан Голиб етиб келишди.

— Нима қилиб ўтирибсилар? — Сўрига чиқатуриб  
гап ташлади Акбар. — Юринглар, футбол ўйнаймиз.

— Шу иссиқда-я,— деди Анвар.

— Нима қипти.

Гапга Голиб аралашди.

— Биласиларми, дайравотта борамиз. Кўлда чўми-  
ламиз, чимзорда футбол ўйнаймиз.

— Тўрт киши футбол ўйнаб бўладими?

— Йўлдан бошқа болаларниям чақирамиз. Саттор  
бор, Акмал, Файрат...

— Кетдик! — деди Шахриёр.

— Кўйлар-чи?

Анварнинг бу гапидан Шахриёр ҳам сергак тортди.

— Кўйларни сояга оламиз. Олдига ўт ташлаймиз.

Кейин борамиз кўлга.

Улар етти-саккизта бўлиб то қуннинг тафти қайт-  
гунча кўлда чўмилишди, копток ўйнашди. Сувда  
бир-бирига коптокни отиб, сув сепишиб роса мири-  
қишли.

## Иккинчи боб

### КЎРИШУВ

Жавзонинг иссиғи авжига чиққан. Кун эрталабдан  
қиздиради.

Бўстон ҳола қайраоч соясидаги супага нонушта  
тайёрлади. Отаси, онаси, Шахриёр укалари йифилиб,  
энди бир пиёладан чой ичишган эди, дарвоза фийқил-  
лаб очиди. Ҳамма шу томонга қаради. Биринчи бўлиб  
Бўстон ҳола жойидан ириб турди: «Ие, Пиримjon  
келди». Ҳола ўғлига пешвоз юрди. «Бўйларингдан энанг  
айлансин, келдингми болам». Бўстон ҳола ўғлини бағри-  
га босди, пешонасидан, юз-кўзларидан ўпди. «Ўзи эрта-  
лаб ўнг қовоғим учиб турувди, сен келаркансан-да».

Шаҳриёр югуриб бориб акаси билан кўришди. Пиримқул уни қучоқлаб юзларидан ўпди.

— Қалайсан? — деди Пиримқул укасига,— каникулда маза қилиб юрибсанми?

Бўстон ҳола гапга аралашди:

— Акасининг тўйига қўй боқаяпти Шаҳриёржоним.

Пиримқул ҳамма билан бирма-бир қучоқлашиб кўришди. Кейин нонуштага ўтиришди.

Дастурхонга фотиҳа ўқилгач, Бердиқул бобо аста томогини қириб Пиримқулга қаради. Отаси нимадир сўрамоқчи эканини сезиб ўғли ҳам унга юзланди.

— Хўш, ўғлим, ишларинг яхшими? Ўқишинг битдими?

— Битди,— деди Пиримқул қисқа қилиб.

— Ҳаммасидан яхши қутилиб олдингми? Ҳалиги, нимайди, диплом дейсизларми, шуниям топширдингми?

Пиримқул отасининг мақсадини тушунди. Диплом ишингни ҳимоя қилиб олдингми, демоқчи.

— Бўлди ота. Ҳаммасидан қутулдим. Энди насиб этса, сентябрдан ишга тушаман.

— Унгача дамми?— деб сўради Бўстон ҳола.

— Шундай...

— Худога шукр, омон-эсон қутулиб опсан. — Бўстон ҳоланинг гап оҳангига ўғлидан мамнунлигини ифода этарди.

Бердиқул бобо ўша вазмин оҳангда деди:

— Ишинг қаерда бўлади? Ёки ҳали номаъумми?

Отасининг бу саволи замирада кўп маъно борлигини Пиримқул билади. Бердиқул бобонинг нияти — ўғли ўқиши битириб ёнига қайтса. Олдин ҳам бу ҳақда гап кечган. Ҳар гал Пиримқул пайсалга солган, мақсадини очиқ айтмаган, ўқиш тамом бўлсин-чи, кўрамиз, деб келган. Энди гапни орқага суришнинг иложи йўқ, бор гапни борлигича айтмоғи даркор. Аммо бирдан гапнинг лўндини айтиш ҳам осон эмас, йўлини қилиб тушунтиromoғи лозим, акс ҳолда ота-онаси дилини ранжитиб қўйиши мумкин.

Пиримқул бир нафас сукут сақлади, гапни нимадан бошлишни ўйлади.

Бердиқул бобо унинг кўнглидаги ўйларни уққан каби савол ташлади.

— Ҳа, ўйланиб қолдинг?.. Айтавер бор гапни. Шаҳарда қолмоқчимисан?

— Ўзимга қолса шаҳарда қолиш истагим йўқ,— Пиримқул тутилиб-тутилиб гап бошлади. — Лекин институтда тартиб бошқача экан. Ўқиши битирганларни уларнинг ўzlари ишга тақсимлар экан.

Бўстон хола ўғлининг сўзини бўлди:

— Вой ўлай, яна қоласанми Тошкентда?

— Ҳозирча шундай қилишга тўғри келади,— деди Пиримқул нигоҳини ердан кўтартмай.

— Ўқиши битиргандан кейин ким қаерда ҳоҳласа ишлайвермайдими?

Бердиқул бобонинг оҳиста, бироқ қатъий бу сўзла-рида «ўзинг ҳўп демасанг, сени мажбур қиласмиди», деган ўткир таъна зоҳир эди. Буни пайқаган Пиримқул отасига юзланди.

— Шундай эмас экан-да. Тайинланган жойда ишламаса, диплом бермас экан. Мени институтнинг ўзида олиб қолиши.

— У ерда нима иш қиласан?

— Ўқитувчилик.

Бердиқул бобо ўғлининг кўзларига термулди. Бу қаращдан икки хил маънони уқиши мумкин: биринчи-си — ўғлим мени алдаяптими, ростданам у институтда домла бўладими, деган гумонсираш; иккинчси — менинг болам вояга етиб, институтда домла бўлди, деган қониқиши туйғуси. Отанинг бир-бирига қарама-қарши ана шу икки туйғуси қўшилиб кетган эди.

Бўстон холада эса аксинча, ташвиш ҳисси кучайди.

— Яна қачон келаркан Пиримқулим, деб йўлингта кўз тикиб ўтираманми, болам.

Пиримқул онасини юпаттан кўйи:

— Тез-тез келиб тураман. Илгари ўқищдан чиқолмасдим, энди ўқимайман-ку, сизларни соғинганимда ишдан жавоб оламану келавераман. Нима, Тошкент қочиб кетилтими,— деди.

Бердиқул бобо бошқа гапирмади. Отасининг сукутини Пиримқул ризолик аломати каби тушунди. Бу тушунча унинг кўнглига далда берди.

Она-она экан-да, ўғлини соғиниши ҳисси, боласи бағрида бўлишини истовчи туйғу уларни сира тарқ этмасди.

— Ўқишинг биттанини эшитиб, энди болагинам ёнимга келади, деб суюниб ўтиргандим-а. Яна ўша аҳвол экан-да,— деди Бўстон хола бўшашиб.

Соқолини силаб сукут сақлаб ўтирган Бердиқул бобо гапга аралашиб:

— Бўлди, ҳадеб дийдиё қиласкерма. Ҳозир замон шунаقا. Фарзандни тарбиялаб учирма қилганингдан сўнг ихтиёр ўзида — хоҳлаган томонига учиб кетади. Сен билан мени дуо қилишдан ўзга иложимиз йўқ. Ишқилиб қаерда бўлсаем омон бўлсин, эгам ўз паноҳида асрасин.

Отасининг бу гапидан Пиримқул қанча суюнган бўлса, Шаҳриёр ҳам шунча қувонди. У акаси шаҳарда ишда қолишини жудаям истайди. Пиримқул шаҳарда бўлса, унинг ўқишига бориши ҳам осон кечади. Борганди институтни қидириб сарсони ачиб юрмайди, акаси ўзи бошлаб боради. Унинг устига институтда домла бўлар экан. Қандай яхши! Жўралари Шаҳриёрга ҳавас қиласди, ҳа, нима, институтда домла бўлиш осонми! Кимнинг акаси домла. Яна қаерда — пойтактда — Тошкентда. Ҳазилми. Бутуноқ жўраларига мақтанади. Ҳали боққа борганда болалар келади-ку, шуларга айтади.

Богни эслали билан қўйлари ёдига тушди: «Қўйларни яхши боқиши керак. Бир семирсин. Энамнинг гапига қараганда яқин орада акамни уйлантиришади... Акам кимга уйланар экан?..» Шаҳриёр ўзича янгасини тасаввур қилди. Кимнинг қизини олади? Қишлоқдаги қизларни бир сидра ўйлаб чиқди. Биронтасиниям акасига эп кўрмади. «Балки энамнинг мўлжаллаб қўйгани бордир...Ёки акамнинг ўзи биронтани кўз остига олганмикан. Шаҳарданмикан ёки қишлоғимизданмикан. Шаҳардан бўлса ота-энам кўнармикан...»

Шаҳриёр ўзича хаёл суроётган масала аллақачон ойдинлашган эди. Бердиқул бобо билан Бўстон хола Пиримқулга бир неча ой олдин бу ҳақда гап очган, ўшанда Пиримқул тортиниб-тортиниб бўлса-да, кўнглини ёрган эди. Аввалига улар кўна қолишмади, танимаган-бilmagan хонадондан қиз олиш, яна шаҳарлик бўлса, деб кўп мулоҳаза қилишибди. Шаҳарда ўсган қиз қишлоққа келадими, бу ернинг шароитига ўрганадими-йўқми, унинг ота-онаси нима дейди.

Бунга ўхшаш кўпгина савол-жавоблар бўлиб ўтган. Охири Бердиқул бобо билан Бўстон хола ўғлиниң раъйига қарашган. Ҳатто Пиримқулнинг амакиси унга билдирмай Тошкентта бориб бўлғуси қудалари ким, қанақа оила эканини маҳалласидан суриштириб ҳам келган.

Бу гаплардан Шаҳриёр бехабар, албатта.

Аслида Пиримқулнинг ҳозирги келиши тўй масаласида эди. Буни Бердиқул бобо ҳам, Бўстон хола ҳам билади. Пиримқул шаҳарда ишда қоламан деганида отасининг кўнглига бир мулоҳаза келди. Ўша ёқдан уйланмоқчи бўлганинг учун шаҳарда қолмоқчисан, шаҳарлик қиз ўзи келмаганига яраша сениям юбормоқчи эмас, деб Пиримқулга айтиш ниятида бир-икки оғиз жуфтлади, бироқ турли истиҳолага бориб, фикридан қайтди. Билиб-билмай ҳар нарсани бир нарсага йўя-вермаслик керак, деган андиша устун чиқди. Қолаверса, ҳали тикланмаган оиласа кўнгилни ғаш қилувчи гапларни аралаштириш яхшиликка олиб келмайди. Майли, тақдирида бўлса уйлансин, агар олло-таоло пешонасига ўша қизни ёзган бўлса, шаҳарда ишлашни биттан бўлса биз ожиз бандалар нимаям қиласардик. Ишқилиб умрини, омадини берсин...

Лекин нонушта устида ҳеч ким тўй ҳақида гап очмади.

Нонушта чоғи тўй ҳақида гап бўлмаган эса-да, у ҳамманинг дилидаги асосий гап эди. Уни тезлаштиришга барча бирдай ҳайриҳоҳ. Аслида Бердиқул бобо билан Бўстон холага қолса Пиримқулни бир неча йил олдин уйлантириб қўйишарди, бироқ у кўнмади, аввал ўқишини битирай, уйланиш қочиб кетмас, деб ўжарлик билан оёғини тираб олди.

Оқшом Пиримқулнинг келганини баҳона қилиб Бердиқул бобо ўзининг яқинларини чақириди. Шаҳриёр амакисини, тоғаларини, поччаларини айтиб келди.

Ош-сувдан кейин Бердиқул бобо мақсадини айтди.

— Буям сентябрда ишга тушаман деялти,— деди Бердиқул бобо Пиримқулга ишора қилиб. — Шунгача уйини йигиб берсак, девдим.

Бу фикр ҳаммага маъқул тушди. Бўстон хола билан Пиримқулнинг амакиси эртагаёқ Тошкентта — совчиликка жўнайдиган бўлишиди...

Совчилар уч кундан кейин қайтиб келишиди. Тўйни бешинчи августта белгилашибди.

Бу хабарни эшитиб Шаҳриёр роса қувонди. Тўй баҳонасида Тошкентта боради...

## ОЛАПАР

Шаҳриёрганинг хаёли кечаю кундуз Тошкентда. Тезроқ бешинчи август келсаю у шаҳарга борса. Ўзини Тошкент кўчаларида юргандай ҳис этади. Юраги энтикиб кетади.

Уйқу олдидан ҳам Тошкентни ўйлади. Бугун шу ширин хаёл билан ухлаб қолди.

Хунук бир овоздан чўчиб уйғониб кетди. Назарида кимдир додлаётгандай туюлди. Юраги гупиллаб урди. Бошини кўтариб овоз келган томонга қаради. Равот адоғидан ёввойи мушукнинг вангиллагани эшитилди. «Ҳо, соғана, яна пайдо бўлти-да», деб ўйлади.

Уч-тўрт кун аввал қандайдир ёввойи мушук уларнинг ҳовлисида пайдо бўлиб қолди. Кечалари уйқу бермайди. Шаҳриёр ҳайдаб юборган эди. Бугун яна овози чиқиб қолди.

У ёстиқقا бош қўйди. Жўрттага қилгандай мушук яна додлади. Бостирма остида ётган Олапар безовта бўлиб ҳуарар, мушук томонга ташланиб, занжирини шалдиратар эди. Ҳадеганда мушукнинг овози ўчавермади. «Ҳо, падарингга қусур-эй, ажалинг еттан шекилли-да. Ҳозир Олапарни қўйиб юборсам-ку, жонингни олади-я. Аслида ўшанда кунинг битган эди-ю, аммо отам қўймадилар-да».

Мушукнинг овози баттар авжига чиқди. Худди бирони-биров бўғизлаётганга ўхшарди, унинг овози шу қадар ваҳимали, хунук эдики, одамнинг бадани вағиллаб кетади.

Бердиқул бобо намозга турган чори таҳоратхона томондан унинг товуши эшитилди: «Пишт! Пишт! Ҳеҳ уйинг куйгур!»

Мушук қўлингдан нима келарди, дегандай баттар забтига олади. Бу Шаҳриёрганинг жигига тегди. «Шошмай тур сени, ҳозир отам номозга кириб кетсин, кунингни кўрсатаман...»

Бердиқул бобонинг чўпон ошиаси бир ит келтириб берди. «Оллонидан опкелинг десам, урғочи кучук оп-

кепсиз-ку», деди Бердиқул бобо ошнасига. Чўпон унга эътиroz билдириди: «Парво қилманг, бу урғочи бўлсаям суллани бор, жудо зотдор ит», деди.

Чўпон алдамаган экан. Ит жуда сергак чиқди. Тун бўйи ҳовли атрофини айланиб юради. Итга ёлчимай юрган Бердиқул бобо чўпон ошнасидан миннатдор бўлди.

Вақти келиб ит бўғоз бўлди. У иккитагина бола туғди. Уч кундан кейин битта кучуквачча ўлди. Ёлиз Олапар қолди. Ит шўрлик Олапарни ялаб-юлқиб катта қилди. Ана-мана дегунча Олапар дўрсиллаб юрадиган бўлиб қолди. Аммо кутилмаганда Олапарнинг онаси йўқолди. У қаёққа кетди — ҳеч ким билмайди. Бир кун қараашди, икки кун қараашди, лекин итдан дарак йўқ. Шу кетганча дом-дараксиз кетди.

Шахриёр Олапарга сут беради, нон беради, ҳуллас — унинг эрмаги бўлиб қолди.

Олапар вояга етгач, шундай ажойиб ит бўлдики, эшилтан одам ҳайратта тушади. Кўни-қўшнилар Олапарнинг қилиқларини кўриб, эшитиб ёқа ушлашади: «Ё тавба, ит ҳам шунаقا ақлли бўладими...» Агар Олапарга бирор ёқиб қолса, биринчи марта кўраётган бўлсаям индамайди, думини ликиллатиб тураверади. Ёқмаган одамини ҳар куни ўн марта кўрсаям ипини узгудай бўлиб ташланади. Унча-мунча одам унинг ҳайбатидан қўрқади. Шунинг учун Олапар доим занжирда туради.

Олапарнинг ёмон кўргани — мушук. Ҳали кучукчалик пайтидаёқ уч-тўртта мушукни асфаласофинга жўнатди. Бўстон хола бир-икки марта Олапарни уришиди: «Олапар, нимага ўлдирасан пишакти, ахир бу ўзимизники-ку». Унга гапирса бошини эгиб индамай турди, гўё ўзининг гуноҳкорлигини тан олаётганга ўҳшайди.

Уларнинг жажжигина мушуги бор эди. Бир кун эрталаб Бўстон хола ҳовли супураёттанды молхона олдида шу мушукнинг ўлигини кўрди. Билдики, уни Олапар ўлдирган. Мушук ўлигини Олапарнинг олдига ташлади-да, унга дўқ қилди: «Нимага буни ўлдирдинг?! Сенга қанча айтдим ўлдирма деб. Яна шундай қилсанг ўзингам калтак ейсан».

Олапар ўз билганидан қолмади. Мушукни кўрди дегунча қутайтирмайди. Фақат йўлини топди. Мушук-

ни ўлдирадиу токларнинг орасигами, картошкапоягами кўмиб кўяди. Кейин ҳеч нарса билмагандай ётаверади. Унинг бу одатини Шаҳриёр билади, аммо она-сига айтмайди.

Бир куни қизиқ бўлди. Пешинда айвонда овқатла-нишиб, ҳамма ҳар ёққа туриб кетипти. Дастурхонни йиғиштириш ҳеч кимнинг эсига келмапти. Шу куни негадир Олапар бойланмаган экан. Бўстон хола кўча-дан келса Олапар дастурхон олдида ётган эмиш. На мушукни, на товуқларни дастурхонга яқинлашгани кўймас эмиш. Буни кўриб Бўстон хола роса ажабла-нипти. «Ҳа, Олапар, дастурхонни кўриб ўтирибсанми? Мана мен келдим, йиғиштириб оламан», дебди. Шун-дан кейин Олапар ўзининг жойига — бостирма тагига кетипти.

Шундай қилиб, улар Олапарга одамга гапиргандай гапира бошлилади. У ҳам индамай гапга қулоқ солади, айтган ишни қиласди.

«Жониворни тили йўқ, холос, бўлмаса ҳамма гапни тушунади», дейди Бўстон хола.

Бердиқул бобо намозга кириб кетиши ҳамоно Шаҳриёр ўрнидан турди. Бориб Олапарнинг занжирини ечди. «Бор, Олапар, шу ярамасни йўқот», деди. Ола-пар ёввойи мушукнинг овози келган томонга юурди. Мушук унинг шовурини эшитиб девор тагидаги қувур-дан ташқарига чиқиб кетди. Олапар бир зум нима қиларини билмай гангигиб қолди. Ялинган кўйи Шаҳриёрга қаради. Қувурдан беш-олти метр берида де-ворнинг тепа пахсаси қулаган эди. «Олапар, мана бу ердан ўт», деди Шаҳриёр. Олапар югуриб келди-да, эпчилик билан девордан ошиб туцди. Шаҳриёр ҳам унинг орқасидан чопди. Равотнинг нариги томони тизза бўйи ўт бўлиб, мушук шу ўтларнинг орасига яширин-ган экан. Олапар уни қидира бошлиди. Шаҳриёр тош олиб оттан эди, мушук ўрик тагидаги лойхона тарафга қочди. Шундагина Шаҳриёр мушукнинг жуда катта эканини кўрди... Олапар икки сакраб мушукка етди, уни қоқ белидан тишлиди. Мушук жон ҳолатда Ола-парнинг юзларини тирнай бошлиди. Олапар унинг тир-наганига ҳам парво қилмай уч-тўрт қадам наридаги кўлмак сувга кўтариб борди-да, мушукни сувга тикиди. Уни сувга батамом ботиргач тепага кўтарди, мушук яна тирнай бошлиди. Олапар бояги ишини тағин так-

рорлади. Мушук уни яна тирнади. Олапар қўйиб юбормади: яна кўтарди, яна сувга тиқди... Бу иш бир неча марта тақрорланди. Охирги сафар кўтарганда мушук шалпайиб, оёқлари осилиб қолган эди. Олапар уни ташламаган кўйи Шаҳриёрга қаради. Олапарнинг бу ишидан Шаҳриёрнинг оғзи очилиб қолди. Олапар сувдан чиқди-да, картошкапоя томонга юрди. Мушукнинг ўлигини ерга қўйди. Оёқлари билан ерни ковлай бошлади. Анча чуқур қилиб ковлагач, мушукни олиб ўша чуқурга ташлади. Кейин уюлган тупроқни унинг устига тортди. Яхшилаб кўмиб бўлгач, яна Шаҳриёрга қаради. У кулиб юборди. «Олапар, мушукти жанозасини ўқимай кўмдинг-ку», деди. Олапар бир зум Шаҳриёр га термулиб турди-да, жойига қараб кетди. Шаҳриёр ҳам орқасидан эргащи. Олапар бостирма тагига бориб, ҳеч нарса кўрмагандай оёқларини узатиб ётди.

Шаҳриёр унинг занжирини бўйнига илиб қўйди. Кейин ўзи ҳам ўрнига бориб кўрпага кирди.

Намоз ўқиб бўлган Бердиқул бобо Шаҳриёрнииг ёнига келиб ўтирди.

— Шаҳриёр, уйгоқмисан? Анави соғана пишак яна пайдо бўпти-да. Туриб ҳайдаб юборсанг-чи,— деди.

Шаҳриёрнинг кулгиси қистади. «Асфаласофинга кетди-ку. Ҳайдаб юборармишман».

— Ҳайдадим, энди келмайди,— деди ҳеч нарса билмаган кўйи.

— Яхши қипсан. Кечаси билан вангиллаб қуллоқмияни еди соғана... — Энди тура қол, ўғлим, қўйла-рингни эртароқ ўтта олиб чиқ. Кейин буғдойни янчиди олайлик. Мен ҳўқизларни обориб тураман хирмонжойга...

Шаҳриёр хирмонжойга келганида Бердиқул бобо тўртта ҳўқизни ҳўпига қўшган, ўзи Болабекка миниб буғдой янчар эди.

— Бирпас сояда дамингни ол, кейин сен ҳайдайсан,— деди Шаҳриёрга.

Хирмонжойда садақайрағоч бўлиб, хирмончилар унинг қалин соясида дам олишарди. Шаҳриёр қайрагчнинг тангадек ҳам офтоб тушмайдиган соясига солинган шолчага ўтирди. Отаси «бош, ҳе жонивор, бош», деб ҳўқизларни ҳайдар, ўзича мингиллаб ашгула айтарди:

*Майда, майда,  
Май босар, о, майдо-майдо.  
От ўрнини  
Той босар, о, майдо-майдо.*

Хўпнинг ўртасида турган семиз чўммоқ ҳўкиз каласини ердан кўтармас, ўлгидай бўлиб буғдой ерди. Бердиқул бобо «бош, хўптири, бош, э, ютоқиб ўл-а», деб қўяди. Сўнг яна ашгуласини давом эттиради:

*Қийғир ётар қияга.  
Майдо-майдо  
Болалари уяга,  
Майдо-майдо,  
Майдам кетди қир ошиб,  
Майдо-майдо,  
Бир-бирадан талошиб,  
Майдо-майдо.*

Ярим соатлардан кейин Болабекни хўпдан ташқари-га ҳайдади. Шаҳриёрнинг олдига келди-да, отдан тушди.

— Ке, энди, сен минақол, бир оз дам олай,— деди.

Шаҳриёр отта минди. Унгача ҳўкизларнинг ҳамма-си тумшуғини сомонга тикиб буғдой ея бошлади. Болабекни ҳўпга ҳайдади. Қўлидаги қамчи билан хўпнинг энг четидаги ҳўкизни урди: «Бош, ҳе, жониворлар-а».

Бердиқул бобо пақирдаги сувдан маза қилиб си-мирди-да, пешонасидаги терларни бармоғи билан си-дириб ташлади.

— Дажам ҳайда, үлим. Бўшаштиранг ҳўкизлар со-вуб қолади. Кейин танбаллик қилиб юрмай қўяди.

Шаҳриёр Болабекка қамчи босиб ҳўкизларни ҳайдади.

«Ҳа, жонивор, бўшашма, майди қил», деб қўяди. У дам-бадам Болабекка, ҳўкизларга қамчи босади. Патур-путтур юрганидан ҳўкизларнинг оёғи тойғаниб, ат-рофга сомон сочилиб кета бошлади. Уни кузатиб ўтирган Бердиқул бобо жойидан туриб ёйилган сомонларни шоха билан хўпнинг ўртасига олиб ташлади.

— Кўп қичама, үғлим, шошилмай, бир маромда ҳайда. Бўлмаса ҳўкизлар тез чарчаб қолади.

Ота-бала пешингача ҳўп ҳайдади.

Кун тиккага келганида Бердиқул бобо ҳўкизларни бўшатди. Шаҳриёр уларни сояга боғлаб, олдига ўт ташлади.

— Кун қайтгунча ҳўқизлар дам олсин, ўзимиз ҳам чой-пой ичиб келайлик.

Улар йўлга тушдилар. Қишлоққа яқинлашганларида рўпарадан Анвар чиқди.

— Ассалому алайкум,— деди Анвар Бердиқул бобога.

— Ваалайкум ассалом. Ҳа, Анварбой, йўл бўлсин.

— Шаҳриёрди излаб юриппан. Боққа борсам то-полмадим, қўйлари турипти, ўзи йўқ. Уйдамикан деб қишлоққа тушувдим. Бўстон холам «Шаҳриёр отаси-нинг олдида, хирмон янчишяпти», деди. Энди шу ёққа бораёттан эдим.

— Жўранг менга ёрдамлашди. Тушликка кетаяп-миз. Юр, биз билан чой ич. Кейин бирга келасизлар.

Анвар уларга эргащи.

Тушдан кейин Шаҳриёр билан Анвар хирмонга бор-мади. «Сенлар боққа боринглар, қўйларга қаранглар, қолганини ўзим ҳайдайман, озгина қолди, бир-икки соат ҳайдасам бас»,— деди Бердиқул бобо.

## АЖИНА БОРМИ?

Кун қизигандан қизиди. Қилт эттан шабада йўқ. Тутларнинг кавагидаги фурракнинг фурр-фурр эттан то-вуши эшитилади, холос. Ҳар замонда мусичанинг ку-ку, ку-куси фурракнинг фур-фурига қўшилиб кетади.

Кўчаларнинг ундан майин тупроғи ҳам қизиб ётипти.

Шаҳриёр билан Анвар ана шу иссиқда қишлоқдан чиқиб боққа бормоқда. Иккови ҳам ялангоёқ, шимини тиззасигача кўтариб олган, шиллигигача тупроқ кечиб кетаяпти. Шаҳриёр Анварга нисбатан бўйдорроқ, би-роқ, икковиям қотма, чайир.

— Анвар, ҳеч ажинани кўрганмисан? — деди Шаҳ-риёр.

— Йўқ. Нима, сен кўрганмисан?

Шаҳриёр Анварга бир қараб қўйди.

— Менам кўрмаганман. Айни пешин чоғи чиқар-миш-да.

— Нимага энди пешинда чиқаркан? — Ажабланиб сўради Анвар.

— Пешинда кун иссиқ бўлади. Ҳамма сояда ётади, кўчада ҳеч ким юрмайди.

- Одамдан қўрқарканми ажина?
- Бўлмасам-чи,— деди Шаҳриёр ўзини билим-донникка олиб.— Одамдан қўрқмайдиган нарса борми.
- Нимага бўлмаса одамлар ажинадан қўрқади?
- Қўрқмаслик керак-да.
- Сен қўрқмайсанми қўрсанг?

Анварнинг бу гапига Шаҳриёр нима деб жавоб беришни билмай қолди. Қўрқаман деса, ҳозир ундаи деди, қўрқмайман деса, очиги қўрқади. Ҳатто ажина ҳақида гап кетсаям чўчиб туради.

- Ким билади дейсан...— деди ноилож.

Иккови ҳам бир дам жим кетди. Ҳар ким ўзича ажинани ӯйларди.

- Аслида ажина йўқ нарса,— деди Анвар жимликни бузиб. — Одамларнинг ўзи тўқиган. Пешинда болалар ёлғиз юрмасин, деб тўқилган афсона.

- Қаёқдан биласан, балки бордир.

— Отам бир куни худди мана шундай иссиқда лалмидан келаётган экан. Ислом бованинг боғидаги катта ёнгоқ бор-ку, ана шу ердан ўтаёттанда от бирдан ҳуркиб кетипти. Отам чўчиб отнинг жиловини тортипти. Нимадан ҳурқди от, деб ён-атрофга қараса, уват тагида, ариқ бўйида бир аёл сочини тараб ўтирганиш. Ажинага рўпара келдим, деб отамнинг юраги шувиллаб кетипти. Отни тўхтатиб унга яхшилаб қарапти. Аёл ҳам отамга термулиб ўтираверишти. Мундай қараса, Қодир бованинг қизи Ибодат бор-ку, шунга ўхшармиш. Ибодат битта ўзи айни пешинда бу ерда нима қиласарди, ажина бўлса керак, деб ўйлапти отам. Энди отни жиловини бурмоқчи бўлиб турган экан, ҳалиги аёл ўрнидан турипти. Отам яна яхшилаб қарапти. Ростданам Ибодат эмиш. Кейин таваккал қилиб унга гапирипти: «Ибодатмисан?» Аёл тиржайиб: «Ҳа, менман», депти. «Ў-ўл, менман демай. Нима қилиб ўтирибсан бу ерда шу маҳал?» «Бошимни юваётувдим», депти Ибодат. Отам шундан кейин сал ўзига кепти: «Бош ювмай ҳар бало бўл-а. Юрагимни ёрдингку. Ажинага дуч келдим, деб хаёлим қочди-я». Ибодат илжайиб кулармиш.

Қўрдингми, агар ўшанда отам гапирмай кетганида ажина қўрдим, деб ўйларди. Фалон жойда ажина қўрдим, деганларам кимнидир кўрган бўлади. Қўрққанидан гапирмайди-да, кейин ажина бор экан, деб юради.

— Сени отанг Ибодатни кўрган бўлса ҳамма Ибодатни кўраверадими? Ажина бор, катталар айтишадику. Қўтонтомдаги Ҳалим деган одамни биласанми, оғзи қийшиқ-чи, ана шуни ажина чақирган экан. У, ҳа, деган, шундан оғзи қийшайиб қолган, дейишади. Шуннинг учун хилват жойда ёлғиз кетаёттанингда нотаниш одам чақирса индамаслик керак. Уч марта чақиргандан сўнг жавоб бериш даркор. Ажина икки марта-дан ортиқ чақирмас эмиш.

Анвар бари бир ишонмади.

— Э, булар бари афсона,— деди Анвар ҳафсаласизлик билан.

Улар катта йўлдан ёлғизоёқ йўлга ўтишди. Бир томони қалин ёввойи дўланазор, бир томони теракзор. Ўрмонга ўхшаб ётган бу йўлдан ёлғиз юришга болалар тутул катталар ҳам чўчишади.

Шу маҳал «Анвар» деган товуш эшитилди. Иккотиям бирдан тўхтади. Шахриёр Анварга қаради. Унинг ранги бўздей оқариб кеттан эди. Шахриёрни қулги босди, аммо кулмади. Бир жиҳати ўзиям чўчиди. Бояги товуш яна эшитилди.

— Ажинами, Шахриёр,— деди Анвар. Унинг овози титраб чиқди.

Шахриёр ўзини қўлга олиб, дадил гапирди.

— Ажина йўқ, дединг-ку ўзинг.

— Бўлмаса ким чақирайпти мени бу ерда.

— Кўрқма,— деди Шахриёр,— ажина эмас. Менам эшитдим-ку. Ажина чақирса мен эшитмасдим. У кимни отини тутиб чақирса шу одамнинг ўзидан бўлак ҳеч ким эшитмас эмиш.

Бу гапдан Анварга сал жон кирди.

— Ростданми? Сенам эшитдингми?

— Ҳа, эшитдим,— деди Шахриёр кулиб.

Унгача улар билан бир синфда ўқийдиган Шарофат етиб келди. Ёнида укаси ҳам бор эди. Шахриёр унга ишора қилиб, деди:

— Ана, сени чақирган ажина.

Анвар Шарофатни кўрдию рангига қон югурди.

— Чақирсанм эшитмайсилар,— деди Шарофат.

— Э, чақирмай ўл! Ўтакам чиқиб кетди-ку.

Анварнинг бу гапидан Шарофат ҳеч нарса тушумади.

Шахриёр кулиб-кулиб бўлган воқеани гапириб берди.

— Юрагингам отти калласидај бор экан, Анвар,— деди Шарофат.

— Гапираверасан-да сен, мени ўрнимда ўзинг бўлганингда кўрадик ҳолингни.

Улар яна йўлда давом этдилар. Бироз юргач, Шахриёрнинг қитмирлиги тутди.

— Хўш, Анвар, ажина бор эканми? — деди.

Анвар аввалига унга бир хўмрайиб қаради, кейин Шарофатта тикилди.

— Бор экан,— деди Шарофатга ишора қилиб. — Мана, ажинадан қаери кам буни.

Ҳаммаси баравар кулди. Шарофатнинг укаси гап нимада эканини тушунмай ҳайрон. Тўрдагилар кулганда пойгадагилар илжаяди, дегандай, у ҳам тиржайиб қўйди...

Шарофат билан укаси ўзларининг боғига ўтиб кетишиди. Икки жўра қўйлари томонга юришди.

Улар қўйларни заякка олиб чиққанидан кейин полиз ўртасидаги сўрига чиқишиди. Иккови икки томонга ёнбошлади. Ҳар ким ўз хаёли билан банд эди.

Шахриёр ўй суриб ётаркан, яна бешинчи августни эслади. У акасини ўйлади. Шахриёрнинг мақтангиси келиб кетди.

— Эртага шаҳарга бораяпман...

Томдан тараша тушгандай айтилган бу гапдан Анвар таажжубланди. Ётган жойида бошини буриб Шахриёрга қаради.

— Нима қиласан шаҳарда?

— Томоша,— деди Шахриёр керилган оҳангда. — Акамга тўй харжлаймиз...

Анвар унинг гапини бўлди:

— Айтгандай, қайси куни акангни кўрдимми?

— Ҳа, кўргандирсан. Акам келувди. Институтни битирди. Энди ўша ерда домла бўладилар.

— Ие, аканг қайтиб келмайдими қишлоқقا?

— Қишлоқда нима қиласи. Шаҳарда ишлайди. Айтаяпман-ку, институтда домла деб... Бешинчи августда акамнинг тўйи бўлади. Менам бораман Тошкентга.

— Вой, акангни тўйи Тошкентда бўладими?

— Бўлмасам-чи, келинни ўша ёқдан оляяпмиз-ку.

Анвар индамади. Чамаси Шахриёрнинг акасига ҳаваси келаёттанди унинг. Буни у Шахриёрга олдин ҳам айттан. Унинг акасиям Пиримқул билан бир синфда

ўқиган. У ҳеч қаерга ўқишига бормади, колхозда ишлатяпти. Акаси шаҳарда ўқийдиганларга Анвар ҳавас қиласди.

Шаҳриёрнинг акаси институтда домла бўлиб қолаётганини эшишиб тоза суюнди. «Қандай маза. Энди Пиримқул ака шаҳарда яшайди. Студентларга дарс беради. Пиримқул ака молодец. Унинг юришлари, кийинишилари қандай чиройли». Анвар шу ўйлар билан Шаҳриёрга термулди. Унга ич-ичидан ҳаваси келди. Шаҳриёр қанчалар баҳтли. Унинг шундай ақлли акаси бор. Эргага шаҳарга боради. Кейин Тошкентга. Бундан буён у Тошкентта тез-тез бориб туриши мумкин. Акаси ўша ёқда бўлгандан кейин боради-да. Ҳали мактабни битирса Тошкентта ўқишига кетадими...

Анвар индамай, хаёл сурисиб қолганини Шаҳриёр ўзича талқин қилди: жўрам хафа бўлди...

— Сенам бирга юр, Анвар,— деди унинг кўнглини кўтармоқ ниятида.

— Ким билан боряпсан?

— Отам, энам билан.

Анвар жавоб бермади. Шаҳриёр бу сукунти розилик белгиси деб тушунди.

— Борасанми?

— Йўқ,— деди Анвар.— Акам билан бормоқчимиз ўзимиз.

— Ихтиёринг. Борсанг, бирга томоша қилиб келардик.

Анвар бошқа гапирмади. Энди гап ортиқча эканини Шаҳриёр сезди.

Маълум муддат жимлиқдан сўнг сўрининг икки тарафидан икки хил хуррак эшитилди...

— Шаҳриёр, ҳо, Шаҳриёр!

Бу овоздан Шаҳриёр ҳам, Анвар ҳам уйғониб кетди.

— Ким у?

Шаҳриёр атрофга аланглади. Ёнроқ тагида Голиб кўринди. У имлаб чақираарди.

— Голиб,— деди Шаҳриёр.

— Нима дейди? — Анвар кўзини ишқалаб сўради.

— Бақа келинглар, деб чақираяпти.

Улар Голибнинг олдига борища.

— Ҳа,— деди Шаҳриёр.

— Панқиллоқ ўйнаймиз.

Голиб шундай деб киссасидан монтикризснинг бўш гильзасини, гуттурт чиқарди. Уни кўриб Анвар билан Шаҳриёрнинг мудроғи қочди, кўзлари чарақлаб очилди.

- Гильзани қаердан олдинг?
- Топдим-да,— деди Голиб керилиб.
- Нечта? Биттами?
- Йўқ. Кўп.

Голиб беш-олтига гильзани кўрсатди.

Учови ёнгоқ соясига ўтириб, гильзага гутурт дорисини тўлдиришди. Кейин уни катта тошга қўйди-да, иккинчи тош билан урди. Тош ўрнига тушмади шекилли, гильза портламади. Анвар тошни олиб гильзани мўлжаллаб урди. У шундай қарсиллаб кетди, гўё милтиқ отилгандай бўлди.

Иккинчи гильзани ҳам дорига тўлдиришди. Яна уришди, яна боягидай қарсиллади. Учинчи гильзаниям тўлдириб, тош билан Шаҳриёр урди. Лекин гильза ёрилмади.

- Э, уришни биласанми ўзи. Менга бер.

Анвар шундай деб тошни роса кўтариб гильзанинг устига ташлади. У қарсиллаб кетди. Шу бараварида Анварнинг ўзиям «вой-й» деди-да, чап оёғининг сонини ушлади.

- Ҳа? Нима бўлди?

Шаҳриёр билан Голиб унинг оёғига қаради. Анвар шимини тиззасигача кўтарди. Болдирига гильза парчаси кириб кеттан эди.

- Энди нима бўлади?
- Дўхтирга бориш керак...
- Отам билсалар роса уришадилар,— деди Анвар.
- Гильзани мен опкеганимни айтма, жўра. — Фолибининг ранги бўздай оқариб кеттан эди.
- Шу ердан топиб олдик, деймиз.

Шаҳриёрнинг бу фикрини учовиям маъқуллади.

Кечқурун Анварни акаси район марказидаги касалхонага олиб кетди.

У ердан ярим оқшомда қайтишди, Анварнинг болдирини кесиб, икки соатча кавлапти. Лекин темир парчасини ололмапти. Ўз оёғи билан юриб борган Анвар чўлоқланиб қайтиб келди. Акасининг жаҳди чиқади, дўхтирларни роса сўқади. «Ҳаммаси саводсиз! Бари пул билан ўқиган, ҳеч балони билмайди. Ренгин қилган чол айтди, кестирма оёғини, ўзи чиқиб кетади, деди. Мен боргунимча кесиб, оёғининг гўштини титкилаб ўтиришипти-я, ярамаслар. Шуларни врач деб пул бериб ўтирганларгаям ҳайрон қоламан»...

Шу куни кечаси Анвар безовта бўлиб, инграб чиқди. Онаси дам-бадам уйғониб Анварнинг бошига қўлини қўйиб кўради. Иссиғи чиқмади, аммо оёғи шишиди. Пешинга бориб тоза дўмбира бўлиб кетди. Тушлиқдан сўнг Анвар акаси билан Самарқандга жўнади.

Қош қорайганда акаси ёлғиз қайтди. Анварни қалхонага ётқизипти. Врачлар «қайси аҳмоқ кесди бунақа қилиб? Нега тўғри шу ерга олиб келмадингиз», деб Анварнинг акасини роса уришипти. «Ҳеч кесишининг ҳожати йўқ эди. Ўзи чиқиб кетарди. Кесиши лозим бўлса, экран орқали кузатиб туриш керак. Бу ҳолда гўштнинг ичидан кичкина нарсани топиб бўладими. Қочиб кетаверади у», дебди. Кесилган жойи йиринглаб кетипти. Камида бир ой ётади, депти. Анвар қолмайман деб роса йигланти: Акаси алдаб-сулдаб қолдириб кепти. «Бўлмаса дўхтирларга айтинг, кесмасин оёғимни», депти.

Бундан Шаҳриёр тоза хафа бўлди. Акасининг тўйигача тузалиб кетармикан Анвар? Тошкентта униям бирга олиб бормоқчи эди. Ишқилиб соғайиб кетсин-да.

Бир ҳафталардан сўнг Шаҳриёр Анварнинг акасига қўшилиб жўрасини кўргани Самарқандга борди. Анвар иккинчи қаватда экан, ўзи пастга тушди. У чўлоқланиб юради. Икки жўра ҳол-аҳвол сўрашди. Шаҳриёр унинг олдида гуноҳкордай сезади ўзини.

Анварнинг акаси олиб келган овқатларини унинг палатасига қўйгани юқорига чиқиб кетди.

— Гильзани қаердан олганимизни ҳеч ким билмадими? — деб сўради Анвар.

— Йўқ,— деди Шаҳриёр.— Сен акантга айтмадингми?

— Айтганим йўқ.

— Қачон чиқсан?

— Билмайман. Яра битса жавоб берамиз, деялти. Ҳар куни дори қўйиб боғлади.

— Оғрийдими?

— Яраси оғриди.

— Акамни тўйигача чиқсанг яхши бўларди. Тошкентта бирга борар эдик,— деди Шаҳриёр.

Анвар индамади. Шундай ният унинг кўнглида ҳам бор эди. Лекин ҳозир, бу аҳволда бир нима дейиш қийин.

Анварнинг акаси тушгач, улар ўрнидан қўзғалдилар. Шаҳриёр Анвар иккинчи қаватнинг зинасига кўта-

рилгунча кузатиб турди. Юқорига чиққач, Анвар тўхтаб ортига — Шаҳриёрга қаради. Иккови бир-бирига қўлини кўтариб хайрлашди.

## ШАҲАРГА САЁҲАТ

Шаҳриёр онаси билан олдин ҳам бир-икки марта шаҳарга борган, аммо унда тўйиб томоша қилолмаган. Укасини гулгирга кўрсатгани келишганди. Гулгирни биринчи марта кўрганида Шаҳриёр ҳайратдан ёқа ушлади.

Кичкина укасининг мазаси бўлмай қолди. Овқат емайди, еганини қайт қиласди. Бурнини ишқаб йифлайди.

— Буни томоғида қопти,— деди Бўстон хола.— Гулгирга обормасак бўмайди.

...Кунлардан бир кун қишлоқда гап тарқалди: «Самарқандда гулгир чиқипти». «Гулгири нимаси экан?» «Болаларнинг томоғида нарса қолармиш, гулгир шуни олармиш». Ҳазилкашроқ одамлар «Болаларни томоғи токчали эканми, нарса қолса», дейишиди. «Сиз куласиз-да, ростданам шундаймиш. Бола кетма-кет қайт қилса, иссиги кўтарилиб овқат емаса, айниқса, бурнини ишқайверса, албатта томоғида қолган бўларкан».

Аввалига бирор ишонди, бирор ишонмади. Кейинчалик боланинг томоғига нарса қолиши ва уни гулгир олиб ташлаши мумкинлигига ҳамма бирдай имон келтирди. Ҳаш-паш дегунча нечта аёл боласини Самарқандга — гулгирга олиб бориб келди.

Озиб-тўзиб, шалпайиб қолган бола гулгирга бориб келиши билан ўйнаб кетади, овқатни ҳам қайтармайди. Кечаси тинчгина ухлайди.

Уч-тўрт йил олдин Шаҳриёр ҳам онасига ҳамроҳ бўлиб Самарқандга борди. Дарвозадан кириши билан эллик ёшлардаги бир аёл икки енгини билагигача шимарив, панжаларини ёзиб Бўстон холага рўпара келди. Гулгир аёл болани чап қўлига олди-да, ўнг қўлининг кўрсаткич бармогини унинг оғзига тиқди. Кўз очиб юмгунча қўлини боланинг оғзидан олиб, Бўстон холага кўрсаткич бармогининг биринчи бўғинида қисилган нарсани кўрсатди.

— Мана, айланай, болангизнинг томоғида қолган нарса. Олма пўчоғи экан. Анча кун бўпти қолганига. Сасий бошлапти.

Гулгир аёл шундай деб болани Бўстон холага узатди. Бўстон хола унга раҳмат айтиб бир сўм берди. Гулгир қўлини фотиҳага очди.

— Илоё-илоҳо худойим ўзи шифо берсин. Томогида қолгани шу бўлсин. Бундан бағига бу дард сиззи балангизни, у қатори ҳамма балаларди четлаб ўтсин. Оллоҳу акбар.

Бўстон хола билан Шаҳриёр ҳам унга қўшилиб фотиҳа қилди.

Шаҳарга бораётганда укаси онасининг қўлида шалпайиб ётвуди. Қайтища эса анча ўйнаб, автобус дे-разасидан ташқарини томоша қилиб келди.

Ўшанда Шаҳриёр гулгир аёлнинг чаққонлигига ҳайрон қолганди. Йўлда онасидан сўради.

— Нимага енгини шимариб панжаларини ёзиб келди, эна?

— Мана, қўлларимда ҳеч нарса йўқ, дегани у,— деб тушунтириди Бўстон хола. — Бир хил одамлар унга ишонмасмиш. Ўзининг қўлида нарса бўлади, шуни худди боланинг томогидан олиб бергандай кўрсатади. Шундай қилиб пул ишлайди, деярмиш.

— Боланинг томогидан ҳеч нарса олмаса у қандай қилиб тузалиб кетади?

— Шуни айтсанг-чи. Унинг устига бу аёлнинг дарди фақат пул ишлаш бўлса фалон сўм берасан, йўқса олмайман, деб туради-да. Қанча берса олаверади. Озкўп демайди, қарамайдиям, индамай раҳмат айтиб киссасига солиб қўяверади.

Шаҳриёр бу гапдан ажабланди. «Тавба, қизиқ одамлар бор-а. Яхшилик ҳам ёқмайди. Ўзлари боласини олиб боради, яна ўзлари ишонишмайди. Ишонмасант олиб борма. Ким мажбур қилаяпти сени...»

Шаҳарга бораётиб Шаҳриёрнинг хаёлидан шу гаплар кечди.

Автобус пастта эниб Дарғом кўпригидан ўтди-да, кучаниб тепага кўтарилди. «Яқинлашипмиз чоғи», деб ўйлади Шаҳриёр. Мингбулоқдан кедадиган автобус Регистон ёнидаги майдонда тўхтайди. Улар шу ерда тушишди.

Бердиқул бобо билан Бўстон хола аввал бозорга боришга келишишди. «Эрталаб яхши нарсалар бўлади, кейинроқ ҳеч нима қолмайди», деди Бўстон хола.

Бозорда игна ташласа ерга тушмайди. Фуж-фуж одам. Чошгоҳ бўлмасдан кун қизиб кетган. Сотарман кўп, сотармандан оларман кўп. Ҳамма ўзининг молини мақтайди: «Мана, нимчанинг яхшиси...»

«Кимга жун рўмол керак», «Амиркон махси бор». Бунга ўхшаган сўзларнинг қайси бирини эшитишни билмайди одам. Шаҳриёрнинг боши гувиллаб кетди бир зумда.

Бу ҳам етмагандай, атрофдан турли ҳид келади. Бир жойда қовурилган балиқнинг ҳиди, бошқа томонда кабоб тутаб ётипти, яна бир тарафда паловнинг иси димокни қитиқлади...

Бердикул бобо билан Бўстон хола бозорни секин оралаб келинга мос нарса қидиришади. Шаҳриёр уларнинг кетидан эргашади.

Бир жойда ўн-ўн беш чоғли одам уймалашиб ниманидир томоша қиласяпти. Шаҳриёр қизиқсиниб, одамларнинг орасидан ичкарироққа кириб борди. Мўйловли бир йигит стол устига учта ангишвонани тўнкариб қўйилти. Нўхатчалик келадиган зўлдирни шу ангишвоналардан бирининг тагига яширади. Сўнгра эпчилик билан учала ангишвонани стол устида у ёқдан-бу ёққа суради, тагига зўлдир бор ангишвона билан бошқаларини аралаштириб юборади. «Топсанг оласан, тополмасанг берасан. Қани, ким топади? Бу галгиси йигирма беш. Топсанг йигирма беш оласан. Қани, кимга йигирма беш керак»... Ана шу йўсун унинг оғзи гапдан, қўли ҳаракатдан тинмайди. Шу қадар тез сурадики, кўз илғамай қолади. Ангишвонанинг тагидан зўлдир чиқиб кетмаганини-чи!..

Қани ким топаркан, деб Шаҳриёр атрофдагиларга разм солди. Ҳеч кимдан садо чиқмади. Мўйловли йигит эса тинмайди. «Йигирма беш, кеп қолинг йигирма беш сўмга. Топсанг оласан...»

Шу маҳал бир йигит тўдани ёриб олдинга ўтди. Мўйловли йигитнинг ҳаракатларини кузатди.

— Неччи пул бу галгиси? — деди бояги йигит. Қиморвоз бошини кўтармай жавоб берди:

— Йигирма беш. Топсанг оласан...

— Тик! — деди йигит.

Қиморбоз ҳаракатини тўхтатди. Ангишвоналардан бирининг тагидан зўлдирни олди. Кейин иккинчисининг тагига кўйди-да, бояги йигитта юзланди:

— Кўрдингми? Бошлайверайми?

— Бошла! — деди ҳалиги йигит.

Қиморбоз бирдан ангишвоналарни у ёқдан-бу ёққа суреб, аралаштириб ташлади. Қизиги шундаки, унинг қўли ишга тушиши билан оғзи ҳам бидирлаб кетади:

— Топсанг оласан, топмасанг берасан. Йигирма беш!  
Топсанг оласан...

Бояги йигит қиморбознинг қўлига шаппа босди.

— Тўхта! — деди. — Мана шунда!.. У шундай деб бир ангишвона устига қўлини қўйди. Қиморбоз ана шу ангишвонани кўтарди. Зўлдир чинданам унинг тагида экан.

— Ҳалолинг бўлсин,— деди қиморбоз.— Ма, ол, деб битта йигирма бешталикни унга узатди.

Йигит пулни олиб мағруронга чўнтағига солди.

— Яна тикайми?— деди қиморбоз ҳалиги йигитга.

У жавоб бериб улгурмасидан берироқда — Шаҳриёрнинг ёнида турган дўппилик бир йигит бақирди.

— Тикинг! Мен топаман!.. Қиморбоз унга қаради.

— Неччи пулга? — деди.

Дўппилик йигитнинг йигирма бешга ҳаваси кетди шекилли, иккиланмай йигирма беш, деди. Қиморбоз бояги ишини яна тақрорлади.

— Кўрдингизми? Бошлайверайми?

— Бошланг! — деди дўппили йигит. Қиморбознинг оғзию қўллари яна ишга тушди.

— Топсанг оласан, топомасанг берасан! Йигирма беш! Йигирма беш! Топомасанг берасан!.. Дўппили йигит унинг қўлини босди.

— Тўхтанг. Мана шунда...

Қиморбоз у кўрсаттани ангишвонани шартта кўтарди. Тагида ҳеч нарса йўқ эди. Дўппилик йигит бўшшиб кетди.

— Қани, чўзинг йигирма бешни,— деди қиморбоз.

Атрофдагиларнинг ҳаммаси дўппиликка қаради. Бечора уялиб кетди чоги, юзлари қип-қизил рангта кирди. У индамай киссасидан йигирма беш сўм чиқариб берди.

Шахриёр унга жуда ачинди. «Жуда ғалати ўйин экан», деб ўйлади. Энди ким ўйнаркан, деган фикр билан томошабинларни бирма-бир кўздан кечирди. Ҳамма жим. Қиморбоз эса ўз иши билан банд. Оғзи-

ям, қўлиям тинмайди. «Топсанг оласан, топмасанг бе-расан»...

Ҳали йигирма беш ютган йигит уни тўхтатди.

— Тик яна.

— Қанчага? — деди қиморбоз.

— Эллик!

Атрофдагиларнинг ҳаммаси бараварига «во-о» деб юборди. Қиморбоз зўлдирни ангишвона остига қўйди. Йигитта қаради.

— Бошлайинми?

— Бошла!

Қиморбоз бошлади. «Эллик сўм! Тоғсанг оласан, эллик сўм!» У тинмай у ёқдан-бу ёққа суради. Томошибинлар қиморбоздан ҳам кўра бояги йигитни кузатади. Йигитнинг икки кўзи столда — зўлдир қайси ангишвонада экан, деб чамаларди.

Кутилмаганда қиморбознинг қўлини босди.

— Тўхта! Мана шуни кўтар!

Қиморбоз унинг айттанини қилди. Ангишвонани кўтариши билан томошибинлар «қойил» деб юборишиди.

— Чиқар элликни! — деди йигит. Қиморбоз унга эллик сўм узатди.

— Қойилман, йигит, омадинг бор экан,— деди. Ҳалиги йигит етмиш бешни киссасига урди-да, тўдан ташқарига чиқди. Ҳамма унга ҳавас билан қараб қолди.

— Молодец йигит экан.

— Қойил қилди аммо...

Томошибинлардан бири уларнинг фикрини рад этди.

— Ие, ҳамманг ёш бола экансизлар-ку. Шунга ишониб ўтирибсизларми. Ахир у ўзининг шериги-ку.

— Шериги бўлсаям тоғдими, ахир?

— Сизам топишингиз мумкин,— деди бояги киши.

Лекин ангишвоналар тагида ҳеч бало йўқ. У қўйган заҳоти зўлдирни қўлига олади ёки умуман қўймайди. Шунинг учун қайсини кўрсатманг, бўш чиқаверади. Одамларди қизиқтириш учун ўзининг шериклари баъзан боягидай «ютиб» туради.

Уларнинг гапига учинчи томошибин қўшилди.

— Ўлдими. Унчаликмасдир-ов!

— Ишонмасангиз ўзингиз биласиз. Ана ўйнаб кўринг. Қани, бир тийин ютасизми.

Томошабинлар ўзаро баҳслашиб кетдилар. Қиморбоз эса ҳамон бақиради: «Топсанг оласан, топмасанг берасан. Қайсинисини кўтаратай...»

Томошага қизиқиб ота-онасидан ажралиб қолиб кетгани Шахриёрнинг эсида йўқ. Бир маҳал ўзига келиб ён-верига қараса, на отаси, на онаси кўринади. Юраги орқасига тортиб кетди. Энди нима бўлади? Мана томоша сенга.

У нима қиласини билмай гангиб қолди. Қаёққа борсин? Қаердан қидирсин отасини? Чор тараф гуж-гуж одам. Бу ердан бировни топиш — қудуқдан игна излашдай гап. Қаерданам шунга кўзи тушиди... Қишлоққа қандай кетади? Мингбулоққа борадиган автобус қаерда тўхтайди. Баланд-баланд ёдгорликларнинг олдида тушувди. Шу эсида, аммо ўша жойгача нимада боради? Автобусга, кейин троллейбусга чиқишиди. Анча пиёда юришиди. Улар ёдида туриптими... Қизиқ бўлди-ку.

Хаёлидан шу ўйлар кечадио кўзи тўрут томонга жавдираиди. Салла ўраган одам кўринса отаммикан, деб суюнади. Бегоналигини билгач, хафсаласи пир бўлади. Энди қулогига қиморбознинг «Топсанг оласан, топмасанг берасан», деган бақириғи ҳам эшитилмайди.

Отаси билан онаси қайси томонга кетди экан. Бу ерда тўрут тараф қибла. Йўқ, ҳеч қаёққа бормайди. Шу ерда тургани тузук. Отаси излаб келса топиши осонроқ. Бордию бир томонга оралаб кетса, Бердиқул бобо ҳам сарсон бўлади.

Шахриёр қиморбознинг олдидан сал нарироққа — нисбатан одам камроқ жойга ўтди. Симёғочдай бир ерда қотиб тураверди. Кўзи эса интизор, одамлар оқими орасидан ота-онамни кўриб қоларман, деган илинжда атрофга термулади. Аммо ҳадеганда отаси келавермади.

Бердиқул бобо билан Бўстон хола анча илгарилаб кетишган эди. Улар гоҳ у савдогарнинг, гоҳ бу савдогарнинг қўлидаги нарсаларни кўриб, нархини сўраб, Шахриёр икковининг ҳам эсидан чиққан эди. Дўппи бозорига оралаганда Бўстон хола «Шахриёрга битта қалпоқ олиб берайлик», деди. Дўппифурушдан бир дўппини олди-да, «Шахриёр, манавини кийиб кўр», деб орқасига ўтирилди. Шахриёр кўринмади. Бирдан Бердиқул бобога юзланди: «Шахриёр қани?» Бўстон

холанинг ҳайрати, қўрқуви Бердиқул бобога ҳам кўчди. «Билмадим, орқамиздан келаётувди-ку». «Вой, ўлмасам, болагинам қаерда қолди». Бўстон холанинг юраги така-пуга бўлди. «Қаранг оқ-бақти». Бердиқул бобо ён атрофга разм солди — Шаҳриёр кўринмади. «Сен шу ердан қимирлама. Агар шу атрофда бўлса сени кўриб келади. Мен изизимиздан бориб қараб келай. Бояги қиморбознинг олдида қолдими дейман-да».

Бердиқул бобо одамлар оқимига кириб кетди. Олдинга интилиб бораяптию кўзи тўрт томонга олазарак боқади.

Тахмин қилишда Бердиқул бобо адашмаган эди. У қиморбозга яқинлашганда Шаҳриёрга кўзи тушди. Лекин Шаҳриёр отасини кўрмади. Бердиқул бобо четдан туриб ўғлини кузатди. Тўдасидан айрилган эчкидай атрофга аланглайди. Бердиқул бобо секин унинг ёнига борди. Шаҳриёр ҳамон отасини кўрмас, нигоҳи узоқча қадалган эди. Бердиқул бобо оҳиста ўғлининг тирсагидан ушлади. Шаҳриёр шартта ўтирилди. Унинг кўзлари хонасидан чиқиб кетгудай бўлиб ўйнарди.

— Ҳа,— деди Бердиқул бобо секин.

Шаҳриёрнинг тили калимага келмай қолди.

— Мунча аланглайсан.

— Сизларди йўқотиб қўйдим,— деди Шаҳриёр довдирааб.

— Шунчалик юрагинг бор экан, ҳушёрроқ юрмайсанми.

Шаҳриёр миқ этмади.

— Юр,— деди Бердиқул бобо.— Энангди ўтакасини ёрдинг. Шаҳриёрди йўқотиб қўйдик, бунча одамди ичидан энди қандай топамиз, деб додлаб ўтирипти... Яхшиям у ёқ-бу ёққа оралаб кетмапсан. Агар шундай қилганингда тополмаслигим аниқ эди.

— Шунинг учун қимирламай турдим-да, жойимда. Бердиқул бобо ўғлига ўтирилди, жилмайди.

— Ақлинг боракан... Боплабсан... Боқса одам бўласан.

Бердиқул бобонинг шунаقا одати бор. Биронтага ҳазиллашгиси келса «Боқса одам бўласан» ёки «Кепак берса кўплак бўласан», деб қўяди. Бу одати Шаҳриёрга ҳам аён. Шундан билдики, отаси уришмайди...

Пешингача бозор айланишди. Бердиқул бобо билан Бўстон хола келинга деб анча-мунча нарса харид қилди. Шахриёрга битта дўпли олиб беришди.

Тушдан кейин ҳайвонот боғига боришиди. Қаердан-дир кўчма ҳайвонот боғи келган экан. Бундан Шахриёр терисига сифмади. Йўлбарс, айик, арслон, фил, тuya — эҳ-е, яна қанча ҳайвонларни кўрди. Илгари ҳеч ҳам кўрмаган, фақат зоология дарсида бу ҳайвонлар ҳақида ўқиган, китобда расмини томоша қилганди, холос. Тирик айиқни, йўлбарсни кўриш ғалати экан. Айниқса, оқ айиқни роса томоша қилди. У сувга тушаверади, чиқаверади, тушаверади, чиқаверади... Эринмаганини, чарчамаганини... Маймунлар-чи, бирам ғалати экан. Шимпанзе, горилла, орангутанг деганлари бор экан. Шимпанзелар тиним билмайди. Шахриёр биттасига писта пўчоғи отувди, орқасини кўрсатиб масхара қилди.

Шахриёр жўраларига бориб роса мақтанади. Айик, шимпанзенинг қилиқларини гапириб беради. Бир уларнинг ичини қизитсин.

— Анварди бир кўриб келамизми? — деди Бердиқул бобо ҳайвонот боғидан чиқаётганда. — Шу ерга келиб кўрмай кетсан одамгарчиликдан бўлмас.

Шахриёрнинг кўнглида шу фикр бор эди. Лекин отасига айтишга ийманиб турганди. Вакт борми-йўқми, бозор-ўчардан ортадими-йўқми. Яхши бўлди, Бердиқул бобонинг ўзи эслатиб қолди...

Касалхона ҳовлисидағи ўриндиқда Анвар билан анча гаплашиб ўтиришди. Бердиқул бобо ундан соғлигини, яраси тузалган-тузалмаганини сўради.

— Ҳа, болаларим-а, ҳеч шўхликларинг қолмади-қолмади-да, — деди Бўстон хола Анварнинг юзидан ўпиб. — Шу монтиклисти ўқи ўлгур ёнроқти тагига қайдан бориб қопти. Шуннан бўлак ўйин тополмади-ларингми. Мана энди шунча азоб. Кунди иссиғида касалхонада ётипсан. Ичингам қизиб кетгандир.

— Анча ўрганиб қолдим. Палатадагилар билан гурунглашиб ётамиз.

Шахриёр унинг тезроқ чиқишини истайди. Тошкентта бирга борсак, зўр бўларди.

— Лекин ҳали-вери жавоб берадиганга ўхшамайди, — деди Анвар. — Яра тоза битмаган. Йиринг йўғу

қизғиши сув чиқади. Кўзи битса жавоб берамиз, деяпти дўйхтир.

— Ҳа, майли, сабр қил. Шошилма. Тоза яхшилаб тузалсин. Бўлмаса кейинам қийналиб юрасан.— Бердиқул бобо шундай деб ўрнидан турди.— Энди бизлар борайлик. Автобусдан қолиб кетмайлик.

Кечга томон улар Регистонга келдилар. Мингбулоқда борадиган автобус бекатида одам кўп, автобусдан эса дәрак йўқ. Ҳамма бозор-ўчар қилиб қайтган.

Ана-мана дегунча бир соатлар чамаси вақт ўтди: бир маҳал пешонасига «Самарқанд-Мингбулоқ» деб ёзилган автобус пайдо бўлди. Ҳамма гувиллаб ўзини унга урди. Тиқилинч, ур-сур бўлдики... Қани энди чиқиб бўлса. Автобус ҳайдовчиси, билет олинглар, деб бақиради. Аммо унга ким қулоқ солади. Ҳар ким жой олиш дардида эди.

Улар ҳам минг азобда чиқиб олишди. Автобус гижифиж бўлди. Қани энди юра қолса. Ҳайдовчи пастта тушиб кеттани бўйича бедарак йўқолди. Ўзи ҳаво исстик, унинг устига тиқилинч, нафас олишнинг иложи йўқ. Бир бола чинқириб йиглайди. «Ҳой, шопир, ҳайданг!» деб бақиради одамлар. Лекин ҳайдовчи парво қилмайди.

Шу аҳволда ярим соатлар турди. Ҳамма ҳаммомга тушгандай жиққа сувга ботди.

Ниҳоят, ҳайдовчи келди.

— Фақат Мингбулоқда борадиганлар қолсин. Йўлда тўхтамайман, — деди у қабина деразасидан мўралаб.

Ичкарида одамлар бараварига қичқиришди:

— Ҳамма охиригача боради.

— Йўлда тушадиган йўқ...

— Тезроқ ҳайданг-эй, шопир ака, одамни нафаси қайтиб кетди.

Автобус оғир силкиниб, жойидан жилди...

Бир неча кун Шаҳриёрга эрмак топилди. Қаердаки икки-уч бола йифилса, уларга шаҳарга боргани ҳақида ҳикоя қиласи. Кечқурун подага борганда-ку, ҳамма болалар уни ўраб олади. Шаҳриёр ҳам йўқ демайди.

Ангишвоначи қиморбоз Юсуфга жуда ёқиб қолди. «Аммо-лекин зўр экан-да, шу», деб қўяди ҳар замон. «Шаҳарга борсам албатта шуни топаман».

Шаҳарда кўрганларини жўраларига сўзлаб бериш Шаҳриёрнинг ўзи учун ҳам завқли эди. Уларга ҳи-

коя қилар экан, ўзи ҳам ўша нарсаларни бошқатдан кўраётгандай ҳаяжонланади. Фолиб, Аҳмад, Ақбар, Шарофат — ҳаммаси оғзини очиб тинглайди унинг ҳикоясини.

— Энг қизиги,— деди Шаҳриёр ҳовлиқиб,— ажойибхона<sup>5</sup>. Ҳамма ҳайвонларди қафасга солиб қўйипти. Шерни кўрсанг, во-о, бўйнидаги жунини.

— Одамларга индамайдими? — деб сўради Шарофат.

Шаҳриёр уни масхара қилди.

— Эсинг жойидами. Қандай қилиб индайди. Қафасга солинган дедим-ку! Темирлари билакдай-билакдай. Шер одамлар ўзига қараётганини сезмайдиям, парвосига келтирмайдиям.

— Қафасда ўтиравериб ўрганиб қолган-да бечора,— деди Аҳмад. — Отам айтувдилар, ҳайвонлар қафасда ётаверса бепарво бўлиб қолармиш.

— Бўлмасам-чи,— деб унинг гапини маъқуллади Шаҳриёр.— Ўзим кўрдим-ку! На шер, на йўлбарс одамларга қаролмайди. Ўзи билан ўзи овора. Фақат маймун жикиллаб, у ёқдан-бу ёққа сакрайди, одамларни калака қиласди.

Бу гап болаларни қизиқтириб қўйди.

— Қандай калака қиласди?

— Гапирадими?

— Гапга тушунадими?

Бири қўйиб, иккинчисн савол беради. Шаҳриёр гўё ҳайвонот борининг раҳбаридаи уларга тушунтиради.

— Шошилманглар, бунча ҳовлиқасизлар. Болалар маймунларга писта ташлайди. Улар пистани олиб чакади. Бир хил болалар жўрттага чақилган пистани отади. Маймун олиб кўради-ю, жони чиқиб кетади. Кейин орқасини кўрсатиб болаларни калака қиласди.

— Сенам ташламадингми писта пўчоғидан?

Шаҳриёр кулди. Шимпанзе ўзини масхара қилгани эсига тушди.

— Ташладим,— деди ўзини кулгидан тўхтатиб.

Кейин шимпанзега писта пўчоғини отганини, маймун уни эркалаганини, орқасини хунук қилиб кўрсатганини — ҳаммасини бирма-бир эринмай гапириб берди. Болалар мириқиб кулишди.

<sup>5</sup> Ҳайвонот бори демоқчи.

Шундан кейин Шаҳриёр қаерга борса болалар йиғилиб келади-да, шимпанзе сени қалака қилганини кўрсатиб бер, деб туриб олишади. Аввалига у эринмай гапирди, маймуннинг ҳаракатлариниям кўрсатиб берди. Охири жонига тегди. Бир нарсани ҳадеб айтавериш, ҳар қанча қизиқ бўлмасин, одамнинг кўнглига урар экан. Шаҳриёр ҳам гапиравериб зериқди.

— Бўлди-да, эй, нима мен артистманми сенларга!

— Ҳа, нима қипти гапирсанг. Бирон жойинг камайиб қоладими,— дейди унга болалар.

Хушига тобласа шошилмай, қизиқ қилиб гапириб беради, йўқса айтмайди...

Июль охирлаб қолди. Тўйи яқинлашмоқда. Шаҳриёр Тошкентта боришни ўйлади. Ҳадемай бешинчи август келади. Қандоқ маза! У Тошкентта — пойтактта боради...

## ТОШКЕНТ ТАРАДДУДИ

Шаҳриёр қўйларини боғдан ҳайдаб келиб қўрага қамаганда Бердиқул бобо шом номозини ўқиётган эди. У қўйлари олдига озгина ўт ташлади-да, Олапарнинг олдига ўтди. Олапар тумшугини икки оёғи устига қўйиб Шаҳриёрга термулиб ётарди.

— Ҳа, Олапар,— деди Шаҳриёр худди жўрасига гапиргандай.— Битта ўзинг ётавериб зериқдингми? Ёввойи пишак кемаяптими?

Шаҳриёр яқинлашгач, Олапар жойидан туриб думини ликиллатди, бошини силкиб пашшасини ҳайдади. Кейин сув ичадиган идишини Шаҳриёрга томон сурди. Шаҳриёр сездики, Олапар чанқаган. Идиши қуп-куруқ.

— Ҳа, жонивор, сувсадингми? Ҳеч ким сув бермайдими сенга. Ҳозир сув опкеламан. Ёки ўзингни дарёга олиб борайми?. Бир ўйнаб келасанми? Яхшиси, занжирингни ечаман. Ўзинг бориб сув ич, бирпас ўйна. Хўпми?

У Олапарга гапира-гапира занжирини еча бошлади.

Намоз ўқиб бўлган Бердиқул бобо Шаҳриёрни қидирди:

— Шаҳриёр, ҳо, Шаҳриёр!..

Отасининг товушини эшишиб Шаҳриёр айвон томонга ўтирилди.

— Ҳа, ота,— деди турган жойидан.

— Қайдасан, улим, бақа ке!

— Олапарди ечяпман...

Бердиқул бобо унинг гапини бўлди:

— Олапарди ечаяпман?! Нимага?!

— Сувсаб кетипти. Қўйворай, дарёдан бориб сув ичади, бирпас оёғини ёзиб келади.

— Ечма, улим, бақа ке. Сувсаган бўса идишига сув сол,— деди Бердиқул бобо.

Шахриёр Олапарни қучоқлаганча отасига ялинди.— Қўйворақалай, ота. Ичи қизиб кетипти ётавериб...

— Сенга айтдимми?! Олапарга сув бергин-да, бориб тоғангни, амакингни, поччаларингни чақириб ке. Маслаҳатлашадиган гап бор. Бўлақол тезроқ.

Отасининг бу гапидан сўнг унинг хаёлига лоп этиб Тошкент, акасининг тўйи келди. Маслаҳатлашадиган гап бор, деяптими, демак, тўй масаласи бўлса керак. Отам унча-мунча нарсани бирор билан кенгашиб ўтирамайди.

— Ана, эшитдинг-ку Олапар,— деди у ўрнидан тураркан.— Сени қўйиб юборишга ружсат йўқ. Ҳозир сув опкеламан. Майли, хафа бўлма, эртага ечаман. — Олапарнинг юзларини, елкасини силаб қўйди. Олапар индамай жойига чўзилди...

...Шахриёр янгишмади. Бердиқул бобо яқинлари-ни чорлашидан мақсад — Тошкентта бориб Пирим-қулнинг тўйини ўтказиб келишни кенгашиб олиш эди. Тошкентта неча киши боради, кимлар боради, нималар олиб бориш керак. Ҳар ким ўз фикрини айтди. Бирининг гапи бошқасига тўғри келмайди, тортишиб қолишади. Шахриёр бир чеккада ким гапирса шунинг оғзига термулиб ўтирипти. У бир нарсага ҳайрон: тоғаси, амакиси, поччалари гапирайти, ундан қилиш керак, бундай қилиш керак, у нарса олган тузук, бунақа нарса олган маъқул, деб жон куйдирайти. Аммо нимагадир отаси жим. Тўрда ёстиқقا ёнбошлаганча соқолини силаб гапларга қулоқ солиб индамай ўтирипти.

Баҳс-мунозаралар анча давом этди. Охири гап айланиб, Тошкентта нимада борамиз, деган масалага келиб тўхтади. Бири самолётда деса, бошқаси поездда, дейди. Яна маъқули автобус, деб туриб олди.

— Шошманглар,— деди нимоят Бердиқул бобо. Ёстиқдан тирсагини күтариб чордана қуриб ўтири. Ҳамма жим бўлиб унга қаради. — Биринг самолёт дейсан, поезд, бошқанг автобус дейсан. Хўш, Тошкентта нима учун бораяпмиз ўзи? Томошагами? Ёки меҳмондорчиликками?

Орага ноқулай жимлик чўқди. Бердиқул бобо гапим кимга қандай таъсир этди дегандай ҳаммага бир-бир синчковлик билан разм солиб чиқди.

— Ахир биз Тошкентта тўй қилгани кетаяпмиз-ку. Тўйди нарсаларини самолётда, поездда қандай қилиб олиб борамиз?

Амакиси луқма ташлади:

— Нарсаларни шу ердан олиб борамизми? Тошкентдай шаҳарда нарса топилмайдими? Ўшақдан оламиз-да.

Бердиқул бобо маънодор йўталди. Яна ўтирганларни бирма-бир кўздан кечирди. Бу қараш билан ким қандай фикрда эканини билиб олмоқчи.

— Хўш, Тошкентда ҳамма нарса бор, дейлик,— деди сўнгра салмоқлаб. — Лекин келин-куёвди, қудаларди сарпоси-чи? Улардиям шаҳардан оламизми?! Ҳаммаси олинган-ку. Янганг улимга деб, неччи йилдан бери латта-путта йифади... Кўйлар-чи. Улардиям самолотга соламизми? — Даврада кулги қўзғалди. — Ёш болага ўхшаб гапирасизлар-а. Тошкентдай жойга келин олгани боргандан сўнг Самарқанд нўхатидан, шўрданагидан, майизидан, нонидан об борайлар-да.

— Нон қотиб қолади-ку,— деди тоғаси.

— Қотмайди. Бир кун-икки кунда қотмайди. Жа, қотгандаям зарари йўқ, дастурхонди безаги. — Бердиқул бобо сўзида қаттиқ турди. — Ундан ташқари, шунча одам — аёллару бола-бақра билан самолот ёки поездда юриш осонми...

Ўтирганлар бўлмаса нима қилайлик, деган мазмунда Бердиқул бобога қарашди. Бердиқул бобонинг жавоби тайин эди шекилли, пинагини бузмади. Ўртанча қуёвига қаради. У колхозда бош ҳисобчи бўлиб ишлайди.

— Жўракул, сен колхозни катталаридансан. Биронта автобус топиш қўлингдан келадими-йўқми?

Жўрақул ҳайрат бармогини тишлади. Қайната-сининг бу кутилмаган саволига жавоб бериш осон эмасди.

— Колхозда автобус йўқ-ку,— деди ниҳоят.

Бердиқул бобо бўш келмади:

— Колхозда бўлмаса районда бордир. Райондаям ошна— оғайниларинг кўп-ку. — Бошқаларга қаради.

— Битта автобус топиб обориб-опкелишини гаплашмасак иш битмайди. Йўлди мосинига ишониш қийин.

Ҳамма бир зум жим қолди. Жўрақул ҳисобчи қаттиқ ўйга толди. Шахриёрнинг амакиси Жўрақул поччасининг ёнига кирди.

— Райондан бирон автобус гаплашсак... Фалон сўм сўрайди-да.

Бердиқул бобо унга ер остидан қаради:

— Самолотда борсак арzon тушадими? Ҳисоблаб кўринглар... Ҳамма нарсани шу ерда ортиб, аёлу эркак, бола-бақра чиқиб боргани яхшими ёки бу ердан шаҳарга бор, шаҳардан истансага бор, поезгами, автобусгами чек қидир, деб сарсони ачиб юрган яхшими? Ё сал қиммат бўлар, ё арzon бўлар — беминнат-да, ташвиши, оворагарчилиги оз...

Бу фикр ҳаммага маъқул келди.

Тошкентта кимлар боради, ким нима иш билан шугулланади, бари келишиб олинди.

— Болаларим,— деди Бердиқул бобо мажлисга якун ясаган сингари,— ҳаммангдан илтимос, ҳушёр бўлинглар, бир-бирларингга гап қайтарманглар. Ҳамжиҳат бўлиб ўтказинглар тўйни. Бегона жойда уялиб қолмайлик. Қишлоғимизда бўлса уни йўриғи бўлак. — Ота томогини қоқиб олди. Бир зум ниманидир ўйлагандек сукут сақлади. — Кўнгилларингга келмасину яна бир нарсани эслатиб қўймоқчиман. Токи тўйни омон-эсон ўтказиб олмагунимизча биттангам бирон пиёла ичманглар. Нотаниш одамларнинг орасида шармандамиз чиқмасин. Худо хоҳласа ўёқда тўйни ўтказиб олганимиздан кейин бу ерда тўй қиламиз. Қишлоқка ош бермасак ярашмайди.

Қишлоқ аҳли Бердиқул бобонинг гапини икки қилмайди. Ота қишлоқнинг оғзи катта оқсоқолларидан. Қариндошлари ўёқда турсин, бегоналар ҳам бирон юмушни ҳал қилолмай боши қотса, отанинг олдига

маслаҳат сўраб келади. Бердиқул бобо уларга эринмай йўл-йўриқ кўрсатади.

— Қачон жўнаш керак Тошкентта? — деди Шаҳриёрнинг тораси.

Ҳамма отанинг оғзини пойлади.

— Бешинчида тўй,— салмоқдаб гап бошлади ота.— Иккинчида етиб борсакми, деб мўлжал қиляпман. Икки кун у ёқдан зарур нарсалар харид қилинади. Ҳали анча иш бор-да. Ун олиш керак, гуруч, сабзи-пиёз дегандай, қанд-курс — хуллас, анча нарса. Аёлларди ўзига яраша дард-ташвишлари бор... Янаям сенлар биласанлар.

Бердиқул бобо ўтирганларга қаради. Ҳеч кимдан садо чиқмади.

— Менимча, шу гап тузук, — деди Шаҳриёрнинг тоғаси.— Шошиб қолгандан кўра, бемалол, керакли нарсаларни кўриб-билиб тузукроғини олган маъқулда!

Фикрлар тиниб, маслаҳат пишгач, ҳамма уй-уйига тарқалди. Шаҳриёр бир чеккада ўтириб ҳамма гапни миясига қўйиб олди. Тошкентта борадиган кун яқинлашганидан унинг севинчи ичига сифмайди.

## ТЎЙ

Пиримқул Дўмбирободда Расул ака деган одамницида ижарада туради. Бу ҳовлига кўчиб келганига икки йилдан ошди.

Расул ака жуда очиқкўнгил, одамохун киши. Хотини Маҳфуза ая ҳам меҳрибончиликда эридан қолишмайди.

Шу икки йил ичида Пиримқулнинг олдига кимлар келмади. Бирга ўқийдиган ўртоқлари-ку, кунда-шунда. Қишлоқдан биронта одам Тошкентта келса, бас. Пиримқулни излаб топади. Ўз уйидай бемалол кириб келаверишади. Баъзан уй эгалари қолиб Пиримқул безор бўлиб кетади, Расул ака билан Маҳфуза аянинг олдида хижолат тортади. Бу ҳақда Пиримқул биринки Расул акага шама қилди. Расул ака уни қайриб ташлади.

— Ундей деманг, акаси. Одам бор жойга одам келади. Ундан кейин ҳамманинг олдигаям бирор кела-вермайди. Ойлаб меҳмон қадам босмайдиган хонадондан худо асрасин.

Пиримқул олдин ҳам икки-уч жойда ижарада турган. Уларда олти ойдан зиёд яшолмаган. Бир хонадонда ҳатто бир ой ҳам туролмади. Кирсаям гапиради, чиқсаям. Бирор сўраб келса-ку, тамом — балога қолади.

Шулардан кейин Расул аканикода яшаш Пиримқулга жаннат бўлиб кўринди. Бердиқул бобо билан Бўстон хола ҳам уч-тўрт келиб кетишиди. Уй эгалари уларни ўз қариндошлари сингари кутиб олишади.

Расул аканинг саккизта боласи бор. Яшави ҳам ўртача. Шунга қарамай, баъзиларга ўхшаб ўнталаб ижарачи қўймайди. Бўлмаса имконияти бор: иккита бўш хонаси турибди. Кўнглига ўтирган, мўмин-қобил болалардан ёки қизлардан битта-иккита қўяди. Фалон сўм берасан демайди, берганинг болам, дейди.

Пиримқул шуларни ҳисобга олиб, иложи борича Расул ака билан Маҳфузга аянинг кўнглига қарайди. Ўғиллари билан ака-уқадай қадрдонлашиб кетди...

Автобус Расул аканинг дарвозасида тўхтади. Ундан ўн беш— йигирма чоғли одам тушди. Расул ака билан Маҳфузга ая уларни дарвозада кутиб олди.

— Мана, бир мошин бўлиб тўзишиб келдик, жўра,— деди Бердиқул бобо Расул ака билан сўрашаркан.

Бердиқул бобо Расул акадан ўн ёшлар катта. Расул ака Бердиқул бобони ота дейди, Бердиқул бобо эса уни Расул деб чақиришни ўзига эп кўрмай, жўра, дейди.

— Жуда яхши қипсиз-да, ота. Ишқилиб тўй бўлсин, ҳамманиям шундай кунларга етказсин.

Юкларни туширишиди, қўйларни ҳовлига олиб кириб бойлашди. Расул ака кичкина ўғлига, қўйларнинг олдига озроқ ўт ташла, деди. Расул аканинг ўзидаям беш-олитга қўй бўлиб, болалари ҳар кун Бўрижар томондан ўт ўриб келишади.

Меҳмонлар икки кун шу ерда турдилар. Эртадан кечгача шаҳар кезиб, тўй ҳаражати ҳозирлашди.

Шаҳриёр уларга эргашади. Гоҳ бозорга, гоҳ магазинга боришади. У тўрт томонга аланглаб термулади. Қарасанг дўппинг тушиб кетадиган даражада баланд бинолар, шовуллаб ётган фавворалар Шаҳриёрни ҳайратта солади. Кўчаларда бирам одам кўп, бирам кўп, юриш қийин. Машиналар-чи, кети узилмайди. Кўчанинг нариги томонига ўтиш осон эмас. Ҳамма жойдан

ўтавериш мумкин эмас экан. Маълум жойлардан, ун-даям кўк чироқ ёнгандада ўтиш керак экан.

Метрога тушишганда Шаҳриёрнинг оғзи очилиб қолди. Пул ташламаса ўтказмай ушлаб қолар экан. Э, тавба, жуда қизиқ-ку. Поездчаларнинг зўрлигини. Станциялар бирам чиройли, бирам чиройли. Эртакларда тасвирланган шоҳларнинг қасрига ўхшайди.

Шаҳриёр ҳанг-манг бўлиб термулади. Роса ажойиб экан-да. Қишлоққа қайтиб борса жўраларига айтиб беради. Анварнинг келмагани чатоқ бўлди-да. Маза қилиб кетарди. Бечора касалхонада ичи қизиб ётгандир...

Икки кунда Тошкентнинг кўп жойларини томоша қилди. Тошкент Шаҳриёр ййлаганидан кўра каттароқ туюлди. Акаси турадиган ҳовлидан шаҳарнинг марказига келгунча қанча вақт ўтади. Бунча вақтда қишлоғидан Самарқандга келиши мумкин.

Катта бўлса нима, яхши-да! Шаҳриёр маза қиласяпти. Ҳеч зерикмайди. Қайтанга тез кеч бўлиб қиласяпти. Ана-мана дегунча кун ботади. Нега унақа? Қишлоғида кеч бўлишини пойлаб зерикарди.

Одамлар тез-тез юрар экан. Кун кеч бўлмасдан ишларимни битказиб олай деса керак-да. Ҳаш-паш дегунча икки кун ўтди-кетди. Келинни Расул аканикига тушириб келадиган бўлишиди. Битта уйини бўшатиб берипти. Энасининг айтишича, Пиримқул олдиндан келишиб қўйган экан. Тўй ресторанда ўтадиган бўлди. Расул aka шу ерда — ҳовлида қилаверайлик, деди, Пиримқул кўнмади, ҳовли тор, меҳмонлар сифмайди. Сизларни шунча безовта қилганимизам етар, деди.

Вақт намозгарга яқинлашганда учта енгил машина, бир автобус бўлиб куёв жўралар келинникига жўна-дилар. Уларнинг олдида усти очиқ «Виллис»да карнай-сурнайчилар. «Виллис» духобалар билан чиройли қилиб безатилган. Сурнай ногоранинг така-тум, така-тумига жўр бўлиб ёр-ёрни чалади. Автобусдаги йигитлар дамбадам овозининг борича қичқиришади. Уларга қўшилиб бақириб юборганини Шаҳриёрнинг ўзиям сезмай қолади.

Келиннинг уйига яқинлашганда автобусдан тушиши. Пиримқулни йигитлар ўраб олган. Олдинда карнай-сурнай, ногора: ва-ву, ва-ву, така-тум, така-тум.

Орқада йигитлар, бири қўйиб иккинчиси рақсга тушади, ҳар замонда «ча-ча-ча-ча» деб бақиришади.

Ана шундай ўйин-кулги, мусиқа билан келиннига кириб бордилар.

Расм-руsumлар битгач, куёв-келин оқ «Волга»га киришди. Келиннинг ёнида дугонаси, куёвнинг ёнида жўраси. Қолган иккита енгил машина ҳам қизлар, жувонлар билан тўлди. Бошқалар автобусга чиқдилар. Яна ўша қийқириқ, мусиқа, ёр-ёр билан ресторанга йўл оддилар.

Буларнинг ҳаммаси Шаҳриёрга жуда қизиқ кўринди. «Бу ерда одатлар бошқача экан, деб ўйлади у. Ёр-ёрни аёллар айтаркан, бизда эркаклар айтади-ку». Қишлоқдаги тўйларда айтиладиган ёр-ёр эсига тушди. Аввал бир киши бошлайди: Томда товуқ ётади...Ҳамма бараварига ёр-ёр, ёрон-ей, дейди. Кейин бошловчи давом этади: оёғи шамдай қотади, ёр-ёр, ёрон-ей... Шу замоннинг қизлари ёр-ёр, ёрон-ей, нархини ошириб сотади-ё ёр-ёр, ёрон-ей...

Қуёш ботганда ресторанга етиб келишди.

Ресторан дегани ажойиб экан. Узун столлар қўйилган, оппоқ дастурхонлар солинган. Катта-кичик шишалар, турли ноз-неъматлар терилган. Ресторан деганида девор йўққа ўхшайди, ҳамма тарафи ойнаванд. Шаҳриёр тоза таажжубланди. Фалати экан-ку.

Тўйни Эркин Комилов деган артист бошқарди. Пиримқул у билан ака-уқадай қадрдон экан. Шаҳриёр Эркин Комиловни телевизорда кўп кўрган. Бугун унинг ўзи билан қўл бериб кўришди. Кимdir Шаҳриёрни кўрсатиб «Бу Пиримқулнинг укаси», деди. Эркин Комилов «Шундайми? Қани кўришайлик-чи, полвон йигит», деб Шаҳриёр билан қўл олишди.

У тўйни шундай қизитди, шундай қизитди. Гапга тоза бало экан. Ҳамманинг ичагини узди.

Шаҳриёр жўраларининг олдида роса мақтанадиган бўлди-да. Эркин Комиловни кўрдим, у билан қўл бериб кўришдим, деса улар ишонармикан? Ишонмаса ўзидан кўрсин.

Яна қанча ашулачилар келишди. Навбатма-навбат қўшиқ айтишди, қизлар ўйинга тушишди. Ҳаммаси Пиримқулнинг ошналари экан. Артистликкаям акаси ўқиган институтда ўқишаркан-да!

Келин-куёвнинг ўртоқлари уларни тўйи билан табриклишди. Охирида ҳамма ўйинга тушди. Роза зўр бўлди ўзиям. Шаҳриёр маза қилди.

Эртаси куни тушдан кейин улар автобусга ўтириб Самарқандга жўнадилар. Бўстон хола, яна икки-уч аёл қолди, холос. Шаҳриёр ҳам қолмоқчи эди, отаси рози бўлмади.

— Иш кўп улим, шунча кун томоша қилдинг. Бундан бўён тез-тез келаверасан акангдикига. Бир ҳафта-үн кунлардан сўнг қишлоқда тўй қиласиз. Тайёргарлик кўриш лозим,— деди Бердиқул бобо.

Шаҳриёр индамади, хўп деб автобусга чиқди...

Улар қишлоққа кириб келишганида вақт хуфтонга яқинлашган эди.

## ТОҒА ҲИКОЯСИ

Оқшом ҳамма қариндошлар-уруглар Шаҳриёрлар-никига йиғилишди. Гап мавзуи — тўй: қандай ўтди, нима бўлди? Аёллар келинни сўрашади; қанақа экан, озғинми-семизми, дарозми-паканами, сариқми-қорами, сочи узумни ё қирқилганми? Бунга ўхшаш саволларнинг охири йўқ.

Гап айланиб яна қишлоққа кўчди. Бердиқул бобо Шаҳриёрнинг тоғасига қаради.

— Сиз қийналмадингизми ишқилиб. Бутун молҳол сизга қолиб кетувди.

Тоға кулди. Сўнгра ҳайрат ила гапга тушди.

— Қийналмадим, — деди у. — Лекин Олапарга қойил қолдим. Ўтирганлар унинг оғзига термулди. — Мен ўзим Олапардан қўрқаман. Бойланган бўлсаям яқинидан ўтишга юрагим дов бермасди. Кеттнларингизда мени ташвишга солган нарса шу эди: Олапарга қандай қилиб овқат бераман, деб ўйловдим.

Ўша куни кечқурун Олапарга овқат олиб келдим. Узоқдан туриб: «Олапар, мен сенга овқат олиб келдим. Нарироқ тур, овқатингни солай. Бўлмаса сендан қўрқаман», дедим. Ишонасизми, то занжири етган жойгача орқасига тисарилди. Қўрқа-писа овқатни идишига солдим. Сал узоқлашдим-да, унга қарадим. Олапар ҳамон бояги жойида. Ке энди овқатингни ичавер, дедим. Шундан кейин овқатга яқинлашди.

Бу гапни эшитиб айримлар кулди: «Лофниям ола-  
сиз-да».

— Ие, — деди тоға,— ҳали ишонмаяпсизларми. Бу  
нима бўпти. Энг қизигини эшитинг.

Шу куни хўп овқат ичипти. Эртаси куни эрталаб  
яна овқат олиб келиб, боягида, дедим. У яна четта  
ўтиб турди. Овқатни қўйдим. Пешинда келсам, овқа-  
тини ичмаган. Қорни очса ичар, деб индамай яна ов-  
қат солиб кетавердим. Кечқурун келдим. Қарасам, яна  
ичмаган. Бир чеккада буқчайиб ётибди. Ҳар доим кел-  
ганимда думини ликиллатиб турарди. Бу сафар менга  
қарамадиям. Ҳайрон қолдим.

Касал бўптими нима бало деб ўйладим. Эски ов-  
қатларни тўкиб ташладим-да, янгисини қўйдим.

Эрталаб келсам яна ичмаган. Қисқаси, икки кун  
мутлақо овқат емади. Бундай қарасам, тумшуғини икки  
оёғи устига қўйиб жим ётиптию кўзларидан жимири-  
лаб ёш оқаяпти. Жуда ажабландим. Нима бўлди экан  
бунга, деб ўйлаб ўйимга етолмайман. Тилизабони  
бўлмаса жониворди бир нарса деса.

«Балки уйда ҳеч ким йўқлигига хафа бўлаёттан-  
дир», деган ўй миямга келди. «Олапар, — дедим, —  
эгаларинг тўйга кетган, хафа бўлма, эрта-индин кеп  
қолишади. Ол, овқатингни ич». Шундай деб овқатини  
янгиладим. Зардолининг тагига бордим-да, бирпас қараб  
ўтиредим. У аста ўрнидан турди, овқаттага яқин келди.  
Шу ердалигимни билиб менга қаради. «Ол, ичавер,  
булар тўйга кетишган, рост айтяпман. Шунинг учун  
мен овқат опкелаяпман сенга», дедим яна. Шундан  
кейин у овқатини ича бошлади.

Бугун эрталаб борсам идишини тозалаб қўйипти.  
Ўзиям думини ликиллатиб турипти. Овқат қўйдим-да,  
«Ол, ич, эгаларинг бугун оқшом келишади» дедим.

Мен унинг ақдига қойил қолдим.

Тоғанинг ҳикояси кўпчиликни ҳайратта солди. «На-  
ҳотки шу рост бўлса?» дейишиди айрим ишонмаганлар.  
Бошқалар «Рост, ишонса бўлади. Олапар жудаям ақл-  
ли ит», деб тоғанинг гапини тасдиқлашди.

Шаҳриёр тоғасининг ҳикоясини тингларкан, Ола-  
пардан хурсанд бўлиб ўтиреди. «Қандай ажойиб кучу-  
гимиз бор», деб ғуурланиб қўйди ўзича.

## КЕЛИН КЕЛДИ

Бердиқул бобо айтганини қилди. Тошкентдаги тўйдан ўн кун кейин қишлоқقا тўй берди. Шаҳриёрларнинг уйига одам тўлиб кетди. Тошкентлик келинни кўрамиз, деб яқин атрофдаги хотин-халаж оқиб кела-верди. Шаҳарлик келиннинг шохи бораканми, билмайман...

...Тўй тарқади. Меҳмонлар ҳам. Қудаларни Пиримқул Самарқандгача кузатиб қўйди.

Эртаси куни эрталаб шаҳарлик келин эрта туриб ҳовлига сув сепиб, супура бошлиди. Бўстон хола «Кўйинг, болам, ўзим супураман. Сиз ҳали меҳмонсиз», деди. Келин «қўл-оёқлигина» экан, қайнонаси-нинг гапига кўнмади.

Ниманидир кўрдими, Олапар бирдан зарб билан вовуллади. Келин итни ечиқ деб ўйлади шекилли, додлаб юборди. Бўстон хола югуриб келди: «Кўрқманг, келин, кўрқманг. Олапар бойланган. У сизга индамайди... Билади». Қайнонасининг гапидан кейин ҳайратланди. «Нега энди менга индамайди? Билар эмиш. Қаттан билади?»

Нонуштадан кейин келин бу гапни Пиримқулга айтди. У ҳам онасининг гапини маъқуллади. «Кўйсангизчи. Ит қаттан билади», деди келин. «Кўрасиз-да... Ўзингизам ҳайрон қоласиз ҳали». Пиримқул шундай дедида, Шаҳриёрни чақириди.

— Шаҳриёр, янгангни Олапарди олдига олиб бор. Келиннинг қошлари чимирилиб кетди.

— Вой, нима девоссиз, қўрқаман.

— Кўрқманг,— деди Шаҳриёр.— Олапар индамайди. У одамни танийди.

У яримта нон олиб келди-да, янгасига тутқизди.

— Манг, шуни берасиз Олапарга.

Олдин Шаҳриёр, орқасидан келин эргашди. Улар яқинлашганда Олапар ётган жойидан туриб, думини ликиллатиб эркалана бошлиди. Унинг ҳайбатини кўриб келин ваҳимага тушди: «Вой, кўрқвомман!»

— Олапар, — деди Шаҳриёр, — мана янгам... Нонни беринг.

Келин нонни синдириб Олапарга отди. Шаҳриёр кулади.

— Отманг, олдига бориб узатаверинг. Индамайди. Ёқмаган одамини кўрса узоқдан вовуллаб ташланаверади. Кўряпсизми, олдига келсангиз ҳам индамай туритти-ку.

Келин Олапарга яқинроқ борди.

— Олапар, Олапар,— деди қўрқа-писа. Бир бурда нонни унга узатди. Олапар унинг қўлидан нонни олиб еди.

— Яна беринг.

Келин ноннинг қолганини берди.

Олапар жонивор нонни еди-ю, индамай тураверди. Худди келинни бир неча йилдан бери биладигандай, унга қараб эркаланди.

Уларни Бердиқул бобо айвонда кузатиб туради. Аввалига у ҳам чўчиди. «Ит-да, билиб бўладими, бирдан ташланиб қолса, келин қўрқиб кетиши мумкин». Йўқ, Бердиқул бобонинг хавотири ортиқча эди. Олапар миқ этмади.

Шаҳриёр билан келин айвонга қайтишди.

— Ҳа, қалай экан,— деди Пиримқул кулиб.— Энди ишондингизми?

Келин ҳам кулимсиради.

— Мани еб қўйса керак, деб ўйловдим.

Келиннинг бу гапи Бўстон холага жуда эриш түюлди.

— Ўзини есин-эй. Ундай деманг-э, болам. Яхши гапгаям, ёмон гапгаям фаришта омин, дейди.

Бўстон холанинг соддалигидан келин билан Пиримқул маза қилиб кулишди.

Уч-тўрт кундан кейин келин қўрқмай Олапарнинг олдига борадиган бўлди. Олапар ҳам келинга ўрганиб қолгандай, уни кўриши билан думини ўйнатиб, эркаланаверади. Келин эса унинг овқатини, сувини қуяди. Қизиқиши билан Олапарга нималарнидир гапиради...

Шаҳриёр янгаси билан қадрдонлашиб қолди. Келин ундан кўп нарсаларни қизиқиб сўрайди. Шаҳриёр ҳаммасини эринмай айтиб беради. У эса Тошкент ҳақида, институтлар ҳақида сўрайди. Янгаси унга Тошкентга ўқишига боринг, деди. Унинг қизиқувчанлиги, муомаласи, ширин-ширин гапириши келинга маъқул тушди...

Августнинг охирларида Пиримқул билан хотини Тошкентта жўнаб кетди. Бундан Шаҳриёр анча маҳ-

зун тортди. Хайрлашаркан, янгаси Шахриёрнинг қўлини қисди-да:

— Тошкентта боринг, Шахриёр, — деди.

Шахриёр хўп оҳангидга бош ирғади...

## Учинчи боб

### ИШТИЁҚ

Шахриёрнинг уйқуси қочиб кетди. Гоҳ у нарсани, гоҳ бу нарсани ўйлайди. Ёз давомида кечган воқеалар кўз ўнгидан ўта бошлади. Самарқанд сафари, қуён қувлаш, Анварнинг оёғига темир кириб кетиши, Тошкент, метро, тўй, янгаси... Ҳаммасини бир-бир ўйлаб чиқди. Анвар эсига тушганда юраги сиқилди. Голиб қаерданам топиб келди шуни. Анвар бечора шунча азоб тортди.

Хаёли мактабга кўчди. Икки-уч кундан кейин ўқиш бошланади. Яна эрталаб барвақт тур, дарс тайёрла, китоб ўқи... Темировнинг ҳар хил ҳангомалари... Синфдошларини ўйлади. Улардан кўпчилигини мактаб ёпилгандан бери кўргани йўқ. Ким қаерга борди экан?

Синфдошлари билан кўришишни ўйлаганда Шахриёрнинг юраги гупиллаб кетди. Ўқишининг дастлабки кунлари ҳаяжонли бўлади. Ҳамма ёз давомида кўргран-эшиттганларини гапириб беради. Мазз... Нилуфар қандай экан? Уям бирон жойга томошага бордимикан? Уларнинг қишлоғига иш билан икки-уч борди, лекин уни учратмади. Бир марта ҳатто уларнинг кўчасидан ўтди, дарвозаси очиқ экан, ичкарига мўралади ҳам. Бироқ ҳеч ким кўринмади.

Хаёли энди Нилуфар атрофидан нари кетмади. Бутун синфдошлари орасидан у алоҳида бўлиб кўрина-верди. Узоқ хаёл сурди. Сўнгра ширин тамшаниб қўйди.

Қачон ухлаганини ўзи ҳам билмайди. Олапарнинг безовта ҳолда вовуллаганидан уйғониб кетди.

У юзини ювиб артинаётганди, сигир соғиб бўлган Бўстон хола молхонадан чиқди. Онасига салом берди.

— Ваалайкум ассалом,— деди Бўстон хола.— Яхши ётиб турдингми, болам. Анвар жўранг кепти-ку, эшитдингми?

— Йўқ. Қачон кепти?

— Кеча тушдан кейин. Боя акасини кўрдим. «Анвар яхшими? Оёғи тузалиб қолдими?» десам, ҳа, тузук, келди, деди. Бир бориб кўриб келгин.

Шахриёр чой-пой ичмаёқ Анварнинг олдига чопди.

У ҳам энди турган экан. Иккови қучоқлашиб кўришиди.

— Тузалиб кетдингми? Темирни олиб ташладими?

— Йўқ,— деди Анвар.— Ҳозир олиб бўлмаскан.

Яра энди тузалаяпти. Яна ўн-ўн беш кун дўхтирга қатнашим керак. Икки-уч кунда дори қўйиб боғлаб турсин, деди.

— Темирди қачон олади? Яна ётасанми касалхонага?

— Ренгин қиласи. Агар жойида турган бўлса олмас экан. Тураверар эмиш, ҳеч қандай зиён қилмас эмиш. Абдумутал ака айтди.

— Абдумутал аканг ким?

— Менга қараган врач-да!— деди Анвар врачга ўзини яқин олиб. — Агар темир суюкка келиб қадалса олиб ташлаш керак экан. Менини суюқдан анча олисда.

Иккови бирга нонушта қилди. Уёқ-буёқдан анча гаплашиб ўтиришиди. Шахриёр Тошкентга бориб келгани, акасининг тўйи ҳақида ҳикоя қилиб берди. Метрони, фаввораларни, Тошкентдаги баланд-баланд иморатларни ҳаяжонланиб сўзлади. Эркин Комилов билан кўришганини, тўйни шу бошқарганини айтганида Анварнинг кўзлари чарақлаб кетди.

— Телевизорда чиқадиган Эркин Комиловми? — деб сўради ҳаяжон ила.

— Ҳа,— деди Шахриёр керилиб.— Ўша. У акам билан ошна экан.

Шахриёрга Анварнинг ҳаваси келди.

— Маза қип кепсан-да!

Анварнинг гапи ўйчан, бирмунча маҳзун чиқди. Шахриёр жўрасининг кўнглини кўтарди.

— Шу топда касал бўп қолганинги қара. Бирга борардинг биз билан.

Ташқарида кимнингдир гапиргани эшитилди. Анварнинг онаси: «Келинглар, болаларим, келинглар. Анвар ичкарида Шахриёр билан гурунглашиб ўтирипти», деди.

Голиб, Акбар, Акмал кириб келди. Анвар уларнинг ҳар бирига алоҳида-алоҳида врач нима деганини гапириб берди. Оёрининг ярасини ечиб кўрсатди.

- Мактабга борасанми? — деб сўради болалар.
- Бораман. Ичим қизиб кетди ўзимниям.
- Шарифнинг қулоғининг ёнига сенинг оёғинг кўшилди,— деди Акбар кулиб. Ҳаммаси кулишди.
- Ишқилиб Темиров билмасин. Билиб қолса гапиравериб одамни безор қиласди.

Анварнинг гапига яна кулишди.

Кечга томон болалар тарқалишди.

Шаҳриёр уйга келувди, онаси унга хат узатди.

- Акангдан хат келди, болам. Ҳозиргина почтачи бериб кетди. Ўқи-чи, эшитайлик...

Шаҳриёр конвертга кўз югуртирида, ичини очиб ўқий бошлади.

Бўстон хола ўғлига анграйиб қаради-да, овозингни чиқариб ўқи, деди. У ҳозир деб, аввал ўзи ўқиб олди. Кейин товушини чиқариб онасига ўқиб берди.

Пиримқул яхши етиб боришганини, эрта-индин ўзи ишни, хотини ўқишини бошлишини ёзипти. Ота-онасининг, укаларининг соғлигини сўрапти. «Ўзинг қалайсан,— дебди Шаҳриёрга. Мактабга тайёргарлик кўраяпсанми? Анвар жўрангни оёғи тузалиб кетдими, ка-салхонадан чиқдими?»

Акасининг хати билан бирга пакетда яна бир кичкинагина қорозча бор эди. Уни янгаси ёзипти Шаҳриёрга. Ҳол-аҳвол сўрапти. Мактабни битириб Тошкентга ўқишига келинг, депти.

Хатни ўқиб Шаҳриёр суюниб кетди. Тезроқ мактабни тамомлаб Тошкентга бориш иштиёқи жўш урди қалбida.

— Мактабга оборадиган нарсаларинг тайёрми, болам?

Онасининг гапи унинг хаёлини бўлди.

— Ҳозир тайёрлайман,— деди у завқ ила.

Тошкентга ўқишига бориш учун яхши ўқиш керак. Фақат беш олиш зарур. Бўлмаса институттга кириш қийин. Ахир у Тошкент бўлса...

Шаҳриёр шу ният билан китоб-дафтарларини тайёрлашга киришди.

Ҳалигина мактаб бошланаёттанидан сал бўлса-да, оғриниб турган Шаҳриёр энди ўқишини орзиқиб кута бошлади. Орадаги икки-уч кун ҳам узоқдай туюлди...

1987 йил.

## **М У Н Д А Р И Ж А**

### **Ҳикоялар**

Чўли ироқ . . . . .	4
Севги сози. . . . .	12
Султон билан Малика . . . . .	22
Тарози. . . . .	30
Момақалдироқ. . . . .	38
Кашфиёт. . . . .	44
Иқрор. . . . .	52
Ука. . . . .	60
Кўнгил . . . . .	70
Тўқайдা . . . . .	77
Ёлизлик . . . . .	88
Ўжар . . . . .	95
Атрофда баҳор . . . . .	106

### **Қиссалар**

Чироқ ўчмаган кеча . . . . .	114
Кўккўл . . . . .	203
Таътил кунлари... . . . . .	277

**М. ҲАЗРАТҚУЛОВ**

**КҮККҮЛ**

*Ҳикоялар, қиссалар*

«Шарқ» нашриёт-матбаа  
акциядорлик компанияси  
Бош таҳририяти  
Тошкент — 2005

Мұҳаррір *Т.Долиев*  
Рассом *Ш.Ҳазратқұлов*  
Бадий мұҳаррір *Б.Бобожонов*  
Техник мұҳаррір *Р.Бобохонова*  
Мусаҳид *Л.Рахматов*

Теришга берилди 25.11.2004. Босишта рухсат этилди 21.12.2004.  
Бичими 84x108<sup>1/32</sup>. Балтика гарнитураси. Офсет босма. Шартлы бос-  
ма табори 18,5. Нашриёт-хисоб табори 18,9. Адади 3000 нусха. Бу-  
юртма № 945. Баҳоси келишилган нархда.

**«Шарқ» нашриёт-матбаа  
акциядорлик компанияси босмахонаси  
700083, Тошкент шаҳри, Буюк Турон, 41.**